


გივი ვაწესაძი



# ვესტნიკი

K 59.642  
2





საქართველოს  
საქართველოს



1997



1470573  
18-00000000



1215



გეორგიული ენციკლოპედია

# შედეგები



Груз. РИ. посвященное  
связи рабочих и транспорта  
и шоссейных дорог  
БИБЛИОТЕКА ГУШОДОРЬА  
ქვე

• ნაკადული •  
თბილისი  
1973

894.631-3

Г 2  
899.962.1-31  
8 406



ქართველმა ხალხმა, სანამ ჩვენს დრომდე მოვიდოდა, გრძელი გზა განვლო, ტანჯვისა და ბედღუკუღმართობის მიძიმე გზა, რამაც ერის სულიერ ცხოვრებას დაღი დაასვა. ფიზიკური არსებობის შენარჩუნების ტრაგიკული შეგნება ზოგს შინაგანად აცარიელებდა, აკინებდა, ხრწნიდა, ზოგს კი, ერის საუკეთესო შვილებს, ზნეობრივად ამალვებდა, სულიერად აკაეებდა და მათი გვირული თავგანწირვა, ანდა ერის კულტურული ფასეულობის შექმნისათვის სულით ხორცამდე დახარჯვა, ქართველ ხალხს ბნელ გზას უნათებდა, იმედითა და სიამაყით ავსებდა. ისტორიული მოთხრობების ამ პატარა კრებულში სწორედ ჩვენი სახელოვანი წინაპრების, ქეთევან დედოფლის, გივი ამილახვარის, შანშე ერისთავის, თამარ დედოფლის და უდროოდ დაღუპული ნიკოლოზ ბარათაშვილის რთული ხასიათი, მსოფლმხედველობა, ტრაგიკული ხვედრი ან ტრაგიკული აღსასრულია ასახული.

249.654

© „ნაკადული“, 1973 წ.

საქმე-2000  
შეამოწმებულია

7.3-3

M-4603  
საქართველოს  
ენის ეროვნული  
ბიბლიოთეკა




# მეამბოხენი

## I

აღმოსავლეთიდან ცხელი, მტკრით შესქელებული ნიავი უბერავდა და სახის კანს აშრობდა. ცხენები დაკარგულ ჩრდილზე დარდით იხუთებოდნენ, ისე ზანტად მოაბიჯებდნენ, თითქოს იცოდნენ, რომ ბედისწერა დროს აჩქარებდა, მუქი თვალების დასათხრელად ემზადებოდა. ეს გზა შეკაზმულებს ადრეც ბევრჯერ გაუვლიათ, მის გარდიგარდმო სიკვდილიც უნახავთ და სიციცხლის ჩასახვაც, მაგრამ ამით მათ ზურგს არც ტვირთი მოჰკლებია და არც იარა. მხოლოდ ეს იყო, რომ ყოველი ახალი მოგზაურობის შემდეგ უკან მომავალი ურმების კრიალი ან აქლემების ეყვანთა ქლარუნი სევდით ივისებოდა, უდაბნოში გაფანტულ ბგერათა უსაზღვრობას იძენდა.

მხედრებს წინ ახოვანი, მზით სახეგარუჯული ვაჟკაცი მოუძლოდა. ღმერთს იგი მბრძანებლად, სხვისი ბედის გამგებლად გაეჩინა. იარაღაყრილი მხლებლებისაგან იერიითაც გამო-

Груз. РМ. писиона. раб. ашкое  
 СВЯТАЯ ПРАВОСЛАВНАЯ ЦЕРКОВЬ  
 И ШКОЛЬНЫХ ДОХОД.  
 БИБЛИОТЕКА ЦУХИДГОРЬ



ირჩეოდა და ნალველში გაზავებული ღიმილის ბუნდოვანებითაც. ფეხდაფეხ მას ორი სპარსელი დიდებული მოჰყვებოდა — ერთი ტანმორჩილი, სახედამკნარი, ისეთივე აქეთებულ და გაუმაძღარი, როგორც ეს საკურისებს სჩვევიათ, მეორე — ახალგაზრდა, ნებიერი, წითელი ჩალმით თავდამშვენებული. უკან მათ თეიმურაზის ბეჭდის მცველი სოლომონი და ყაზახის სულთანი მოჰყვებოდათ, კიდევ უფრო უკან ახალგაზრდა აზნაური მოაბიჯებდა. ყიზილბაშთა შეიარაღებული რაზმი მძიმედ მოიჩრწეოდა, გზაზე ავარდნილ მტვერში ეხვეოდა. დატვირთული აქლემები ზეზეულად თვლემდნენ, სინამდვილეს ზმანებათა ხატოვანებით ამსუბუქებდნენ.

სპარსეთში თვალების დასათხრელად მიმავალ გივი ამილახვარს წვერში თეთრი გარეოდა, მაგრამ არც მოტეხილი ჩანდა და არც იმედგადაწყვეტილი. მისი მახვილი, ათას ჭირვარამს გამოვლილი გონება მოვლენებს ზოგჯერ ისე ალაგებდა, რომ ზღვარი სასაცილოსა და სატირალს შორის იშლებოდა. შეიძლება ამის მიზეზი დრო უფრო იყო, ვიდრე მისი დაუდგარი ხასიათი. როცა წინ იყურებოდა, აწმყოს ვერ ამჩნევდა, სწორედ იმას თელავდა, რისი შენარჩუნებაც სურდა, ხოლო როცა უკან მოიხედა, ადგილზე აღარაფერი დახვდა. დრო სხვა უსაზღვროებას მიეტმანა, სხვაგვარად დათარიღდა და იქით წარუძღვა, საითაც ყველა ბრალდებულს მიუძღვის. დატყვევებულს, სასჯელის წინაშე მარტო დარჩენილს გამოსავალი თვითონ უნდა ეპოვა, როგორმე უნდა დასხლტომოდა ხელიდან ნიჭიერ ვიგინდარას, თორემ ამ გზას უკან ვეღარ გამოჰყვებოდა.

გაბრტყელებული ქვეყანა მზის სხივთა სიმძიმისაგან იდრიკებოდა, მოგონებებს გარეყანს აცლიდა, ჩირივით ატკნობ-



და. მას შემდეგ, რაც ამ გზას დაადგა, მეხსიერების ყველა კარი უნდა დაეხშო, მაგრამ მკმუნვარე მოგონებები დროის თხელ კედლებში ეონავდა და გონების ზედაპირზე ვრცელ მინდვრებს იპყრობდა. თბილისიდან გამოყოლილ, შემოჩენილ აჩრდილებს ჯერ კიდევ შეეძლოთ მისი ცდუნება, გზიდან გადაყვანა, რადგან არეულ, მღვრიე დროში ყველაფერი ბედისწერა და ფათერაკია.

ამილახვარმა უკან მიიხედა. სიცხისაგან ქანცმიხდილი მხლებლები მომჩვარულიყვნენ, სიფხიზლე დაეკარგათ. ირგვლივ ყველაფერი გადაბუგული, გავერანებული ჩანდა. ერთ დროს ამ უნაყოფო ველებზე ბალები ყვაოდა, წარმართული ტაძრები ქათქათებდა, ახლა კი დანაოჭებული სივრცის მეტი არაფერი ირხეოდა. მიწას რომ ხრწნა შესძლებოდა, აქაურობა, ალბათ, მძორის სუნით იქნებოდა აყროლებული. ამ გზით მოდიოდნენ საქართველოში დედაწულიანად აყრილი გადამთიელები, ამ გზით მოვიდა ნადირ-შაჰიც. მალალი, პირხმელი. ჯარს ისე მოუძლოდა წინ, თითქოს თბილისის ალების შემდეგ მისი სამფლობელო ერთი ათად გაიზრდებოდა. მოგორავდა უზარმაზარი, ენაარეული, აღვირახსნილი ბრბო, რომლის ამლაგმავი ძალა საქართველოში არ მოიპოვებოდა. ყიზილბაშები სივრცეს წითლად ღებავდნენ, ნახევრად შიშველი ავღანელები მტვრის სქელი ფენით იმოსებოდნენ, თუთიყუშებივით აქრელებული ქურთები ველურად ყიოდნენ. უკან მათ სვაგებივით მოჰყვებოდნენ ქურდები, ყომარბაზები, მაწანწალები. რის შექმასაც მგლები ვერ მოასწრებდნენ, ისინი შესანსლავდნენ. ბრბო ქშინავდა, ქოთავდა, წამლავდა წყალს, პაერს, სულსა და ხორცს. უზარმაზარი სხეული იმხელა სტომაქს მოათრევდა თან, რომ თბილისს მისი ამოყოფა არ შეეძ-



ლო. ოსმალებისაგან ნარბევი ქალაქი დაიძაბა, ლანძღვა-გინებისა და კივილის აღსაქმელად მოემზადა. წინასწარ არავინ იცოდა, ვის რას წაპვლევდნენ, ვის რისთვის გაიშეტებდნენ სასიკვდილოდ. თბილისი აჩურჩულდა, კრელი მოსახლეობა ეროვნებათა მიხედვით დაჯგუფდა. ერთ ადგილას ქართველებმაც მოიყარეს თავი, მაგრამ ვერ მორიგდნენ და ორ ნაწილად გაიყვნენ. რამდენიმე თავადმა მამულს მიაშურა, ციხეში ჩაიკეტა, თავის დასაცავად მოემზადა, უმრავლესობა კი ნადირ-შაჰს მიეგება და საჩუქრები მიართვა. იმათ შორის, ვინც ნადირ-შაჰს თბილისში შემოსვლა მიულოცა თვითონაც ერია; კი არ ერია, წინ მიუძღოდა უმეფოდ დარჩენილ ქართლელებს და შაჰს ისე ელაპარაკებოდა, როგორც ქვეყნის ერთადერთი გამგებელი. ნადირმა კაცის ცნობა და დაფასება იცოდა, მაგრამ ერთი მდაბიური ზნე სჭირდა: დანათესაეებისა თუ თავის დაზღვევის მიზნით, დამარცხებულს ცოლად ქალიშვილს სთხოვდა და თუ ნებით არ აძლევდნენ, ძალით მიჰყავდა. შაჰის უზნეობა რომ დროზე სცოდნოდა, ნათიას ან იმერეთში გადაიყვანდა, ანდა სასწრაფოდ გაათხოვებდა, მაგრამ ყველა საფრთხეს ვინ დაუხშობს გზას.

ხნიერ სპარსელს საჭურისის კიდეც ერთი თვისება ჰქონდა, ლაყბობა უყვარდა. ზოგჯერ მისი უსიამო ხმა როკაპი დედაკაცის ქოთქოთივით ესმოდა უკნიდან, მაგრამ მას უკვე აღარ აინტერესებდა, რას ამბობდნენ ალაპის მადიდებელი ხანები, რა ხდებოდა გაფითრებული ცის ქვეშ. მიწიერებისადმი ღტოლვა როგორღაც შეუმჩნევლად, თავისთავად დაკარგა და იმ კედლებს მიაწყდა, რომელთა სიმტკიცე სულის მოძრაობას აბრკოლებდა. უმწიკვლო და უდანაშაულო ირგვლივ არავინ ეგულებოდა, მაგრამ მან მაინც ბევრი რამ ითავა, უამრავი

სისხლი დაღვარა და მხოლოდ ამის შემდეგ მიხვდა, რომ ცხოვრების მიხვეულ-მოხვეულ, ბნელ შუკებში გზის ვაკვლევა არც ისე იოლი ყოფილა, როგორც ახალგაზრდობაში ეგონა. თუმცა, როცა მხეცს ძალა ერჩის, ვერც ბნელ შუკებს ხედავს და ვერც ყოფიერების მღვრიე მორევს ამჩნევს. სანამ იზრდოდა, ცხოვრების ავკარგიანობაზე ფიქრის დრო არ ჰქონდა, ზარბაზნების ქუხილით გაბრუებულს ცხოვრება უგუნურთა სათამაშო ასპარეზად, ნათხოვარ საუნჯედ მიაჩნდა, რასაც დღეს თუ ხვალ დაუკითხავად გამოგტაცებენ ხელიდან. ამიტომაც არ ერიდებოდა სისხლისღვრას, ფიცის გატეხას, ავისა და კარგის ერთმანეთში აღრევას. მიწიერებას მოწყვეტილი ფიქრები კი მხოლოდ მას შემდეგ ეწვია, როცა თავი დამარცხებულად სცნო.

მტკრის სქელი ფენა ფარდასავით ირხეოდა, საკუთარ ოხშივარში გახვეული მზე დედამიწას სულის მოთქმის საშუალებას არ აძლევდა, აქლემების ეყვანთა ქღარუნი სივრცეს აათეკებდა. ამილახვარმა თვალი მოიჩრდილა და უწყლო ველებს დაედევნა, მაგრამ გონებაში მოფუსფუსე აჩრდილებს მაინც ვერ დაუსხლტა ხელიდან. გამარჯვებულნი სამი დღელამე ძარცვავდნენ ქალაქს. თბილისი აყროლდა, წაიბილწა. მტკვარმა იმდენი სისხლი და ხორცი შეიწოვა ერთბაშად, რომ ველარ მოინელა და მეტეხს ქვემოთ გვამები მორებივით გამოირიყა. გაძარცვული ქალაქი იკრუნჩხებოდა, დაცარიელებული ქუჩები წელს ძლივს მიათრევდნენ აღმართში. სამი დღის შემდეგ ყიზილბაშები დარწმუნდნენ, რომ თბილისში ხელს ველარ მოითბობდნენ და ქართლის ხეობებს შეესივნენ. ციხეში ირანელი მეციხოვნენი ჩადგნენ. სანამ ნადირ-შაჰი უკან გაბრუნდებოდა, კაცი გამოუგზავნა და ქალიშვილი სთხოვა ცოლად.

მან უარი შეუთვალა. უარის თქმისათვის იგი შეიპყრეს და შაჰს მიჰგვარეს. წინააღმდეგობის გაწევას აზრი არ ჰქონდა. შაჰს უკვე გაეგზავნა მარბიელი რაზმი ქალისაკენ.

ნათია დანიშნული იყო. თეიმურაზი ხშირად ჩამოდიოდა ქალაში და შეყვარებულები მთელ დღეს ერთად ატარებდნენ. იმ დღესაც ერთად ყოფილან, ბაღში მსხდარან, ნარდი უთამაშობდნენ. ბავშვებს თამაში უფრო იტაცებდა, ვიდრე საუბარი. ნათია ცამეტი წლისა იყო, თეიმურაზი თხუთმეტის. რა შეეძლო თხუთმეტი წლის ყმაწვილს, რით დაეცვა ან სატრფო ან საკუთარი თავი. ქართველებს საქართველოში იარაღის ტარების უფლებაც კი არ ჰქონდათ. ყიზილბაშებმა თეიმურაზი განზე მიაგდეს, ნათია ცხენზე აიტაცეს და ისე გაეცალნენ იქაურობას, როგორც ეს ავაზაკებს სჩვევიათ. ნათელი დღე შეტორტმანდა, თვალის დახამხამებაში დანახშირდა. აღარ არსებობდა ხეთა სიმწვანე, ცის სილურჯე, ყვავილთა სურნელება. ყველაფერი შავმა ფერმა და სასოწარკვეთილებამ შთანთქა. მოხდა ის, რასაც წარმოდგენა ვერ ეგუება, რის წინაშე სიკვდილიც კი ანგელოზივით მწყაზარია.

ამილახვარმა ერთი წამით ცხენი შეაჩერა და ჰრელი ხელსახოცით ისე მოიწმინდა ოფლი, თითქოს კეფასთან ღრმა, დაჩირქებული კრილობა ეგულებოდა.

თეიმურაზის<sup>1</sup> ბერად შედგომა მოგვიანებით გაიგო, კირილე ეპისკოპოსმა უამბო ყიზილბაშებითა და ქართველებით გა-

<sup>1</sup> თეიმურაზ ბაგრატიონი — ძე მეფე იასესი, ვახტანგ მეექვსის ძმისწული, შემდგომ ცნობილი საეკლესიო მოღვაწე, კათოლიკოს ანტონი პირველად წოდებული.

<sup>2</sup> თეიმურაზ მეფე — ჯერ კახეთის, შემდეგ კი ქართლის მეფე, ირაკლი მეორის მამა.

რემოცულ ციხეში. იმ დღეს თეიმურაზ<sup>2</sup> მეფემ შემოუთვალა, ციხე ჩამაბარე და ყველაფერს გაპატიებო, მაგრამ მაშინ თეიმურაზი შაჰის ყურმოჭრილ მონად მიაჩნდა და ისევ ვერ დადობდა, როგორც სეფიანთა ტახტის მიმტაცებელს.

მხარმარცხნივ, ცის დასალიერთან ჯერ დაკლაკნილი ზოლი გამოჩნდა, შემდეგ კი ტყით შემოსილი მთების ჩრდილი. გამშრალმა თვალემა ცოტაოდენი შვება იგრძნეს. გზა მარჯვნივ, სამხრეთისაკენ უხვევდა, მაგრამ მთების დანახვამ მაინც შეარბილა სულში გაჩენილი უდაბნოს სიმხურვალე. არ ეგონა ასე მალე თუ მოენატრებოდა წყაროს წყალი, ზურმუხტოვანი მინდვრები, გზის პირას ჩამოხტომა და ხის ქვეშ სუფრის გაშლა. თუმცა გზის პირას ცოტა ხე იდგა ისეთი, რომლის ტოტებზე ან ყიზილბაშებსა და ოსმალებს არ ჩამოეხრჩოთ ქართველები, ანდა ქართველ თავადს მოქიშპე თავადის ყმები. კაცის კვლა, მოტაცება, დასახიჩრება ისეთივე ჩვეულებრივი ამბავი იყო უპატრონოდ დარჩენილ ქვეყანაში, როგორც ტურების კვილი. ოსმალები და სპარსელები მხოლოდ მაშინ კარგავდნენ მოსვენებას, როცა საქართველოდან ტყვეთა გაყვანა ფერხდებოდა. ხეობებში ჩამოწოლილ ნისლს ყოველდღე ფლეთდა შემზარავი კვილი, თოფის სროლა, მოთქმა-გოდება. ქამთა სიავე უამრავ მსხვერპლს მოითხოვდა, მაგრამ არავითარ შეღავათს არ იძლეოდა. საქართველო სამყაროსაგან მოწყვეტილ, მოძულეებულ ქვეყანას ჰგავდა, რომელსაც დაუსჯელად ჯიჯგნიდნენ.

ნათია ისე მიიყვანეს პარემში, რომ მისთვის არც კი უჩვენებიათ. იქნებ არც იყო საჭირო. რა უნდა ეთქვა, რით ენუგეშებინა სასოწარკვეთილი, სხვის საკუთრებად ქცეული გოგონა, რომელსაც ამქვეყნის არაფერი გაეგებოდა. იმ იარაღით,

რაც წელზე ეკიდა, ვერაფერს გახდებოდა, მის მოჭრილ თავს წინ დაუგდებდნენ ნადირ-შაჰს. ნათია დრომ დაითრია, სულიან-ხორციანად შთანთქა, მაგრამ მის მეხსიერებაში ჩაწველილი სოლი ვერაფერმა მოარყია. ზოგჯერ ისე აწვეებოდა ტვინს, რომ ირგვლივ ყველაფერი წითლად იძარღვებოდა. შეიძლება სწორედ ეს სოლი იყო მისი დაუღევრობის, მერყეობის, ვაკეცობისა და ავკაცობის მიზეზი, შეიძლება სწორედ იმ დღეს მიხვდა პირველად, რომ სჯობია ბრძოლა წააგო, ვიდრე უმწყობას ამოეთარო.

არაგვის ერისთავი ურთუროთი თბილისში სპარსელების გულის მოსაგებად ჩამოვიდა და მის სახლში ყოველდღე ლხინი იმართებოდა. იმ საღამოს ქართველ თავადებთან ერთად სპარსელი დიდებულებიც ჰყავდა დაპატიყებული. სპარსელები ერთმანეთის თანდასწრებით ღვინის სმას ერიდებოდნენ, ჩუმად წრუპავდნენ, ქართველები კი ჯიხვის ყანწებს ცლიდნენ და ისე ხმაშეწყობილად მღეროდნენ, თითქოს ამ ქვეყნის არაფერი ეკითხებოდათ. გუბდებოდა არსებობის ქაფმორეული დინება, ინიღბებოდა ავი ზრახვები, მდიდრდებოდა დროის უფსკრულზე გადებული სუფრა. ერთ დარბაზში თავმოყრილი მტრები უკეთ ექცეოდნენ ერთმანეთს, ვიდრე დაცალკევებულნი. სპარსელები თავაზიანად ილიმებოდნენ, ჩხუბსა და აყალმაყალს ერიდებოდნენ. მათთან შედარებით ქართველები მხარგრძელნი, შეუმუსრაენი ჩანდნენ. აქ რომ ჩხუბი ამტყდარიყო, ყიზილბაშთა მოგრობ თავები მწიფე მსხალივით დაცვივდებოდა. პირველი ორი ყანწი სულის მოსათქმელად, წყურვილის მოსაკლავად დალია, შემდეგ კი გამომწვევად გადახედა მუხრანბატონებს, ერისთავებს, ორბელიანებს, ბარათაშვილებს და ციციშვილებს. ღვინო ისე სიამოვნებდა, როგორც ოლიმპიელ

ღმერთებს ნექტარი. სვამდა ხარბად, თავდაუზოგავად. წუთი-სოფლის ღვინოში ჩასახრჩობად. სწორედ იმ ღამეს დაუფარდა ხმა, გივი ამილახვარს ღვინო არ ათრობსო. და მართლაც არ ათრობდა. გათენებამდე ფეხი არ მოუცვლია, წვეთი არ დაუქლია, მაგრამ გონებაში არაფერი გაბუნდოვანებულა. მხრჩოლავი ჭაღები ბნელს ებრძოდნენ, შეზარხოშებული სახეები შეუგუებელს ეგუებოდნენ, სულში დადლილობა და გულგრილობა იკიდებდა ფეხს. თამადა მტკიცე ხმით, დამაჯერებლად ლაპარაკობდა, მალაღფარდოვან სიტყვებს უცვეთი ქეშმარიტებებით ადუღებებდა, მაგრამ სინამდვილეს მაინც ვერსად გაურბოდა. შეიძლება ამის მიზეზი მოაჯირზე გადაყუდებული აჩრდილი აყო, რომელიც ახალი უბედურების მოსანელებლად ძველის ამონთხევას ცდილობდა.

როგორც კი თამადამ სიტყვა დაასრულა, „მრავალყამიერმა“ იქუხა. ქართველები ზოგჯერ მოვარდნილ ჭირს სიმღერით, სილაღითა და სილამაზით იგერიებდნენ, მაგრამ ბოლო დროს არა მარტო სილამაზემ დაკარგა ფასი, არამედ ღმერთმაც დაკაცმაც, კაცზე უფრო ღმერთმა, რადგან არაფერი შეისმინა, ცალი თვალითაც კი არ გადმოხედა გაჩანაგებულ ქვეყანას. რად უნდოდათ ქართველებს ღმერთი, თუ საქართველო არ იქნებოდა.

განთიადისას სტუმრები წამოიშალნენ, დღის სინათლეს მიამურეს, მაგრამ თვითონ ადგილიდან არ დაძრულა. ქუჩაში გასვლას და თვალების ჭუტვას ისევ ნახევარბნელში ჯდომა და ღვინის სმა ერჩია. ღვინო უკეთ ავსებდა დროს, ვიდრე თვალი და ყური. თითები მუხის სქელ ფიცარს ეფერებოდნენ, ძველისძველი კერპი საცოდავად იღმიჭებოდა, თავაშვებული ქვეყანა ისე ეგებებოდა ახალშობილ დღეს, თითქოს სისხლი ჩა-

მოირეცხა, ნათელში განიბანა. ახალი დღის დაბადება რაღაცას ამოკლებდა, იქნებ აწონასწორებდა კიდევ, მაგრამ ამ დარბაზში იგი სამუდამოდ ვერ დარჩებოდა. ხვალ, ზევან ერთი კვირის შემდეგ ცხოვრება თავისას მოსთხოვდა და მთელი ტანით უნდა წამომართულიყო, პირისპირ შეპკებებოდა იმას, რაც აირღაირია, გაუხეშდა, სიხარულისაგან დაიცალა.

შინაყმები სუფრის ალაგებას შეუდგნენ. დამძიმებული სხეული ჯერ შეანჯღრია და მხოლოდ ამის შემდეგ წამოსწია სკამიდან. გვერდითი ოთახი ცარიელი აღმოჩნდა. კუთხეში სპარსული ტახტი იდგა. ტახტზე წამოწოლილს ძილი უფრო ჩქარა მოერია, ვიდრე წუხელის ღვინო. სიზმრები წყალში ჩაყრილ სოკოსავით დალბა, თავისივე ლორწოში გაითქვიფა. მეხსიერებას მხოლოდ უნდობლობით დავიწროებული თვალემა, შუღლით დამძიმებული სახეები და შელახული ფარდის რხევა შემორჩა. ერთხელ რაღაც მოელანდა, გვერდზე გაცოცება, გაუჩინარება სცადა, მაგრამ უხილავი დილეგის ბნელ კედლებს თავი ვერ დააღწია. პირი უშრებოდა. გულ-ღვიძლი ეწვოდა, ოფლში გაღვრილს ისეთი გრძნობა ჰქონდა, თითქოს თონეში ეძინა.

გალეიქებულს სუფრა გაშლილი დახვდა. ფანჯრიდან მზით გათანგული ქალაქი მოჩანდა. დღის სინათლე არ სიამოვნებდა, მისი არც სიცხადე სწამდა და არც სიხალისე. სანამ დარბაზში შევიდოდა, თვალემა მოიფშვნიტა და დაუბანელ პირზე ხელი ჩამოისვა. ლხინი ის-ის იყო იწყებოდა. არაგვის ერისთავმა მკლავის სიმსხო ყანწი შემოაგება. შიგნეულობა დაცხრა, დარბილდა. ღვინო ელავდა, ისეთი რაკრაკით გადადიოდა ყელში, თითქოს მის მიერვე დანთებული ცეცხლის ჩაქრობა სურდა. ქვეყანა შეიმოსა, ამჩატდა, უტიფრად აღიღინდა. რომ არ აპ-

ყოლოდა, ბრაზისაგან გაიგუდებოდა. ყანწს ყანწი მოჰყვა, ღამის თევას — ღამის თევა, თავდავიწყებას — თავდავიწყება და ასე გაგრძელდა მანამდე, სანამ ხმა არ გავრცელდა, ქსნის ერისთავი შანშე აჯანყდაო.

ცხენის წაფორხილებამ მეხსიერების ღია კარი დაახშო, თვალმა ქვეების სიმბურვალე აირეკლა. გათლილი, ჩალისფერი ქვეები ისე ეყარა გზის პირას, თითქო აქვე, ამ ველზე აღმოცნდნენ. უსახური ქვეყანა იწელებოდა, იმმუშნებოდა, ღუნედ იკლაკნებოდა ისიც, რასაც შაში და უგუნურობა ჰქვია. რისთვის მიჰყავდათ სპარსეთში, ნუთუ საქართველოში ჯალათი არ მოიპოვებოდა? მის დაბმას, ორი რგოლის გახურებას და თვალების ამოწვას უბრალო ჯარისკაცებიც კი მოახერხებდნენ. ტკივილი ტვინს დაფლეთდა, ქვეყანა დანაკვერჩხალდებოდა და რა მაგრადაც არ უნდა მდგარიყო ფეხზე, მაინც ხელით სატარებელი იქნებოდა. ცოტა ხნის შემდეგ სახე დაუსივდებოდა, ხმა და ხასიათი შეეცვლებოდა, მაგრამ გარდუვალობით შეკრული წრე ბედმა კიდევ ერთხელ გადაშალა და უფრო დიდი წრის მოხაზვას შეუდგა. სწორედ ამ წრის მრუდე ხაზს მიჰყვებოდა ახლა იგი სპარსეთისაკენ და შაჰისათვის ძღვნად საკუთარი თვალები მიჰქონდა.

ამილახვარმა უსიამო ფიქრები თავიდან მოიშორა, ხელი მოინაცვლა და უკან მიიხედა. ჯერ არც ქვეყანა ჩანდა შეცვლილი და არც ისინი, ვისთვისაც გზათა უაზრობა არ არსებობდა. მათ კარგად იცოდნენ, სად მიდიოდნენ, რა შემთხვევაში როგორ უნდა მოქცეულიყვნენ და ამიტომ არ ჩქარობდნენ.



მოაბიჯებდნენ ისე, თითქოს ყოველი ზედმეტი მძაბრობა მზეს გააღიზიანებდა, გაახელებდა. ამ ერთფეროვან, გაშიშვლებულ წუთისოფელში აწმყო არ არსებობდა. კაცს ან იმით უნდა ეცხოვრა, რასაც ელოდა, ანდა იმით, რაც მეხსიერებთან შემოტრიალდა.

ნადირ-შაჰს ქალაქში გაჩერება არ უყვარდა, ველზე დგომა ერჩია, ასე უფრო მშვიდად გრძნობდა თავს. კრწანისის მიდამოები ნეხვის, ოფლისა და შემწვარი ხორცის სუნით იყო აქოთებული. ტყედ გაშლილი კარვები ისე მძიმედ აწვებოდნენ ქვეყანას, თითქოს ფესვის გადგმას, მიწასთან შეზრდას ცდილობდნენ. რა ბეცი თვალიც არ უნდა ჰქონოდა კაცს, როგორც არ უნდა გაემართლებინა ყოფიერების უთავბოლოება და კაცთა მოდგმის უგუნურობა, მომხდურთა დანიშნულება მაინც მკვლელობა, ძარცვა და ნგრევა იყო. სანამ ამ ჭრელი ქალაქის მკვიდრნი ხორცს წვავდნენ, ნადავლით ვაჭრობდნენ, დატყვევებულ ქალებს აუპატიურებდნენ, არც წინ იყურებოდნენ და არც უკან, მაგრამ, როგორც კი ბუკის ველური ბგერები სივრცეს გააპობდა, იარაღს აისხამდნენ, ცხენებზე ამხედრდებოდნენ და რაც უფრო მეტ სისხლს დაღვრიდნენ, მით უფრო ცოტა მოეჩვენებოდათ. ღმერთო დიდებულო! იქნებ ამ ქვეყნის შექმნა შეცდომა იყო, — წამოსცდა უნებურად და სანამ მეგზურს წამოეწეოდა, პირჯვარი გადაისახა.

ნადირ-შაჰის კარავი ისე გამოირჩეოდა სხვა კარვებისაგან, როგორც მარგალიტი ზღვის კენკებისაგან. კარვის წინ ხმაალ-შემართული თურქმენები იდგნენ. ჯარში და შაჰის კარზე ჯერ კიდევ ბატონობდა თურქული ენა, თურქული ზნე-ჩვეულებები, რაც მკვიდრ სპარსელებს ეკალივით ესობოდათ გულში. რამდენჯერ შესწრებია ყიზილბაშების, თურქმენებისა და ავღანელების ჩხუბს შირაზელებთან, ხორასნელებთან და მაზან-

დარელებთან, რამდენი მუცელი უნახავს ხანჯლით გამოფარ-  
რული, რამდენი თავი ძირში მოჭრილი. ნადირ-შაჰის მტკიცე  
ხელი რომ არა, ეს ძლიერი ჯარი ერთ დღეში დაიშლებოდა;  
რაზმებად დაიყოფოდა და სისხლად დაიდვრებოდა.

მეგზურმა თურქმენებს რაღაც უთხრა და შაჰის პირადმა  
მცველებმა გზა დაუთმეს. კარვის კალთა ისე გადასწია, თითქოს  
არც ღვინო ჰქონდა ყანწებით ნასვამი და არც სოლი ტვინში  
ჩაქედილი. ნადარი ფეხმორთხმით იჯდა ქერმანული ხალიჩის  
თავში. მისი ვაყკაცური, უნარიანი პირისახე არაფერს იკარებ-  
და ისეთს, რაც საჭიროდ არ მიაჩნდა. ამ უსწავლელმა, სილა-  
რიბეში გაზრდილმა კაცმა სპარსეთი მკვდრეთით აღადგინა —  
ჯერ ავღანელები გარეკა ერანიდან, შემდეგ კი ოსმალები და-  
ამარცხა და დაქარგული სამფლობელოები დაიბრუნა. მიუხე-  
დავად ამისა, სიფრთხილე და შორსმჭვრეტელობა მაინც არ  
დაუკარგავს. ალლოგამახვილებულმა კარგად იცოდა, რომ ქა-  
ოსი და არეულობა ფეხდაფეხ დაჰყვებოდა ყველგან და რო-  
გორც კი წაიფორჩილებდა, მაშინვე გასრესდა.

ნადირ-შაჰის მხარმარჯვნივ იმამ-ყული-ხანი, მირზა-ხანი და  
შირვანის ბეგლართბეგი ისხდნენ, მხარმარცხნივ სათნო, თეთრ-  
წვერა შეიხი, ყულარ-აღასი და მდივანბეგი. მუსლიმანთა ნაქე-  
ბი თავაზიანობა, გაჭიანურებული სალამი და ფეხმორთხმით  
ჯდომა არავითარ სიამოვნებას არ ანიჭებდა, მაგრამ იგი დაჰყ-  
რობილი ქვეყნის წარმომადგენელი იყო და თუ საჭირო გახ-  
დებოდა, აუტანელიც უნდა აეტანა. თათბირი დიდხანს არ გაგ-  
რძელებულა. ნადირ-შაჰს ეჩქარებოდა, ძილშიც კი ინდოეთი  
ელანდებოდა და ამიტომ დროის დაქარგვა დიდ ცოდვად მი-  
აჩნდა. ნიჰმა, რაღაცის გარდაქმნის, გადახალისების სურვილმა  
იგი სპარსეთის შემოქავე ბორკილებისაგან გაათავისუფლა,

2. გ. მალულარია

Гос. Ф. И. Милова в Библ. Иос.

17

საქართველოს  
ისტორიის  
მუზეუმი  
საქართველოს  
ისტორიის  
მუზეუმი

მკაცრი და შეუპოვარი გახადა, ხოლო რამდენიმე დღემ<sup>ს</sup> გამარჯვებამ საბოლოოდ დაარწმუნა, რომ ყველა წინააღმდეგობის აღმოფხვრას მხოლოდ მაშინ შეძლებდა, თუ მსოფლიოს დაპყრობას მოახერხებდა. მის გონებაში უკვე ბოგინობდა ამგვარი გეგმები, მაგრამ მსოფლიოზე მას ცოტა ბუნდოვანი წარმოდგენა ჰქონდა.

ნადირ-შაჰს არც ლაპარაკი უქირდა და არც აზრის მოკლედ, მკაფიოდ გამოხატვა. თბილისის გამგებლობა და ერნელთა ჯარის სარდლობა იმამ-ყული-ხანს დაევა, მას კი წინადადება მისცა, ქართველები შეეყარა და იმამ-ყული-ხანთან ერთად ქსნის ერისთავის წინააღმდეგ გაელაშქრა. ნაჭეიფარსა და უხერხულად ფეხმოტხმულს უარის თქმა არ გასჭირვებია. მან ჯერ კიდევ არ იცოდა, ყიზილბაშების უკან გაბრუნების შემდეგ რა მდგომარეობა შეიქმნებოდა საქართველოში, კიდევ რამდენ ხანს აცოცხლებდნენ ტახტის მიმტაცებელს სპარსელები. შანშე ერისთავი ადვილად ხელწამოსაკრავი, დამთმობი კაცი არ იყო, გაბოროტებულმა სასტიკი შურისძიება იცოდა. შეიძლება მოგვიანებით მას მაინც წაეგო თავი, მაგრამ ახლა არც ნადირ-შაჰის ყმობა უნდოდა და არც შანშე ერისთავის გადაკიდება. დრო ჯერ ითმენდა, ითმენდა მანამდე, სანამ ყველა უკან დასახევ გზას არ მოუჭირდნენ.

ამილახვარმა ცხენი შეაჩერა და ახალგაზრდა აზნაურს გასცხა, წყალი მომართვიო. მისი ძლიერი, ბრძანებას მიჩვეული ხმა ისე შთანთქა ცხელმა ჰაერმა, რომ არც კი შერხეულა. საკინძეგახსნილმა ყმაწვილმა წყალნარევი ღვინო მოურბენინა.

ტიკტორის სირბილე და მოქნილობა ესიამოვნა, მზის სხივების მოუდრეკელობა გადაავიწყა. ვარდისფერი სითხე ხალისიანად იღვრებოდა, პირსა და ყელს წებოდქეული ნერწყვისაგან რეცხდა, ლბებოდა, გრილდებოდა გახურებული პირისაზე და უეცრად ისეთი გრძნობა შეექმნა, თითქოს არა მარტო მისიანები თანუგრძნობდნენ, არამედ გათელილი, გაუხარებელი ბუნებაც. ამ მტერიან გზაზე არც ჯაჭვით დაბმა ელოდა და არც თვალების დათხრა. საფრთხე ბორცვებს მიღმა, ცის დასალიერთან იმალებოდა.

როგორც კი ცხენი ადგილიდან დაძრა, აწმყო გაქრა და რადგან მომავალი კარგს არაფერს უქადდა, ისევ წარსულს წაეპოტინა. შანშე ერისთავი მამაცი, შეუპოვარი ვაჟკაცი იყო. მათი მამულები ერთმანეთს ესაზღვრებოდა, რამდენჯერმე ამის გამო დავაც კი მოსვლიათ და ამიტომ მის მძიმე ხასიათს სხვებზე უკეთ იცნობდა. ჟამთა სიავემ ერისთავი გააჯიუტა, ექვიანი და დაუნდობელი გახადა. გულჩათხრობილს ყველგან ღალატი ელანდებოდა, საერისთავოს მიღმა მდებარე ქვეყანა მახედ მიაჩნდა. როცა მსჯელობდა, წინდახედული, გონიერი კაცის შთაბეჭდილებას ტოვებდა, მაგრამ განრისხებულმა არავის დანდობა არ იცოდა, უგუნურობამდე სასტიკი იყო. ერთ შინაყმას ენა მხოლოდ იმიტომ ამოჰგლიჯა, რომ სწორი ამბავი ვერ მიუტანა. ასევე დაუნდობელი იყო მტრის მიმართაც. ყიზილბაშთა მცირე რაზმებს სადაც კი წააწყდებოდა, მუსრს ავლებდა. მთელ საქართველოს რომ ასე ებრძოლა, ყიზილბაშები, ოსმალები და ლეკები ძარცვის ხასიათზე ვერ იქნებოდნენ, მაგრამ ამგვარ ბრძოლას ყველაზე ადრე, ალბათ, თვით შანშე ერისთავი გამოეთიშებოდა.

ამილახვარმა სადავე ისე მოქაჩა, რომ ფიქრი არ შეუწყვე-

ტია. ქსნის ერისთავი დაუღალავი, ქვეყნისათვის გამოსადეგო  
კაცი იყო, მაგრამ საქართველოში ისეთი ვითარება შეიქმნა,  
რომ თავადები ყველაფერს ერთმანეთის საწინააღმდეგოდ,  
ერთმანეთის ჯიბრზე აკეთებდნენ. აჯანყების დაწყებამდე შან-  
შეს არც კი უცდია ვინმე მიემხრო, ზურგი ან ფრთა გაემაგრე-  
ბინა. თუმცა ვინ უნდა მიემხრო, რუსები და ოსმალები შორს  
იყვნენ, ქართველ თავადებს კი არ ენდობოდა. მუდამ იმას  
ფიქრობდა, ჩემს მამულზე უქირავთ თვალიო. საერისთავო  
იყო მისი კარ-მიდამოც, სამეფოც და სამშობლოც. ოსმალები  
სპარსელებს იმიტომ ერჩია, რომ ქართლში მათ მეფობა მო-  
შალეს, ქვეყანა ხეობებად დაყვეს და ადგილობრივ თავადებს  
ჩააბარეს. ურჩობა და ღალატი შანშე ერისთავს შინ სძულდა,  
თორემ გარეთ ისეთივე ჩვეულებრივ ამბად მიიჩნდა, როგორც  
ყმების დასჯა. ქსოვრისთან ომში ვახტანგ მეფეს სწორედ იმ  
დროს უღალატა, როცა ბრძოლის ბედი წყდებოდა.

იგი ჯერ კიდევ საქართველოში იყო, როცა იმამ-ყული-ხანი  
ქსნის ხეობისაკენ დაიძრა. ქართლი იმ დროს სულთმობრძავ,  
გადაგვარების გზაზე დამდგარ ქვეყანას ჰგავდა, სადაც ჰაერი  
ბოდვისა და სიკვდილის სუნით იყო გაქვნილი. გამონაკ-  
ლისს არც ქსნის ხეობა წარმოადგენდა. ერთმანეთს ებმოდნენ  
დაცარიელებული ნასტავისი, ნასპარსალი, ქადაგიანი, ციხის-  
ძირი და ქანდა. ერთმანეთს შეჰყურებდნენ კედელმორღვეული  
ქსნის ციხე და გუმბათჩამოქცეული წითელი საყდარი, რომ-  
ლის შიდა კედლებს ჯერ კიდევ ამშვენებდნენ ანგელოზები და  
წმინდანებად შერაცხული მღვდელმთავრები. ქსნის ციხეს რომ  
პატრონი ჰყოლოდა, მისი აღება ზარბაზნებით შეიარაღებულ  
სტერსაც კი გაუჭირდებოდა. ამ ციხის გამო წაეკიდნენ ერთ-  
მანეთს ბაგრატი მუხრანბატონი და კახეთის მეფე ავ-გიორგი.

რომელმაც ბაგრატს გესლიანი სიტყვები შემოუთვალა და ციხიდან ღვინო გამოუგზავნა; ბაგრატმა გესლს გესლი დაამატა და ციხეში ორაგულები შეუგზავნა. ის, რაც ადრე ქართველებს დიდ უბედურებად მიაჩნდათ, ათასჯერ განმეორების შემდეგ მასხრობად იქცა. დრო მათთვის სიკვდილის წყარო უფრო იყო, ვიდრე სიცოცხლისა და ამიტომ მაინცდამაინც დიდ ანგარიშს არ უწევდნენ.

ქართლის სილატავე და სიცარიელე სპარსელებსაც აკვირვებდა, მაგრამ საკბილოს მაინც ეძებდნენ. ხალხი იხიზნებოდა, კოშკებსა და გამოქვაბულებში იმალებოდა. გაჭირვებამ მათ ბევრი რამ დააფიწყა ისეთი, რისთვისაც ადრე თავს გასწირავდნენ. მუხრანი დაცარიელებული დახვდათ, ცარიელი აღმოჩნდა ლამისყანაც, რომელსაც მუხრანბატონები, ორბელიანები და ერისთავები ერთმანეთს ედავებოდნენ. სპარსელებს ქსოვრისის, ოძისისა და ხოფის აღება არ გასჭირვებიათ, მთელი გზა ისე განვლეს, რომ წვეთი სისხლი არ დაუღვრიათ. მიუხედავად ამისა, მაინც იღრინებოდნენ, იგინებოდნენ. მათი საკბილო ლეკებს დაეტაცათ, კავკასიონს იქით გადაეზიდათ. პირველი სიმაგრე, რომლის აღებაც ბრძოლით მოუხდათ, ახალგორის ციხე იყო. სანამ ძალა შესწევდა, შანშე ერისთავი თავს იცავდა, ახალგორის დათმობის შემდეგ წირქვალის ციხეში გამაგრდა, მაგრამ სპარსელები იქაც მისწვდნენ და რადგან მათთან გამკლავების ძალა არ შესწევდა, საერისთავო უმცროს ძმას, იესეს ჩააბარა, თვითონ კი რუსეთში გადავიდა დახმარების სათხოვნელად.

რა იყო საზეიმო, მაგრამ სპარსელებმა მაინც დიდი ღვინო გადაიხადეს და ნადირ-შაჰთან კაცი აფრინეს, შანშე ერისთავი საქართველოდან განვდევნეთო. იმამ-ყული-ხანმა მცირეოდენი

ნადავლი და ტყვეები თბილისში გაგზავნა. ამ გამარჯვების შემდეგ მის ჯმუხ სახეს კიდევ ერთი ნაოჭი შეემატა. სპარსელების მომხრე ქართველი თავადები გამხნევდნენ. მანუჩიდან არაგვის ერისთავი ურთურთი ქსნის ხეობაში გადავიდა და სპარსელი დიდებულები საერისთავოში მიიპატიჟა. ქართლი გაინაბა, ისევ იმ ფარდას ამოედარა, რომლის უკანაც ძალას იკრებდა. ერთხანს მხოლოდ შანშე ერისთავის ძმა, იესე განაგრძობდა ურჩობას, მაგრამ რკალი მის ირგვლივაც სწრაფად იკვრებოდა.

ამილახვარმა მხერა შიშველ ბორცვებს მიაპყრო. ის, რაც გარეთ ბრტყელი და მშვიდი ჩანდა, აღქმის შემდეგ სახეს იცვლიდა, იმღვრეოდა, შეუთვისებელს ითვისებდა. გაუგებრობა, თვალთმაქცობა და სიცრუე სხვადასხვა წყაროდან მოედინებოდა, სხვადასხვა მიზეზს ეფარებოდა და ახსნას, გამართლებას თხოულობდა. გამართლებით თითქმის ყველაფრის გამართლება შეიძლებოდა, მაგრამ მისი სიმართლეს ისეთივე ცალმხრივი და მანკიერი იყო, როგორც უკან დარჩენილი აჩრდილებისა. მოვლენები სხვა შინაარსს იძენდნენ და ვერაგულად კარგავდნენ იმ თვისებებს, რაც დიდი ხნის წინათ შეიძინეს. საჭირო იყო გარდაქმნა, გადასხვაფერება, მაგრამ სად ეპოვნა სწორი გზა იქ, სადაც ყველა გზა ათასჯერ ნაცადი და უარყოფილი იყო, სად აღმოეჩინა ისეთი ვაჟკაცი, რომელსაც ერთხელ მაინც არ ეღალატა მოყვრისათვის, როგორ მოერიგებინა სიკვდილი, განუკითხაობა, გაუტანლობა, როგორ აღმოეფხვრა შეგნებიდან ის აზრი, რომ უკიდურესი დაძაბულობაც კი თითქმის არავითარ შედეგს არ იძლეოდა, ერთი გამარჯვება ათ კიდევ უფრო დიდ გამარჯვებას თხოულობდა.

ბორცვებს მიღმა ჯერ ორმოებად ქცეული ნაქალაქარი გა-

მოჩნდა, შემდეგ კი წარმართული ტაძრის ნანგრევები, რომელსაც ირგვლივ დაბალი ბუჩქები, გამხმარი ბარდი და ხავსი შემოხვეოდა. ამქვეყნად ბევრი რამ უნახავს აღდგენილი, შეკეთებული, შენიღბული, მაგრამ გუმბათჩამოქცეული, კედლებჩამორეცხილი ტაძრის აღდგენა აღარავის შეეძლო. ეს იყო დროის მოუშუშებელი კრილობა, კბილებდაკრეპილი გვამი, რომლის ხანდაზმულობა აუღაბურებდა, აკნინებდა ისედაც დაკნინებულ ბუნებას. ერთ დროს, ალბათ, ამ ქალაქშიც ცხოვრობდნენ, სამყაროს სიდიადით შემკრთალი, პირქეში ადამიანები, რომლებიც ღმერთის სახელით ტაძრებს აგებდნენ, ურწმუნოებს ცეცხლზე წვავდნენ, ურჩებს თავს კრიდნენ და თუ მათ მიერ დადგენილ საზღვრებში რამე არ ეტეოდა, გრძელს ამოკლებდნენ და მოკლეს კიმავენენ.



როცა სეფე-ხანი მთელი თავისი ჯარით ქართლს მოადგა, ნადირ-შაჰი უკვე ისპაჰანში იყო და სალაშქროდ ემზადებოდა. ყიზილბაშების უეცარმა გამოჩენამ ქართლი ისევ აშალა, აფორიაქა, მაგრამ სეფე-ხანი სოფელ ფხვენისში დაბანაკდა, კახეთიდან თეიმურაზი, გივი ჩოლოყაშვილი და ქიზიყის მოურავი ქაიხოსრო იხმო, ქართლიდან მის გარდა ბარძიმ არაგვის ერისთავი და ლუარსაბ თარხნიშვილი, ყველას იარაღი აპყარა, მცველები მიუჩინა და უკან სპარსეთისკენვე გაბრუნდა. მათთვის არც ცხენები ჩამოურთმევიათ და არც ბორკილები დაუდვიათ, მაგრამ ისე იცავდნენ, როგორც საშიშ დამნაშავეებს. ყიზილბაშებს საქართველოში ფეხის მოკიდება გაუჭირდათ. ყოველი ხევის შემომტკიცება იმდენ სისხლად და ჯათად უჯ-



დებოდათ, რომ აღარც მტრებს ენდობოდნენ და აღარც მოყვრებს. ტყვეობა არც ისე უსიამო აღმოჩნდა, როგორც ეგონა. მცველები თავაზიანად ექცეოდნენ, ხოლო როცა ექცხოდნენ სუფრას შემოუსხდებოდნენ და პურის ჭამას დაიწყებდნენ, როცა სადილი ღვინში გადაიზრდებოდა, ბანაკი მათ უფრო ეკუთვნოდათ, ვიდრე შაჰის სარდლებს. ასე ტკბილად ქართველ მეფესა და თავადებს იშვიათად უტარებიათ დრო. ბოლოს გამოჩნდა ცადაწვდილი მინარეთები. ისპაჰანი, აღარ ჰგავდა იმ საშიშ და ქუჩუციან ქალაქს, როგორიც ნადირ-შაჰის აღზევებამდე ახსოვდა. ყველგან სიმშვიდე და წესრიგი სუფევდა, ვაჭრებს ფართოდ გაეღოთ დუქნის კარები, ხელოსნებს გარეთ გამოეტანათ შუა საქონელი, ქუჩები ხალხით იყო სავსე. სეფეხანმა ტყვეები ისე მიჰგვარა ნადირ-შაჰს, თითქოს მძიმე მოვალეობა მოიხადა. ნადირმა მართლაც მეფური სულგრძელობა გამოიჩინა, მათთვის არც ბრალდება წაუყენებია და არც სასჯელით დამუქრებია, პირიქით, ბრძანება გასცა ყველასათვის იარაღი დაებრუნებინათ, ხალათები ეჩუქებინათ და გამოეშვიდობებინათ პირადად სთხოვა თითოეულს, ყანდარში გაყოლოდა სალაშქროდ. იმ დამეს მაჰმანდარებმა ფული და ხალათები ჩამოარიგეს, ხოლო მეორე დილით ტყვედყოფილი ქართველები ნადირ-შაჰის ამაღლაში იყვნენ. თეიმურაზი და კახელი თავადიშვილები მხოლოდ ამ ლაშქრობის დროს გაიცნო ახლოს. კახეთის მეფე გონიერი, გულკეთილი კაცი აღმოჩნდა. შესაძლებელსა და სასურველს არასოდეს ურევდა ერთმანეთში და იცოდა, ვის რისთვის მიმხრობოდა და რისთვის განდგომოდა. ცხოვრებას რომ მათი გზები არ გაეყარა, შეიძლება დამოყვრებულიყვნენ კიდევ, მაგრამ დამოყვრების ნაცვლად მოსისხარ მტრებად იქცნენ.

ლაშქრობა სამ თვეს გაგრძელდა. ნადირ-შაჰმა ყანდარი  
სწრაფად აიღო და გამარჯვება იხეიმა, რაც ბევრ სპას-ბევრ  
ქამას და რაღაც ისეთის დაკმაყოფილებას ნიშნავდა. უფ-  
ლებაც ჯარისკაცებს ყოველთვის არ ჰქონდათ. ზეიმში მათაც  
მიადლებინეს მონაწილეობა. ერთმა გურგანელმა იუზბაშმა მოქ-  
რილი ყურების მთელი აცმა უჩვენა, რომელთა შორის ზოგი-  
ერთი ჩირივით იყო დამუკნარი, რამდენიმეს კი ჯერ კიდევ  
სდიოდა სისხლი. ერთმა ფარსელმა ჯარისკაცმა ავღანელებს  
ყომარში ფული და ტყვეები მოუგო, ერთს ქალიც კი წაართვა  
და მეორე დღეს მისი მოქრილი თავი სარზე ჩამოცმული იბო-  
ვეს. ღრეობამ თითქმის იმდენივე ხალხი შეიწირა, რამდენიც  
ციხის აღებამ, მაგრამ ბოლოს, როგორც იქნა, დაცხრა სისხლ-  
მოწყურებულთა თარეში და როცა გამარჯვების მსუყე ფერე-  
ბი დრომ გამოახუნა, მათი ბედის გადაწყვეტის ქამიც დადგა.  
ისინი ან უნდა დაეხოცათ, ანდა სამშობლოში დაებრუნები-  
ნათ — დახოცვა სახიფათო იყო, ამ ამბავს შეეძლო საქართვე-  
ლოში აჯანყება გამოეწვია, მაგრამ შაჰს არც მათი სამშობლო-  
ში დაბრუნება უნდოდა ისე, რომ ძაფის ერთი ბოლო ხელში  
არ სჭეროდა. ამიტომაც არ ჩქარობდა, მათთან ლაპარაკს მათი  
დასაჩუქრება ერჩია. ასე გაგრძელდა მანამდე, სანამ ერთ წვი-  
მიან დღეს თეიმურაზი არ იხმო და პირდაპირ არ უთხრა. სა-  
ქართველოში მხოლოდ იმ პირობით დაგაბრუნებ, თუ ირაკ-  
ლი ბატონიშვილი ყანდარში ჩამოვა და ინდოეთში გამომყვე-  
ბაო. თეიმურაზი დალონდა, მაგრამ წიგნი მაინც მისწერა დე-  
დოფალსა და ბატონიშვილს. მაშინ რომ ირაკლის თავი არ გა-  
მოედო და ყანდარში არ ჩამოსულიყო, ღმრეთმა იცის, კიდევ  
რამდენ ხანს იხეტიალებდნენ უცხო ქვეყნის მტერიან გზებ-  
ზე.



გავარვარებული მზე ოდნავ დაქანდა, მასთან ერთად დაქანდა მთელი დედამიწაც, წარსული ჯერ კიდევ არ იყო ისე მღვრიე, რომ ვერ დაენახა, რა გაქრა და რა გამოიკვეთა, რა დაილექა და რა გადაადგილდა. თბილისში დაბრუნებულს საქმე თითქმის არაფერი ჰქონდა. დღისით ან წიგნს კითხულობდა, ანდა მტკვარს გადაჰყურებდა, საღამოობით კი წვრილმანი ცოდვებით დამძიმებული ბრუნდებოდა სახლში. ირგვლივ ბევრი რამ ხდებოდა ისეთი, რაც წყლის ნაყვად, უგუნურ თამაშად მიაჩნდა. რად უნდოდათ სპარსელებს სხვისი მიწები, როცა თავიანთს ვერ უვლიდნენ, რისთვის დასჭირდა არაგვის ერისთავს იესე ქსნის ერისთავის ცოლ-შვილის გაცემა, რატომ ცდებოდა ადამიანი ისე მწარედ, რომ ბოლოს საკუთარი შეცდომის მსხვერპლი ხდებოდა.

არაგვის ერისთავი ურთურთი ჯერ კიდევ ცოცხალი იქნებოდა, საბედისწერო შეცდომა რომ არ დაეშვა. იესეს გაუჭირდა, გადაწყვიტა ცოლ-შვილი გაეხიზნა, კახეთში გადაეყვანა, მაგრამ კახეთისაკენ მიმავალი ყველა ბილიკი არაგვის საერისთავოზე გადიოდა და ერთმა უბრალო შემთხვევამ დიდი სისხლის ღვრა გამოიწვია.

სპარსელ დიდებულებს ლხინი და უქმად ყოფნა მობეზრდათ, ნადირობა მოენატრათ და ურთურთმა ისინი ბაზალეთის ტბის მიდამოებში მიიპატიჟა. შუადღემდე აყრუებდა მთა-ბარს ცხენების ჭიხვინი, თოფის სროლა, ძაღლების ყეფა. რაც იმ დღეს ნადირი მოსრეს, დამშეულ არაგვისხვევლებს მთელი კვირა ეყოფოდათ. ნაშუადღევს ტბის პირას ცეცხლი დაანთეს, ნანადირევი აუქნელად შეწვეს და ცხოვრებაზე ფიქრსა და

ლაპარაკს ცხოვრებით დატკობა ამჯობინეს. ტბა ოღნავ წამო-  
იქოჩრა, ძვლების ხვრამ და ძაღლების გნიასმა შეაშფოთა.  
სპარსელები აღარაფერს იკლებდნენ, ღვინოს ისე ეტანებოდ-  
ნენ, თითქოს ბავშვობიდანვე იყვნენ ჩვეულნი. ლხინი ალბათ  
ღრეობაში გადაიზრდებოდა, ერთ მოულოდნელ შემთხვევას  
რომ მათთვის ხელი არ შეეშალა. ურთურთი უკვე გვარიანად  
შეზარხოშებული იყო, როცა საცალფეხო ბილიკზე მხედართა  
პატარა ჯგუფი გამოჩნდა. ერისთავმა წარბები შეიკრა. მის მა-  
მულში დაუქითხავად ჩიტიც კი ვერ ბედავდა შემოფრენას და  
უცხო მხედრების გამოჩენამ დააეჭვა. ვინ იყვნენ, სად მიდი-  
ოდნენ, რა ზრახვები ედოთ გულში? ასე ადვილად იგი მათ  
გზას ვერ დაუთმობდა. ურთურთმა ძაღლები და შინაყმები აი-  
ყოლია, ტყის პირს გაჰყვა და მხედრებს გზა გადაუჭრა. მის  
წინ ცხენებზე ამხედრებული ქალები, ბავშვები და მოახლე-  
ები აღმოჩნდნენ. ერისთავი ცოტათი დამშვიდდა, მაგრამ ქვე-  
და ყბა ავად მოედრიცა. იესე ერისთავის ცოლი იმ წამსვე იც-  
ნო, ხოლო ბავშვები რომ ქსნის ერისთავის შვილები იყვნენ,  
ამაში ეჭვი აღარ ეპარებოდა. დადგა საბედისწერო წუთი.  
ურთურთი ქვედა ტუჩს იკვნეტდა და ისე ირყეოდა, თითქოს  
ცალ მხარეს ეშმაკი ეწეოდა, მეორე მხარეს კი ანგელოზი. ახ-  
ლა ყველაფერი იმაზე იყო დამოკიდებული, რა გადასწონი-  
და — კაცობა თუ ავკაცობა. მოლოდინში ძაღლებიც კი გაი-  
ლურსნენ. ღმერთმა იცის, რამ დაუბნელა იმ დღეს არაგვის  
ერისთავს გონება — ღვინომ, ღვარძლმა თუ სპარსელებისადმი  
ერთგულებამ, მაგრამ როცა მერყეობა დაძლია, იესე ერისთა-  
ვის ცოლშვილის შეპყრობა და სპარსელებისათვის გადაცემა  
ბრძანა.

●

ამილახვარმა თავი ასწია. იმ ადგილას, სადაც ქვიშა გამხ-  
მარ, ეკლიან ბუჩქებს ეპარებოდა, ქარი ქარს უვლში სწვდა,  
ცაში აიტაცა და როცა მოახრჩო, ისევ მიწაზე დაანარცხ. ერ-  
თი წუთით უკან დარჩენილი სამყარო აირ-დაირია, გამუქდა,  
მაგრამ არც გამქრალა და არც შემსუბუქებულა. დროს ისეთი-  
ვე მნიშვნელობას ანიჭებდა, როგორსაც დრო ანიჭებს ჯალათ-  
სა და მსხვერპლს შორის დარჩენილ მანძილს.

შანშე ერისთავი რუსეთიდან ხელცარიელი დაბრუნდა,  
მაგრამ როცა რძლისა და ძმისწულების შებყრობისა და სპარ-  
სელებისათვის გადაცემის ამბავი გაივთ, ისეთი რისხვით აღივ-  
სო, რომ შურისძიების მეტი არაფერი ახსოვდა. მისი აფორი-  
აქებული შეგნებიდან გონიერების ყოველგვარი ნიშანწყალი  
განიდევნა. რომ შესძლებოდა ჯოჯოხეთიდან ეშმაკებს ამოიყ-  
ვანდა და არაგვის საერისთავოს შეუსევდა, მაგრამ რადგან  
ამის ძალა არ შესწევდა, გზა გაიმრუდა, დაღესტანში გადავიდა  
და იმდენი ლეკი დაიჭირავა, რამდენი კომლიც სულ არ იყო  
არაგვის ხეობაში. ეშმაკების შეცვლა იმ დროს მხოლოდ ლე-  
კებით შეიძლებოდა, რადგან უფრო დიდ ზიანს ვერც ჯოჯოხე-  
თის მოციქულნი მიაყენებდნენ საქართველოს.

შანშე ერისთავის მრისხანება ლეკებსაც აცოფებდა. არაგ-  
ვისხეველებს ისე აწიოკებდნენ, თითქოს განკითხვის დღე  
დადგაო. იწვოდა სოფლები, იღვრებოდა სისხლი, ბღაოდა სა-  
ქონელი. უფრო დიდი უბედურება არაგვისხეველებს იშვია-  
თად დასტყდომიათ თავს. ურთურთი ერთხანს წინააღმდეგო-  
ბის გაწევას ცდილობდა, იმამ-ყული-ხანს დახმარება სთხოვა,  
მაგრამ თბილისში დარჩენილ სპარსელებს ლეკებთან შებმა  
არ შეეძლოთ და ერისთავი მთელი თავისი ჯალაბით ანანურის

ციხეში ჩაიკეტა. შანშემ ციხეს ალყა შემოარტყა. დაიწყეს  
დამქანცველი ომი. არაგვის ერისთავს ხალხი აკლდა, ქსნის  
ერისთავს შორსმსროლელი იარაღი. ლეკებს იერიში იერიშზე  
მიჰქონდათ, მაგრამ ვერც ციხის კარი შელღწეს და ვერც კე-  
დელზე გადასვლა მოახერხეს. ციხის მისადგომები გვამებით  
აივსო, ჰაერი მძორის სუნით გაიჟლინთა. ურთურობა იცოდა,  
შანშე ერისთავი რომ მისიანს არაგვის დაინდობდა და ამიტომ  
თავგანწირულად იბრძოდა, მეციხოვნეთა მამაცობა მტერსაც  
კი აკვირებდა ომი გაჰიანურდა, გამძაფრდა. შანშეს ციხე მა-  
ნამდე უნდა აეღო, სანამ ნადირ-შაჰი საქართველოში დამხმა-  
რე ჯარს გამოგზავნიდა, შემდეგ კი თვით მას მოუხდებოდა  
ციხეში ჩაკეტვა და თავის დაცვა.

როცა ლეკთა ჯარი საგრძნობლად შეთხელდა, შანშემ სხვა  
ხერხს მიმართა. თავის ყმებს, ქსნისხეველებს წყაროს წყლის  
სათავე მოაძებნინა და ისე უმოწყალოდ გადაჭრა, როგორც  
უფსკრულში ჩაკიდებულს თოკს გადაუჭრიან. ციხის მცვე-  
ლებს გაუჭირდათ. ომსა და სიციხეს როგორმე გაუძლებდნენ,  
მაგრამ უწყლობამ ანანურის ციხე საკირედ აქცია. ლუკმა ალა-  
რავის გადასდიოდა ყელში, დილდილაობით ცვრიან ბალახს  
ლოკავდნენ. მომჩივარულ მკლავს ალარც თოფის გატენვა შე-  
ეძლო და ალარც ხმლის მოჭნევა. ბარძიმ ერისთავმა და მისმა  
მომხრეებმა წყურვილით სიკვდილს ციხიდან გასვლა ამჯობი-  
ნეს, მაგრამ შანშემ ყველას თავები დააყრევინა. არაგველთა  
მკლავის მოღუნებამ ლეკები გაათამამა. რამდენიმე იერიშის  
შემდეგ ციხე აიღეს და ვინც კი ცოცხალი დახვდათ, ხმლებით  
აკუწეს. ურთურობა უკან დაიხია, ცოლშვილიანად ხის მაღალ  
კოშკში ჩაიკეტა. გაჩაღდა სამკვდრო-სასიცოცხლო ბრძოლა.  
ლეკებს ეგონათ, კოშკს დაღამებამდე მოუღებდნენ ბოლოს,

მაგრამ ერთი ბოძიც კი ვერ მოარყიეს. მეორე დღეს შანშემ  
ჯარისკაცებს ტყიდან ფიჩხი მოაზიდვინა, კოშკს ირგვლივ შე-  
მოუწყო და ცეცხლი წაუკიდა. ქართველი თავადის სისასტიკემ  
ლეკებიც კი შეაკრთო. ქალებისა და ბავშვების შემხარავი კრ-  
ვილი ისე ისმოდა ზემოდან, თითქოს ცა ისხლეტდა და უკან,  
დედამიწაზევე აბრუნებდა. ცეცხლი ძლიერდებოდა, ხმელი  
ხე ტკაცუნებდა და როცა კოშკი ჩამოიქცა, ქვეშ მხოლოდ  
კვამლისაგან გაგუდული, დანახშირებული გვამები დაიტანა.

ანანურის ციხის აღების შემდეგ შანშე ერისთავმა ლეკები  
შიატოვა, ქსნის ხეობაში გადავიდა და ციხეების გამაგრებას  
შეუდგა. დარბეულ მოსახლეობას აღარც ბრძოლის თავი ჰქონ-  
და და აღარც შალვის, ყველაფერს მშვიდად ძილი, სულის  
მოთქმა ერჩია, მაგრამ ერისთავი გაშმაგდა, მთელ ქვეყანას  
დაუპირისპირდა. ქსნის ხეობა ან უნდა დაეთმოთ მისთვის, ან-  
და ომი გამოეცხადებინათ, სხვა პირობას არ ცნობდა, არ ენ-  
დობოდა. შეიძლება ქართველების მთელმა გულისწყრომამ  
მის არსებაში მოიყარა თავი, ან იქნებ მისი შეუპოვრობა მო-  
დუნების საშუალებას არ აძლევდა სხვებს? თუმცა შანშეს  
სხვების დარდი არ ჰქონდა, ასე შორს არ იყურებოდა. არაგვის  
ხეობაში გადმოყვანილმა ლეკებმა ჯერ მთელი ქართლი ააოხ-  
რეს, შემდეგ კი კავკასიონიდან ახალციხემდე ტყვეთა გადა-  
საყვანი ხილი გადეს და ხელი მოითბეს. ამ ხიდის მოშლა და  
ლეკების ქართლიდან განდევნა ფასად დაუჯდათ ქართველებს.




აქლემების ეყვანთა ჟღარუნი ისე ისმოდა უკნიდან, თით-  
ქოს მასა და ქარავანს შორის მტერის სქელი ფარდა იყო ჩა-  
მოფარებული, რომელიც თანდათან მუქდებოდა და მისი

ჩრდილის მეტს არაფერს ირეკლავდა. ამგვარი გრძნობა სხვა დროსაც ჰქონია, მაგრამ საქართველოში ჩრდილი ჩრდილს ან კვეთდა, ანდა გვერდს უმშვენებდა, აქ კი ყველაფერი თავის თავის ამარა იყო მიტოვებული და უწყლო ველების უსასრულობით იფიტებოდა. ასე იფიტებოდა ყოველი დღე თბილისში, როცა ერანელ დიდებულებს ან ნარდს ეთამაშებოდა, ანდა მათთან ერთად აბანოში დადიოდა. სველ ფიცარზე ჯდომას და ღვინის სმას სუფრასთან ქეიფი ერჩია, სადღაც მოტაცებული გოგონების გარყვნას კი — მონატრებულ საყვარელთან წოლა. მაგრამ საკუთარ ქვეყანაში იგი სტუმარი უფრო იყო, ვიდრე მასპინძელი, სტუმარს კი ისე ართობენ, როგორც შეუძლიათ, ხან თავაზიანობით, ხანაც ძალდატანებით. ამიტომაც ვერ ახერხებდა განზე დგომას, საკუთარი ცხოვრებით ცხოვრებას. ერთხელ ისეთი უხამსობის მოწმე გახდა, რომ ჯამი კედელს შეაღწეა და იქაურობას გაეცალა. სპარსელებს მისი აღშფოთება აკვირვებდათ, მას სპარსელების სიძაბუნე. შიშვლებსაც და შემოსილებსაც ნელსაცხებლების, უზნეობის და ვერაგობის სუნი ასდიოდათ. რომ შესძლებოდა, საკუთარ მამულში გადასახლდებოდა, თუ ქვეყანას ვერას არგებდა, პურსა და ღვინოს მაინც მოიყვანდა, მაგრამ ქალაქიდან ფეხის გადგმის უფლებას არ აძლევდნენ, თავის დასახლდევად ცოლშვილიც კი თბილისში ჩამოაყვანიდნენ. თბილისი იმ დროს სახადმოხდილი, ძალას დამორჩილებული ქალაქი იყო. უმწეობა არსად არ იგრძნობოდა ისე ცხადად, როგორც მის ვიწრო ქუჩებში. უსაქმურობამ გააწვალა, დროსთან ჰიდლილში მხოლოდ წიგნის კითხვა ეხმარებოდა. მეტეხს ქვემოთ, მტკვრის პირას ერთი სირიელი ვაჭარი ხელნაწერებსა და ნაბეჭდ წიგნებს ყიდდა. მის პატარა დუქანში ზოგჯერ ისეთ რამეს წააწყდებოდა კაცი, რასაც სწავ-




ლულები სანთლით ეძებენ. პირადად მას საკვლევი და საძიებელი არაფერი ჰქონდა, მაგრამ ერთმა ყდამომძვრალმა, უსათაურო წიგნმა ღამე თეთრად გაათენებინა. უცნობებრძენი ამტკიცებდა, უკანონობას ქვეყანაზე ვერც ერთი მუცტი და ვერც ერთი მთავრობა ვერ აღმოუხვრისო. შეიძლება ცხოვრების რომელიმე ვიწრო სფეროში სანიმუშო წესრიგი დაამყარონ, მაგრამ ამგვარი წესრიგის დამყარება იმდენ ჯაფასა და მსხვერპლს თხოულობს, რომ უწესრიგობა სხვა მრავალ სფეროში ათკეცდება და ასკეცდებაო. მიუხედავად ამისა, სრულ უკანონობას და ანარქიას უგუნური მეფის მმართველობაც კი სჯობსო. ქების ღირსი მხოლოდ ის მთავრობაა, რომელმაც ბრბოს ფიზიკურად ან გონებრივად დამორჩილება შეძლო და ეს მორჩილება სახელმწიფოს მიზნებისათვის გამოიყენაო. ერთი სიტყვით, უცნობ კანონმდებელს არც ერთი კანონი და ხელისუფლება არ მოსწონდა, მაგრამ უკანონობა და უხელისუფლებობა კიდევ უფრო დიდ ბორბტებად მიიჩნდა. ამიტომაც ცდილობდა მბრძანებლებისათვის ესწავლებინა ჰკუა და არა ბრბოსათვის. წიგნი ლათინურ ენაზე იყო დაწერილი, ხალისიანად იკითხებოდა და უამრავ განმარტებებს შეიცავდა. ამ წიგნის წაკითხვას იგი ვერაფრით ვერ შეძლებდა, მათ ოჯახში, რომ ერთ ღროს მისიონერ ბერს არ ეცხოვრა. ბერმა ენა ასწავლა, საღვთო სჯულის ბუნდოვანი ადგილები განუმარტა, მაგრამ უცნობი სწავლული ისეთ რჩევა-დარიგებებს იძლეოდა, რაზედაც ბევრს საქართველოში წარმოდგენაც არ ჰქონდა. თუმცა ყველა მისა დებულება ზოგადი ხასიათისა იყო და საქართველოს თითქმის არც ერთი მხრიდან არ უდგებოდა. შეიძლება ამის მიზეზი ის იყო, რომ საქართველო სახელმწიფოს აღარ წარმოადგენდა. უმეფოდ დარჩენილ ქვეყანაში ყველა იმას აკე-

თებდა, რის თავიც ჰქონდა. ერთი სიტყვით, საქართველოს  
ბრბო არ ჰყავდა, ბრბოს გარეშე კი უცნობი სწავლულის მოძღ-  
ვრება ფრთამოტეხილი ჩანდა.




იმ საღამოს, როცა თბილისში სპარსელთა დამხმარე ჯარი  
შემოვიდა, მიწა ორჯერ თუ სამჯერ იძრა. მიწისძვრას არავინ  
უმსხვერპლია, მაგრამ ცხენების კიხვინმა და ძაღლების ყმუ-  
ილმა ღამე შეაშფოთა, ააფორიაქა. აფორიაქებული იყო მისი  
გონებაც. რიკულებიანი აივანი რამდენიმე წამს გემბანივით  
იღწეოდა, მოედანზე დანთებული კოცონები მეხსიერების გა-  
რეკანს რუჯავდნენ. რაც თავი ახსოვდა, მის ქვეყანას და მას  
შორის ყოველთვის იღვა ვიღაც, ვანთიადს ელოდა და ათას-  
ჯერ გადახდილ ვალს კიდევ ერთხელ სთხოვდა. ხვალ ისევ მო-  
ადგებოდნენ კარზე. შანშე ერისთავის წინააღმდეგ გალაშქრე-  
ბა რომ არ ასცდებოდა, ეს აღრევეც იცოდა, მაგრამ ახლა შან-  
შეს თავიდან მოცილება მასაც სურდა. თუ გამდგარი თავადის  
განდევნას შესძლებდა, ქართლის გაერთიანება და ნადირ-შაჰ-  
თან მორიგება არ გაუჭირდებოდა. ნადირი გონიერი კაცი  
იყო, რჯულისა და გვარტომობისათვის არავის დევნიდა, პირი-  
ქით, მისი ოცნება ყველა ეკლესიის შერწყმა, ყველა ერის გა-  
ერთიანება იყო. ასეთ კაცთან საერთო ენას როგორმე გამონა-  
ხავდა, მაგრამ უბედურება ის იყო, რომ მათი მორიგება ნა-  
სოფლარებს და ნაქალაქარებს ვერ აღადგენდა, ცხოვრებას  
ვერც აზრს შესძენდა და ვერც სამართლიანს გახდიდა. ის სიბ-  
რმავე, რაც წუთისოფლის წაღმა-უკუღმა ტრიალს თან დაჰყვა,  
სიბრმავედ დარჩებოდა.



ამილახვარმა საკუთარი სხეულის სიმძიმე იგრძნო და სანამ ცხენს გაუწყობდა, წელში გასწორდა. სიცხემ მოთენთა, აზრი ისე ველარ ინასკვებოდა, როგორც ჩრდილისა და ნათელას მონაცვლეობის დროს. ის სიხალისე, რაც თან გამოჰყვა, მხემ გამოფიტა, უსაზღვროებამ გათელა. მისი ძლიერი, მკვრივი სხეული ორ თვალშეუბამ სიბრტყეს შორის იყო მოქცეული და შეუმჩნევლად პატარავდებოდა, მიწისათვისაც მცოცავ მწერს წარმოადგენდა და ცისათვისაც. სასაცილო მხოლოდ ის იყო, რომ ეს მწერი მასზე უფრო უძლურ, მაგრამ შეიარაღებულ მწერებს ცხრა მთას იქით მიჰყავდათ თვალების დასათბრელად და ბნელ დილეგში ჩასავდებად. რა ჰქონდა საერთო ამ გადახრუკულ ველებს და სიცხით შეწუხებულ ცას მის მერყეობასთან და სიმტკიცესთან, სიხარულთან და მწუხარებასთან, გონიერებასთან და უგუნურებასთან? რა თქმა უნდა, არაფერი, იმდენად არაფერი, რომ მათ შორის არსებობა და არარსებობა თითქმის ერთი და იგივე იყო.

მესამე დღეს თბილისში ავღანელები შემოვიდნენ და სპარსელთა ჭრელი, ენაარეული ლაშქარი ქართველებთან ერთად ქსნის ხეობისაკენ დაიძრა. დასავლეთიდან გრილი ნიავი უბერავდა. დაფლეთილი ღრუბლები ცხვრის ფარასავით მოსდებოდა ცას. მოულოდნელობა ყოველგვარ მოლოდინს აქარბებდა, ყოველ ნაბიჯზე აღმიჭებოდა. შანშე ერისთავს შვილმა, იოანემ უღალატა, იმამ-ყული-ხანთან გამოიქცა და ერთგულება აღუთქვა, მეორე დღეს კი მასთან ქართველი თავადები გამოცხადდნენ და ლაშქრობაში მონაწილეობის უფლება ითხოვეს. ამ პატარა ქვეყანაში იმდენი კუთხის ინტერესები უპირისპირდებოდა ერთმანეთს, რომ დროის გაოხრებას აღარავინ აქცევდა ყურადღებას.



მტკვრის ხეობა გონმისდილივით ღუმდა, ისეთივე დაც-  
რიელებული ჩანდა, როგორც ფერდობებზე შეფენილი ნა-  
სოფლარები. ლაშქარს წინ ყიზილბაშები მიუძღვოდნენ, უკან  
მათ ინდოელები, შირვანელები და ქურთები მიჰყვებოდნენ,  
კიდევ უფრო უკან მრავალრიცხოვანი, თავსაფარწყარული ავ-  
ღანელები, რომელთა მორთულობა თბილისელებს ღიმილს  
ჰგვრიდა. თეთრი თავსაფრის ფონზე მათი მუქი, დიდცხვირა  
სახეები ისე იკვეთებოდა, როგორც გამოჩორკნილი ლოდები.

მას შემდეგ, რაც სპარსეთიდან დაბრუნდა, საქართველოში  
ცოტა რამ შეიცვალა. ახლა მის ძველ ცოდვებს კიდევ ერთი  
ცოდვა მიემატებოდა, რომელსაც არც კაცი შეუძლოდა და  
არც ღმერთი. მთელი ის სისხლი, რაც ამ ბრძოლებში დაიღ-  
ვრებოდა, სპარსელების უკან გაბრუნების შემდეგ, მას მიე-  
წერებოდა. მაგრამ ახლა განკითხვისა და ცოდვა-მადლის აწონ-  
დაწონის დრო არ იყო. რაც არ უნდა მომხდარიყო, მხნეობა  
და საღი აზრი უნდა შეენარჩუნებინა, მანამდე ეზიდა ტვირთი,  
სანამ მიწას მიწის სუნი უდიოდა. ქვეყანა, რომელსაც ბავშვო-  
ბიდან აკვირდებოდა, საქაჯეთს ჰგავდა, მაგრამ ამის გამო ჰკუ-  
ის დაკარგვა თუ ღალატს არა, ცხოვრებაზე ხელის აღებას მა-  
ინც ნიშნავდა.

ქსანი ისე დაპატარავებულიყო, რომ ჯარმა რამდენჯერმე  
გადაკვეთა ცხენდაცხენ. სპარსელები არ ჩქარობდნენ, დარწ-  
მუნებული იყვნენ, შანშე ერისთავი ვერსად გაგვექცევას და  
გზადაგზა ციხეებს, მონასტრებსა და კოშკებს ანგრევდნენ,  
ტყვეებს აკროვებდნენ, ნაძარცვით ვაჭრობდნენ. ბოლოს მი-  
ადგნენ აწერის ციხეს, სადაც შანშე ერისთავი ცოლშვილითა  
და მახლობლებით ჩაკეტილიყო. ციხე მაღალი, მიუდგომელი  
ჩანდა, ირგვლივ ღრმა ხევი უვლიდა, მიახლოება მხოლოდ

სამხრეთ-აღმოსავლეთიდან შეიძლებოდა. ხევს გაღმა უძველესი, თლილი ქვით ნაგები ეკლესია იდგა, რომელიც თალითა და სვეტებით ანტიკურ ტაძარს ჰგავდა. ყიზილბაშები საიერიშოდ ემზადებოდნენ, სანგრებს აგებდნენ, ტყვია-წამალს იმზარაგებდნენ. რაღაც არ უნდა დასჯდომოდათ, დილით ციხე უნდა აეღოთ და ბორკილგაყრილი შანშე ერისთავი ნადირ-შაჰისათვის გაეგზავნათ. მზე მორცხვად ჩადიოდა, უზარმაზარი ჩრდილები ხეობებისაკენ ეშვებოდნენ, ქვეყანა ბინდით იმოსებოდა. მაჰმადიანებმა კიდევ ერთხელ გაშალეს თავიანთი ფარდაგები და ლოცვას შეუდგნენ. დღის უმტკივნეულო ქრობას ქსნისხეველები ადრეც ბევრჯერ შესწრებიან. მაგრამ ახლა მათი ცდუნება თითქმის შეუძლებელი იყო. იმედს გათელვა ელოდა, სიცოცხლეს დათრგუნვა. განთიადისას, როგორც კი ცა ჩამქრალი კოცონების ფერფლის ფრად შეფერადდებოდა, კაცობრიობის მიერ ჩადენილ ცოდვებს კიდევ ერთი ცოდვა მიემატებოდა და არსებობის მღვრიე მორევს შეუერთდებოდა. აქეთ მომავალს იმედი ჰქონდა, რომ მოვლენათა აუარებელ ხლართს შორის ერთს მაინც გამოხსნიდა, ქართლს თავს მოუყრიდა, მოალონიერებდა, მაგრამ როცა ცის კიდურმა მოგიზგიზე კოცონების სიმხურვალე აარეკლა, როცა ქსნის ხეობა ხვალინდელი დღის მოლოდინში გაინაბა, ისეთი გრძნობა დაეუფლა, თითქოს აქ საკუთარი ნებით კი არ იყო მოსული, არამედ უხილავ თოკს გამოაბეს და ძალით მოათრიეს.



ამილახვარმა შუბლი მოისრისა და ისე დაიგრძელა კისერი, თითქოს ახლაც თოკით მიათრევედნენ იქითკენ, საითაც გული არ მიუწევდა, სადაც სასჯელისა და ტკივილის მეტი არაფერი

ელოდა. წარმოდგენა ერთხანს სიმხურვალისაგან მოლაპლაპე  
რგოლებს ირგვლივ უვლიდა, წელში გამართვას, ყალყზე შედ-  
გომას ცდილობდა, მაგრამ შემდეგ ცხელი ჰაერის რკალში მო-  
ექცა, მოიღრცა და როცა უკუიქცა, ისევ მოგონებათა ტყვეო-  
ბაში აღმოჩნდა.

მეორე დღეს სპარსელებმა აწერის ციხე აიღეს, დატყვევე-  
ბული მამაკაცები შეკრეს, ქალები და ბავშვები კედელთან მი-  
რეკეს, მაგრამ შანშე ერისთავი და მისი ძმა ვერსად აღმოაჩი-  
ნეს. ერანელ მხედართმთავრებს ალაპის გამოცხადება არ გა-  
აკვირვებდათ ისე, როგორც ერისთავის გაქრობამ გააკვირვა.  
ყველა ხვრელი და სორო გადაქექეს, ქვევრებში ჩაიხედეს,  
აქა-იქ კედლები გამოანგრიეს, ბოლოს ქალებს მიადგნენ, მაგ-  
რამ მათ შორის ვერც გადაცმული მამაკაცი იპოვეს და ვერც  
ისეთი ქალი, რომ ერისთავის მეუღლისათვის მიემსგავსები-  
ნათ. მხოლოდ მოგვიანებით იცნო ერთმა ქართველმა თავადმა  
ქსნის ერისთავის ცოლი და დაუფიქრებლად გასცა. ქალი იქ-  
ვე დაჰკითხეს. ღამით შანშე ერისთავი და მისი ძმა რამდენიმე  
კაცის თანხლებით ჩრდილოეთის კედელზე გადასულან, ხევამ-  
დე ჩაულწევიათ და გაქცეულან. ერანელი მხედართმთავრები  
დაღონდნენ, ამბოხებული თავადის შეპყრობის იმედი გადა-  
უწყდათ. ჯავრი ქალებზე და ტყვეებზე იყარეს. ყოველი მხრი-  
დან ისმოდა ტირილი, კივილი, გინება; იარაღის ჟღარქუნი და  
ცხენების ჭიხვინი. ავღანელები ტყვეებს გზადაგზა ყიდდნენ.  
ვისაც მათი გამოხსნა შეეძლო, არაფერს ზოგავდა, მაგრამ გა-  
ლატაკებულ ქართლს ამდენი ტყვის გამოსყიდვის თავი არ  
ჰქონდა. უბედურთა გოდება ისე მოჰყვებოდა ქსნის ხეობას,  
როგორც ქსნის წყალი. ავღანელები ბრაზობდნენ, ტყვეების  
თან წაყვანა არ შეეძლოთ, მყიდველი კი არსად ჩანდა და რო-

ცა მტკვრამდე ჩააღწიეს, მამაკაცებს ყელები გამოსტრეს და წყალში გადაყარეს. თბილისამდე მხოლოდ ისინი ჩაიყვანეს, ვინც მძევლად ან შაჰის კარზე გასაგზავნად სჭირდებოდათ.

სანათლის გაბრუებულ სივრცეში სახეებიანი სამწვანე შემოიჭრა და იმხელა ადგილი დაიჭირა, რომ თითქმის მთელი უდაბნო შემოსა. არაფრით არ ეგონა გახრუკული ბორცვების მიღმა თუ ჯგუფად დარგული ხეები აღმოჩნდებოდა. ხეები ტანმსხვილი, ხშირფოთლოვანი ჩანდა. მათ ქვეშ, ალბათ, იმდენი ჩრდილი სუფევდა, რომ ყველა შეხუთული გულის გასახალისებლად იკმარებდა, მაგრამ აჩრდილები მის მეხსიერებას მანამდე არ მოასვენებდნენ, სანამ ცხენიდან არ ჩამოხტებოდა და გახურებულ პირისახეზე ჩრდილს არ გადაიფარებდა.

შანშე ერისთავი კიდევ ერთხელ მაშინ ნახა, როცა ბორკილგაყრილი თბილისში ჩამოიყვანეს. ნაგვემსა და პატივყარილს სახეზე ადამიანის ფერი არ ედო, მაგრამ მაინც ჯიუტად სდუმდა. მარცხსა და დამცირებას ვერ ჰგუობდა. მცველებით გარშემორტყმულს, ძალდატანებით ქედმოხრილს ჯერ კიდევ იმედი ჰქონდა, რომ მისი სულისა თუ სხეულის ძალა თავის მოკვეთამდე ან თვალების დათხრამდე არ მიიყვანდა, მუხთალ ბედს მანამდე გამოსტაცებდა ხელიდან. ამიტომაც უყურებდა ქვეყანას მტრულად, გამომწვევად. სხვა ქართველებთან შედარებით მას ერთი დიდი უპირატესობა ჰქონდა, მტრის წინაშე ქედი კი არ მოუხრია, არამედ მასთან ბრძოლაში დამარცხდა.

იმ დღეს თბილისი აღგზნებული ჩანდა. შანშე ერისთავისა და მისი ძმის ასე ადვილად შეპყრობას არავინ ელოდა. ზოგს უხაროდა, ზოგს გული სწყდებოდა, მაგრამ უმრავლესობას მათ ბედზე უფრო მათი ამბავი აინტერესებდა. არაფერი და-

უტოვებიათ გამოუკითხავი, გამოუკვლეველი. აწერის ციხე-  
დან გაქცევის შემდეგ ერისთავი მტკვრის ხეობას აპყობდა და  
ახალციხეში ასულა. ახალციხის ფაშას სიხარულით მიუღია  
ერანის წინააღმდეგ ამბოხებული თავადი. ენგიჩარებს, რომ  
მელთა უმრავლესობა გამაჰმადიანებული ქართველები იყვნენ,  
ციხეში მიუწვევიათ, ლხინი გადაუხდიათ. შანშეს მეორე დღეს-  
ვე დაუწყია ოსმალებთან მოლაპარაკება ქსნის ხეობის გამო-  
სახსნელად, მაგრამ ეს ამბავი ისე გახმაურებულა, რომ ნადირ-  
შაჰს ყურამდე მიუღწევია. ნადირი გაცოფებულა, სულთანის-  
სათვის შეუთვლია, თუ შანშე ერისთავს არ გადმომცემ, იმე-  
რეთში აღექსანდრეს გადმოვიყვან და გავამეფებო. სულთანს  
არ მოუსურვებია ერთი მემამბოხე თავადის გამო ერანთან ურ-  
თიერთობის გამწვავება და შანშე ერისთავის შეპყრობა და ნა-  
დირ-შაჰისათვის გადაცემა უბრძანებია. ერისთავი არ მოელო-  
და ოსმალებისაგან ასეთ მუხანათობას. ძმასთან ერთად ციხეში  
შევარდნილა და ენგიჩარებისათვის დახმარება უთხოვია. მე-  
ციხოვნენი წინ აჰყარებთან ერისთავს, მაგრამ ციხეში თვით  
ფაშა მისულა, შანშე და მისი თანმხლები პირები შეუპყრია და  
ბორკილგაყრილნი თბილისში გამოუგზავნია.

თბილისის ხანს სამი დღე ჰყავდა დამწყვდეული ტყვეები.  
მეოთხე დღეს ჩაფრებს ჩააბარა და ნადირ-შაჰთან გაგზავნა  
დარუბანდში. შაჰს ერისთავისთვის მოუსმენია, მაგრამ არ შე-  
უწყალებია და შეიარაღებული რაზმის თანხლებით ხორასანში  
გაუგზავნია. გზაში შანშე ერისთავი გაქცეულა. მთელ მის გაქ-  
ცევა-გამოქცევაში, ალბათ, ეს იყო ყველაზე საბედისწერო  
შეცდომა. ლტოლვილი თავადი შეუპყრიათ, თვალები დაუთხ-  
რიათ და დილეგში ჩაუგდიათ.



ამილახვარმა ნავარაუდევო მანძილი კიდევ ერთხელ გაზომა და საკუთარ დაღლილობას შეუფარდა. დასრულებული ქვეყანა მასთან ერთად ისწრაფოდა ჩრდილისაკენ, ცხელი სუნთქვა შორიდან სწვდებოდა სახეებიანი სიმწვანის ცვალებად გარე-ხაზს. ძვირფასი საუნჯე, რომელიც დედამიწას შვილივით ჩაეკრა მკერდში, ველებსა და ბორცვებს აწონასწორებდა, კი არ აწონასწორებდა, ცხადად უპირისპირდებოდა და დიდებულ სამოსელში გახვეული მშვიდად ეგებებოდა ცხენების, აქლემებისა და ადამიანების მძაფრ სუნს, მტკრით განაცრისფრებული აჩრდილების მოუსვენარ ფუსფუსს, იმ არსების ხსენებას, ვინც ყოფიერებას ვერც თავი მოაბა და ვერც ბოლო, ვინც არსებობა უსასრულობის ცივ სუდარაში გაახვია, ხოლო მოუსვენრობა ამოების დაუმსხვრეველი ბორკილებით შეკრა და შებოჭა.

შანშე ერისთავის შეპყრობის შემდეგ ნადირ-შაჰმა ხალათი და ცოტაოდენი ფული გამოუგზავნა, ქსნის საერისთავო უბოძა და ქართლის გამგებლად დანიშნა. ქართლს ისევე სკირდებოდა მოვლა და მოსულიერება, როგორც მძიმე ავადმყოფს, მაგრამ ამისთვის არც სახსრები გააჩნდა და არც იმდენად თავისუფალი იყო, რომ გადამკრელი ზომები მიეღო. თბილისის ხანი თვალს არ აშორებდა, მარტო არსად უშვებდა. იმისათვის, რომ ხალხის ნდობა მოეპოვებინა, ნადირ-შაჰის უნდობლობა უნდა გამოეწვია, ნადირ-შაჰის ნდობის მოპოვება კი ხალხის უნდობლობას იწვევდა. ასეთ ორკოფულ მდგომარეობაში აღმოჩნდა ვეჭილად დანიშვნის პირველი დღიდანვე. სპარსელები აწმყოს აჩეჩებდნენ ხელში, მას კი თვალი მომავლისაკენ გაურ-

ზოდა, არეულობისა და ქაოსის წინააღმდეგ ბრძოლა სურდა, მაგრამ როცა თბილისის ხანის თანხლებით ერთ სოფელს ეწვია და ხალხი დაემალა, მიხვდა, რომ მოურიგებლის ამორიგებას ცდილობდა.

გარემოს არაფერი არ აშიშვლებდა ისე, როგორც აქლემების ექვანთა ქლარუნი. რწევა და ქლერა ერთ მძიმე ტალღად იკვრებოდა, შეგნებაში იკრებოდა და აზრს შუაზე წყვეტდა. გაწყვეტილი ბოლოების ძებნასა და გადაბმას კი უფრო მეტი დრო სჭირდებოდა, ვიდრე მესხიერების ვრცელ საუფლოში მცირეოდენ გადანაცვლებას. სპარსელებს ქართლში საქმოდ ბევრი მომხრე ჰყავდათ, მაგრამ მასზე უფრო დაუღალავი და გავლენიანი კაცი ვერ იპოვეს. მიუხედავად ამისა, მაინც ექვის თვალით უყურებდნენ, ფხიზლად სდარაჯობდნენ. უნდობლობისაგან დაბრმავებული ვერაფრით ვერ შეეგნოთ, რომ ეს გათელილი, მოძულებული, შინაურებისა და გარეულებისაგან ნაჯიჯნი ქვეყანა მისი სამშობლო იყო და თუ მისგან სამსახურს მოითხოვდნენ, იმის უფლებაც უნდა მიეცათ, რომ საკუთარ ქვეყანასაც გამოდგომოდა. წინააღმდეგ შემთხვევაში არა მარტო გამგებლობა კარგავდა აზრს, არამედ გამარჯვებულსა და დამარცხებულს შორის თამაშიც. ერთი-ორჯერ სცადა სხვების დაუკითხავად ემართა ქვეყანა, აყრილი ყმები მიტოვებულ სოფლებში დააბრუნა, აკრეფილი გადასახადების ნაწილი გზების, ხიდების, ეკლესიების შეკეთებას მოახმარა, იმამ-ყული-ხანის მიერ მიტაცებული მცხეთის საეკლესიო ქონება ნიკოლოზ კათოლიკოსს დაუბრუნა, მაგრამ ამის გამო იმდენი საჩივარი გაუგზავნეს ნადირ-შაჰს, რომ თუ მათ წაკითხვას მოისურვებდა, რამდენიმე ლაშქრობაზე ხელი უნდა აეღო. სიბნელათ, სიბნელით და სიბრყვიით იყო შეპყრობი-

ლი მთელი ის სამყარო, სადაც ყველას სხვის ქონებაზე ეჭირათვალი, დამნაშავენი უდანაშაულოებს ეძებდნენ დასასჯელად, ხოლო საუკუნოობით ნაშენებს ისევე დაუფიქრებლად ანგრევდნენ, როგორც ქრისტიანები წარმართულ კერპებს.

შეიძლება გვერდნამოთლილი ბორცვის სამხრეთ ფერდობზე კერპი არ იდგა, მაგრამ ადამიანის ნაცოდვილარის კვალი ჯერ კიდევ აჩნდა მის გარუჯულ ზედაპირს, ღრმა, მტკივნეული კვალი, სწორედ ისეთი, როგორიც გონებას უფორიაქებდა. რამდენიც არ უნდა ეოხუნჯა, როგორც არ უნდა ეთვალთმაქცა, სოლის მორყევას მაინც ვერ ახერხებდა. ზოგჯერ ხსნა გულგრილობას მოჰქონდა, ზოგჯერ ღიმილს, ზოგჯერ გაცოფებას, მაგრამ ყველაფერი, რასაც ფეხს ადგამდა, ძირმომპალი ეჩვენებოდა. სალად აზროვნება, წინდახედულობა მონობას, არარად ქცევას ნიშნავდა. საქირო იყო სიფრთხილის უკუგდება, რაღაც ისეთის ჩადენა, რასაც კაცს ღმერთიც უშლის და ახლობელთა ბედ-იღბალზე ფიქრიც. სანამ ცოლშვილი თბილისში ეგულებოდა, ბადენ ვერ გახევდა, გათენებას და დაღამებას იმავე ნიღბით უნდა შეჰკვებებოდა, როგორიც სპარსელების თბილისში შემოსვლის დროს აიფარა სახეზე, მაგრამ, როგორც კი ცოლშვილს ქალაქგარეთ გაიგულებდა, რაღაც ისეთს ჩაიდენდა, რაც სპარსელ მემატიანეთა შორის შაითანის სახელს დაუმკვიდრებდა.

სიმწვანით შეფერადებული ქვეყანა სიმკვრივეს იძენდა, მუქი ლაქებითა და მოულოდნელობით იმოსებოდა. შეიძლება ტანმსხვილ, ხშირფოთლოვან ხეებს ქვეშ ისეთივე სიცარიელე იყო მოკალათებული, როგორიც გზაში აედევნა, მაგრამ ეს ხელს არ უშლიდა ყოველი ნაკვეთური ნათლად დაენახა, გამოეცალკეებინა. მანძილისა და ერთფეროვნების დაძლევა ასე

უფრო ეადვილებოდა, უფრო ცხადად ესახებოდა ის, რაც უკან  
დარჩა, რაც ჯერ კიდევ ხორცშესახსმელი, შესამოსავი იყო.

ნადირ-შაჰმა ქართლს უზარმაზარი გადასახადი შეაწერა.  
მას კი შემოუთვალა, ხარკი რაც შეიძლება სწრაფად აეკრიფა  
და ურმებით დაღესტანში გაეგზავნა. ნადირს გაუჭირდა. ლე-  
კების თარეშითა და რბევით შეწუხებულმა გადაწყვიტა და-  
ღესტანი აეღო და ავაზაკთა ბუდე ისე დაენგრია, რომ ველა-  
რავის აღედგინა. სამზადისს დროულად შეუდგა, აზერბაიჯან-  
ში გამოიზამთრა და გაზაფხულზე უზარმაზარი ლაშქარი  
ჩრდილოეთისაკენ დაძრა, კავკასიონს მიადგა. სწორედ კავკა-  
სიონი აღმოჩნდა ის ციხე-სიმაგრე, რომლის აღება ვერაფრით  
ვერ მოახერხა. მრავალრიცხოვან ჯარს ვიწრო ხეობებში მოძ-  
რაობა უჭირდა, შიმშილი, სახადი და სიცივე მუსრს ავლებდა  
სამხრეთელებს. ზოგჯერ რამდენიმე მთიელი მთელ რაზმს აკა-  
ვებდა და აუნაზღაურებელ ზარალს აყენებდა. ბოლოს მუს-  
ლიმანები იქამდეც კი მივიდნენ, რომ ღორის ხორცის ჭამა და-  
იწყეს. დრო იყო, ნადირს თავი დამარცხებულად ეცნო, უკან  
გაბრუნებულიყო, მაგრამ იგი ასე ადვილად ვერ ეგუებოდა  
მარცხს. ჯერ კიდევ იმედი ჰქონდა, რომ რამეს მოიგონებდა,  
კავკასიონის აულეებელ მთებს აიღებდა. რამდენიმე ციხე და ხე-  
ობა გასული წლის გაზაფხულზე წაართვა ლეკებს, მაგრამ  
მთელი დაღესტნის ასაღებად დრო, ფული და სურსათი იყო  
ნაჭირო, ფულისა და სურსათის მოსაპოვებლად კი ახლო-მახ-  
ლო მდებარე ქვეყნების დაბეგვრა. შაჰის სიტყვიერ შემონათ-  
ვალს მალე წერილობითი განკარგულებაც მოჰყვა. მძიმე ბეჭ-  
დის ანარეკლი და შავი მელნით დაწერილი ასოების სიცხადე  
მბრძანებელსა და ხელქვეითს შორის მანძილს ამოკლებდა,  
მაგრამ მას არც ხარკის აღება უცდია და არც პასუხის გაცემი-

სათვის შეუწყებია თავი. ხალხს ტყავს თუ გააძრობდა, თორემ წასართმევი არავის არათფერი ჰქონდა. სამი ათასი უღელი ზარი სულ არ დაბოგინებდა ქართლში. ასე გაწყდა ის სუსტი ძაფი, ნადირ-შაჰთან რომ აკავშირებდა. ამიერიდან ან თუითონ უნდა გამხდარიყო თავის ხალხისა და ქვეყნის პატრონი, ანდა იმათ მიმხრობოდა, ვინც ნადირ-შაჰის წინააღმდეგ იბრძოდა.


დაღლილი, მზით გაღახული ამილახვარი კიდევ ერთხელ გასწორდა წელში და როცა ღუმელივით გახურებულ უღაბნოში ნიავი შემოიქრა, მოზღვავებულ აჩრდილებს კვლავ გაუღო კარი. ამ მრავალრიცხოვან, მოფუსფუსე ბრბოში ერივნენ ისეთებიც, ვისი ვალიც თან გამოჰყვა, მაგრამ ახლა არც ვალის გადახდის საშუალება ჰქონდა და არც ანგარიშსწორების სურვილი. ერანელთა წინააღმდეგ მარტო იმიტომ კი არ აჯანყდა, რომ ნადირ-შაჰის რისხვისა ეშინოდა, არამედ ქართლის მოღუნებამ, გაყუჩებამ შეაშფოთა. თავადი და ანგარიშგასაწევი კაცი მხოლოდ მანამდე იყო, სანამ საქართველო არსებობდა, სანამ იმ მიწაზე ედგა ფეხი, რომელიც წინაპრებმა დაუტოვეს: შემდეგ კი გუდანაბადი უნდა აეკრა და ბედის საძებნელად შორეულ გზებს დასდგომოდა. უცხო გზებზე ხეტილის სიტკბოება სიჭაბუკეში არაერთხელ უგემია, უსასრულო ველები გადაუვლია, მაღალი მთები გადაულახავს, ბოსფორი და დარდანელი გადაუცურავს, მაგრამ ისე ლალად არსად უგრძენია თავი, როგორც თავის აოხრებულ, გაღატაკებულ, ზნეშელახულ ქვეყანაში გრძნობდა. სწორედ ეს ქვეყანა იყო ახლა უკუნით მოცული და თუ მისი დანახვა უნდოდა, წინ აფარებული ფარდა ხმლით უნდა გაეპო.

მანშე ერისთავის დამარცხების შემდეგ ქართლში არავინ გაფაჩუნებულა, არათფერი გახმაურებულა. თბილისში გამოკე-

ტილს ისეთი გრძნობა ჰქონდა, თითქოს მიღმა მდებარე ქვე-  
ყანა ცხოვრებას მოსწყდა, დაცარიელდა. სიცარიელე გვერდ-  
მომპალ კრილობასავით ფართოვდებოდა, ამარზუნად იშშუშ-  
ნებოდა. შეიძლება ამდენი ვაი-უბედურების შემდეგ შვირე  
ხნით მოდუნება, გაგულგრილება საჭიროც კი იყო, მაგრამ  
როცა გულგრილობას მძიმე ავადმყოფობის ნიშნები დაეტყო,  
გადაწყვიტა სიცარიელე ამოევისო, გათიშულნი დაერაზმა, ბე-  
დის, ღმერთის, უაზრობის წინააღმდეგ ამბოხებულყო. მთე-  
ლი ზემო ქართლი და ქსნის ხეობა მის ხელში იყო, არაგვის  
ერისთავი ერთგულებას ეფიცებოდა, ხოლო ხუთივე საეპის-  
კოპოსოს ეპისკოპოსებთან მანამდე დაიწყო მოლაპარაკება, სა-  
ნამ მოიფიქრებდა, როგორ გაეყვანა ცოლშვილი თბილისიდან.  
ადიდებული მტკვრის მღვრიე წყალს მღვრიე წყალი ემატე-  
ბოდა, ხლართს ხლართი, იბმებოდა უხილავი ქსელი და მიუ-  
ხედავად იმისა, რომ საბოლოო გამარჯვების იმედი არ ჰქონ-  
და, მომავალს მაინც ხალისიანად ეგებებოდა, წვიმიანი გაზაფ-  
ხულის ჭექა-ქუხილით ივსებოდა.



პრილის დამდეგს, როგორც კი მთები თეთრი საფარისაგან  
განთავისუფლდა, აზერბაიჯანის ქარების სარდალმა ფათალი-  
ხანმა იმამ-ყული-ხანი ალაზნის პირას იხმო, საიდანაც გაერთი-  
ანებული ძალებით ქარელი ლეკებისათვის უნდა შეეტიათ.  
იმამ-ყული-ხანს ქართველი თავადებიც გაჰყვნენ თან. თბილი-  
სი თითქმის დაუცველი დარჩა. სპარსელებს იმედი ჰქონდათ,  
რომ აღდგომის წინა დღეებში ქართველები ამბოხებასა და  
სისხლის ღვრას მოერიდებოდნენ, მაგრამ ამ შემთხვევის ხე-  
ლიდან გაშვება მკვლრებით აღმდგარი ღმერთის ხატრითაც



არ შეიძლებოდა. იარალი წინასწარ დაურიგა ყველას, ვისაც მასთან ერთად გაქცევა სურდა, ქალები და ბავშვები თბილად შემოსა, შინაყმებს კი უბრძანა ბზობა ღამეს ყველა ცხენს შეკაზმული ჰყოლოდათ. გაზაფხულის სურნელოვანი ჰაერი აყვავებული ქვეყნის მთელ იმედს იტევდა, მიწა მსუბუქად სუნთქავდა, ამბოხების, განწმენდის სურვილი ყველა კარს აღებდა, განსაცდელს თამამად ეგებებოდა.

როგორც კი სიონის დიდი ზარები აგუგუნდნენ, ქრისტიანები ეკლესიებისაკენ დაიძრნენ, მუსლიმანები კი ქუჩებში გამოეფინნენ და აყაყანდნენ. ამ დროს თბილისში ისპაჰანელი დიდვაჭარი შემოვიდა საპალნეაკიდებული აქლემებით, სახედრებით, დახლიდარებით და ბაზარში ნაყიდი მონებით. ისა-ედდინი გამაჰმადიანებული ებრაელი იყო, მონები კი სხვადასხვა რჯულისა და მოდგმის ყმაწვილები. ზოგიერთს ჯერ კიდევ ახსოვდა მშობლიური ენა და იმ სოფლის სახელი, სადაც დაიბადა. ქარავნის თბილისში შემოსვლამ ქალაქი ააფორიაქა, აამჩატა. აქლემებს ძვირად ღირებულ საქონელთან ერთად რაღაც სანუკვარი ოცნების მაგვარიც მოჰქონდათ. ამ ოცნებას თუ ზანგრძლივად არა, დროებით მაინც შეეძლო მაღალი კედლების გადალახვა, ისეთ სამყაროში გადასახლება, სადაც ფერი ფერს ამდიდრებს და სასწაული სასწაულს დამაჯერებლობას მატებს. ჩალვადრების ყიყინი, აქლემების ეყვანთა ქლარუნი და ძაღლების ყეფა ქალაქს დამთქნარების საშუალებას არ აძლევდა, საღერღელს უშლიდა. დედაკაცებით, ბაღლებითა და ძაღლებით სავსე ქუჩები ფეხს იდგამდნენ, ქარავანს უკან მისდევდნენ. გამაბრუებელი ჰაერის თხელ სამოსელში იმდენი ვარაუდი, ფიქრი, ვნება, ბოღმა და სიზმრები ეხვეოდნენ, რომ მან ვერც მათი ერთმანეთთან დაკავშირება შეძლო და ვერც მათ-

ში გათქვეფა, მაგრამ ამ ბუნდოვან გარემოს მის სულში რა-  
ღაც ისეთი შემოჭმონდა, რასაც სიყვარული ჰქვია და შემოჭ-  
ლიური მიწის სუნი უდის.

ამილახვარს ვილაციის ძახილი მოესმა. დაწინაურებულმა  
ხეირიანად ვერც კი გაიგო ვის უხმობდნენ, მაგრამ სანამ თავს  
მოაბრუნებდა, წარბი გახსნა და სახეზე ნიღაბი აიფარა. სპარ-  
სელები ჩამორჩენილიყვნენ, ფეხდაფეხ მხოლოდ საკუთარი  
ჩრდილი მოსდევდა. ნუთუ იგი ვერასოდეს დაინახავს მოძრავ  
ჩრდილს, ვერ გაარჩევს შავს თეთრისაგან, ნუთუ მისთვის ამ-  
ქვეყნად სიბნელის მეტი არაფერი იარსებებს? თვალდავსებუ-  
ლი ბევრი უნახავს, მაგრამ სიბრმავე მაინც ძნელი წარმოსად-  
გენი აღმოჩნდა, მით უმეტეს ისეთ დროში, როცა კაცს თავის  
გასატანად ათი თვალი და ათი ყური სჭირდებოდა. ერთადერ-  
თი ადგილი, სადაც თვალს არაფერი იტაცებდა, უდაბნო იყო.  
მთელი ქვეყანა რომ ასეთი უსახური და უსინჯარულო ყოფი-  
ლიყო, მაშინ, ალბათ, უსინათლობასაც უფრო იოლად შეეგუ-  
ებოდა, მაგრამ მას ქვეყნის სხვაგვარი სახეც ახსოვდა.

როცა ქალების, ბავშვების და რამდენიმე ზემოქართლელი  
თავადის თანხლებით დასავლეთის კარიბჭეს მიაღგა, მცველე-  
ბი უკვე შეკრული და პირში ჩვარჩაჩრილნი ეყარნენ. პატარა,  
სულ ოციოდე კაცისაგან შემდგარმა რაზმმა ისე სწრაფად აჰ-  
ყარა იარაღი ყიზილბაშებს, რომ ლოცვითა და ოცნებით შებ-  
ყრობილ ქალაქს არაფერი გაუგია. თავზე წამოყუდებული ცი-  
ხის სიმძიმე კარის გაღებისთანავე შემსუბუქდა, გრილმა ნიავ-  
მა ადევნებული სიმყრალე ქალაქშივე შეაბრუნა, თბილისი  
ისე მიატოვა, რომ გული არაფერზე დასწყვეტია. ყმობისაგან  
თავდახსნილს სივრცე და თავისუფლება იტაცებდა, მოუკირ-  
წყლავი გზა დაკარგულ ფინიასავით ეგებოდა ფეხქვეშ, ჩრდი-



ლები დიდმის ქალებისაკენ მიუძღოდნენ. ახლა მთავარი იყო მცხეთამდე ჩაედწია როგორმე, ქალები და ბავშვები დაებინა-ვებინა, განსაკუთრებით იმ თავადთა ცოლშვილი, რომლებიც იმამ-ყული-ხანს უნდა გამოჰქცეოდნენ და არაგვის ხეობაში გადმოსულიყვნენ, შემდეგ კი თვითონ დაუწყებდა დევნას ყი-ზილბაშებს. ქართველების სისხლი მათ იმდენი ემართათ, რომ ასანაზღაურებლად საუკუნეებიც არ იკმარებდა.

სიბნელით ამოვსებული სივრცე მაინცდამაინც შორს ყუ-რების საშუალებას არ იძლეოდა, მაგრამ თვალი იმითაც კმა-ყოფილი იყო, რასაც ხედავდა — აყვავებული ხეების ცვალებად გარეხაზს, ჩამუჭებულ ჩრდილებს, ამეტყველებულ სახე-ებს. მათ უკვე აღარ ეშინოდათ ქვის ყრუ კედლების, სიბნე-ლის, უმწიობის. გაქენებული ცხენების ლტოლვა და ბნელი-დან მომზირალი აჩრდილები საუკუნეებს ხის ნორჩი ფოთლე-ბივით აშრილებდნენ, დაუდევრად კეცავდნენ და როცა ნი-ავს წააწყდებოდნენ, ისე ფურცლავდნენ, თითქოს ყველაფერი ერთი ამოუხსნელი, დაუმთავრებელი ზმანების ნაფლეთები იყო. თვალს არაფერი ეუცხოებოდა — არც მთვარის სხივე-ბით გაკაშკაშებული ტაძარი, რომელსაც ირგვლივ სახედაში-მებული ქურუმები უვლიან და მოთმინებით ელიან იმ წუთს, როცა მსხვერპლად შეწირული ქალწულის მკერდიდან თბილი სისხლი იღეთქებს, არც კვერთხს ჩაბლაუჭებული მღვდელ-მთავრები, არც თავიდან ფეხებამდე შექურვილი რაინდები და არც იმის ხატება, ვინც არსად იყო და ყოველივე არსებულს იტევდა, ვისაც მსხვერპლი არ სჭირდებოდა და მსხვერპლს მა-ინც სწირავდა, ვისაც სათქმელი არაფერი ჰქონდა და მაინც ალაპარაკებდნენ, აწვალებდნენ, რადგან თუ წვალებას აზრი არ ჰქონდა, მაშინ არაფერს არ ჰქონდა აზრი.



როცა მცხეთას მიაღწენ, ცა უკვე ფერს იცვლიდა და აღ-  
 მოსავლეთ კიდურზე შემორჩენილი ღრუბლების გადაყრას  
 ცდილობდა. აღიდებული მტკვარი ავად იღრინებოდა და ხელს  
 არავის იკარებდა. მცხეთის ხიდი რომ აყრილი იყო, ეს ადრე-  
 ვე იცოდა, იცოდა ისიც, რომ სხვების დაუხმარებლად ამდენ  
 უმწეთ არსებას ვალმა ვერ გაიყვანდა, მაგრამ არაგვის ერისთა-  
 ვი პირიანთ კაცი აღმოჩნდა. მცხეთაში ჯარიც დაახვედრა და  
 ნავტიკებიც. სადღაც, ცხრა მთას იქით, უზარმაზარი, აფრაგა-  
 შლილი ხომალდები ოკეანეებს სერავდნენ, მას კი იმის საშუა-  
 ლებაც არ ჰქონდა, რომ მდინარე გადაელახა უხიფათოდ. მარ-  
 ტო რომ ყოფილიყო, ცხენს მტკვარში შეაგდებდა და ავად  
 თუ კარგად ვალმა გავიდოდა, მაგრამ ქალებისა და ბავშვების  
 წყალში შეყრა იგივე იქნებოდა, რაც მათი წყლისთვის გატა-  
 ნება. ამიტომაც მოიგონა შორეული წინაპრების მიერ არაერ-  
 თხელ ნაცადი ხერხი. ბეჟან ერისთავს შეუთვალა, გაბერალი  
 ტიკები ერთმანეთისათვის გადაება, ზედ ფიცრები დაემაგრე-  
 ბინა და წყალში ჩაეშვა. ბეჟანმა პირნათლად შეასრულა დანა-  
 ბარები. როგორც კი ინათა, მეომრებმა წყალში ჩაშვებულ  
 ნავტიკები ახსნეს და მათკენ გამოემართნენ. მტკვრის დანაო-  
 ჰებული ზურგი თანდათან მუქდებოდა, უძირო უფსკრულის  
 სიღრმეს იძენდა. ჯამბაზბ არასოდეს ყოფილა, მაგრამ იმ დღეს  
 თოვზე გასულივით ირწეოდა, ღმერთს მადლობა მხოლოდ მა-  
 შინ შესწირა, როცა ყველა მშვიდობიანად გაიყვანა ვალმა.

უკან მომავალი საქურისი ისევ ალაპარაკდა. ნერწყვგამშ-  
 რალს ხმაზე ეტყობოდა, რომ სიცხემ და ოფლის სუნმა შეაწუ-  
 ხა. ერთი-ორჯერ შინ დატოვებული იადონი ახსენა, მაგრამ ახ-  
 ლა იგი ხეთა ჩრდილს ბულბულის სტვენაზეც არ გაცვლიდა.  
 სანატრელი ქვეყანა მხოლოდ იქ იყო, სადაც სიმწვანე ისახე-



ბოდა, სიმწვანე და ჩრდილი, ჩრდილი და ლოცვა, ლოცვა და პურის ჭამა, პურის ჭამა და თვალის მოტყუება, საქუროისმ ფრთხილი ძილი იცოდა, ცალი თვალი მუდამ დიაჲ ჰქონდა, მაგრამ ამდენ სიფრთხილეს ტყუილად იჩენდა. მისი ტყვე არსად გაქცევას არ აპირებდა.

მცხეთაში ტალახი ჩამოიფხიკეს, ტანსაცმელი გაიშრეს მაგრამ დუშეთში ასვლამდე ისევ ამოისვარნენ ლაფში. თოვლი ჯერ კიდევ დნებოდა, გზები ზოგ ადვილას გადარეცხილი იყო, ზოგან კი წყლით დაფარული. ხარებს უჭირდათ ურმების ტალახიდან ამოთრევა; აღმართზე ფეხის მოკიდება. მეომრები დაიჭანცნენ, ხელები გადაეყვლიფათ. დუშეთში ერთბაშად იმდენმა ხალხმა მოიყარა თავი, რომ ეს პატარა სოფელი საომარ ბანაკს დაემსგავსა. იმ საღამოს დიდებული პური ჭამეს, იმღერეს, იცეკვეს. თუ მთელი ქართლი არა, მისი დიდი ნაწილი მათ ხელში იყო და ადვილად აღარავის დაანებებდნენ თავისუფლებამ მერყევენიც კი გააამაყა, გააგულადა. მეორე დღეს ზემო ქართლის თავადები, ქსნისა და არაგვის ერისთავები იხმო და როცა მინდორი ხალხით აივსო, სიტყვა წარმოთქვა, თბილისიდან წამოღებული ფული და იარაღი დაარიგა ახლა კარგად არ ახსოვს, რა თქვა, მაგრამ როცა საქმე ფიცზე მიდგა, უკან არავის დაუხევი. წმინდა გიორგის ხატთან პირველად თვითონ მივიდა, ორივე ხელით ჩაეჭიდა და ისე ხმამალლა წარმოთქვა ფიცი, თითქოს სურდა მისი ხმა ცასაც მისწვდომოდა. დროშების ფრიალმა და ერთსულოვანმა შეძახილებმა ხალხი აღაფრთოვანა, დიდი და პატარა ფიცს დებდა ხატს კოცნიდა. იმ დღეს ყველა დარწმუნებული იყო, რომ ლატს არასოდეს გაივლებდა გულში, მაგრამ შემდეგ იმდენმა უღალატა, რომ ყველას გვარი და სახელი აღარც კი ახსოვს.

თუმცა ზოგჯერ კაცს მოღალატედ მხოლოდ დაღალატიანებუ-  
ლი თვლის. ბოლო დროს ქართლში ისეთი ვითარება შეიქმნა,  
რომ ბევრმა შეიძლება პირადად მას უღალატა და დაეცა.  
ნას.

მხარმარცხნივ, უსასრულობის უკიდურესი ზღვარის მახ-  
ლობლად კვლავ გამოჩნდა მრუდე, მუქი ზოლი და უეცრად  
ზოლის შუაგულში რაღაც ისე გაბრწყინდა, თითქოს ძაფზე  
ბრილიანტი ჩამოაცვესო. ბრილიანტი მანამდე ბრწყინავდა,  
სანამ ბორცვებმა სივრცე არ დაინაწილეს და ცის კიდური არ  
დაჩრდილეს.

როცა საზეიმო განწყობილება დაცხრა, უამრავმა საქმემ  
წამოყო თავი. სანამ ყიზილბაშები მტკვარს გადმოლახავდნენ,  
საქირო იყო ჯარის შეიარაღება, ციხეების გამაგრება, თურ-  
ქეთთან და რუსეთთან კავშირის დამყარება. ამ სამი სახელ-  
მწიფოს ინტერესები ისე უნდა დაეპირისპირებინა ერთმანე-  
თისათვის, რომ ორ მათგანს მისთვის ფულიც გამოეგზავნა და  
ჯარიც მოეშველებინა. სხვაგვარად სპარსელებთან ომი გა-  
უქირდებოდა. მართალია, ოსმალები სასურველი სტუმრები  
არ იყვნენ, მაგრამ აჯანყებული ქართველები პირველ რიგში  
იმას ებრძოდნენ, ვისაც ქვეყანა ეპყრა ხელთ. სხვა გამოსავა-  
ლი არ ჩანდა, არ არსებობდა. გათიშულ ქვეყანას მხოლოდ  
მტრების გათიშვა აძლევდა მცირე ხნით სულის მოთქმის სა-  
შუალებას. იმ დღეებში რატომღაც დარწმუნებული იყო, რომ  
წინაპართა შეცდომას არ გაიმეორებდა, გარეშე მოვლენებს  
თავს არ დააჩაგვრინებდა, მაგრამ ყოველდღიურმა წვრილმა-  
ნებმა ისე აწეწ-დაწეწა ყველაფერი, რომ ბოლოს სასჯელის  
მეტი ვერაფერი დაიმსახურა.

ამილახვარს ერთი წუთით მოეჩვენა, თითქოს ქვეყანა ამობ-



რუნდა და ცას მიეწება. ბორცვები, ამომშრალი ხევი და სახე-  
 ებიანი სიმწვანე ადგილს ინაცვლებდა, ხან ცის გრდურს ეცვ-  
 როდა, ხანაც უსაზღვროებაში იძირებოდა. მხარსაქცევმა აღარ  
 იცოდა საით გაეხედა, რას მოსჰიდებოდა, როგორ დაებრუნე-  
 ბინა წართმეული ქვეყანა. ერთხანს მტვრით ამოვსებულ თვა-  
 ლებს იწმენდა, შემდეგ ცხენს გაუწყრა და როცა ჭუჭყიანი  
 ზელით სადავე მოქაჩა, გაუფერულებულმა წარსულმა კვლავ  
 შეისხა ხორცი.

ქართლი მის თვალწინ იმოსებოდა, მწვანდებოდა, მაგრამ  
 იგი ვერაფერს ამჩნევდა. დრო უკანმოუხედავად გარბოდა,  
 დაფიქრების საშუალებას არ იძლეოდა. ყველაფერი სასწრა-  
 ფოდ თავმოსაბმელი, გზადაგზა მოსაგვარებელი იყო. ორ თვე-  
 ში თითქმის ახალი სახელმწიფო უნდა შეექმნა და ისე ემართა,  
 რომ მტერსაც ეცნო და მოყვარესაც. ცოლ-შვილი ერთხანს  
 თან დაჰყავდა, მაგრამ მალე შათი ყველგან თან ტარება გაუ-  
 კირდა და მიუვალ მთებში გახიზნა. არაგვის საერისთავო სან-  
 დო კაცის ხელში იყო, ქსნის ხეობა რევან ამილახვარს ჩააბა-  
 რა, თვითონ კი ზემო ქართლში გადავიდა და ციხეებში ქართ-  
 ველი მეციხოვნენი ჩააყენა. საგანგებოდ გაამაგრა სურამის,  
 ახალდაბისა და კეხვისის ციხე, რადგან ეს ციხეები ახალცი-  
 ხისა და იმერეთისაკენ მიმავალ გზებს რცავდნენ. ქართლში გა-  
 მეფებულნი მდუმარება დაირღვა, ხალხი ამოძრავდა, აღიღინ-  
 და. ცხოვრებამ აზრი და სიხალისე შეიძინა. პურის ჭამა — პუ-  
 რის ჭამას ჰგავდა, შრომა — შრომას, სიცილი — სიცილს და  
 ტირილი — ტირილს. იმედი ფრთებს ისხამდა, ექვეებს შორის  
 გზას იკაფავდა. სწორედ ამ დროს შემოუთვალა ნადირ-შაჰმა.  
 თბილისში დაბრუნდი და ყველაფერს გაპატიებო. რა ჰქონდა  
 საპატიებელი, რა ემართა ან შაჰის ან მისი დამქაშების? მიწა,

რომელზედაც ფეხი ედგა, მისი სამშობლო იყო და თუ ქატილ  
ვარგოდა, მომხდურისაგან უნდა დაეცვა. ამიტომაც არ დაუ-  
წყია ყოყმანი, შაჰს უარი ისე შეუთვალა, რომ ცხენდან ~~დაეცა~~  
კი ჩამომხტარა.

სპარსელებს სოლომონი და ყაზახის სულთანი წამოეწივ-  
ნენ. ახლა მის ზურგს ოთხი წყვილი თვალი უყურებდა, ოთ-  
ხი წყვილი მზით გამოხუნებული თვალი, რომელთაც არც  
დათხრა ელოდა და არც დაწვა. დასათხრელი თვალები მხო-  
ლოდ მას ეწყო უბეებში და ეს ამოდენა ხალხი ერთი წყვილი  
თვალისათვის მზის ქვეშ იხრუკებოდა, გზის შესამოკლებლად  
ზმანებებს ებლაუჭებოდა. სოლომონი სპარსულს ისე ლაპა-  
რაკობდა, თითქოს მედრესეში იყო გაზრდილი. მისი სხვები-  
საგან გამორჩევა მხოლოდ დაბალი, სასიამოვნო ხმით შეიძ-  
ლებოდა. ყაზახის სულთანს სპარსულზე და თურქულზე უფ-  
რო ქართული ეხერხებოდა, მაგრამ საუბრის ერთი ენიდან  
მეორეზე გადატანას ვერ ბედავდა. ყველაზე მეტს საქურისი  
ლაპარაკობდა — მას ბევრი რამ ჰქონდა ნანახი, გაგონილი და  
გადატანილი, ეტყობა, ამბის მოყოლაც იცოდა, რადგან და-  
ნარჩენები ყურადღებით უსმენდნენ. მოსახვევამდე თვითონაც  
უგდებდა ყურს ბერიკაცს, სხვისი იარაღით ებრძოდა დროს,  
ხოლო როცა შეგნებიდან უკან მომავალთა სახეები განდევნა  
და ყურადღება გარე სამყაროზე გადაიტანა, ერთი ძველი ამ-  
ბავი მოაგონდა. სპარსეთის რომელიღაც შაჰი სპარსეთის რო-  
მელიღაც თავადს არაერთხელ მოყოლილ ამბავს უამბობდა,  
მაგრამ თავადი მაინც ისეთი ყურადღებით უსმენდა, რომ ბო-

გირი ვერ შეამჩნია და ცხენიანად წყალში გადავარდა. იმ დღი-  
დან თავადს შაჰის წყალობა და პატივისცემა არ მოჰკლებია.

ამილახვარმა გზის პირას წამოსკუპებულ მინდვრის თავგეს  
თვალი შეავლო და გამშრალი ტუჩები გაიღოკა: სწყუროდ, მაგ-  
რამ წყურვილის მოკვლას მერეც მოასწრებდა, შიოდა, მაგ-  
რამ შიმშილსაც იქ დაიკმაყოფილებდა, სადაც წყურვილს მო-  
იკლავდა. მანამდე კი შეიძლებოდა დრო გადაეადგილებინა  
ისევ იმ ამბებს დაბრუნებოდა, რომელთა სიციხადემ და გაუ-  
გებრობამ აქამდე მოიყვანა.

ივლისის ბოლოს ყიზილბაშებმა მტკვარი გადმოლახეს და  
არაგვისა და ქსნის ხეობებს შეესივნენ. ორ თვეში ხუთი ათა-  
სამდე მეომარს მოუყარა თავი, ათას კაცამდე ციხეებში და  
კოშკებში ჩააყენა, მაგრამ ამ ჯარით ბრძოლებში ნაცად, ინგ-  
ლისური ზარბაზნებითა და თოფებით შეიარაღებულ ოციათა-  
სიან ლაშქარს ვერაფერს დააკლებდა. მას შემდეგ, რაც პირ-  
ველად მიიღო ბრძოლაში მონაწილეობა, მუდამ იმას ნანობდა,  
რომ საქართველოს მუდმივი, გაწვრთნილი ჯარი არ ჰყავდა.  
სანამ შორსმსროლელ იარაღს გამოიგონებდნენ, ეს ნაკლი მა-  
ინცდამაინც მწვავედ არ იგრძნობოდა, მაგრამ შორსმსროლე-  
ლი იარაღის გამოგონებისა და გაუმჯობესების შემდეგ, ხმლის  
იმედით მხოლოდ ის რჩებოდა, ვისაც სხვა გამოსავალი არ  
ჰქონდა. გამოსავალი მასაც არ ჰქონდა და ამიტომ ყიზილბა-  
შებთან პირისპირ შებმას ერიდებოდა, მტერს მხოლოდ მაშინ  
ესხმოდა თავს, როცა ადგილ-მდებარეობა ხელჩართული  
ბრძოლის საშუალებას იძლეოდა. სანამ წვიმები დაიწყებოდა,  
საჭირო იყო გზების შეკვრა, ციხეების გამაგრება, მტრის ძა-  
ლების დაქსაქსვა, შემოდგომაზე კი სპარსელები თავიანთი ფე-  
ხით დაიხვედნენ უკან. სწორედ ამ დროს მიეცემოდა იმის სა-



შეალება, რომ რაც შეიძლება ნაკლები ყიზილბაში გაეშვა  
მტკვარგალმა.

ბეჭედმა მზის სხივები აირეკლა და ანარეკლი ისე ეცა  
თვალში, როგორც ეკალი. მძაფრ მოძრაობას შეუვლი გზის  
მანძილზე ერიდებოდა, გარემოს ეგუებოდა, მაგრამ ახლა თავი  
ვერ შეიკავა და გვერდზე გადაქანდა. ცხენმა იმწამსვე იუცხო-  
ვა სიძიმის მოულოდნელი გადაადგილება და მხოლოდ მას  
შემდეგ დამშვიდდა, როცა მხედარი გასწორდა, თვალი და-  
ხუჭა. თვალის დახუჭვას სიბრმავესთან საერთო არაფერი  
ჰქონდა. მზის სხივები ქუთუთოებში ატანდა, თვალის გუგას  
სწვდებოდა, ჩრდილებად და ლაქებად იშლებოდა, მტვრით  
ივსებოდა, უზარმაზარ გობივით ემხობოდა თავზე. ახლა რამ-  
დენიც არ უნდა ეთვალთმაქცა, როგორც არ უნდა მოეტყუე-  
ბინა თავი, ღია კიშკარს მაინც ვერსად იპოვიდა. შეიძლება  
შაჰს ან მის ჯალათებს ხელიდან დასხლტომოდა, მაგრამ თავზე  
წამომხობილი საწუთროს საზღვრებს ვერც ცოცხალი დააღ-  
წევდა თავს და ვერც მკვდარი.

ამილახვარმა თვალი გაახილა. გზა ათიოდე ნაბიჯით შემოკ-  
ლებულიყო, მაგრამ ახლა ათ ნაბიჯსაც მნიშვნელობა ჰქონდა,  
მნიშვნელობა ჰქონდა ყველაფერს, რაც ბედთან და მარტო-  
ობასთან ბრძოლაში ეხმარებოდა, განსაცდელს უმსუბუქებდა.  
ყიზილბაშების სისხლი იმდენი ემართა, რომ შაჰს ასჯერ რომ  
მოეკლა, გაეცოცხლებინა და ისევ მოეკლა, მთლიანად მაინც  
ვერ აინაზღაურებდა, მაგრამ ამის გამო ისედაც გრძელი გზის  
კიდევ უფრო გაგრძელება არ ღირდა. ისპაჰანში გულიც უნდა  
ჩაჰყოლოდა, ენაც და ღიმის უნარიც.

როგორც კი სპარსელებმა ციხეებს ალყა მოხსნეს და უკან  
დახვევა დაიწყეს; ზემო ქართლიდან მთელი თავისი ჯარით ქვე-



მო ქართლში გადმოვიდა და მტერს უკან აედევნა. ყრბილბა-  
შები ჩქარობდნენ, ნისლისა და აედრის ისე ეშინოდათ, რო-  
გორც ღვთის რისხვის. ყოველი ჩამორჩენილთა კრებულმათი  
ლუკმა, მათი ნადავლი იყო. რამდენიმე დღის შემდეგ მათი  
თავსაყრელად ჰქონდა, თოფი, თოფისწამალი და ტყვია ყვე-  
ლას ყოფნიდა. მიუხედავად ამისა, ხალხს მაინც უფრთხილდე-  
ბოდა, ასი კაცის დაკარგვა მისთვის უფრო დიდი დანაკლისი  
იყო, ვიდრე სპარსელებისათვის ათასის. ყიზილბაშებს მხო-  
ლოდ მაშინ შეუტია გულდაგულ, როცა მტკვარზე გადასვლა  
დაიწყეს. ყიზინი ვიწრო ხეობას აყრუებდა, ბრძოლის სისას-  
ტივე მკლავს ძალას მატებდა, ხმლის ყოველი მოქნევა თითო  
კაცის სიცოცხლეს იწირავდა. სისხლმა და დაგროვილმა ბოლ-  
მამ ქართველები დაათრო, გაახელა. იკვეთებოდა თავები, ილე-  
წებოდა მხრისა და ლავიწის ძვლები, იფატრებოდა მუცლები.  
მტკვარი გვამებით აივსო, წითლად შეიღება. გაღმა გასული  
ყიზილბაშები უკან მოუხედავად გარბოდნენ თბილისისაკენ.  
ეს რომ საბოლოო გამარჯვება ყოფილიყო, ხმაღს კედელზე  
დაკიდებდა და ათას საქმეს მოკიდებდა ხელს — აღადგენდა  
ტაძრებს, გზებს და სასწავლებლებს, ააშენებდა ბრძმედებს,  
საამქროებს და ქარვასლებს, დაიწყებდა ფულის მოჭრას, წიგ-  
ნის ბეჭდვას, ზღვის გაღმიდან რალაციის შემოტანას, მაგრამ გა-  
ზაფხულამდე ისე ცოტა დრო იყო დარჩენილი, რომ ასეთ რა-  
მეზე ფიქრი ოცნებას უფრო ჰგავდა, ვიდრე სინამდვილეს.

სინამდვილე ამდენ თავისუფლებას, ამდენ გასაქანს არ იძ-  
ლეოდა. აღმოსავლეთიდან ყოველ დღე უბერავდა სულის შემ-  
ხუთავი, მძორის სუნით გაყვნილი ნიავი და ხმელ ხეებზე  
შემომსხდარ ყორნებს აჩხავლებდა. ქვეყანა იძარცვებოდა,  
ისეთივე მიუსათარი ხდებოდა, როგორც ერთ დროს, ჯერ კი-

დევ სიცოცხლის გაჩენამდე იყო. ლოდინი ვარაუდს ავიწრო-  
ებდა, ვარაუდი ლოდინს უთხრიდა ძირს. ამ დროს არაფერი  
არ ენატრებოდა ისე, როგორც ღვინო, ღვინო და ღვინის მსახე-  
ლი ვაყვაცები. ცეცხლის პირას გაშლილი სუფრას, ანაგისტის მსახე-  
ლები, გამოუღვეველი სადღეგრძელოები და ძველისძველი სიმ-  
ღერები დროს ბუხართან ან შუაცეცხლთან არ უშვებდა, თით-  
ქმის იმხელავე ადგილს ისაკუთრებდა, რამხელაც მთელ ქვე-  
ყანას ეჭირა.



ცოდვების შიშით ამქვეყნიურ სიამოვნებაზე ხელი არასო-  
დეს აუღია, მაგრამ იმ დღეებში ისეთი ცოდვა თუ მადლი ჩა-  
იდინა, რომ აქამდე ვერ დაუვიწყებია. ღამის გასათევად თავად  
ელიზბარ დავითაშვილის ოჯახში ჩამოხტა. თავადი ორმოცდა-  
ათ წელს გადაცილებული, ცხოვრებაზე გულაცრუებული კა-  
ცი იყო და სახლში ფუსფუსს გარეთ წანწალი ერჩია. აჯანყე-  
ბამდე სოფლის მღურვით იქარვებდა ჯავრს, მაგრამ აჯანყების  
შემდეგ მგლის მუხლი გამოიბა, ცხენიდან აღარ ჩამოდიოდა,  
ხან ერთ ციხეში იყო, ხან მეორეში, იმედი ჰქონდა, რომ ყი-  
ზილბაშებს ქართლიდან განდევნიდნენ. წინა დღით ლიახვის  
ხეობაში გადასულა და კაციშვილმა არ იცოდა, როდის დაბ-  
რუნდებოდა. მასპინძლობა მისმა ახალგაზრდა, ღვთის ხელით  
შემკულმა, უჩვეულო შუქით გამთბარმა ცოლმა გაუწია. ლა-  
მაში ქალი ბევრი უნახავს, მაგრამ ჰქუა არასოდეს დაუკარ-  
გავს. იმ საღამოს კი მეტწილად დუმდა, საკუთარ თავს ვეღარ  
ცნობდა. სუფრას მასპინძლის გარდა ჩიხტიკობით თავმორთუ-  
ლი დედაბერი და ორი აზნაური უსხდნენ. აზნაურები ღვინოს

აძლებდნენ, მეინახეობას უწევდნენ. მისი დათრობა სხვა  
დროსაც ჰქონდა, ახლა კი მდევიც ვერ დაათრობდა. მზერა ქა-  
ლის გულმკერდს და წელს ეალერსებოდა, დაუნახავის დანახ-  
ვას ცდილობდა, წარმოდგენა საწოლს შლიდა, ახალგაზრდებს  
ზეწარს კმუჭნიდა. აზნაურები ისე მალე, ისე უხეიროდ დათ-  
ვრნენ, რომ მათი სუფრასთან ჯდომა აღარ შეიძლებოდა და  
დედაბერმა ისინი დიდი ვაი-ვაგლახით მიიყვანა კარებამდე.  
ლოგინი მალლა, მეორე სართულზე გაუშალეს, სადაც ოთახე-  
ბი ერთ რიგში იყო ჩამწკრივებული და ყოველ ოთახს მხო-  
ლოდ ერთი კარი ჰქონდა. მაშინ გულში ცუდი არაფერი გაუვ-  
ლია, მაგრამ იმ ოთახის კარი, რომლის მიღმაც თავადისა და  
მისი მეუღლის საწოლი უნდა მდგარიყო, უნებლიეთ დამიბ-  
სოვრა. ღვინომ და უჩვეულო შუქით გამთბარი სხეულის სიახ-  
ლოვემ ააფორიაქა, ისე გააშმაგა, რომ არც თავი ახსოვდა და  
არც საქმე. ფეხზე კი გაიხადა, მაგრამ ლოგინში ჩაწოლა ვე-  
ლარ შეძლო. ჭვეყანა ვეწროებოდა, მარტო დაწოლა საკუთა-  
რი თავის გაძარცვად, ცხოვრებაზე ხელის აღებად მიაჩნდა.  
შუალამემდე დამწყვდეულ ნადირივით ბორგავდა, სულსა და  
ხორცს აწვალეზდა, მაგრამ როცა მთვარე ღრუბლებს ამოეფა-  
რა, დერეფანში წინდების ამარა, ქურდულად გავიდა და მას-  
პინძლის საწოლი ოთახის კარი ისე თამამად შეაღო, თითქოს  
საკუთარ ცოლთან მიიჩქაროდა. ქალს არ ეძინა, საწოლის  
გვერდით ნახევრად დაღეული სანთელი ენთო. მისმა დანახვამ  
ქალი შეაკრთო, გააკვირვა. სტუმრისაგან ასეთ რამეს არ მოე-  
ლოდა. საწოლიდან წამოწეულმა ჯერ დაყვირება სცადა, მაგ-  
რამ შემდეგ გადაიფიქრა და მკერდზე საბანი აიფარა. გადაი-  
ფიქრა ან იმიტომ, რომ წივილ-კივილი უფრო გაუტეხდა სა-  
ხელს, ვიდრე დუმილი, ანდა იმიტომ, რომ შეარცხვენდა და



აიძულებდა უკან გაბრუნებულიყო. არშეიძობის, ქალის გულის  
მოგების დრო რომ ჰქონოდა, მოძალადესავით კი არ დაადგე-  
ბოდა თავზე, არამედ რამდენიმე დღეს მოიცდიდა და საწა-  
დელს ნაცადი გზით ეწეოდა, მაგრამ ახლა სააწმყოფდ დერსო-  
ლაპარაკოდ არ ეცალა, დილით ქსნის ხეობაში უნდა გადასუ-  
ლიყო, იარაღი უნდა გადაეტანა. ამიტომაც არ დაუწყია ყოყ-  
მანი, კარი სწრაფად ჩარაზა, საწოლისაკენ დაიძრა და სანამ  
ღრუბლებიდან გამოცურებული მთვარის სხივები ოთახში შე-  
მოიჭრებოდა, ქალი უკვე მკლავებში ჰყავდა გამომწყვდეული.  
წინააღმდეგობას სხვა დროსაც წასწყდომია, მაგრამ ასეთი  
არაფერი უნახავს. ქალი თავგამეტებით იბრძოდა, იბრძოდა  
კბილებით, ფრჩხილებით, მოქნილი სხეულის ყველა ნაკვთით,  
ყველა კუნთით, იბრძოდა უხმოდ, შეუბოვრად. ყიზილბაშებ-  
თან ხელჩართულ ბრძოლას ისე არ დაუდლია, როგორც ამ  
თითქოსდა უმწეო არსების დამორჩილებამ დაღალა. ლოგინი  
აირ-დაირია, საბანი და ბალიშები იატაკზე ეყარა, გაკაწრული  
ყელიდან სისხლი ყონავდა. ბოლოს, როგორც იქნა, მისწვდა  
მის მკერდს, მის ტუჩებს და როცა გახელებული დააცხრა,  
ქალმა გასისხლიანებული ხელები კისერზე მოხვია და აკენეს-  
და. მხოლოდ ამის შემდეგ მიხვდა, რა აშუქებდა ღვთის ხე-  
ლით შემკულ სხეულს, რატომ იზიდავდა ასე მძაფრად, ქალს  
აღერსი და სიყვარული სწყუროდა. იმ დამეს თვალი არ მოუ-  
ხუჭავთ, ზედ არაფერი გადაუფარებიათ, ერთმანეთი არ დაუნ-  
ღვიათ. დილით ქალს ჩაეძინა და როცა იგი ფეხაკრეფით გამო-  
ვიდა ოთახიდან, ისეთი გრძნობა შეეჭმნა, თითქოს უჩვეულო  
ჩვეულებრივმა დაჩაგრა.



ამილახვარმა მარჯვენა ხელი რამდენჯერმე მუხუღიძვე და ისევ გაშალა. კანის ნაკეცებში ჩამყდარი მტვერი ოფლმა აზილა, გააშავა. ამ სქელი ტალახის ჩამოსარეცხად ერთი დოქი წყალი არ იკმარებდა. ყველაზე მეტად წყალი სწორედ იქ სკირდებოდა ადამიანს, ხადაც წყლის ნასახიც არ მოიპოვებოდა. ყანდარში ლაშქრობის დროს ერთმა აბადანელმა სპარსელმა უამბო, ხიჯრამდე არაბებს ისე უჭირდათ, რომ როცა ბედუინებს უდაბნოში წყალი ან საკვები შემოაკლდებოდათ, უწლოვან ვოგონებს ცოცხლად მარხავდნენ ქვიშაში და იმ ადგილას ნიშანსაც კი არ ტოვებდნენო. საქართველოდან სპარსეთში მიმავალი მხედრები ბედუინები არ იყვნენ, მიწაში ცოცხლად დამარხვა არავის ემუქრებოდა, მაგრამ აქ არც არსებობა იყო სიკვდილის საწინდარი და არც სიკვდილი არსებობის საბაბი.

გაზაფხულამდე სპარსელებს ფეხი არ გამოუდგამთ თბილისიდან, მაგრამ გაზაფხულზე ორი ისეთი ამბავი მოხდა, რამაც ქართლი გათიშა, ერთმანეთს დაუპირისპირა. ასი წლის შემდეგ ქართლის წაბილწულ, მუსლიმანთა სუნიტ გაყენთილ ტახტზე პირველად ავიდა ქრისტიანი მეფე და მისი კურთხევა ქართველებმა ისე იზვიამეს, როგორც მეორედ მოქცევა. კათალიკოსმა თეიმურაზს და თამარს საკუთარი ხელით დაადგა გვირგვინი თავზე, თავადებმა ერთგულების ფიცი დადეს, მოქალაქეებმა სამკაულები და ფარჩეულობა მოართვეს. ლხინი სამ დღეს გაგრძელდა. თბილისში შემოხიზნულ უცხოელებს არაფრით არ ეგონათ, ქართველებს თუ კიდევ შეეძლოთ ასეთი ბრწყინვალე დღესასწაულის გადახდა. უკმაყოფილო მხო-


ლოდ ის თავადები იყვნენ, რომლებიც ფიქრობდნენ თეიმურაზს ქართლის ტახტზე ასვლის უფლება არ ჰქონდათ, მაგრამ უფლებას მოპოვება უნდა და არა დამოწმება. თეიმურაზი წინდახედული კაცი იყო და დროზე მიხვდა, რომ ნადირ-შაჰი თავს იოლად არავის დააჩაგვრინებდა, სპარსეთის გათიშვის უფლებას არავის მისცემდა. ამიტომ მთლიანად მის მხარეზე გადავიდა, ხარკსაც უხდიდა და ლეკების წინააღმდეგ ბრძოლაშიც ეხმარებოდა. სახელმწიფოს მართვის ნიჭი თამარსაც აღმოაჩნდა. სწორედ იმ დროს, როცა იგი სპარსელების წინააღმდეგ აჯანყდა, დედოფალმა ნადირ-შაჰი ინახულა, ხარკის გადაუხდელობისათვის კახეთის აოხრებაზე ხელი ააღებინა და ბოლოს იმაზეც დაიყოლია, რომ მამამისის დაცარიელებულ ტახტზე მისი ქმარი აეყვანა. ნადირმა პირობა მისცა და აღასრულა კიდევ. სპარსეთიდან საგანგებოდ გამოგზავნილმა ელჩებმა თეიმურაზს ტახტზე ასვლა მიულოცეს და ძვირფასი საჩუქრები მიართვეს. უმეფოდ დარჩენილ ქვეყანას ბოლოს და ბოლოს ეღირსა შეფე, მაგრამ თეიმურაზის ტახტზე ასვლა იმას ნიშნავდა, რომ მათ შორის უფლვი და ომი დაწყებულიყო. ომის საბაბიც მალე გამოჩნდა.

მაისის ბოლოს ბექან ერისთავი ყმებმა მოკლეს და მისი ოჯახი ხეობიდან განდევნეს. უბატრონოდ დარჩენილი არაგვის საერისთავო ნადირ-შაჰმა თეიმურაზს უბოძა. ეს უკვე მის მიერ შეკოწიწებული სამეფოს ხელყოფა იყო. არაგვის საერისთავოს დაკარგვა მთელი ქვემო ქართლის-დაკარგვას უდრიდა. სანამ ჯარს თავს მოუყრიდა, თბილისიდან ამბავი მოუვიდა, თეიმურაზი და ალი-ხანი სალაშქროდ ემზადებიანო. ახლა მთავარი იყო, ვინ ვის დაასწრებდა, ვინ ჩაიგდებდა პირველად ხელში არაგვის ხეობას. შეტევა ორი მხრიდან დაიწყო —

ნატანტარიდან და ღუშეთიდან. წინ თითქოს არავინ ელობებო-  
და, თავს არავინ ესმოდა, მაგრამ არავის ხეობის დაპყრობა  
მაინც გაჭირდა. აჯანყებულებს შურისძიების ეშენოდათ და  
ამიტომ ციხეებსა და კოშკებში იკეტებოდნენ, თავს იცავდნენ.  
ღღე ღღეს მისდევდა, კვირა კვირას, მაგრამ საბოლოო გამარ-  
ჯება არსად ჩანდა. ამასობაში თეიმურაზმა და ალი-ხანმა  
მცხეთასთან მტკვარი გადმოლახეს და უკან დაედევნენ. გა-  
ნახლებული ქვეყანა, რომლის წესიერად დანახვა ვერც კი მო-  
ესწრო, ისევ შეიცვალა, ისევ უცხო და ხორკლიანი გახდა. წინ  
და უკან წანწალი სრულიად არ ჰგავდა იმას, რისკენაც ისწრა-  
ფოდა, რის გამოც სისხლს ღვრიდა. აჯანყებამდეც და აჯანყე-  
ბის შემდეგაც მხოლოდ ერთი რამ სურდა, სპარსელები გაერე-  
კა ქართლიდან. ეს სურვილი სამართლიანიც იყო და ბუნებრი-  
ვიც, მაგრამ ხშირად ბუნებაც ისევე ტყუოდა, როგორც მისი  
შემოქმედი.

მას შემდეგ, რაც განაჩენი წაუკითხეს და ციხეში გამოამწყ-  
ვდიეს, მის ირგვლივ უხილავი, მაგრამ გადაულახავი ზღუდე  
ალიმართა, რომლის მორღვევა მტერსაც შეუძლებლად მიაჩნ-  
და და მოყვარესაც ბრალდებას, ისევე როგორც სიკვდილს,  
საკუთარი სახე არ გააჩნია. სიკვდილი ყოველთვის ან უეცრად  
შოვარდნილი ჭირია, ან უკუჩვენებელი სენი, სასჯელი კი — თა-  
ვის მოკვეთა, თვალების დათხრა, ცხვირის ან ენის მოჭრა.  
ერთიც და მეორეც გარდუვალობის ამოუხსნელ კანონებს  
ემორჩილება და ამიტომ ადამიანს მათ წინაშე მარტოს ტოვე-  
ბენ. უკან მომავალნი ერთხელ არ წამოსწევიან, ერთხელ არ  
ამოსდგომიან გვერდით.





არაგვის ხეობის დაკარგვის შემდეგ ცხადად იგრძნო, რომ ხელიდან ეცლებოდა ის უპირატესობა, რაც ამბოხების წყალობით მოიპოვა. პაერი დამძიმდა, ექვითა და უხსოვლობით გაიყვინთა. ქართველი თავადები დუმდნენ, ერთმანეთს პირს არიდებდნენ. თეიმურაზის ტახტზე ასვლის შემდეგ სპარსელების წინააღმდეგ ბრძოლა კანონიერი მეფის წინააღმდეგ ბრძოლასაც ნიშნავდა, რასაც შეიძლება სავალალო შედეგი მოჰყოლოდა, რადგან მეფეს მათი აღზევებაც შეეძლო და განდევნაც. ამიტომაც დუმდნენ, მოთმინებით ელოდნენ იმ დროს, როცა საეჭვო და სავარაუდო აღარაფერი იქნებოდა. მხოლოდ მას და ქართლის ტახტზე თეიმურაზის ასვლით უკმაყოფილო რამდენიმე თავადს არ უცდიათ მეფესთან შერიგება. ჯერ ერთი იმიტომ, რომ სანამ ქართლში სპარსელები ბატონობდნენ, თეიმურაზის გამეფებას მისთვის არავითარი მნიშვნელობა არ ჰქონდა, მეორეც სპარსელების ყმობას ისევ თურქებთან მორიგება ერჩია, რადგან თურქები დიდ ომებს აწარმოებდნენ ევროპაში და საქართველოსთვის დიდხანს ვერ მოიცლიდნენ. გარდა ამისა, იყო კიდევ ერთი საფუძვლიანი მიზეზი, რასაც ანგარიში უნდა გასწეოდა, იმერეთსა და სამცხე-საათაბაგოს თურქები არასოდეს არ დაანებებდნენ სპარსელებს, საქართველოს გაერთიანებისათვის კი ისევ ის სჯობდა, რომ ერთი ბატონის მოხარკე ყოფილიყო.

ამგვარი და კიდევ უფრო სარწმუნო აზრები მაშინ ბევრი უტრიალებდა თავში, მაგრამ არც ის ავიწყლებოდა, რომ გაობრებულ დროში ცხოვრობდა. ბრძოლის წაგება — თავის წაგებას უდრიდა. ჭვეყანა ისე იყო არეული, გალატაკებული და დაქსაქსული, ხოლო რწმენადაკარგული თავადაზნაურობა იმდენად უპირო, ხარბი და გამუხანათებული, რომ ეშმაკობისა,

თვალთმაქცობისა და დაუნდობლობის გარეშე კაცი ვერც მტერს გაუმკლავდებოდა და ვერც მოყვარეს შეიძენდა. ამიტომაც არ სჯიდა საკუთარ თავს ისე მკაცრად, როგორც ამას მამაზეციერი მოითხოვდა. მისი მიზანი ქართლიდან სპარსელების განდევნა იყო და არა სულის ცხონება. ამ მიზნის მისაღწევად კი ყველა ხერხი ვარგოდა — წმინდაც და უწმინდურიც, თურქებთან მოლაპრაკებაც და ლეკების დაჭირავებაც.

სოლომონმა და საქუთრისმა რამდენჯერმე მისი სახელი ახსენეს, მაგრამ რაღაც ისეთთან დაკავშირებით, რაც წარსულს უფრო ეხებოდა, ვიდრე მომავალს. წარსული ყველას ითრევდა, სიცხისა და გათელვისაგან იცავდა. სანამ ამქვეყნად რაიმეს დამტკიცება ან უარყოფა შეიძლებოდა, სანამ დრო სამ ნაწილად იყო დაყოფილი, მტყუანი და მართალი არ გამოიღეოდნენ, მანძილი ციხესა და სასახლეს შორის არ შემცირდებოდა. ეს მანძილი აქ, ამ დანაოქებულ მიწის უბეშიც კი იგრძნობოდა. იგი მარტო მიაბიჯებდა მტვრიან გზაზე და წინ ყურებას ისევ ის ერჩია, რომ აჩრდილებისათვის ადგილი დაეთმო, მათთან ერთად გადაეფასებინა გადასაფასებელი.



როგორც კი თეიმურაზმა არაგვის ხეობაში ფეხი მოიკიდა, მაშინვე დაიწყო მოლაპრაკება იმ თავადებთან, რომელთა გადასაბირებლად უვნებლობის ფიცის მეტი არაფერი არ იყო საჭირო. ყველაზე ადრე, ყველაზე მუხანათურად მკვიდრმა ბიძაშვილმა, რევაზ ამილახვარმა ულალატა. ქსნის ხეობა გამაგრებული ციხეებით და მეციხოვნეებით ისე მიართვა თეიმურაზს, როგორც საკუთარი ხელით დაპყრობილი ქვეყანა. სა-

ფასურიც შესაფერისი მიიღო. თეიმურაზმა იგი ქვემო ქართლის ჯარების სარდლად და უახლოეს მრჩეველად დანიშნა. მას რომ სპარსელების ქართლიდან განდევნა თურქებისა და ლეკების დახმარების გარეშე შესძლებოდა, მაშინ რამდენიმე კაცს ან თავს მოჰკვეთდა, ანდა ხეზე ჩამოკიდებდა, მაგრამ მომავალზე ფიქრი მკლავსა და ნებისყოფას აღუნებდა, წამიერი რისხვა დაღვარჰქნილი ღიმილის აბლაბუდაში ეხვეოდა. ვახუშტი აბაშიძე და ზაალ ავალიშვილი ბანაკიდან ღამით გაიპარნენ და თეიმურაზს ეახლნენ. ირღვეოდა, მცირდებოდა მის მიერ თავმოყრილი სახელმწიფო, შიშვლდებოდა კაცის ბნელი სული, მაგრამ ღალატზე მოულოდნელი მაინც ცხინვალთან დამარცხება აღმოჩნდა. არ ეგონა კახეთის ჭაბუკი მეფე თუ ამდენ მოხერხებულობას და სიმამაცეს გამოიჩენდა. დილის ბინდბუნდში, როცა ნისლი ჯერ კიდევ არ იყო გაფანტული, მცირერიცხოვანი ჯარით საფარიდან გამოვიდა და მის დაუცველ ბანაკს თავს დაესხა. ბანაკი აირია, არავინ იცოდა, ვინ იყო მტერი, საიდან მოვიდა. მეომრებისათვის რომ გონზე მოსვლის საშუალება მიეცა, უკან დაიხია. უკან დახვევა ურბნისამდე გაგრძელდა. იმდღევანდელმა დამარცხებამ ცხინვალი და გორი დააკარგვინა, მაგრამ ერთ რამეში საბოლოოდ დაარწმუნა. ირაკლი ძლიერი, სახიფათო მოწინააღმდეგე იყო, ისეთი მოწინააღმდეგე, რომელიც ბრძოლას კი არ გაურბის, არამედ ფიქებს.

იმ ღამეს ბევრი იფიქრა, რატომ აფასებს ადამიანი ცხოვრებასა და მოვლენებს ზოგჯერ სწორად, ზოგჯერ კი მცდარად. მაგრამ ვერავითარ დასკვნამდე ვერ მივიდა, ისიც კი ვერ გაიგო, რის უგულვებელყოფის უფლება ჰქონდა და რის არამარცხი სწორედ მაშინ მოსდიოდა, როცა დროსა და სიკვდილს

თვალს არიდებდა, ცხოვრებას არაერთგვაროვანი ნაფლეთები-  
სა და ნამსხვრევებისაგან აკოწიწებდა. წინა დღეს რომ ისე  
მოქცეულიყო, როგორც ღვთის გაჩენილი არსება უნდა იქცე-  
ოდეს, მარცხს გადაურჩებოდა, მაგრამ სწორედ იმ საღამოს არ  
იყო, რა მოეხერხებინა საკუთარი თავისათვის, როგორ  
უკუეგდო ფეხებთან მოცოცებული ბნელი, უსახური, უსისხლ-  
ხორცო წყვდიადი, რომელიც ყველაფრის შთანთქმას, დასა-  
კუთრებას ცდილობდა და მის წინააღმდეგობას არავითარ ან-  
გარიშს არ უწევდა. შეღამებისას ვის არ შემოსწოლია ნაღვე-  
ლი გულზე, ვის არ დაუშვია შეცდომა, მაგრამ შეცდომის მილ-  
მა რომ კიდევ იყო რალაც ისეთი, რასაც არსაიდან შემოევლე-  
ბოდა, ეს მხოლოდ მეორე დღეს ირწმუნა.

როგორც კი თურქებმა მისი დამარცხების ამბავი გაიგეს,  
მაშინვე აწრიალდნენ, აფუსფუსდნენ. სტამბოლიდან დიდი ვე-  
ზირის მიერ ხელმოწერილი რაყიმი და ფული მიიღო. ახალცი-  
ხის ფაშამ მსხვილლულიანი ზარბაზნები, თოფისწამალი, ყუმ-  
ბარები და მეთოფურები გამოუგზავნა. ლეკთა ბელადმა მალა-  
ჩიმ ოთხი ათასი კაცი მოჰგვარა და დახმარებისათვის მაინც-  
დამაინც დიდი გასამრჯელო არ მოუთხოვია. მარცხი დროები-  
თი აღმოჩნდა, სპარსელებისადმი მტრულად განწყობილი ძა-  
ლები კვლავ მის ირგვლივ იყრიდა თავს, მაგრამ ხალხი მაინც  
აყლდა. ხუთი ათასი ქართველით, ენგიჩართა რამდენიმე ასე-  
ულით და ოთხი ათასი ლეკით თბილისამდე ვერ მიატანდა,  
ჟიზილბაშებს ქართლიდან ვერ განდევნიდა. საჭირო იყო ჯა-  
რი, ნამდვილი ჯარი და არა ბრბო, მაგრამ ასეთი ჯარის შექმ-


ნას წლები სკირდებოდა, მას კი თვეები ჰქონდა სათვლელი. ზაფხულამდე სურამის ციხე აულებელ სიმაგრედ უნდა ექცია, უკმაყოფილო ქართველი თავადები გადმოებირებინა, გადამწყვეტი ბრძოლებისათვის მომზადებულიყო. გამარჯვება დროის მოგების, მოლონიერების საშუალებას, მისცემდა, დამარცხება კი საბოლოოდ გასწყვეტდა წელში.

სანამ თეიმურაზი და ალი-ხანი გორიდან დაიძრებოდნენ, ახალციხიდან უსუფ-ფაშა გადმოვიდა და თან ექვსი ათასი მეომარი გადმოიყვანა. უსუფი ფრთხილი, თავზეხელგადაფარებული კაცი იყო, ახალციხიდან ქართლში გადმოსვლა შორეულ, სახიფათო ლაშქრობად მიაჩნდა, მაგრამ მას ჯარისკაცები სკირდებოდა და არა ფაშები. ფაშების ზნეს კარგად იცნობდა. ყოველთვის თავგასულნი, ხელგასვრილნი და მუხანათები იყვნენ, თავიანთ დამპყრობლებს ისე ერთგულად ემსახურებოდნენ, ისე ხშირად ახსენებდნენ ალაჰს, თითქოს გათურქებამდე. გამაჰმადიანებამდე არც თანამდებობის ფასი იცოდნენ და არც ღმერთის არსებობა. მბრძანებლის სიდიადე და მონის უნდობლობა უსუფს სახეზე ეწერა, მაგრამ მისი სახე მას მხოლოდ იმდენად აინტერესებდა, რამდენადაც ერთად უნდა ებრძოლათ, ერთად უნდა გაემარჯვათ. ხვალინდელ ომში აუცილებლად უნდა შეეპყრო გამარჯვების მაცდური, სისხლისაგან კანგასლაგნილი აჩრდილი, შეეპყრო მანამდე, სანამ თურქები და ლეკები გულში ღალატს გაივლებდნენ.

ბრძოლა გორსა და რუისს შორის მოხდა. მარჯვენა ფრთა თურქებს დაუთმო, მარცხენა ლეკებს, თვითონ კი შუაში გაჩერდა და როგორც კი ინათა, ბტრის შუაგულისაკენ დაიძრა ისე მედგრად შეუტია წინა რიგებს, რომ ყიზილბაშები და ქართველები შედრკნენ, უკუდგნენ. რაც უფრო მწვავედებოდა

ბრძოლა, მით უფრო ნაკლებად ახსოვდა საკუთარი თავი, ბევ-  
ლი ცოდვები, ახალი ცოდვების სიმძიმე, ღვთის უსულგულოება  
და კაცთა მოდგმის უგუნურობა. ხმაღს ისე იქნევდა, თითქოს  
ცხოვრებაში მეტი არაფერი უკეთებია. წინსვლა აგულიანებ-  
და, ათამამებდა, კიდევ ცოტა და მტრის ჯარს შუაზე გააპობ-  
და, გათელავდა, მაგრამ ამ დროს თეიმურაზმა და ალი-ხანმა  
პირი იბრუნეს და გორისაკენ გაიქცნენ. გაქცეულებს ფეხდა-  
ფეხ დაედევნა. იმ დღეს რომ ყიზილბაშების ჩეხვით არ გარ-  
თულიყო და მეტი გონიერება გამოეჩინა, თეიმურაზი და ალი-  
ხანი ციხეში ვერ შეასწრებდნენ. გორის ციხის მაღალი კედ-  
ლი ისე მოულოდნელად აღიმართა მის წინ, როგორც ღვთის  
ხელი. ბრძოლა დამთავრებული იყო. გასისხლიანებული ხმალი  
გაწმენდას და ქარქაშში ჩაგებას მოითხოვდა, გამარჯვება ზე-  
იმს, მონღლებას, მაგრამ მან წინასწარ გაუსწორა დროს ანგა-  
რიში.

გვერდით გაჩერებულმა უსუფ-ფაშამ ალაჰს მადლობა შეს-  
წირა, გამარჯვება მიულოცა, მაგრამ გორის ციხის აღებაზე  
უარი განაცხადა და რუისში დაბრუნება მოითხოვა. გამარჯვე-  
ბის სიბარული მანამდე ამოიწურა, სანამ გულს შეათბობდა.  
ძნელი იყო მტერთან მოყვრობა და მასთან ერთად ბრძოლა.  
უნდობლობა გაუქარწყლებელ ექვეებს ასაზრდოებდა. ერთი  
ხელის მოსმით გასაკეთებელი საქმე ქუცმაცდებოდა, ჭიანურ-  
დებოდა. იმის მაგივრად, რომ გორის ციხის აღებაში მოხმარე-  
ბოდა, უსუფ-ფაშამ მალაჩი იხმო, სტამბოლიდან გამოგზავნი-  
ლი ფული გადასცა და მთელი თავისი რაზმით დაღესტანში  
გაგზავნა ლეკთა კიდევ უფრო დიდი ჯარის დასაქირავებლად.  
სხვისმა უგუნურობამ ხელ-ფეხი შეუქრა, იმდენი დრო და-  
აკარგვინა, რომ ვერაფრით ვეღარ აინაზღაურა.



ღვთის მონა არასოდეს ყოფილა, არც ის სჯეროდა, რომ მისი გაჩენა აუცილებელი იყო ამქვეყნად, მაგრამ რადგან გაჩენდა ისეთ დროში, როცა ძალლი პატრონს ვერ სცნობდა, არ უნდოდა უგუნურად წაეგო თავი. ღალატი ყველას შეეძლო, საკუთარ ძმასაც კი და მას უკვე უჭირდა მტრისა და მოყვრის ერთმანეთისაგან გარჩევა, სხვის სულში ჩახედვა. თუმცა სხვის სულში ჩახედვა უფრო სახიფათო იყო, ვიდრე გარდუვალობის პირისპირ დგომა. ერთბაშად იმდენ ბნელ ზრახვებს, იმდენ მუხანათობას აღმოაჩენდა, რომ ან ყველას უნდა დაპირისპირებოდა, ანდა გასცლოდა, მაგრამ რადგან წმინდანი არც თვითონ იყო, ამიტომ არც სხვების საქციელს სჯიდა მეტისმეტად მკაცრად.

ამილახვარს წარბები ისე ჰქონდა შეკრული, თითქოს რაღაცის ახსნა უჭირდა და აზრის აღრევას რომ მეხსიერების ამღვრევაც არ გამოეწვია, გაწყვეტილი ძაფის ბოლოს ჩაებლა უჭა.

ერთი კვირის შემდეგ ამბავი მოვიდა, ირაკლიმ არაგვის პირას ლეკები სასტიკად დაამარცხა, მალაჩი საკუთარი ხელით მოკლა და სტამბოლიდან გამოგზავნილი ფული თბილისში ჩაიტანაო. ლეკების დამარცხებამ უსუფ-ფაშას თავზარი დასცა. ჯარი იმ დღესვე შეკრიბა და ახალციხისაკენ გასწია. აღმოსავლეთიდან კვლავ დაუბერა მძორის სუნიტ გაყლენთილმა ქარმა, ისევ აჩხავლდნენ ყორნები. ცხენიდან ჩამომხტარს მუხლის გაშლა უჭირდა, ხმალი ისე ეკიდა წელზე, როგორც დიდი ლოდი, რომელსაც ვერასოდეს მოიხსნიდა. თუმცა რატომ უნდა მოეხსნა. ქვეყანა ბორკილებით იყო მოფენილი და თუ მათი დაღეწვა სურდა, ხმალი წელზე უნდა რტყმოდა. იგი არც ისე

სუსტი იყო, რომ მძორის სუნისა და ყორნების ჩხავილისათვის ვერ გაეძლო. ზურგს უკან სურსათ-სანოვაგით სავსე, გამაგრებული, ზარბაზნებით შეიარაღებული ციხე ეგულებოდა. ამ ციხის აღებას მტერი ადვილად ვერ მოახერხებდა, შეიძლება წლებიც დასჭირებოდა, მანამდე კი ღმერთმა იცის, ვისი მზე ჩაესვენებოდა და ვისი ამობრწყინდებოდა.

ერთად თავმოყრილი ქვეების რომელიღაც ხერელიდან ჩიტი ამოფრთხილდა და იქითკენ გაფრინდა, სადაც სიმწვანე და სიგრილე ეგულებოდა. საქურისმა გაფრენილ ჩიტს წრიბინის თუ სისინის მაგვარი ბგერები დაადევნა. გზა ხეებს გვერდს უვლიდა, იქეთკენ მიემართებოდა, სადაც გახუნებული ბორცვები უცხო თვალისგან ერთფეროვნებით იცავდნენ თავს. ცხელი ქარი მიწის გულს აშრობდა. მხედართა პატარა ჯგუფი, რომელიც მოპირდაპირე მხრიდან მოდიოდა, მან მხოლოდ მაშინ შეამჩნია, როცა გამომშრალი ქვეყნის მკლავთა ხვევნას თავი დააღწია. ვიღაცეებს მათსავით ეჩქარებოდათ მწვანე კუნძულისაკენ, მათსავით ენატრებოდათ ჩრდილი და ხის ქვეშ წამოწოლა, სადაც მოგონებებით მოფენილი გზა კი არ მთავრდებოდა, არამედ ინასკვებოდა.

სანამ ციხეს ალყას შემოარტყამდნენ, დაუბრკოლებლად შეეძლო იმერეთში ან თურქეთში გადასვლა — ყარსისა და ერზრუმის ფაშები ცალ-ცალკე ეხვეწებოდნენ, ოსმალეთში გადმოდი და აქედან შეფუტით სპარსელებსო, მაგრამ საქართველოს ფარგლებს გარეთ ბრძოლას ის აზრი აღარ ექნებოდა, რისთვისაც ცოლ-შვილი მიატოვა, მამული დაკარგა, თავი საფრთხეში ჩაიგდო. გაქცევა სინამდვილეს სახეს შეუცვლიდა, გარდაქმნას, გადასხვაფერებას მოსთხოვდა, გადასხვაფერება კი ყველა კვალს წაშლიდა, გადარეცხდა. რადგან აჯანყდა, რად-




გან საქვეყნო საქმე იტვირთა, ბედის ძიების უფლება აღარ ჰქონდა, ბოლომდე მემამბოხედ უნდა დარჩენილიყო. მხოლოდ ამ გზით შეიძლებოდა სისხლის ღვრის გამართლება, კაცობის შენარჩუნება. ეს იყო ხსნის ერთადერთი გზა, მისი ერთადერთი საკუთრება, სხვა ყველაფერი კი დროსა და შემთხვევითობას ეკუთვნოდა. შეიძლება ერთ წელიწადში ვარსკვლავებს ადგილი მოენაცვლებინათ, წალმა დატრიალებულიყო ის, რაც აქამდე უკუღმა ტრიალებდა. მიწისძვრით, შავი ჭირით, შუღლით, სიბრძყვიტა და სიგიჟით სავსე საწუთროში აჩქარებას აზრი არ ჰქონდა. ბედი მტრების მიმართაც იმდენივე გულგრილობას იჩენდა, რამდენსაც მის მიმართ.

ციხეში ქართველებთან ლეკთა მცირერიცხოვანი ჯარი და თურქი მეთოფურებიც შეჰყვნენ. ზარბაზნები პირველად საცდელად გაისროლა, შემდეგ კი მათი ქუხილისაგან ყურთასმენა აღარ იყო. ზოგჯერ მტერისა და კვამლისაგან ისე იფარებოდა სივრცე, რომ მოწინააღმდეგე არ ჩანდა. მტრის ბანაკში მდგომარეობა შეიცვალა. თეიმურაზი კი არ ემორჩილებოდა ალი-ხანს, არამედ ალი-ხანი თეიმურაზს, მაგრამ სარდლების შეცვლა არაფერს არ ცვლიდა. ყველა, ვინც ციხის გარეთ დარჩა, მისი მტერი იყო, ყველას მისი დამარცხება და დატყვევება სურდა. ასევე იქცეოდა სათოფურებიდან შემოპჭრილი სინათლის შლეგი ნაკადიც, გარე სამყაროს მრუში, უტიფარი მოციქული, რომლის სიკაშკაშე გულის კედლებს ბზარავდა. თეიმურაზმა მეორე დღესვე შემოუთვალა, ციხე ჩამაბარე და არას გერჩიო, მაგრამ დამნაშავედ იგი სხვებს თვლიდა და ამიტომ უფლება ჰქონდა მანამდე დაეცვა თავი, სანამ ძალა შესწევდა. ამ უფლებას ვერც თეიმურაზი წაართმევდა და ვერც ნადირ-შაჰი. სურამის ციხე იმისთვის კი არ გაამაგრა, რომ მტრისათვის ჩაებარებინა.



ბორცვთა ჩრდილების ზრდა ამილახვარმა მხოლოდ მაშინ შენიშნა, როცა განტოტებული ღროის ერთი შტო ამომრა და ცა, მიწა, სახეებიანი სიმწვანე და მხედართა პატარა ჯგუფი ერთ დიდ წრედ შეიკრა. ამ წრიდან გასვლა ისევე შეუძლებელი იყო, როგორც არსებობის აზრის ამოხსნა, მაგრამ უცვლელი ფერებისა და უსაზღვროების ცქერა მობეზრდა, სიცხისა და აზრთა წინააღმდეგობებისაგან თავი გაუსივდა. სხვებისათვის პაერი მხოლოდ მტვრითა და მზის სხივებით იყო დამძიმებული, მისთვის კი მუქართაც, ისეთი მუქართ, რომლის წარმოდგენა სისხლძარღვებს ყინავდა. უწინ მუსლიმანები დამნაშავეს სახალხოდ, დიდი ზარ-ზეიმით სჯიდნენ. აშენებდნენ ფიქარნავს, ნიღბავდნენ ჯალათს, უხმობდნენ მოქალაქეებს, რომელთაც შემდეგ მოჭრილ თავს ან დათხრილ თვალებს უჩვენებდნენ, მაგრამ მას შემდეგ ბევრი დრო გავიდა და თუ სპარსელებისათვისაც დრო იმასვე ნიშნავდა, რასაც სხვებისათვის, ცოტა რამ უნდა გაემარტივებინათ, დამნაშავე აქლემზე ან ცხენზე შემჯდარი კი არ უნდა მიეგვარათ ჯალათისათვის, არამედ ჯალათი წაეყვანათ იქ, სადაც დამნაშავე ჰყავდათ დამწყვდეული. თუმცა, როცა საჭირო იყო, შაჰები ასეც იქცეოდნენ, ოთხ კედელს შორის უფრო მეტ დანაშაულს სჩადიოდნენ, ვიდრე ღია ცის ქვეშ.

იმ წელიწადს სურამის ციხეს ვერაფერი დააკლეს, მაგრამ მომდევნო წლის გაზაფხულზე ქაიხოსრო ორბელიანმა და რევაზ ამილახვარმა ახალდაბისა და კეხვისის ციხეები აიღეს და სურამის ციხის ამარა დატოვეს. რკალი თანდათან ვიწროვდებოდა: თოფისწამლისა და ყუმბარების მარაგი ილეოდა. ჯარისკაცები დაიქანცნენ, უქალოდ ცხოვრება და მკვდრების მარხვა



მობეზრდათ. ზოგჯერ ისეთ რამეზე წაეკიდებოდნენ ერთმანეთს, რომ გაწყრომას აზრი არ ჰქონდა. ოთხ კედელს შორის გამოკეტილი უიმედობა მიღმა დარჩენილი ცხოვრების დარღლით იხუთებოდა, ჰირვეულობდა, დასასრულისაკენ ისწრაფოდა. სწორედ ამ დროს შემოუთვალა თეიმურაზმა მესამედ, ციხე ჩამაბარე და არას გავნებო. ციხის ჩაბარება აზრად არ მოსვლია, მაგრამ მოლაპარაკებაზე უარის თქმა სისულელე იქნებოდა. სანამ მეფე ყველა მის პირობას შეასრულებდა, ჯარისკაცები დაისვენებდნენ, ციხიდან გავიდოდნენ, ივაკრებდნენ, ილაყებდნენ და როცა უქმად ყოფნა მობეზრდებოდათ, ბრძოლის განახლებაზე უარს აღარ იტყოდნენ, განსაკუთრებით თურქები და ლეკები, რომელთაც ტყვეობა ელოდათ.

კარავი ციხის წინ, მწვანე ველზე გაშალეს. ნესტისაგან დამძიმებული დილა იზმორებოდა, ნათელი ფერებით იმოსებოდა. ციხიდან რამდენიმე კაცის თანხლებით მხოლოდ მაშინ გავიდა, როცა თეიმურაზი მთელი თავისი ამალით კარვისაკენ დაიძრა. ფეხი მსუბუქად ეხებოდა ცვრიან ბალახს, უიმედობა საწყალობლად წკმუტუნებდა, უპატრონო ძაღლივით მოსდევდა უკან, მაგრამ მისი გასაცოდავება არც ღალატს შეეძლო, არც მარცხს და არც სიკვდილს. რაც უფრო მეტ მუხანათობას იჩენდა ბედი, მით უფრო გამომწვევად შეჰყურებდა თვალებში. კარავში ისე შეაბიჯა, თითქოს სადილზე ყოფილიყო წვეული. თეიმურაზი ფეხზე წამოდგა, ხელი ჩამოართვა, დიდი ხნის უნახავ მეგობარივით მოიკითხა. კარავი მართლაც საზეიმოდ მოერთოთ და მოეკაზმათ. ძვირფას ხალიჩაზე ბალიშები და მუთაქები ეყარა. დაბალ სუფრას ღვინით სავსე დოქები, თიხის ჯამები, ხილი და კახური ჩურჩხელები ამშვენებდა. თეიმურაზი შესამჩნევად გამელოტებულიყო, წვერში თეთრი



გარეოდა, მასთან შედარებით ჩია, ჯანსაღი კაცის შთაბეჭდილებას ტოვებდა. საუბარი ერთმანეთის მოკითხვით, უძველესი ამბების მოგონებით და ღვინის სმით დაიწყო. ღვინო ჩინებული იყო. ისე სიამოვნებდა, როგორც უკვდავების წყალი. ერთი წუთით ყველა დაბრკოლება აღმოიფხვრა, წარსული და აწმყო ერთმანეთში აირია, გადახალისდა. ღვინით დამტკბარს ისეთი გრძნობა ჰქონდა, თითქოს არავისი არაფერი მართებდა, მით უმეტეს ისეთი გადამთიელისა, როგორც ნადირ-შაჰი იყო. ჯავრი შაჰებისა და სპარსელების სჭირდა, თორემ თეიმურაზს უსიტყვოდ ჩააბარებდა ციხეს. მეფე სხვას არც სთხოვდა არაფერს. ციხე ჩამაბარე, ერთგულება ხატზე შემომფიცე და დღეიდან შენთვის სახლთუხუცესობა მიბოძებიაო. ხატის შიში არასოდეს ჰქონია, როგორც კი მოჰგვარეს, ისე ეამბორა, როგორც უცხო, შეუცნობელი სამყაროს მკვიდრს, რომელსაც ამქვეყნის აღარაფერი ეკითხებოდა. თეიმურაზმა ხალათი აჩუქა, ღვინით სავსე თასი გადმოულოცა, მაგრამ ჯერ ერთი შერიგება მას ღროის მოსაგებად სჭირდებოდა და არა იარაღის დასაყრელად, მეორეც მეფე სხვის ნებას ემორჩილებოდა და ასე ადვილად ვერ ენდობოდა. ერთხანს უდარდელი კაცივით ოხუნჯობდა, ხალათის ჩუქებაზე და მუსლიმანთა წეს-ადათებზე არაკებს ჰყვებოდა, შემდეგ კი თეიმურაზს თვალი გაუსწორა და მოურიდებლად უთხრა:

— ციხეს იმ დღესვე მოგართმევთ, რა დღესაც ნადირ-შაჰისაგან უვნებლობის რაყიშს მომიტანთ.

თეიმურაზს მოგვარებული საქმის გადადება არ ესიამოვნა, მაგრამ ჭირვეულობა არ დაუწყია. თხოვნა იქვე, მისი თანდასწრებით შეადგინეს, რევაზ ამილახვარს ჩააბარეს და სპარსეთ-

ში გაგზავნეს. ისპაჰანამდე მისვლა-მოსვლას სამი თვე სჭირდებოდა, სამ თვეში კი, ღმერთმა იცის, რა მოხდებოდა, მით უმეტეს ისეთ ქვეყანაში, სადაც შაჰებს უფრო ხშირად კლავდნენ, ვიდრე მამლებს.

სიმხურვალისაგან ფერმიხდილი ცა მძიმედ აწვეებოდა მხრებზე, თვალისმომჭრელი სინათლე, რყევა, ნჯღრევა, უკან მოხედვა და წინ ყურება ღლიდა, აღიზიანებდა, მაგრამ იგი სხვებზე ძლიერი, სხვებზე მეტად ნაჯახირები, ნაწანწალები იყო და მოშვების, წელში მოხრის უფლება არ ჰქონდა. მის ზურგს იმდენი თვალი უყურებდა, რამდენი კაციც მოჰყვებოდა გზას. სანამ მწვანე მინდვრების, მჩქეფარე მდინარეების მახლობლად ცხოვრობდა, დამსკლარი, დაბზარული დრო სურამის ციხის კედელივით შეკრული ჩანდა, მაგრამ უდაბნოს ცხელმა ჰაერმა დუღაბი წებოსავით გააღებო, კედელი მოირღვა და დრო უამრავ ნაკვეთურებად დაიშალა. მათ შეწებებას აზრი არ ჰქონდა, მაგრამ ზოგიერთი ნაკვეთური მახვილი წახნაგებით კაწრავდა გონებას და ისე ექაჩებოდა უკან, თითქოს ქვეყნად შესაცნობი და დასამახსოვრებელი აღარაფერი იყო.

სამი თვის მანძილზე ციხის კარი არ დაუკეტია. ზარბაზნების ქუხილი ლოდინმა შეცვალა, მტრობა კეთილგანწყობილებამ. ციხის წინ გაშლილ ტრიალ მინდორზე საღამოობით ბაზრობა იმართებოდა. თურქი, ლეკი, სპარსელი და ქართველი ჯარისკაცები ერთმანეთს ხვდებოდნენ, ვაჭრობდნენ, ყომარს თამაშობდნენ, ხოლო ზოგჯერ ჭიდაობაც კი იმართებოდა. ჭიდაობის დროს ყველა თავისიანს უჭერდა მხარს და იყო ერთი

გაუთავებელი ყიყინი, ტაშის ცემა და „ლა-ილას“ ძახილი. ამასობაში ციხე ნაგვისა და სიბინძურისაგან გაწმინდა, დაზინებული კედლები შეუმჩნევლად შეაკეთა, სურსათ-სანოვაგის, თოფისწამლის, ყუმბარების მარაგი შეამოწმა და დააწმინდა, რომ ერთ წელიწადს ისევე გაუჭირვებლად დაიცავდა თავს, როგორც მანამდე იცავდა. ქვეყანა, რომელსაც ათასი ჯურის ურდოები დაუკითხავად ისაკუთრებდნენ და სახეს უცვლიდნენ, არ იყო ისე გარდასახული და განაწილებული, რომ კაცი კაცის კვლისაგან გაეთავისუფლებინა, ძალა სიმართლისათვის დაემორჩილებინა. მას შემდეგ, რაც ლეკებმა მათი მამული ააოხრეს და მან, ჯერ კიდევ ბავშვმა, საკუთარი გამჭირახობისა და სიმამაცის წყალობით დაადწია თავი ტყვეობას, სულ უფრო მეტად რწმუნდებოდა, რომ ეს ქვეყანა ძალადობის ბუდეა და თუ არსებობა გინდა, უამრავ კაცურ თვისებებზე უნდა აიღო ხელი. ხელის აღება ძნელი არ იყო, მაგრამ უმწეობის უკან დგომა დათმობას თხოულობდა. დათმობა — ყმობას, ყმობა — ხოხვას, ხოხვას კი ისევ საფრთხის წინაშე დგომა და კაცურად ცხოვრება სჯობდა. ამიტომაც ვერ ელეოდა ხმალს, ციხეს, თავისუფლებას.

როცა რევან ამილახვრის დაბრუნების დრო დადგა, ციხის კარი ჩაკეტა და გარეთ აღარავის უშვებდა. პასუხი შეიძლება დადებითიც ყოფილიყო და უარყოფითიც, უფრო დადებითი, რადგან ნადირ-შაჰი ქვეიანი კაცი იყო და ბრძოლის გავრძელებას ერთი კაცის სიტყვიერად შეწყენარებას ამჯობინებდა, მაგრამ პირადად მას ზოგჯერ დადებით პასუხს უარყოფითი ერჩია, სამი წლის მანძილზე მას და მის მომხრეებს თავისუფლება ისე გაუჭდათ ძვალ-რბილში, სულის ფსკერიდან ამოხეთქილმა წყარომ ისე ამოავსო სიცარიელე, რომ ზარბაზნების

ქუხილისა და ბედთან ჰიდილის გარეშე არსებობა ვერც კი წარმოედგინათ.

რევან ამილახვრის სპარსეთიდან დაბრუნება მხოლოდ მაშინ გაიგო, როცა ციხეში ნადირ-შაჰის მიერ გამოგზავნილი რაყიმი შემოუგზავნეს. აღმოსავლეთის უძლიერესი მეფე და უნიჭიერესი სარდალი, რომელმაც ტახტი და ძალაუფლება საკუთარი ჭკუისა და ვაჟკაცობის წყალობით მოიპოვა, დიდკაცური შემწყნარებლობით წერდა, შენს მიერ ჩადენილი დანაშაული, შენს მიერ დაღვრილი სისხლი, ჩვენი გაძლიერების მოსურნე, ჩვენი ერთგული მეფის, თეიმურაზის ხათრით გვიპატიებიაო. ცოტა ჭკვევით კი ფიცს დებდა, თუ მომენდობი, არას გავნებო. თავის გადარჩენის უკეთესი შემთხვევა აღარასოდეს მიეცემოდა, ხელში ბეჭედდაკრული, ხელმოწერილი რაყიმი ეჭირა, მაგრამ ბედს მაინც ეწინააღმდეგებოდა, უნდოდა ბოლომდე გამოეცადა განგება, მანამდე ევლო უფსკრულის პირას, სანამ ან თვითონ არ გადაიჩეხებოდა, ანდა უფსკრული არ ამოივსებოდა. ამასვე ამბობდა ის ცაც, რომელიც თავზე ეხურა. თეიმურაზი, ალი-ხანი და ალბათ თვით ნადირ-შაჰიც დარწმუნებული იყვნენ, რომ შეწყნარების შემდეგ იგი ბედს დაემორჩილებოდა, ციხიდან კისერზე მარყუჟამოკიდებული გამოვიდოდა, მაგრამ მომავალი ყოფის წარმოდგენით გაღიზიანებულმა ჯარისკაცებს კარები ურდულეებით ჩააკეტინა. მე-თოფურებს ყველა ზარბაზანი გაატენინა და ლანძღვა-გინებით ესროლა მიღმა დარჩენილ ჭკვეყანას.

სპარსეთიდან მომავალ მხედრებს წინ მტვრის სქელი ფენა მოუქლოდა და გარემოს სისადავეს სტაცებდა, აბუნდოვანებ-

და. ამ ბუნდოვანებაში ვილაცის ბედის ძახილი ისმოდა. იმათ შორის, ვისაც გზადაგზა ტოვებდა, ბევრი ერია ბედლამწვარი, მაგრამ უდაბნო ოთხივე მხრივ ხსნილი იყო და შეიძლება ის, ვინც უკან ჩამოიტოვა, კვლავ წინ დახვედროდა, გამოღობა კებოდა, პასუხი მოეთხოვა. პასუხს თხოულობდნენ მკვდრებიც და ცოცხლებიც, თხოულობდნენ ისეთი გამომეტყველებით, თითქოს მის მეტი ცოდვილი არავინ იყო ამქვეყნად, მაგრამ წარსული მარტო მისი საკუთრება როდი იყო, ყველას უფლება ჰქონდა ისე გადაეთვალა და გადაეფურცლა დასვრილ დღეთა სქელი შეკვრა, როგორც საჭიროდ მიაჩნდა.

სურამის ციხე მრისხანედ უღრენდა ირგვლივ შემომდგარ მტერს, მისი კედლების სისქე და სიმაღლე საიმედო იყო, მაგრამ ვარე სამყაროსთან აღარაფერი აკავშირებდა. შეიძლება სწორედ ეს შებოჭვა, გარდუვალობასთან ქიშპობა მატებდა ძალას. ზარბაზნები ზოგჯერ ისე ქუხდნენ, თითქოს ციხე უზარმაზარი, საიერიშოდ დაძრული ხომალდი იყო, რომელიც მტრის ბრტყელძირიან ნაგებს ნაფოტებად აქცევდა და სამშვიდობოზე გავიდოდა. მზისა და კვამლისაგან სახეგარუჯული ჯარისკაცები იღრინებოდნენ, იგინებოდნენ, ერთმანეთს სროლაში ეჯიბრებოდნენ. ყიზილბაშებმა რამდენჯერმე სცადეს ციხის იერიშით აღება, მაგრამ უკან ხელცარიელნი ბრუნდებოდნენ. ციხე არ ტყდებოდა, არ ტყდებოდა არც შიგნიდან და არც გარედან. ნადირ-შაჰი კი ჩქარობდა, შიკრიკს შიკრიკზე გზავნიდა, მაგრამ სასიხარულოს ვერაფერს ატყობინებდნენ. ბოლოს შიკრიკების ნაცვლად მხატვრები გამოგზავნა, ციხე ჩაახატვინა და როცა დახედა, თეიმურაზს და ალიხანს შემოუთვალა, ციხეს ირგვლივ მაღალი გალავანი შემოავლეთ, ჯარი მიუყენეთ და მეციხოვნენი ნებაყოფლობით დაყრიან



იარაღსო. იმ დღიდან მტრის ბანაკი აფუსფუსდა, დაიწყეს მიწის თხრა, ქვისა და დულაბის მოზიდვა, ციხის ირგვლივ ციხის აგება. ორი თვე გრძელდებოდა ურმების წინ და უკან ტოიალი, ხარაჩოების ზრდა, კალატოზებისა და დურგლების წყლის წყვეტა, მაგრამ, როცა გალავნის შეკვრა დაიწყეს, ზარბაზნებს ტუჩი დაახრევიან და მანამდე ესროდა ჯერ კიდევ სველ კედლებს, სანამ ერთიანად არ დაანგრია.

ბგერათა აღრევამ, ცხელმა ქარმა და წინათგრძნობის გაბუნდოვნებამ აზრს გზა გადაუღობა, მაგრამ ამილახვარმა გზაში აღევნებული, წებია შთაბეჭდილებები თავიდან მოიშორა და მხედართა მოახლოებულ ჯგუფს გახედა. ჯგუფს წინ ყორნისფერ ულაყზე ამხედრებული, სქელი წვერით სახეშემოსილი მამაკაცი მოუძლოდა, რომელიც თავს არც მარცხნივ აბრუნებდა და არც მარჯვნივ. ამ სიშორეზე კაცის ცნობა შეუძლებელი იყო, მაგრამ ჩაცმულობით და მიხვრა-მოხვრით მხედრები ქართველებს უფრო ჰგავდნენ, ვიდრე სპარსელებს. რაღაც შეუმჩნეველი, თვალით დაუნახავი ცხადყოფდა, რომ ისინი სამშობლოში ბრუნდებოდნენ, ბრუნდებოდნენ იმ ქალაქში, საიდანაც იგი დასასჯელად წამოიყვანეს. ვიღაცამ ვალი თუ სასჯელი მოიხადა, თავი მხრებზე შეინარჩუნა და ტკივილი იმავე დროს შეაჩეჩა ხელში, რომელიც მას დასახიჩრებით ემუქრებოდა. მუქარა იზრდებოდა, მძიმდებოდა, მაგრამ საბედისწერო დღის დადგომამდე ჯერ კიდევ შეიძლებოდა აღრეულ ბგერათა დალაგება და დახშული აზრისათვის გზის გახსნა.




როგორც კი დათბა, როგორც კი სათოფურებში ცხოველ-  
 მყოფელი სხივები შემოიჭრა, ნადირ-შაჰმა თავის სარდლებს  
 ტყვიაწამალი გამოუგზავნა და შემოუთვალა, თუ ციხის აღება  
 ვერ მოახერხებთ, მისი დანგრევა მაინც უნდა შეძლოთო. დად-  
 გა გადამწყვეტი ბრძოლების ქაში. თეიმურაზს და ალი-ხანს  
 უკან დასახევი გზა აღარ ჰქონდათ. რაღაც არ უნდა დასჯლო-  
 მოდათ, ციხე ან უნდა აეღოთ, ანდა დაენგრიათ. საქმის გაჭი-  
 ანურება ლალატის, დანაშაულის ტოლფასოვანი იქნებოდა და  
 ამას ნადირ-შაჰიც ასე ახსნიდა. ბოლო დროს კი მის გაღიზიან-  
 ნებას ყველა ერიდებოდა. ტახტზე ასული მწყემსის შვილი  
 აღარ იყო ის კაცი, ვინც ჯარისკაცებთან ერთად ლაშქრობის  
 ყველა სიღუბეში იტანდა, ვინც მართალს მოყვრულად ექ-  
 ცეოდა და მტყუანს მტრულად, ვინც ყველა წინააღმდეგობის  
 მორიგებას, ქვეყნის წუმბედან ამოთრევას ცდილობდა. დრომ,  
 ჭაოსის შეუმუსვრელობამ და ცხოვრების უკუმგდებელმა ძა-  
 ლამ ეჭვიანი და ვერაგი გახადა, ტირანად აქცია, ხოლო მას  
 შემდეგ, რაც საკუთარ შვილს ლალატისათვის თვალეზი დათ-  
 ხარა და მისი მომხრეები საიჭიოს გაისტუმრა, ქვეყანას მაჯლა-  
 ჭუნსავით დააწვა თავზე, ნადირ-შაჰს რომ საწოლში ან აბა-  
 ნოში მოკლავდნენ, ეჭვი არ ეპარებოდა, მაგრამ ეს დღე შეიძ-  
 ლება მისთვის გვიან დამდგარიყო.

თეიმურაზმა და ალი-ხანმა ციხის აღებას მისი დანგრევა  
 ამჯობინეს. გაზაფხულის ჭექა-ქუხილი ცხვრებს, ცხენებსა და  
 ღორებს აფრთხობდა, გალუმპული, უძინარი ჯარისკაცები ზე-  
 ზეულად თვლემდნენ. ყუმბარები რომ არ გამოლეოდა, მტერს  
 ციხის კედელთან არ მოუშვებდა, მაგრამ ბოლო დროს მის ნე-  
 ბაზე ცოტა რამ იყო დამოკიდებული. თითო-ორიოლა გასროლა

დახველებას უფრო ჰგავდა, ვიდრე გაავებულ ყფას. მოწინა-  
აღმდეგე აღარ ერიდებოდა, აღარ უფრთხოდა. ყიზილბაშებმა  
და ქართველებმა მსხვილი მორებისაგან საფარი გააყეთეს,  
ხმლის მაგივრად წერაქვები მოიმარჯვეს და სამირკვლის ვა-  
მოთხრა დაიწყეს. ტყვია და ლოდი ვერაფერს აკლებდა მსხვილ  
მორებს. კედლებს რომ სული ჰქონოდათ, ალბათ, იმასვე იგრ-  
ძნობდნენ, რასაც მათი დამცველები გრძნობდნენ — ძალთა  
თანაფარდობის დარღვევას და მკლავის მოღუნებას. დენთით  
სავსე კასრები ციხემდე ურმებით მოზიდეს, ძირგამოთხრილ  
კედელს ქვეშ შეუწყვეს და პატრუქს ცეცხლი წაუკიდეს. აფეთ-  
ქებამ მთელი ციხე შეარყია, კედელი ერთ-ორ ადგილას გაიბ-  
ზარა, მაგრამ არც დანგრეულა და არც გვერდზე გადაქანებულა.  
კედლის სიმტკიცემ ჯარისკაცები გაახარა, გაათამამა, ისე იქ-  
ცეოდნენ, თითქოს ციხეს ღვთის ხელი იცავდა. ერთხანს მტე-  
რიც გაოგნებული ჩანდა, მაგრამ შემდეგ ისევ დაიწყეს საძირ-  
კვლის გამოთხრა, დენთით სავსე კასრების ურმებით მოზიდვა.  
წერაქვების ყრუ კაკუნი ზოგჯერ ციხის ეზოშიც კი ისმოდა.  
იმ დილით ჯარისკაცებს კედელთან ახლოს მისვლა აუკრძალა,  
საკუთარ თავს კი დღეების თვლა. თუმცა გარდუვალობისათ-  
ვის რა მნიშვნელობა ჰქონდა დაღამებას და გათენებას, გამარ-  
ჯებას და დამარცხებას, საბედისწერო დღე სხვა დღეთა რიგს  
არ გამოაკლდებოდა, თავს არ დაიჩაგრავდა. ძლიერმა აფეთ-  
ქებამ კედელი ჰაერში აიტანა, დაფშვნა და მტვრად აქცია. სა-  
ნამ დაჭრილთა ღრიალი ცოტათი მინელდებოდა და მტვერი  
გაიფანტებოდა, ყრუ და ბრმა იყო, მაგრამ როცა ქარმა რუხი  
ფერის ღრუბელი გადარეკა, მის წინ ღია სივრცე აღმოჩნდა.  
ციხეს ცალი კედელი მორღვეული ჰქონდა. ფართო ღიობიდან  
მწვანე ველი და ტყით შემოსილი ფერდობები მოჩანდა. უც

המוסד  
למחקר





ნაური, შემზარავი საყურებელი იყო კედელმორღვეული ციხე, მაგრამ გულში შიშის ნაცვლად სევდამ დაისადგურა გურჯველმა, უტყვმა სევდამ, რომელსაც არც თავი უჩანდა და არც ბოლო. ერთი კედლის აფეთქებამ ოთხი წლის ბრძოლა სასწვლად აქცია, ამ მტვრიან გზაზე გამოისროლა.

მწვანე ფოთლების შრიალმა შიშველი ქვეყანა შემოსა, ჯგუფად დარგული ხეები ეკლესიასავით მყუდრო და ჩრდილით სავსე ჩანდა. ამ დიდებული ტაძრის მახლობლად ეყვნებიც კი სხვაგვარად ეღერდნენ. ჩრდილისა და სინათლის ზღვარზე მზით გაბუნდოვანებული მიწის პირი ცხადად იკვეთებოდა, იკვეთებოდა სპარსეთიდან მომავალი მხედრების სახეებიც. წინ მომავალი მამაკაცი ჯგუფად დარგულ ხეებს ყურადღებას არ აქცევდა, გზას ისე მოჰყვებოდა, თითქოს სივრცეს მოარღვევდა. ყორნისფერი ულავი გარემოსადმი მეტ ინტერესს იჩენდა, ვიდრე მისი პატრონი. უეცრად ამილახვარმა კუჭყიანი ხელი მოიჩრდილა და მზერა დაძაბა. ზვიადი, მზერაგაყინული მამაკაცის ერთი ნაკვთი ნაცნობი ეჩვენა, მალე ნაცნობ ნაკვთს სხვა ნაკვთებიც ამოუღვნენ გვერდით და როცა სახე მთლიანად გამოიკვეთა, გაკვირვებისაგან ერთი გაბმული ბგერა აღმოხდა. მის წინ შანშე ერისთავი იდგა.

II

ჩრდილმა აქლემებიც დაიტია, ცხენებიც და ადამიანებიც. მუსლიმანებმა სუფრა იმ ადგილას გაშალეს, სადაც მიწიდან წყალი მოიხუხჩუხებდა და რამდენიმე ნაბიჯის შემდეგ ისევ მიწაში იკარგებოდა, ქართველებმა კი მწვანე მოლი დაისაკუთრეს, რომლის ბუნებრივი სიხალისე ყველა ხალიჩის მქსოველს

შეშურდებოდა. ამილახვრის მხლებლებს შანშე ერისთავის ცოლ-შვილი, რძალი და ძმისწულები შეუერთდნენ. ადამიანების ფუსფუსმა, ცხოველების ქშენამ და ჭურჭლის გვეგნებინა და რკინის ჟღარუნმა ჩგუფად დარგული ხეები მართლაც თავი შესაფარს დაამსგავსა — მწვანე ჭერით გადახურულ, სულის დამაშოშმინებელ ღვთის კარავს, სადაც ფარდაგზე მუხლმოყრილი მუსლიმანები ისევე გულმხურვალედ ლოცულობდნენ, როგორც კათედრალურ შეჩეთში.

თავისიანებთან პურის ჭამა მხოლოდ ორმა კაცმა არ ისურვა — გივი ამილახვარმა და შანშე ერისთავმა. სუფრა მათ ცალკე გააშლევინეს, სკამებად უნაგირები გამოიყენეს და ერთმანეთის პირისპირ დასხდნენ. სუფრას ხილი და მწვანილი აკლდა, მაგრამ ამილახვარს გვერდით ღვინით სავსე ტიკი ედო და ისე ეფერებოდა, როგორც ახალშობილ ხბოს. მხოლოდ ღვინოს შეეძლო უგუნებობის გაფანტვა, ქვეყნის შეფერადება, იმ შანძილის შემცირება, რომელიც მათ ერთმანეთისაგან და სხვებისგან თიშავდა.

სანამ სუფრას აწყობდნენ, ხმა არც ამილახვარს ამოუღია და არც ერისთავს, მაგრამ როცა მარტო დარჩნენ, ღმერთი ახსენეს, პირჯვარი გადაიწერეს და პური გატეხეს. იმ ადგილიდან, სადაც მუსლიმანები ისხდნენ, ყელში დანაგაყრილი ცხვრის ბლავილი მოისმა. შანშე ერისთავი ადრინდელად ზვიადი და მიუკარებელი ჩანდა, მაგრამ შიგნით რალაც მორღვეოდა, დასკვნობოდა. ორი ბნელი ორმო ქვეყანას უჩინარს, უსაგნურს ხდიდა. ამილახვარმა ტიკს პირი მოხსნა, ჯამები გაავსო, ერთი ერისთავს მიაწოდა, მეორე თვითონ აიღო ხელში და ავბედითობას შეჩვეული კაცის უდარდლობით თქვა:

— მასპინძლობა დღეს მე მეკუთვნის, შანშე-ბატონო, ეტ-

ყობა, ჩვენი შეხვედრა წინასწარ ჰქონდა ვიღაცას ნავარაუდევ-  
ვი, იცოდა, რომ თვალდათხრილი და თვალდასათხრელი უხ-  
მოდ არ ჩაუვლიდნენ ერთმანეთს გვერდით, თორემ ყველაფე-  
რი რომ შემთხვევითობას დავაბრალოთ, მაშინ დაბადებებს  
დღიდან ვყოფილვართ ნაავხორცალი და ნაცოდვილარნი.

— ეს ქვეყნის ნათრევი ქვეყანა შენთვის ყოველთვის უფ-  
როთ იყო სახლი, ვიდრე ჩემთვის, გივი-ბატონო.

— ამ მოუწყობელ სახლში სასიკეთო არაფერი ხდება, მაგ-  
რამ ღვინო ჯერ არ გამოლეულა.

— სადაურია?

— ატენური.

— გზაში გაილახებოდა.

— საზრუნავს ჩვენ რა გამოგვიღვეს, შანშე-ბატონო, მაგ-  
რამ გალახული ქვეყნის შვილს გალახული ღვინოც მოიყვანს  
ხასიათზე. ღვინის სმა და თვალების დათხრა კაცობრიობამ  
თითქმის ერთდროულად დაიწყო.

შანშე ერისთავმა გაღიმება სცადა, მაგრამ არაფერი გამო-  
უვიდა. სქელი წვერი მის დამძიმებულ, მკაცრნაოკებიან სახეს  
კიდევ უფრო ამძიმებდა. ამ სიმძიმის მიღმა მარტო წარსული  
კი არ იმალებოდა, არამედ რაღაც ისეთიც, რის დაჯერება გა-  
რედან მაცქერალს უჭირდა. ძნელი იყო სიბრძნისა და სიშმა-  
გის მორიგება, იმის დანახვა, რომ ეს ხეივანი კაცი ოდესღაც  
მართლაც ჩვილი ბალდი და უმწეო არსება იყო.

ამილახვარმა თავი მოაბრუნა და მზის ქვეშ გართხმულ  
ქვეყანას გახედა. ორი ქედდახერგილი ბორცვი ისე ხშირად  
კვეთდა ერთმანეთს, რომ შორიდან მსხვილ დაგრეხილ ბაგირს  
ჰგავდა.

— ეს მწვანე კუნძული რომ ვიღაცას მსხვილი თოკით არ

დაება, ტივტივს დავიწყებდით და უდაბნოს ვეღარასოდეს და-  
ვალწევდით თავს, — თქვა ამილახვარმა და თვალები ისე მო-  
ჭუტა, თითქოს გახურებული მზე ხეებს შორისაც შემოიჭრა

— ჩვენ უკვე კარგა ხანია ვტივტივებთ, გივი-ბატონო.

— ტივტივს როგორმე გავუძლებთ, მაგრამ ნავი თუ გა-  
დაბრუნდა, შორიდან დაძრული, გახურებული ტალღები ჩვენს  
ნაგვემ სხეულს ირგვლივ შემოერთყმება, სითხეს გამოსწოვს,  
გამოაშრობს და მანამდე არ მოეშვება, სანამ არ დაანახში-  
რებს.

— ერთხელ მე ეს უკვე გამოვცადე, მას შემდეგ მზეც კი  
შავი ფერისაა.

— შავი მზე, ალბათ, თეთრზე უფრო მცხუნვარეა. კიდევ  
კარგი, დაბმული ვართ, თორემ ვერც ღვინოს დავლევდით და  
ვერც ორიოდ სიტყვას ვეტყოდით ერთმანეთს.

შანშეს თავი არ აუღია, გვერდზე არ გაუხედავს. ქვეყანას  
მისთვის სიგრძე, სიგანე და სიმაღლე აკლდა, ყველა ფერს ერ-  
თი თალხი ფერი ჩრდილავდა და ადედებდა.

— რა უფრო გესიამოვნება, შანშე-ბატონო, ხბოს ხორცი  
თუ გუდის ყველი?

— ეშმაკი თუ მართლა დაბორილობს ამქვეყნად სადმე,  
ჩვენი შემხედვარე სიცილით უნდა კვდებოდეს. — თქვა ერის-  
თავმა ისეთი გამომეტყველებით, თითქოს რაღაც დათმო, სა-  
მუდამოდ ამოირეცხა გულიდან.

— ეს ცხოვრება რომ უკბილო ხუმრობა და უთავბოლოდ  
წაღმა-უკუღმა ტრიალია, ამას ეშმაკის სიცილზე უფრო ჩვენი  
შეხვედრა ადასტურებს, შანშე-ბატონო, მაგრამ მე მაინც მი-  
ხარია, ცოცხალს რომ გხედავ, თავი რომ მხრებზე გაბია. ჩვენს  
უბედურ თავს-დაბადების დღიდან იმდენი მახვილი ემუქრება,



რომ აღარც კი იცი რომელს მოერიდო. აწი, თუ ქვეყანა არ დაიქცა, ჰერსა და საწოლს აღარავინ შეგეცილებდა, შენი თავის ბრალმდებელიც და დამცველიც შენვე იქნები. იტოცხლე, ღმერთმა ხელი მოგიმართოს და მშვიდობიანად ჩაგიყვანოს საქართველოში.

— საქართველოდან ორი მახვილი თვალი წამოვიღე, უკან კი ორი ბნელი ორმო მიმაქვს. ამ თვალების დათხრასი შენც მიგიძღვის ბრალი, გივი-ბატონო, მაგრამ ბედმა მაინც ავარდოს ის მძიმე ხვედრი, რაც მე მარჯუნა წილად.

შანშე ერისთავმა ჯამი ისე მიიტანა პირთან, თითქოს ბალხამით იყო სავსე და როცა დაცალა, დასახიჩრებული სახის ერთი მკაცრი ნაოჭი შეუბრბილდა.

— რამდენი ხანია ღვინო არ დამიღვევია, ღვინო კი არა, პურიც არ მიჭამია ხეირიანად. თვალების დათხრას ისე არ გავუმწარებვივარ, როგორც უმწეობამ, ხეიბრობამ ვამაწვალა. არ მინდოდა სიკვდილი იმ ქვეყანაში, სადაც ყველაფერი სისხლის სუნითაა გაყენთილი, სადაც ჩემისთანა გადამთიელის საფლავს მიწასთან ასწორებენ. შეიძლება მცირედი სიხარული მე კიდევ მეღის ამქვეყნად, თუ ვერ დავინახავ, ფეხს მაინც დავადგამ მშობლიურ მიწას, მაგრამ რა ვუთხარი ისეთ დროს, როცა ყოველი მისწრაფება შეცდომაა და ყოველი კაცური საქმე დანაშაული, — თქვა შანშე ერისთავმა და პურისა და ყველის ნაჭერს ისე ადვილად ძიაგნო, თითქოს სიბრძავეს მისთვის ხედვის უნარი არ წაუერთმევია.

— ეს ქვეყანა თუ აბუჩად არ აიგდე, იმ ორიოდვე სასიამოვნო წუთსაც წაგამწარებს, რომელიც დიდი ვაი-ვაგლახით უნდა დასტყუო. ეტყობა, მართლები იყვნენ ჩვენი წინაპრები, როცა ამბობდნენ, ცხოვრება იმისთვის კი არაა შექმნილი,

რომ გეფეროს და თავზე ხელი გისვას, არამედ გაცდუნოს და ან საკუთარი თავის გმობამდე მიგიყვანოს, ანდა დანაშაულამდეო.

— როცა ჯაჭვით დაგაბამენ და თვალებთან გავარჯარებულ ფირფიტებს მოგიტანენ, ქვეყანა ქრება, ქრება ყველაფერი, რისი აბუჩად აგდებაც შეიძლება და მზად ხარ დასაკლავ ხაროვით იბღავლო. სიკვდილისა და წამების წინ ცხოვრება იცვლება, სულ სხვაგვარ სახეს ღებულობს.

თვალდათხრილი ერისთავი მის წინ იჯდა, ღვინოს სვამდა, ლაპარაკობდა, მაგრამ წამება და აღამიანი ერთად ვერ თავსდებოდა, ასეთ შესისხლხორცებას ცოცხალი აზრი და ღლის სინათლე ვერ ჰგუობდა.

— მე, როგორც ვხედავ, ცხოვრების სახის ცვლა კაცს ჭამის მაღას და ღვინის სმის სურვილს არ უკარგავს. — თქვა ამილახვარმა უფრო შთაბეჭდილების შესამსუბუქებლად, ვიდრე ჯერ კიდევ გაუხუნარი ტკივილის გასაღიზიანებლად.

შანშე ერისთავს გაეღიმა, მაგრამ მის ღიმილში იყო რაღაც დაუძლეველი, ღიმილის უარყოფელი.

— ეს, ალბათ, იმიტომ, რომ ბრმას თვალით გაძლომა არ შეუძლია.

— გაუმაძღრობა მარტო თვალის თვისება როდია.

— წარმოდგენით შექმნილ ფასეულობას ფასი არა აქვს, გივი-ბატონო.

ღვინომ, ჩრდილთა სიმკვეთრემ და წყლის სიახლოვემ ქვეყანა გადაასხვაფერა, დროს რაღაც ისეთი შესძინა, რაც მანამდე არ ეგუებოდა, არ ერწყმოდა. გივი ამილახვარი შანშე ერისთავის ყოველ მოძრაობას აკვირდებოდა, ცდილობდა დაენახა, რა კვალი დატოვა მის სულში ტკივილმა, უმწეობამ,

ქვეყნის გაუჩინარებამ, რისთვის ბრუნდებოდა საქართველოში — სასიკვდილოდ, წამებულის როლის სათამაშოდ თუ დაკარგულის ასანაზღაურებლად.

შანშე ერისთავმა ამილახვარს ჯამი ჩამოართვა და ბრმა თვალებით სივრცე მოქაჩა, მოთოკა.

— შენს სახეზე მე ახლა არაფრის ამოკითხვა არ შემიძლია, გივი-ბატონო, მაგრამ ზოგ რამეს თვალით დანახვა არც სჭირდება. სიბრმავე ხეიბრობა უფროა, ვიდრე სიბეცე. ის, რაც შენ გაინტერესებს, მე თითქმის მოვინელე — წამებასაც გავუძელი, მარტობასაც და სინდისის ქენჯნასაც, მაგრამ იმ საბედისწერო დღიდან დამწვარი ხორცის სუნი და გამჭრალი სივრცის შმუშვნის ხმა სამყაროს თვისებაც გახდა.

ამილახვარმა ღვინის ძალა იგრძნო და ისე მოავლო თვალი ქვეყანას, თითქოს მასთან ერთად თვრებოდა მიწაც, ცაც და მწვანე ფერიც. იცვლებოდა არა მარტო ხილული ნიშნები, არამედ ღვთის ხელწერაც.

— ჩემთვის ჯერ თვალები არ დაუთხრიათ, შანშე-ბატონო, მაგრამ სამყარო მაინც ისე კარგავს და იძენს თვისებებს, როგორც ეს ღვინო ფერსა და გემოს. როცა საკუთარ სახლში ფეხს შესდგამ, ქვეყანა გამარტივდება, წარსული ბურუსში გაეხვევა და შეიძლება ერთ მშვენიერ დღეს მრავალყამიერიც კი შემოსძახო.

— ქართველებს რომ ნაკლები გვემღერა და მეტი საქმე გვეკეთებინა, შეიძლება ამ დღეში არ ჩავვარდნილიყავით.

— შავი დღე ისეთ ხალხსაც დასდგომია, რომელიც ნაკლებს მღეროდა და მეტს აკეთებდა. ეტყობა, გაჩენის დღიდან ჩვენ ზუსტად იმდენი შეცდომა ჩავიდინეთ, რამდენსაც მუხთალი ბედრ თხოულობდა. ახლა კი სიმღერა ბედის გამოწვევა

უფროა, ვიდრე დანაშაული. დავლიოთ, შანშე-ბატონო, შანშე-  
ვით ღვთის გულს მაინც ვერ მოვიგებთ, მამაზეციერმა კარგა  
ხანია ჩაიქნია ხელი ჩვენზე. გაუმარჯოს გაუმარჯვებულთა  
ბრძოლას!

ამილახვარს ღვინო სწყუროდა და როგორც კი ყელიდან  
ბგერები ამოუშვა, ჯამი პირთან მიიტანა. ის, რაც არ მომხდა-  
რა, შეიძლება არც მომხდარიყო, შეიძლება სადღაც უკვე ილე-  
სებოდა სისხლმოკარბებული ბრალმდებლის დასაკლავი დანა,  
შეიძლება ცოდვები და შეცდომები უკვე წყვილდებოდნენ  
ერთმანეთის გასაბათილებლად.

ამილახვარმა ცარიელი ჯამი სუფრაზე დააგდო და ამოქო-  
ლილ, ამოლესილ სათოფურებს შეხედა, რომელთა უკან მარა-  
დიული შუაღამე და დანახშირებული, დაკრუნხხული გვამების  
მღუმარება სუფევდა. ერთ დროს მას და თვალდათხრილს რა-  
ღაც აკავშირებდა, უფრო მტრობა, ვიდრე მეგობრობა, მაგრამ  
ბოლოსდაბოლოს მტრობაც იცვითება და მრავალი წლის შემ-  
დეგ ხელახლა იწყება ზოგი რამის მიჩქმალვა და ზოგის გამომ-  
ზეურება, ღმერთის, საკუთარი თავისა და სხვების წინაშე ან  
თავის მოკატუნება, ანდა ყალყზე შედგომა. შანშე ერისთავი  
წამებული კი იყო, მაგრამ წმინდანობამდე ბევრი რამ აკლ-  
და.

— როცა, აი, ასე ზიხარ, ღვინოს სვამ, ირგვლივ ჩრდილი  
გარტყია და დღის ჩვეულებრივ დინებას ხელს არაფერი უშ-  
ლის, ქვეყანაზე თითქოს არც უბედურება არსებობს, არც საფ-  
რთხე და არც სასჯელი, არაფერი ისეთი, რაც ხალხს მუსრს  
ავლებს, ქალაქებს მიწასთან ასწორებს, სოფლებს წყალს-  
ატანს. და უეცრად აბობოქრდება, წინ გადაგელობება, შეგაკ-  
რთობს, შეგზარავს და კიდევ ერთხელ დაგარწმუნებს, რომ

საფრთხე და საშინელება ამ ქვეყანაზე კი არ შემცირებულა, არამედ გაძლიერებულა, მომრავლებულა.

— უბედურების მეტი ჩვენ რა გვინახავს, გივი-ბატონო, მაგრამ რა ფრთხილადაც არ უნდა იყო, გულგრილობისა და უღარდულობის უკან ჩასაფრებულ უბედურებას მაინც ვერ შეუკრავ გზას. ამას წინათ სპარსეთის ერთი ქალაქის მოსახლეობა ისე ამოწყვიტა მუცლის მწვავე სახადმა, რომ ცარიელ ქუჩებში მხოლოდ ძაღლები და კატები დაეხეტებოდნენ. გასულ ზაფხულს ერავში დიდი გვალვა იყო, გვალვას კალიების ლაშქარი მოჰყვა და ადგილობრივი მოსახლეობა ისე დაიშა, რომ კაცი კაცის ხორცს ჭამდა. რამდენი მიწისძვრა, ჰირი, წყალდიდობა ახსოვს საქართველოს, რამდენი ცივი ზამთარი და შიმშილობა, მაგრამ ბუნების მტრობას როგორმე გავუძლებდით, ირგვლივ რომ ამდენი სისხლმოწყურებული მტერი არ გვეხვიოს.

— თამარის შემდეგ რომ კიდევ ერთი საუკუნე გაგვეძლო, მარტო მონღოლებს რომ გავმკლავებოდით, მერე აღარაფერი გვიჭირდა, მაგრამ მონღოლებმა და იმათმა ნაშიერმა წელში გაგვტეხეს. მას შემდეგ ვეღარ მოვმრავლდით, თავისუფლად ვეღარ ამოვისუნთქეთ. ქრისტეს ჯვრის ტვირთვამაც დაგვღალა. ოსმალებსა და სპარსელებს რა უჭირთ. სელიმ პირველმა ერთ დღეში ორმოცი ათასი შიიტი ამოწყვიტა და ამით მის სახელმწიფოს არაფერი დაჰკლებია, ჩვენ კი ორმოცი ათასი კაცი დიდი ხანია არ გამოგვიყვანია ბრძოლის ველზე.

— ძალა სწორედ მაშინ გვაკლია, როცა შეგნებული გვაქვს, ვინა ვართ, რა დღეში ვართ და რა გველის.

— ჩვენ არა მარტო ძალა გვაკლია, შანშე-ბატონო, არამედ დანიშნულებაც. ჩვენთან დაახლოებას და დამეგობრებას არა-

ვინ ცდილობს, არავის არაფერში ვჭირდებით. ქართველები გარიყული ხალხი ვართ და მხოლოდ ჩვენზეა დამოკიდებული მოვისპობით თუ შევრჩებით ამ ქვეყანას. გაუმარჯოს იმათ, ვინც მაზეშია გაბმული და კბილებს მაინც ილესავს!

— რომ გვამტვრევენ ამ ალესილ კბილებს!?

— არაფერია, დაგვამტვრიონ. იცი, რომელიღაც ხალიფამ თუ სულთანმა მონადირეთუხუცესს უბრძანა, ლომებისათვის კბილები დაეძროთ, ბრჭყალები დაეჭრათ და თავისუფლად გაეშვათ სასახლის დიდ ბაღში. ლომებს კბილები კი დააძვრეს, მაგრამ ამას მათთვის ხელი არ შეუშლია ხალიფის რამდენიმე მოხელე შეეჭამათ.

— ერთი ასეთი არაკი რომ ნადირ-შაჰისათვისაც შემოინახო, შეიძლება ცალი თვალი შეინარჩუნო.


— თუ ცალი თვალი შევინარჩუნე, მეორეს ველარავინ დამთხრის.

შანშე ერისთავი აღარ იღიმებოდა ისე უსიამოდ, შემზარავად, როგორც შიგნეულობის ღვინით გაგრილებამდე. საკუთარ თავთან საუბარს ისევ ძველ მოქიშპესთან საუბარი ერჩია და მზად იყო მანამდე მჯდარიყო სუფრასთან, სანამ მასპინძელი მასპინძლობას გაუწევდა.

— ყანწებზე ხომ არ გადავსულიყავით, შანშე-ბატონო?

— არა, ჯამით სმა მირჩევნია.

მზე დასავლეთისაკენ იხრებოდა, მწვანედ შეფერადებული სინათლე რბილდებოდა, ყველა ის ნაჭრილობევი და ნაწიბური, ორ ბნელ ორმოს რომ გარს ერტყა, ცხადად იკვეთებოდა, საშინელებას სინამდვილის უტყუარი ნიშნებით ამჟღავნებდა. თვალის რქოვანი გარსი, წინა სენაკის ნამი, ბროლი და მინი-



სებური გარსი დამწვარი და განადგურებული იყო, მაგრამ დაუზიანებელი არც თვალის მამოძრავებელი კუნთები, თვალბუდე, ქუთუთოები და ცრემლის სადინარები დაარჩენილყო. მარჯვენა თვალის ზედა ქუთუთო ბასრ იარაღს დაეგლიჯა, მსხვილი ნაწიბურები ერთმანეთს შეზრდოდა. მარცხენა თვალის გარე კუთხე ცეცხლს ამოეჭამა, ორმოში კიდევ ერთი პატარა ორმო გაჩენილიყო. ერისთავს მსხვილი, გოროზი თვალეები ჰქონდა, მაგრამ საკუთარი სახის დანახვა მას უკვე აღარ შეეძლო და მხოლოდ მას ზარავდა, ვინც მის თვალებს გარედან შეჰყურებდა.

— ის, რაც მე მაინტერესებს, უბრალო ცნობისმოყვარეობა არაა, შანშე-ბატონო, ხომ იცი, თვალდათხრილს თვალხილულთა შორის თვალდასათხრელზე უკეთ ვერავინ გაუგებს. რას წარმოადგენს ბრმისათვის ეს ქვეყანა?

შანშე ერისთავი ერთხანს დუმდა, საკუთარ წვერს ეფერებოდა, შემდეგ კი ბრმა თვალეები ამოიწმინდა და ნალვლიანად თქვა:

— იმასვე, რასაც თვალხილულთათვის. მე რომ დაბადებით ბრმა ვყოფილიყავი, მაშინ, ალბათ, არ მეცოდინებოდა, რომ ეს ქვეყანა არა მარტო ბრმებისათვისაა ბნელი, არამედ მხედველთათვისაც. საგნების ხილვის უნარმა იმაზე მეტი ვერაფერი მასწავლა, რაც სიბნელეში ყოფნამ და მარტოობამ, ახლა ყურადღება ნაკლებად მეფანტება, თვალით აღქმულის ერთმანეთთან დაკავშირება ან დაცალკეეება არ მჭირდება და ამიტომ უფრო შიგნით ვიყურები, ვიდრე გარეთ. შიგნით ყურება გარეთ ყურებაზე უფრო იოლი და სასიამოვნო არაა, მაგრამ ერთი დიდი უპირატესობა აქვს, ბევრ რამეს ხედავ ისეთს, რაზედაც მანამდე წარმოდგენა არ გქონდა.

— თუ ბრმები ნათელმხილველები ხდებიან; მაშინ არც ისე ცუდად ყოფილა მათი საქმე.

— მე არ ვეკუთვნი იმათ რიცხვს, გივი-ბატონო, ვისაც არ ესმის, თუ რა დიდი უპირატესობაა ქვეყნის საკუთარი თვალთ დანახვა, არც იმათ, ვისაც სიბრმავეთ გამოწვეული უბედურება არაფრად მიაჩნია, მაგრამ ბრმეებზე უაპრაფ სასწაულებს ყვებიან. თქმულებას თუ დავუჯერებთ, ილიადა და ოდისეა ბრმა ჰომეროსმა შეთხზა. ერთი ბრმა იტალიელი მხატვარი საღებავებს თურმე მგრძნობიარე თითებით აზავებს და უჩვეულო ფერებს ქმნის. ამას წინათ ერთმა ინგლისში ნამყოფმა სპარსელმა თავადმა მიამბო, ვილაც დაბადებით ბრმა ინგლისელი სწავლული დიდებულ ლექციებს კითხულობსო გეომეტრიაში. წინასწარმეტყველთა უმრავლესობა ან განგებ იბრუციანებდა თავს, ანდა, მართლაც, ბრმა იყო. ასე, რომ ბრმების საქმე არც ისე ცუდადაა, როგორც თვალხილულთ ჰგონიათ, მაგრამ მე უკვე იმ ასაკში ვარ, როცა კაცს შეგუების უნარი დაჩლუნგებული აქვს და არაფრის თავიდან დაწყება აღარ შეუძლია. სიცოცხლის დასასრულამდე ისიც მეყოფა, რაც მეხსიერებამ შემომინახა, რაც ერთ დროს საკუთარი თვალთ აღვიქვი.

მოშრიალე ფოთლებით გადახურულ თავშესაფარში ადამიანების ყაყანმა, რკინის ჟღარუნმა და ცხოველების ქმენამ იკლო. საჭურისმა პურის ჭამა მოათავა, რამდენიმე ჯარისკაცი თვალყურის სადევნებლად დააყენა, დანარჩენებს კი უფლება მისცა თავქვეშ უნაგირები ამოედოთ და თვლემას მისცემოდნენ. ყველაზე უძლურს და ანჩხლს ყველაზე მეტი უფლებები ჰქონდა, მისი, რატომღაც, უფრო ეშინოდათ, ვიდრე ახალგაზრდა სპარსელი თავადიშვილისა. ამასობაში ქართველებმაც მო-



ათავეს ჭამა-სმა და თვალის მოსატყუებლად მდებლობზე წამოწ-  
ვნენ. საჭურისი მაინც ვერ ისვენებდა, ხეებს შორის დაბორი-  
ალობდა, ბრძანებებს ხან სპარსულად იძლეოდა, ხან თურქუ-  
ლად. ბოლოს მათ სუფრას მიუახლოვდა, შეთავაზებულ ღვინო-  
ზე უარი განაცხადა, მაგრამ სათქმელის თქმა მაინც ვერ გა-  
ბედა და უხმოდ გაბრუნდა უკან. მალე მისი არათანაბრად გან-  
ვითარებული სხეული ისე მოიკრუნჩხა ხალიჩაზე, თითქოს  
დედის მუცელში ყოფნა მოენატრაო.

როგორც კი ღვთის კარავი თვლემას მიეცა, ბებერი, ნანგ-  
რეგებითა და ერთფეროვანი ზმანებებით გაოგნებული ქვეყანა  
ცოტათი მოსულიერდა, გაახალგაზრდავდა, სხვებს განუდგა  
და მათთან მოცოცდა. მისი ნაჯიჯგნი, ნაოხრალი გარეკანი  
უამრავ მოუშუშებელ და მოშუშებულ იარებს დაეფარა, მაგ-  
რამ მაინც ცდილობდა მოღონიერებულიყო, უკეთ მოკაზმუ-  
ლიყო, მათთან ერთად ექეიფა, ყური დაეგდო, რას ეუბნებო-  
და თვალდათხრილი თვალდასათხრელს, რა ჰქონდათ ქართვე-  
ლებს სოფელთან სადავო.

— საჭურისი თავზე იმიტომ დაგვადგა, რომ ჩვენთვის პუ-  
რის ჭამა ჩაემწარებინა, მაგრამ შენმა დათხრილმა თვალემა  
შეაჩერა. — თქვა ამილახვარმა, როცა მიხვდა, რომ აწი მათ  
ხელს აღარავინ შეუშლიდა.

— საჭურისი რომ იყო, ხმაზე შევატყვე. შეიძლება იგი  
ჩემზე უმოწყალოდ აწამეს, მაგრამ მაგათ ხმასა და სუნს ვე-  
ლარ ვიტან. მიკვირს, როგორ ძლებს ჩემი ძმა იესე შაჰის კარ-  
ზე, რას პოულობს მათთან საერთოს. იცოცხლე, გივი-ბატო-  
ნო, ამ გზაზე ღმერთი შენზე უკეთესს ვერავის შემახვედრებდა.

შანშე ერისთავის მკაცრი ნაოჭები ერთმანეთს ეთიშებოდ-  
ნენ და ცალ-ცალკე რბილდებოდნენ. მას უკვე აღარაფრის

შეცვლა, აღარაფრის გადასხვაფერება აღარ შეეძლო და თუ ქსნის ხეობის ჩამუქებულ ტყეებს დარუბანდის ციხის ქონგურები ცვლიდა, დარუბანდის ციხის ქონგურებს კი ზორანის ჭურღმულები, ეს მხოლოდ იმიტომ, რომ უკან დასახევი გზა აღარ ჰქონდა.

— ამ გზის კიდევ ერთხელ გავლას და უკან დაბრუნებას მე ალბათ ვეღარ შევძლებდი, ჩემი უკანასკნელი ამოსუნთქვა ამ ცხელ ჰაერს შეეზავებოდა, ჩემი ძვლები ამ უდაბნოში გაიბნეოდა, — თქვა ერისთავმა და უბიდან ქისა და ჩიბუხი ამოიღო. თამბაქოს წვევას სპარსეთში მისჩვეოდა.

— ერთი საქმისათვის ორჯერ არავის სჯიან, შანშე-ბატონო, მაგრამ შენ იქნებ კიდევ აპირებ აჯანყებას?

ერისთავს გაეცინა.

— ჩემი ხნის კაცი და ისიც ბრმა თავის თავს თუ აუჯანყდება, თორემ სხვებს ვერაფერს დააკლებს. ცხოვრებამ იცის, სად შემოვაცვდა ჯავშანი, სად გაგიყაროს შხამიანი ნესტარი. უკან რომ გამარჯვებული დაებრუნებულყავი, გზაში შემომეგებებოდნენ, თავს მდაბლად დამიკრავდნენ, მაგრამ თვალდათხრილს, შეიძლება, საქართველოში მეტი ბრალდება წამომიყენონ, ვიდრე სპარსეთში წამომიყენეს. ჩემი შინ დაბრუნება ჩემს მეტს არავის გაახარებს, ალბათ.

— მკვდრეთით აღმდგარი და შინ დაბრუნებული, მართლაც, არავის უყვარს, მაგრამ ძაღლებს ყოველთვის უხარიათ ბატონის დანახვა. რამდენადაც მახსოვს, მწევრებისა და ნაგაზების მთელი ხროვა გყავდა.

— თვალები რომ დათხრილი მაქვს, ეს არც ძაღლებს გამოეპარებათ მხედველობიდან, მაგრამ მე ჯერ ისიც არ ვიცი, დამიბრუნებენ მამულს თუ არა.

— უმამულოდ შენს არსებობას რა აზრი ექნება?

— მოსაპოვებელი სწორედ ისა მაქვს, რასაც სიცოცხლე შევალე.

შანშე ერისთავი ყოველთვის პატარა ხელმწიფე იყო და მამულის დაბრუნებაზე ისე ლაპარაკობდა, როგორც ტახტის ბოძებაზე. რბევისა და ძარცვის შემდეგ ქართველების ერთადერთი სიმდიდრე მიწა იყო და ამ მიწას კბილებით ებლაუჭებოდნენ.

— რომ არ დაგიბრუნონ, რას იზამ? — ჰკითხა ამილახვარმა.

— არ ვიცი, ქართლს ახლა მეფე და გამგებელი ჰყავს. თემურაზმა დიდი პატივი დამლო, ნადირ-შაჰს ჩემი თავი გამოსთხოვა, იქნებ მამულაც დამიბრუნოს.

ერისთავი ტყუილად უჩიოდა შეგუების უნარის დაჩლუნგებას. ხმის მიხედვით თვალხილულზე ნაკლებად არ ასხვავებდა ადამიანებს ერთმანეთისაგან, პურის, ყველის და ხორცის ნაჭერს ფრთხილად; მარჯვედ იღებდა სუფრიდან, ხოლო როცა ჯამს თითებს შორის ჩაიდგამდა, ცხადად გრძნობდა, პირამდე იყო სასმისი სავსე თუ არა. მთელი იმ ხნის განმავლობაში, რაც ერთად ისხდნენ, ხელიდან არაფერი გავარდნია, წვეთი ღვინო არ დაუქცევია. ნიჰს თავისი გაჰქონდა. ბრმა ერისთავი კაცურად იქცეოდა და ხეიბრობას თითქმის არ იმჩნევდა.

— ერთ დროს მეფის ყოლას უმეფობა გერჩია, შანშე-ბატონო. — თქვა ამილახვარმა ისე, თითქოს რაღაცამ გააღიზიანაო.

— უგუნური მეფის ყოლას უმეფობა ყოველთვის ჯობია ჩვენი უბედურება ისაა, რომ საკუთარი ნაკლის შეუფასებლობა და ღირსების გადაფასება გვიყვარს, თავი ყველას მართალი

გვეონია, სინამდვილეში კი ყველა მტყუანი ვართ. ჩვენი არც  
ლმერთი ჰგავს ღმერთს, არც სახელმწიფო სახელმწიფოს და  
არც კაცობა კაცობას. ამიტომაც ვიხარჯებით ტყუილუბრა-  
ლოდ. როცა წმინდანებს სახეში ვაფურთხებთ, რაცა ყველა-  
ფერში ექვი გვეპარება და ერთმანეთის არაფერი გვეყრა, მა-  
შინ იმის თავი მაინც უნდა გვექონდეს, რომ ყველა ძველი კერ-  
პი დავლევოთ და უამრავი სიცრუისაგან განვთავისუფლდეთ.

ამილახვარი მიხვდა, რომელი კერპების დალევაზეც ლა-  
პარაკობდა ერისთავი, რისგან თხოულობდა განთავისუფლე-  
ბას, მაგრამ იცოდა ისიც, რომ კერპების დალევვა დროზე და  
ცხოვრების პირობებზე უფრო იყო დამოკიდებული, ვიდრე  
სურვილზე. შეუზღუდველი თავისუფლებისაკენ სწრაფვამ  
ერისთავი მხოლოდ გააბოროტა, გააუგნურა. ამიტომაც ჰკითხა  
მოუერიდებლად:

— უამრავი სიცრუისაგან განთავისუფლება მეზობლის  
ოჯახის ქალიან-ბავშვიანად ამობუგვესაც ხომ არ ნიშნავს?

ერისთავმა უკან დაიხია, წარბები შეიკრა. ყბების მოძრაო-  
ბაზე ეტყობოდა, რომ ამ თემაზე საუბარი არ სიამოვნებდა.

— მე მტერს ვებრძოდი, ჩემი მეზობელი კი მტერს ეხმა-  
რებოდა და დროს ქეიფში ატარებდა. განა იმ ოჯახის პატრონ-  
მა არ გასწირა ქალები და ბავშვები, განა ჩემზე აღრე არ წა-  
იწყმიდა სული. ვინ ატანდა ძალას, ვინ იცნობდა ჩემს რძალსა  
და ძმისშვილებს მის მეტი. გამდგარიყო განზე, დაეთმო გზა  
ლტოლვილთათვის, ამისთვის მას პასუხს არავინ მოსთხოვდა,  
მაგრამ, არა. დალატი ძვალრბილში გვაქვს გამჭდარი და სხვა-  
გვარად ვერ ვძლებთ. ჩვენში მანამდე არ აღმოიფხვრება ერთ-  
მანეთის სიძულვილი და შიში, სანამ მოლაღატე დარწმუნებუ-  
ლი იქნება, რომ ავკაცობისათვის არ დაისჯება. ეს რომ მხო-

ლოდ ერთ ან ორ კაცს ეხებოდეს, არაფერს ვიტყვოდი, მაგრამ ბოროტმოქმედება, უპასუხისმგებლობა, უზნეობა ხალხსა, რყვნის და ასეთი ხალხი ველარ უძლებს გაქირვებას, ეფლქუ და გონებრივ ტანჯვას.

— სისხლი ჩვენ ყველას გვცხია ხელზე, ყველა ერთი და იმავე სენით ვართ შეპყრობილი, მაგრამ მკვლელობასა და სისასტიკეს შორის დიდი განსხვავებაა.

— ეს ცხოვრება ისეა მოწყობილი, გივი-ბატონო, რომ რა შორსაც არ უნდა გადგე, შეგნებულ თუ უნებლიე მკვლელობას თავს მაინც ვერ აარიდებ, ხოლო თუ რაიმე საქმისა ან მიზნისათვის იბრძვი, სისასტიკეც უნდა გახდე, ზოგჯერ ისეთი სისასტიკი, როგორიც შენამდე არავინ ყოფილა. კაცი კაცის ან ყმა ან მოსისხარი მტერი და როცა მკვლელობაზე ან სისასტიკეზე უარს ამბობს, უარს ამბობს ცხოვრებაზეც. მკაცრი განაჩენი ჩემს თავს იმ დღეს გამოვუტანე, როცა ავჯანყდი. ამიტომ არც მოდუნების უფლება მქონდა და არც მტრისა და მოლაღატის დანდობის.

— ბარძიმ ერისთავს რაღას ერჩოდი, ციხიდან თავის ფეხით გამოვიდა, ნებაყოფლობით დაგნებდა?

ჯარისკაცები მოშორებით იდგნენ, მოურიდებლად იქექებოდნენ, მაგრამ მათ თვალს მაინც არ აშორებდნენ. ორი კაცის ერთმანეთის პირისპირ ჯდომა და ღვიწის სმა ერთს თუ ართობდა, მეორეს აღიზიანებდა. ზოგს უხაროდა, რომ ვიღაც თავგასული ქართველი სპარსეთში მიჰყავდათ თვალების და სათხრელად, რადგან თუ შესაძლებლობა მიეცემოდა საკუთარ სოფელში ან ქალაქში შეივლიდა, თავისიანებს ინახულებდა. ზოგს კი ის სწყინდა, რომ ჩრდილსა და უზრუნველ ცხოვრებას მოსწყვიტეს, ამ უდაბნოში გადმოიხროლეს..

— ყველაფერზე, რაც გამიკეთებია, ახლა პასუხის გაცემა ჩნდება, გივი-ბატონო. მაშინ მხოლოდ ერთი აზრი მასულდგმულებდა, მკაცრად, სამაგალითოდ დამესაჯა ყველა. ვინაც იმ საზარელ დანაშაულთან რაიმე კავშირი ჰქონდა. ბრალი, აღბათ, იმაშიც მიმიძღვის, რომ ლეკები დავიჭირავე და ქართლი ავაწიოკებინე, მაგრამ საკუთარი ძალებით ურთურთ ერისთავს ვერაფერს დავაკლებდი, ხელიდან დამისხლტებოდა. სპარსელების ზურგს ამოეფარებოდა, მე კი დათმობას, პატიებას სიკვდილი მერჩია. მაშინ რომ შური არ მეძია, საკუთარი ხელით გამოვიჭრიდი ყელს.

— კი მაგრამ, ბავშვები. ბავშვები როგორ ამობუგე ცეცხლში?

— ჯერ ერთი, არც ისეთი ბავშვები იყვნენ, როგორც შემდეგ დაიწყეს ლაპარაკი, მეორეც ურთურთი რომ დამნებებოდა, მოზარდებს ხელს არ ვახლებდი. ჩვენი მტრები მართო გადამთიელები კი არ არიან, გივი-ბატონო, არამედ დროც ჩვენი მტერია. დრო არ ითმენდა, დაყოვნების საშუალებას არ იძლეოდა. ყიზილბაშები უკვე ემზადებოდნენ არაგვის ხეობაში შემოსაქრელად. იმ ომში ან მე უნდა დავლუპულიყავი, ან ურთურთ ერისთავი, ან მოლალატე ან დალალატიანებული.

— რას იტყობდი, ქსოვრისთან ომის შემდეგ რომ ვახტანგი ასე მოგგცეოდა?

— როცა მეფე შუღლის წყარო უფროა, ვიდრე ქვეყნის გამგებელი, მაშინ ყველას უფლება აქვს ისე მოიქცეს, როგორც საჭიროდ მიაჩნია.

სუფრას არაფერი შემატებია, მაგრამ მაინც მდიდრული მღვდერი ჰქონდა, სასმელი და ჭურჭელი უფრო ახალისებდა, ვიდრე ნაირნაირი კერძები.

— შენ რომ კაცმა ყური გიგდოს, შანშე-ბატონო, ყველაფერში ან ბედია დამნაშავე, ან სხვები. ბრალდებულის სკამზე ჯდომას შენც ბრალმდებლის სავარძელი გერჩევნია, რადგან ასე უფრო ადვილია ქვეყნად ბოგინი, მაგრამ აგერ უკვე რამდენი საუკუნეა, რაც მძიმე ცოდვებს ჩავდივართ, ცხოვრებას უშედევგო ბრძოლაში, ქიშპობაში და სოფლის მღურვაში ვატარებთ, ხოლო როცა ძალა გამოგველევა, ნალალატეგნი ვხვდებით ერთმანეთს. მთელი საქართველო შენ უგუნურობაში და სისასტიკეში გდებს ბრალს. შენ მე ლალატში, ქართველი თავადები თეიმურაზს ტახტის მიტაცებაში, თეიმურაზი ქართველ თავადებს მუხანათობაში, ხოლო ნადირ-შაჰს ყველა მემამბოხეებად და ეშმაკის მოციქულებად მივაჩნევართ. ასეთ ვითარებაში მტყუანისა და მართლის გარჩევა ძნელია, სიმართლე ან ძალას ემორჩილება, ანდა იმდენია, რამდენიც ფოთოლი, აი, ამ ხეზე, მაგრამ რადგან ყველას ერთი ბედი გველის, რადგან ბრალდებას ვერც ერთი ჩვენგანი ვერ გაექცევა, მაშინ კაცური კაცისათვის მაინც ის სჯობია, რომ თავის საქმე აცეთოს და თუ სხვა გამოსავალს ვერ იპოვის, ღირსეულად წააგოს თავი.

— თუ ვაქეაცობა და პატიოსნება, ვაქეაცობა და სამართლიანობა, ვაქეაცობა და მტრის სიძულვილი ერთი და იგივე არაა, მაშინ რა მნიშვნელობა აქვს ღირსეულად წააგებ თავს თუ არა?

— მარადიულობის თვალსაზრისით, რა თქმა უნდა, არა ვითარი, მაგრამ ცხოვრებას და ადამიანის საქციელს მაინც ადამიანი სჯის და ამიტომ კაცურ კაცს თავი გასათახსირებლად, ფეხსადგილში გადასაგდებლად არ ემეტება. ამის ღირსი არც ჩვენ, ქართველები ვართ, რადგან სანამ აქამდე მოვიდოდ-

დით, ათასი ჯოჯობით გამოვიარეთ. შეიძლება, ღმერთს მე  
არაფრად მივაჩნივარ, შეიძლება არც ამ ქვეყანას ვვირდები  
რამედ, მაგრამ რადგან ვიშვი, რადგან სხეულში ჩემი სული  
მიდგას და მხრებზე ჩემი თავი მადია, იმის უფლებაც მაქვს,  
რომ ღმერთსაც ავუჯანყდე, ხელმწიფესაც და ყოფიერებასაც.

ამილახვარმა ცას ღიმილნარევი მუქარით ახედა, მაგრამ  
შზერა მწვანე სახურავს ვერ გასცდა. ხის ფოთლები ისე ირზე-  
ოდნენ, ისე შრიალებდნენ, თითქოს ჩრდილებს ქსოვდნენ და  
დედამიწაზე აფენდნენ. მათ ჯერ კიდევ შეეძლოთ შეხმატკბი-  
ლებული ჩურჩული, იმ ადგილის შემოსვა, საიდანაც უნაყო-  
ფობა განდევნეს, მაგრამ ორიოდ თვის შემდეგ მათ სამოსელს  
ქარი დაფლეთდა, ნაფლეთებს უდაბნოში გაიტანდა და გაძარ-  
ცულნი, ალბათ, ისევე დაუპირისპირდებოდნენ ერთმანეთს,  
როგორც ის და შანშე ერისთავი უპირისპირდებოდნენ.

— ამ ღვინოს არც ფერი შესცვლია და არც გემო. ჩემმა  
ერთგულმა ყმებმა საგზალი ურმებით მომართვეს, მოთქმა-გო-  
დებით გამომაცილეს, მაგრამ სპარსეთში გამოყოლა ერთი  
ახალგაზრდა აზნაურის გარდა არავინ ისურვა. თუმცა რისთვის  
უნდა გამოედოთ თავი. ჩემი არავის არაფერი მართებს, დავა-  
ლებული მხოლოდ მე ვარ მათგან. — თქვა ამილახვარმა და  
შანშე ერისთავს ღვინო მიაწოდა.

— არ ვიცი, რით ავხსნა, შემთხვევითობით თუ საკუთარი  
ხასიათის უხიაგობით, მაგრამ ბედი შენ ყოველთვის უფრო  
გწყალობდა, ვიდრე მე, გივი-ბატონო. ამ გზას ისე ადგახარ,  
თითქოს სპარსეთში სასჯელი კი არ გელის, არამედ დიდება და  
პატივისცემა. მე წყალი და ლუკმა პური მენატრებოდა — შენ  
ღვინითა და სურსათ-სანოვაგით დატვირთული აქლემები მოგ-  
ჰყვება უკან. მე დაბორკილი ვიყავი — შენ საკუთარ ცხენზე



ზიხარ და არაფერი გბოჭავს. მე გვერდზე გახედვის უფლებას არ მაძლევდნენ — შენ თითქმის არც კი გიცავენ. რა ვუთხრა იმ განგებას, ვინც ასე ანაწილებს კაცთა შორის ანსა და უარს.

მოვარაყებულნი ჩიბუხი შანშე ერისთავს სიღარბისლუს მატებდა, მაგრამ ამილახვარს ცოტა სასაცილოდ ეჩვენებოდა თამბაქოს წევა და კვამლის პირიდან ბოლქვა-ბოლქვად გამოშვება.

— ბედს ზოგჯერ ხელის შეწყობა სჭირდება, ზოგჯერ კი ხელის შეშლა. ვინც ამას ვერ ახერხებს, ყოველთვის მტეს აგებს.

— ბრძოლა ორივემ წავაგეთ. განსხვავება ჩვენს შორის მხოლოდ ისაა, რომ მე უკვე დამთხარეს თვალები, შენ კი ამ ცოტა ხანში დაგთხრიან.

— ბრალდებულისათვის ცოტა ხანი ცოტა არაა, შანშე-მატონო, მანამდე შეიძლება ქვეყანა ან წალმა შეტრიადდეს, ამ უკულმა.

— ერთს დროს მეც ასე ვფიქრობდი, მაგრამ როცა გიქირს, სასწაულის იმედი უფრო გაქვს, ვიდრე საკუთარი თავის.

— სასწაულის იმედით გაიქეცი გზიდან?

— მახლობლად შამხნარი და მდინარე იყო. წყალში შესვლა რომ მომესწრო, შეიძლება დღეს ჩვენ შორის არავითარი განსხვავება არ ყოფილიყო.

— მაშინ რომ გზიდან არ გაქცეულიყავი და ნადირ-შაჰის სპარსეთში დაბრუნებას დალოდებოდი, შეიძლება თავთან ერთად თვალებიც შეგენარჩუნებინა.

— ნადირ-შაჰის იმედი მე კი არა, მის შვილს არ ჰქონდა. ჯალათი, რომელმაც მას თვალები დასთხარა, ჩემს ჯალათზე

გამოუცდელი აღმოჩნდა და ექიმებს დიდი ჯაფა დასჭირდათ მის გადასარჩენად.

— ეტყობა, შაჰს გადაწყვეტილი აქვს თვალდათხრილნი მოამრავლოს ამქვეყანაზე. — თქვა ამილახვარმა გესლიანი ღიმილით და იმ ერთმა სიტყვამ, რომელიც ხშირად აღგებოდა ენაზე, ფოთლების სანდომიანი შრიალი სახითათო ჩურჩულად აქცია, პური გაამწარა, გააუგემურა. მან ისიც კი არ იცოდა წინასწარ, შაჰს მიჰგვრიდნენ თუ პირდაპირ ჯალათებს მისცემდნენ ხელთ და თვალებს ისე დათხრიდნენ, რომ ხმასაც არ ამოაღებინებდნენ. თუმცა ჯალათებთან საერთო ენა არასოდეს არავის გამოუნახავს და რაღა იგი გამონახავდა. წინა დღით დასჯილის გმინვა და გოდება კარებში შემოეფეთებოდა, სქელი, ცხიმიანი კვამლით გარუჯული კედლები დანაშაულის კვალს დაფარავენ და მას ან გამოიყვანენ, ანდა ხელით გამოიტანენ იქიდან, სადაც თავის ფეხით შევიდა. შანშე ერისთავს ყვლაფერი ეს უკვე განვლილი ჰქონდა, მაგრამ დავიწყებით რომ ვერაფერს დაივიწყებდა, ამას თვალით დანახვა არც სჭირდებოდა.

ამილახვარმა შორს ყურებას ღვინის დასხმა ამჯობინა და წარმოდგენას პურის გაუგემურების, გამწარების უფლება აღარ მისცა.

— ჩვენ ისეთ დროში გავჩნდით, იმდენი ცოდვა დულს და გადმოდულს ირგვლივ, შანშე-ბატონო, რომ აღარც კი იცი, ვინ გაამტყუნო და ვინ გაამართლო, რა დააბრალო შენს თავს და რა სხვას. აქამდე ხალხი მხოლოდ მაშინ მიდის, როცა ან დილა უბედურება დაატყდება თავს, ანდა ამოწყვეტის გზაზე დგას. ჩვენი ხსნა მხოლოდ ცოდვა-მადლის ზუსტად გამიჭვნას, ყველაფრის სასწორზე აწონ-დაწონას შეუძლია, მაგრამ ქართვე-

ლები ისედაც ცოტა, ისედაც გათიშულნი ვართ და თუ კიდევ სამკვდრო-სასიცოცხლოდ დაეუპირისპირდით ერთმანეთს, აღარც მოყვარესთან გვექნება სადავო რამე და აღარც მტერთან, — თქვა ამილახვარმა და ხელში რომ ღვინით სავსე ჯამი არ სჭეროდა, ვილაცას შეუკუროთხებდა.

— ამიტომ ჩვენს თავსაც ყველაფერი უნდა ვაპატიოთ და სხვებსაც, არა?

— შენს თავს შენ ისეთი რამ აპატიე, რაც ზოგიერთს აქამდე საფლავში ჩაიყვანდა. მართალია, საზღაურიც გაიღე, მაგრამ მაინც არ ეკუთვნის იმ ადამიანთა რიცხვს, ვისაც უფლება აქვს ცოდვა-მადლის მკაცრად გამიჯვნა მოითხოვოს. ამისთვის მე და შენ არ გამოვდგებით. საქმისა და ცხოვრების ერთმანეთისაგან გამიჯვნა არაფრით არ ხერხდება, არაფერს არ გააჩნია მხოლოდ თავისი თავი და მხოლოდ თავისი ბოლო. საქმის, მომავლის თვალსაზრისით თუ ვიმსჯელებთ, არავის არაფერი უნდა ეპატიოს, მაგრამ მხოლოდ მომავლის იმედით ცხოვრება ხალხს ერთხანს აგულიანებს, უამრავ სისხლს აღვრევიანებს, შემდეგ კი ისე ღლის, ისე თიშავს, რომ საერთო არავისთან არაფერი აქვს. აღზვევებულნი ნაძარცვ ქონებას იტაცებენ და ისაკუთრებენ, ხელმოცარულნი კი ბედს ეგუებან და ჩივილს იწყებენ. ჩვენ ამდენ ღვინოს იმიტომ ვსვამთ და ამდენს იმიტომ ვმღერვივართ, რომ მომავალს ხან შიშით ვუყურებთ, ხან ზიზღით.

ამილახვრის სახეზე ზიზღის ნაცვლად რაღაც შექარის მავარი გამოიხატა.

— შავ დღეში რომ ვართ, ეს ახალი ამბავი არაა, გივი-ბატონო, მაგრამ ცხოვრება თავის გზით მიდის, ჩვენ ჯერ კიდევ ვარსებობთ, ხალხად ვითვლებით და ამიტომ ვალდებულნი

ვართ ჩვენი არეულ-დარეული ყოფა ჩვენვე მოვაწესრიგოთ. მოწესრიგება კი მანამდე არ მოხერხდება, სანამ ყველგან ერთ მიზანს არ დავისახავთ, ერთ კანონს არ დავემორჩილებით. თქვა ერისთავმა ისე, თითქოს არსად აღარ ეჩქარებოდა.

— საქართველოს თუ ამით რამე ეშველება, მზად ვარ, უმკაცრეს კანონს დავემორჩილო, შანშე-ბატონო, მაგრამ იქ, სადაც კანონი არ მოქმედებს, მართალია გამარჯვებული და მტყუანია დამარცხებული, იქ, სადაც კანონი მოქმედებს, მართალია ის, ვინც ამ კანონების გამოყენება იცის, ვისაც სასამართლოში საქმის მოგება შეუძლია და მტყუანია ის, ვისაც ამის თავი არა აქვს, ხოლო იქ, სადაც აღამიანი ბედსა და გამჩენს უპირისპირდება, სადაც კაცთა მოდგმის ნამოქმედარი ზუსტ სასწორზე უნდა აიწონოს, მართალი არავინ არ შეიძლება იყოს, თვით მამაზეციერიც კი. როგორ გინდა იცხოვროს ამქვეყნად და არავის არაფერი დაუშავო, როგორ გინდა აკეთო რაღაც და არავინ და არაფერი გაიღო მსხვერპლად, როგორ გინდა, შენი პირადი მისწრაფებები, შენი ხასიათის უხიაგობა-სხვეების მისწრაფებებს და ხასიათის უხიაგობას დაამთხვიო, როგორ გინდა, ერთ კანონში ჩაატო ის, რაც არავითარ კანონში არ ეტევა. ხშირად კეთილ, სამართლიან საქმესაც კი უბედურება მოაქვს. შენმა აჯანყებამ იმდენი ხალხი შეიწირა, რამდენიც ზოგჯერ დიდ ომში არ დაუკარგავთ ქართველებს, მეც ბევრი მეზრძოლი და კაი ყმა მომიკლეს, მაგრამ როცა უპატრონოდ დარჩენილი ქვეყანა წყვდიადში იძირება, მაშინ ამ წყვდიადის გასაშუქებლად ვილაცამ რაღაც უნდა გააკეთოს, თუნდაც ამისთვის სისხლის გაღება დარჩეს საჭირო. შენ რომ უგუნურობა არ გამოგეჩინა და ლეკების დახმარებით ურთუროთ ერისთავის ოჯახი ასე სასტიკად არ ამოგებუვა, დღეს ქვეყნისათვის წამებულნი გმირი იქნებოდი.

— როგორ გმირადაც შენ მოგაქვს თავი, არა? — მკითხა ერისთავმა ისეთი ღიმილით, რომ გესლმა გადახრეული მინდვრების ფერი მიიღო.

— შენზე ნაკლებად ცოდვილი არც მე ვარ, შანშე-ბატონო. რაც მე ცხოვრებაში ცოდვები ჩამიდენია, რამდენიმე კაცის ჯოჯოხეთში გასაგზავნად იკმარებდა, ფიცის გატეხვას მე არ მოვრიდებივარ, კაცის კვლას და ღვთის გმობას, მტერთანაც მიბრძოლია და მოყვარესთანაც, მაგრამ უგუნური და უცხვირპირო არასოდეს ვყოფილვარ, ასეთი რამ ჩვენ — ქართველებს — არ გვეკადრება, ჩვენ ხომ ოსმალები, ყიზილბაშები და ლეკები არა ვართ. მართალია, ძალა და ცხოვრებისადმი ცხოველური სიყვარული გვაკლია, მაგრამ სხვისი ყურმოჭრილი მონები არასოდეს ვყოფილვართ, დამპყრობლები არც სწავლა-განათლებით გვკობდნენ, არც ზრდილობით და არც კაცთმოყვარეობით. ძლიერ მტერს მარტო იმიტომ კი არ ვუჯანყდებოდით, რომ სხვა გამოსავალი არ გვქონდა, მშვიდობიანად ვერ მოვურიგდებოდით, არამედ იმიტომაც, რომ საბოლოოდ არ გადაგვარებულყავით, არ დაგვეკარგა რჯული, ენა, ხასიათი და ის, რითაც ქართველს ქართველად მოაქვს თავი. უცხო, გარედან მომზირალ თვალს ჩვენი არაფერი ესმის, ამდენი წინააღმდეგობისა და აუხსნელი ამბების ერთად თავმოყრა და გაგება უჭირს, მაგრამ ეს არც გასაკვირია, არც სავალალო და არც სამარცხვინო. დამადლებით ვერავინ ვერაფერს დაგვამადლის, რადგან არავინ არაფერში დაგვხმარებია, არავის სისხლი და ქონება არ გაგვიფლანგავს. ჩვენს თავს ისე ვუვლიდით, როგორც შეგვეძლო, როგორც გაჭირვება და ჭკუა გვიკარნახებდა. შეიძლება, ზოგიერთს ისიც კი მოეჩვენოს, რომ ჩვენივე თავის მტერი ვართ, არ ვცდილობთ შეგვა-

მირდეთ, გავერთიანდეთ, დანგრეული აღვადგინოთ, კანონიერება დავნერგოთ, ერთი სიტყვით, ქვეყანას და საკუთარ თავს მოვუაროთ, მაგრამ, იქნებ, ჩვენ სხვებზე უკეთ შევძინოთ, რომ როგორც არ უნდა შევკავშირდეთ და გავერთიანდეთ, ირგვლივ შემოსეულ მტრებს მაინც ვერ მოვერევით, იქნებ, იმიტომ არ ვაშენებთ და არ ვაწესრიგებთ არაფერს, რომ მძარცველები ჩვენს ნაშრომსა და ნაღვაწს ერთ დღეში გააცამტვერებენ, იქნებ, ჩვენ სწორედ ის დრო დაგვიდგა, როცა უკეთესია ღარიბ-ღატაკნი ვიყოთ, ვიდრე მდიდრები, იქნებ, იმიტომაც დავიშალეთ და დავიქსაქსენით, რომ გვირჩევნია მტერს ერთი სახელმწიფოს ნაცვლად ათ სახელმწიფოსთან, ათ მეფესთან და თავადთან ჰქონდეს საქმე, იქნებ, ათი დიდი სახელმწიფოებრივი მნიშვნელობის ბრძოლის წაგებას, ასი პატარა, ადგილობრივი მნიშვნელობის ბრძოლის წაგება გვირჩევნია. იქნებ, ჩვენთვის სიჯიუტე, სიკერპე ბევრად უფრო დამღუპველია, ვიდრე ზოგი რამის არ შემჩნევა, გამასხარება, გაუფასურება. ჩვენ რომ დიდი ერი ვიყოთ, სხვების დაპყრობის თავი რომ გვქონდეს, მაშინ ჩვენს გაერთიანებას წინ არაფერი დაუდგებოდა, მაგრამ ჩვენ არსებობისათვის, თავის გადასარჩენად ვიბრძვით და ყველაფერი, რასაც ცუდად თუ კარგად ვაკეთებთ, მხოლოდ ამ მიზანს ემსახურება. ძლიერ, ხალხმრავალ სახელმწიფოს ყოველთვის ურჩევნია ბრძოლის ველზე შეებას მოწინააღმდეგეს, სუსტი კი ცდილობს ძალები დაქსაქსოს და ვიწროებში ჩაუსაფრდეს მტერს, რადგან საბოლოო გამარჯვება ბრძოლის მოგება-წაგებაზე კი არაა დამოკიდებული, არამედ გამძლეობაზე. ამიტომ ზოგჯერ არც კი იცი რა სჯობია — თავდაცვა თუ თავდასხმა, ვინ უფრო ადრე აღიგვება. პირისაგან მიწისა — დამპყრობელი თუ დაპყრობილი. იმან,

რაც მე კაცობრიობის წარსულის შესახებ ვიცი, ერთ რამეში დამარწმუნა. სუსტ, დაპყრობილ ხალხებზე ადრე სწორედ ის ხალხი აღგვიღა პირისაგან მიწისა, რომელიც ქუხდა, მსოფლიო იმპერიებს აკოწიწებდა, მეზობლებს თავზარს სცემდა.

ამილახვარი სრულიად არ ჰგავდა გარიყულ, საკუთარი თავის ამარა დარჩენილ კაცს. იქცეოდა ისე, როგორც მოსწონდა, როგორც საჭიროდ მიაჩნდა და ამბობდა იმას, რის უთქმელობაც ცხოვრებას ლაზათს უკარგავს.

— ჩვენ რომ ერთმანეთს არ ვკამდეთ, არ ვღალატობდეთ, მაშინ საკუთარი თავისადმი სასაყვედურო არაფერი გვექნებოდა. ერთად ვიქნებოდით თუ ცალ-ცალკე, გავიმარჯვებდით თუ დავმარცხდებოდით, ეჭვი და უნდობლობა არ მოგვწამლავდა, არ გაგვაუგუნურებდა, არ ჩაგვადენინებდა რალაც ისეთს, რისი მონელებაც ჭირს — თქვა შანშე ერისთავმა და იგრძნო, რომ ღვინო ერეოდა, სათქმელს ისე ვეღარ ამბობდა, როგორც სურდა.

— ტყუილად გგონია, შანშე-ბატონო, რომ შუღლი, ღალატი, შური და გაუტანლობა მარტო ჩვენი, ქართველების თვისებაა. ბერძნებმა ყველა ამ თვისების ზემოქმედება ისე მწვავედ განიცადეს თავიანთ თავზე, რომ მათი გამომხატველი ღმერთები თუ ქალღმერთები შექმნეს და ზოგი კვარცხლბეკზე შეაყენეს, ზოგი კი ქვის კედელზე ამოტვიფრეს. რა გასაკვირია, მშიერ კაცს სხვისი ლუკმა შურდეს, როცა შურის გრძნობისაგან მეფეებიც კი არ არიან თავისუფალი, რა გასაკვირია, მეზობელს მეზობლის ეშინოდეს, როცა მღვდლებიც კი ერთმანეთს ეჭვის თვალთ, უნდობლად უყურებენ. რომელ ქვეყანაში არ ყოფილა ძმათა შორის სისხლის ღვრა, ტახტისათვის ბრძოლა, ქიშპობა, ყაჩაღობა, რბევა, დამნაშავეის გაბა-

ტონება და უდანაშაულოს დასჯა. ბიზანტიელებს, არაბებსა და სპარსელებს ჩვენ კი არ ვასწავლეთ ცოცხლად ტყავის გაძრობა, ძელზე გასმა, თვალების დათხრა, არამედ მათ გვესწავლეს, მამული ჩვენ კი არ წაგვირთმევია მეზობლებისათვის, არამედ მათ წაგვართვეს, ნაძარცვით ჩვენ კი არ ვიკვებებით, არამედ ჩვენი მტრები იკვებებიან. არ არსებობს ისეთი უზნეობა და დანაშაული, მარტო ჩვენი თვისება რომ იყოს, მარტო ჩვენ რომ ჩაგვედინოს. განსხვავება ჩვენსა და სხვა ხალხებს შორის მხოლოდ ისაა, რომ მძიმე დღეში ვართ, უსაშველოდ გვიჭირს, გაჭირვებულს კი ღმერთისა და ზნეობისათვის არ სცალია, ცხოვრება ამდენი პარპაშის საშუალებას არ აძლევს. მისი ერთადერთი მიზანი არსებობის შენარჩუნებაა, სულერთია, რის ხარჯზეც არ უნდა მოხდეს ეს. გადახედე სპარსელი და ფურქი ისტორიკოსების მატრიანებს, ჩვენ იმიტომ კი არ გვლანძღავენ, იმიტომ კი არ გვეძახიან შაითანს, რომ არ ვვარგვართ, არამედ იმიტომ, რომ მათ ნებას არ ვემორჩილებით, შაჰებსა და სულთნებს სიცოცხლეს ვუმწარებთ. აგერ უკვე რამდენი საუკუნეა, რაც თავს გვესხმიან, თითქმის ყოველ წელიწადს გვიპყრობენ, მაგრამ ჯერაც ვერ დავუბყრივართ.

ცა ისევ ისეთივე მოწმენდილი, სიცხით შეხუთული იყო, მაგრამ ფოთლებს შორის რატომღაც სულ უფრო ნაკლები და ნაკლები შუქი ატანდა. შეიძლება გარედან მომდინარე სინათლეს ღვინის ნაპერწკლებით გაშუქებული განწყობილება ჩრდილავდა, ან შეიძლება კუნძულმა ადგილი მოინაცვლა და ტის დასალიერს მიუახლოვდა. შანშე ერისთავს ამის დანახვა არ შეეძლო, მაგრამ არც გივი ამილახვარს აინტერესებდა, რა იცვლებოდა ირგვლივ, დრო წინ მიიწევდა თუ ერთ ადგილას იტყუებებოდა. იმდენი ღვინო, რაც ღლეს დალია, თბილისიდან



წამოსვლის შემდეგ არ დაუღუვია, იმდენი სიტყვა, რაც ღღეს დახარჯა, მთელი გზის მანძილზე არ დაუხარჯავს. ქვეყანა, რომელსაც ხან თვალთ ზომავდა, ხანაც ნაბიჯებით იზზარებოდა, თავზე ენგრეოდა, მაგრამ მას არავითარი სურვილი არ ჰქონდა ნანგრევებს შორის დაღუპულიყო, გადამთიელებისთვის შეეწირა ის, რაც მას და მის ქვეყანას სჭირდებოდა.

— მე რომ ბრალმდებელი ვიყო, ალბათ, ასეთ დიდ მნიშვნელობას არ მივანიჭებდი ლოდინს, როგორც ახლა ვანიჭებ, — თქვა ამილახვარმა და ერისთავის მახვილი სმენა მართო სიტყვების აღსაქმელად კი არ მოემზადა, არამედ ფარული აზრის ამოსახსნელად, — ყველაფერს აუცილებლობით ავხსნიდი და მართებულად მივიჩნევდი, მაგრამ ბრალდებულსა და ბრალმდებელს შორის დაახლოებით იმხელა მანძილია, რამხელაც დედამიწის ერთი უკიდურესი წერტილიდან მეორე უკიდურეს წერტილამდე. შეიძლება, სწორედ ეს უკიდურესობა ჰყოფს ქვეყანას ორ ნაწილად. ერთი ეკუთვნის იმას, ვის ხელშიც სამართალია და არაფრის ძიება არ სჭირდება, მეორე იმას, ვინც სამართალს ეძებს და ვერ პოულობს. ჩემი მდგომარეობა კიდევ უფრო სავალალო იქნებოდა, სამართალი რომ სხვადასხვა მოხელეებისა და სადივანბეგოების ხელში იყოს, მაგრამ მე მხოლოდ ერთი კაცი მდებს ბრალს და მიუხედავად იმისა, რომ ჩემი ბრალმდებელი უფლებამოსილი ხელმწიფე და სასტიკი მბრძანებელია, მაინც მიჩვენია საქმე ერთ კაცთან მქონდეს, ვიდრე სადივანბეგოებში მოკალათებულ მოხელეებთან.

— მუსლიმანებს და, ალბათ, თვით ნადირ-შაჰსაც ღღემდე არ უყვართ ყადები და მათი ხელქვეითნი. სპარსეთში მოსამართლეებისა და ხელისუფალთა უფლება-მოსილებანი ჯერაც



არ არის გამიჯნული, მით უმეტეს მაშინ, როცა საქმე სახელმწიფოებრივ დანაშაულს ეხება. შენ რომ გადასახადი არ გადაგხადა, ან რამე მოგეპარა, რა თქმა უნდა, მაპთან არ მიგიყვანდნენ, მაგრამ შეამბოხის დასჯა და შეწყნარება მხოლოდ შაჰის ნებაზეა დამოკიდებული.

— ამბობენ, მისი შიშით ყველა კანკალებს და მასაც ყველგან შეთქმული და მოლაღატე ელანდებო.

— არსად არ ბუდობს იმდენი შიში, აჩრდილები და ავიზრახვები, რამდენიც სასახლეში.

მობიბინე ხალიჩაზე ნათელი ლაქები ჩნდებოდა და ისევ ქრებოდა. ნიავი ფრთებს შლიდა, ქარის ძალას იძენდა. ამილახვარმა გზას ოდნავ დაბინდული თვალებით გახედა და მის სახეზე რაღაც ისეთი გამოისახა, რაც მანამდე კანჭვეშ იყო დაფარული. აღგზნებულს ცოტა მოგონილ ამბად ეჩვენებოდა ამ გზის არსებობაც, მანვე ერისთავთან შეხვედრაც, ნათქვამის სიმსუბუქეც და უთქმელის სიმძიმეც. ძილში ყველაფერი ეს სხვაგვარად დალაგდებოდა და შეიძლება ისეთი რამ მოლანდებოდა, რაც შეუძლებელს შესაძლებლად გახდიდა, ან ყველას დაადანაშაულებდა ანდა ყველას გაამართლებდა.

საჭურისმა ჯერ თავი წამოსწია და მხოლოდ ამის შემდეგ წამოდგა ფეხზე. მისი მქისე ხმა ისე გაისმა მთვლემარე სამყაროში, როგორც ყორნის მოულოდნელი ჩხავილი. მუსლიმანები და ქართველები წამოიშალნენ, ცხენებს, აქლემებს და ხორცშესხმულ ქვეყანას მიაშურეს. ყველაფერი აირ-დაირია, აყაყანდა, აქლერდა. გზა აღჭურვას, ტანსაცმლის ტანზე მორგებას, შემართვას მოითხოვდა, მაგრამ სხვების ფუსფუსი ამილახვარსა და ერისთავს არ აფორიაქებდა. ისხდნენ და მანამდე სვამდნენ და საუბრობდნენ, სანამ უნაგირები არ გამოაცალეს,

სუფრა არ აალაგეს. უმეტესობას ცხენი უკვე შეეკაზმი, ჩალ-  
ვადრებს საპალნეაკიდებელი აქლემები წამოეყარათ, ჯარისკა-  
ცებს იარაღი აესხათ. მოძრაობდა ყველა და ყველაფერი და  
ამ მოძრაობაში სიცხარე, მოუთმენლობა იგრძნობოდა.

— საქართველოში ხომ არაფერს დამაბარებლი, გივი-ბა-  
ტონო?

— დაბარებას დაბრუნება მირჩევნია.

ახალგაზრდა აზნაურმა ამილახვარს შეკაზმული ცხენი  
შოკგვარა და სადავე ხელში შეაჩეჩა. დრო იყო თვალდათხრი-  
ლი და თვალდასათხრელი ერთმანეთს გამომშვიდობებოდნენ,  
თავთავიანთ გზას დასდგომოდნენ.

— ჩვენი გზები რომ არ იყრებოდეს, საქართველოში რომ  
ერთად ვბრუნდებოდეთ, უთქმელი, დაუღვევლი და შეუჭ-  
მელი არაფერი დაგვრჩებოდა, შანშე-ბატონო, მაგრამ რადგან  
ქვეყნად ჯალათი არსებობს, მსხვერპლიც უნდა გამოინახოს და  
ამჯერად ბედმა მე გამწირა. — თქვა ამილახვარმა და ცხენს  
ყბაზე მოუთათუნა.

ერისთავი თამბაქოს ეძალებოდა, ოფლით დანამულ სახე-  
ზე ლაქები ემატებოდა.

— განწირულს სხვაგვარი ხმა და სიცილი აქვს, გივი-ბა-  
ტონო. შენ ან იმის იმედი გაქვს, რომ თავს დაიხსნი, ანდა ვერ  
წარმოგიდგენია, რა საშინელებაა თვალების დათხრა.

ამილახვარმა შანშე ერისთავის ყორნისფერ ულაცს შეავ-  
ლო თვალი და უნებლიეთ გაიფიქრა, სად იშოვაო ამ ხეიბარ-  
მა ეს დიდებული ცხენი.

— ამ ამბავს მე ისე კი არ ვუყურებ, შანშე-ბატონო, რო-  
გორც გარკვეული მოვლენების კანონიერ შედეგს, ან ცოდვა-

თა საზღაურს, არამედ როგორც ბედისწერას, რომლის ნამდ-  
ვილ არსს აქამდე ვერავინ ჩასწვდომია.

— ბედისწერას ლოდინი და დროის გადავადება არ უყვარს,  
ვარს, თორემ ამდენი მომღურავი არ ეყოლებოდა.

— მე რომ ავბედითობას შეჩვეული არ ვიყო, ყოველი  
საფრთხის შემოფეთებაზე, რომ გული მეღეოდეს, მაშინ ამ  
გზას არ დავადგებოდი, შენი არ იყოს, მე საკუთარი ხელით  
გამოვიჭრიდი ყელს, მაგრამ რამდენ სასიკვდილოდ ნასროლ  
ტყვიას ჩაუსისინებია გვერდით, რამდენი ზიფათი და სასჯელი  
ამცდენია. იქნებ, ღმერთმა ამჯერადაც მიხსნას.

— ხომ გავიგონია ქართული ზღაპარი, სადაც გამოცდილი  
გამოუცდელს ეუბნება, წასული ბევრი მინახავს, უკან დაბრუ-  
ნებული კი არავინო.

— ქართულ ზღაპარში ერთი ყოველთვის ბრუნდება უკან  
და, შეიძლება, ის ერთი მე აღმოვჩნდე. მშვიდობით, შანშე-ბა-  
ტონო, თუ უკან ამ გზითვე დავბრუნდები, შენს სიტყვებს მო-  
ვიგონებ. — თქვა ამილახვარმა ცხოვრებასთან გარიგებული  
კაცის ორაზროვანი ღიმილით და ცხენს მსუბუქად მოექცა  
ზურგზე.

იქ, სადაც მას ელოდნენ, გულჩვილი და დამთმობი არავინ  
დახვდებოდა; სიტყვას არავინ შეაწევდა. ეს აზრი ჩრდილივით  
გამოჰყვა საქართველოდან და ნელ-ნელა, შეუმჩნეველად წამ-  
ლავდა, მაგრამ ამგვარი შხამი მის ძლიერ სხეულს ადვილად  
ვერ მოერეოდა, ისე ვერ დააუძღურებდა, რომ საკუთარი თა-  
ვისათვის ელაღატა.

ქართველები ერთმანეთს გამოემშვიდობნენ და ორ ჯგუ-  
ფად გაიყვნენ. დასავლეთისაკენ მიმავალთ სულ სხვა გამო-  
მეტყველება ჰქონდათ, ვიდრე იმათ, ვისი გზაც აღმოსავლეთი-

საკენ მიიკლავნებოდა. ამილახვარმა ცხენი ადგილიდან დასდ-  
რა და როცა მტვრიან გზაზე გავიდა, უკან დაბრუნებულ მწვანე  
კუნძული უმტკივნეულოდ ჩააბარა წარსულს.

### III

დახრილი, კიდევებუწითლებული მზე სიმძიმეს კარგავდა.  
მოკრიალებულ ცაზე ფხვს ველარ იკიდებდა. ყოველი მრუდდ  
თუ სწორი ხაზი პირვანდელ სიმკვეთრეს იძენდა, მოშლილი  
ზღვრების აღდგენას ცდილობდა. ახლა უკვე შეიძლებოდა ისე  
სუნთქვა, როგორაც დედამიწა სუნთქავდა, იმ უთანხმოე-  
ბის შემცირება, რომელიც მას და დროს შორის სუფევდა. შე-  
იძლება, ქვეყანაც ექაჩებოდა ქვესკნელის ბნელი, გრილი მარ-  
ნიდან გამამხნეველ, გამაზალისებელ წვეწვს და მანამდე სვამ-  
და, სანამ არ დათვრებოდა, იგიც ხომ ვიღაცის შექმნილი იყო,  
ვიღაც ისეთის, ვისაც მისთვის არაფერი უკითხავს, არაფერი  
აუხსნია.

გზაზე ავარდნილი მტვერი ღრუბელივით იკვრებოდა და  
იქეთკენ მიედინებოდა, საითაც შანშე ერისთავი და მისი  
მხლებლები მიდიოდნენ. ერისთავთან შედარებით მას ერთი  
დიდი უპირატესობა ჰქონდა. შანშეს არავინ გამოსარჩლებია.  
მას კი თეიმურაზმა სოლომონი გამოაყოლა და ნადირ-შაჰთან  
რაციმი გამოატანა, სადაც მის შეწყალებას სთხოვდა. თეიმუ-  
რაზის თხოვნისათვის რომ შაჰს ანგარიში გაეწია, ამ ორ ხანს  
ქართლში არ გამოგზავნიდა, მაგრამ მეფისა და დედოფლის  
განმეორებითი თხოვნა რაღაცას ნიშნავდა, მის კართან სიახ-  
ლოვეზე და შეუვალობაზე მეტყველებდა. სანამ ასეთ კაცს ჯა-

ლათს გადასცემენ, ყველა მოსალოდნელ შედეგს ითვალისწინებენ. თეიმურაზი, რა თქმა უნდა, მისი გულისათვის შაჰს არ წაეკიდებოდა, მაგრამ შაჰს ქართველების მიმართ, ამდენი ნდობა არ ჰქონდა.

ყვითელი და ცისფერი სიბრტყე, სხვადასხვაფრად შეღებულ, ერთმანეთისაკენ პირშეჭყეულ თასებს რომ ჰგავდა, ხან უახლოვდებოდნენ ერთმანეთს, ხანაც ისე შორდებოდნენ, რომ უზარმაზარ ბზარში ჩაუქრობელი ცეცხლის სიკაშკაშესთან ერთად მარადიული ჩრდილიც იჭრებოდა. შემდეგ ყვითელი თასი ცოცვას, რყევას იწყებდა და კიდევები ისე აცვდებოდა, თითქოს ვიღაც ბასრი კბილებით ღრღნიდა. ტყვე რომ არ ყოფილიყო, ცხენს დეზს შემოკრავდა, გააჭენებდა, გაახელებდა, ვცდებოდა ამოეწურა, დაეკეცა დაუკეცავი სივრცე, თუ ყველაფერს ვერ ზიდავდა, იმას მაინც მიიტანდა ქვეყნის დაღრღნილ კიდემდე, რასაც ედავებოდნენ, მაგრამ, როგორც კი ცხენს მათრახს შემოკრავდა, უკან მომავალნიც მაშინვე აყიფინდებოდნენ, იარაღს მოიმარჯვებდნენ და დასაქერად დაედევნებოდნენ, შემდეგ, რამდენიც არ უნდა ემტკიცებინა, გაქცევა არ მინდოდაო, მაინც არავინ დაუჭერებდა.

ამილახვარმა ცხენი ნებაზე მიუშვა და როცა რომელიღაც საგნის მეორისაგან გამოცალკევება გაუჭირდა, მიხვდა, რომ დანაწევრებული დროიდან კვლავ ამოირეცხა აწმყო. ციხე გატეხილი, კედელმორღვეული იყო, მაგრამ აღება კედელმორღვეულ ციხესაც უნდოდა და თეიმურაზმა ზედმეტ სისხლისღვრას მისი კიდევ ერთი პირობის შესრულება, თამარ დედოფლის თბილისიდან სურამში ჩამოყვანა ამჯობინა. თამართან შეხვედრა იმიტომ ისურვა, რომ კეთილი, გონიერი ქალი იყო, ქართლის ტახტი მემკვიდრეობით მას ეკუთვნოდა და, რაც

მთავარია, ნადირ-შაჰთან უფრო ადვილად პოულობდა საერთო ენას, ვიდრე თეიმურაზი. წინასწარ ძნელი იყო იმის თქმა, დატყვევების შემდეგ როგორ მოექცეოდნენ სპარსელები და მტრულად განწყობილი ქართველები, მაგრამ როგორც არ უნდა მოქცეოდნენ, რა ბრალდებაც არ უნდა წაეყენებინათ, თამარი მისი განუსჯელად დასჯის, ძალლივით მოკვლის უფლებას არავის მისცემდა, წინ აეფარებოდა. ამიტომაც აღარ ზარავდა მორღვეული კედლის ცქერა. ფართო ღიობიდან სინათლის მსხვილი ნაკადი იჭრებოდა და მოპირდაპირე კედლის მარჯვენა კუთხეს ეცემოდა, ქვის სიპირქუშეს არბილებდა, ჯარისკაცები უსაქმოდ დაბორიანდებდნენ, იცოდნენ, რომ დაფერდებულ, გვერდგამონგრეულ ხომალდზე დიდხანს ვერ დარჩებოდნენ, მაგრამ მოუთმენლობას არ იჩენდნენ, ციხიდან არ გარბოდნენ. მხოლოდ ერთი ჯმუხი, მტკვარგალმელი აზნაური დაადგა ქვაზე ჩამომჯდარს თავზე და ჯიუტად ჰკითხა:

— რას აპირებთ, ვივი-ბატონო?

მტკვარგალმელ აზნაურს სიჩუმე, ლოდინი და გაურკვეველობა უფრო აფრთხობდა, ვიდრე ხელჩართული ომი.

— ბრძოლა წაგებულია, ჩემო გიორგი, საფიქრებელი ახლა მხოლოდ ისაა, რომ რაც შეიძლება ნაკლები მსხვერპლი გავიღოთ.

— ჩააბარეთ ციხე და მსხვერპლსაც ნაკლებს გავიღებთ.

— ჯერ ადრეა, ამ კედელმორღვეული ციხის ფასად რამდენიმე თავის გამოსყიდვა შეიძლება. სანამ კაცს მტერთან დაზავების მცირედი შესაძლებლობა მაინც აქვს, დანებება სისულელეა.

— მე თუ შემრჩება თავი მხრებზე?

უნდოდა ეთქვა, მაგ გასიებულ თავს ის ფასი არა აქვს, რა

საც ადებო, მაგრამ ამ მოუხეშავ კაცთან ლაპარაკს მისი თავი-  
დან მოცილება ერჩია.

— ნუ გეშინია, სანამ ცოცხალი ვარ, მაგ თავს არაფერი  
ემუქრება.

უკმაყოფილებას სხვებიც გამოთქვამდნენ, მაგრამ ხელაღე-  
ბით გამოწვევას ვერაფერს უბედავდა. მას ჯერ კიდევ შესწევდა  
იმის ძალა, რომ ურჩინი აელაგმა.

თეთრი, დედოფლის საკადრისი კარავი იმავე ადგილას გა-  
შალეს, სადაც გასულ წელს თეიმურაზს შეხვდა. სურამის მა-  
ცოცხლებელი ჰაერი დენთის სუნისა და მტვრისაგან გაიწმინ-  
და. ცის მსუბუქი თალი და ზურმუხტოვანი ტყე-ველი ძველს  
მტრობის დავიწყებას, სიცილს, სიხარულს, კაცთა შორის თან-  
ხმობას მოითხოვდა, მაგრამ ბუნების ეს ძახილი, ალბათ, იმათ  
ყურამდე არ აღწევდა, ვინც დაბლა ელოდა. თუმცა, რით ამო-  
ავსებდა გაღმობიერებულ-განატიფებული ქვეყანა უკან დარ-  
ჩენილ ნატერფალსა და ნამუხლარს, რით შებოჭავდა იმათ  
სულს, ვისაც მისი სულის შერყევა და მოდრეკა სურდა. ჯერ-  
ჯერობით მხოლოდ გაშლილ კარავს და აღჭურვილ, მორთულ-  
მოკაზმულ მტრებს ხედავდა, რომლებიც მასთან შესახვედრად  
ზარ-ზეიმით ემზადებოდნენ.

ადევნებული ჩრდილი ისე დაგრძელდა, რომ გზას გასცდა  
და ველზე გაიჭრა. ამილახვარმა მწუხრისაგან პირშექცეული  
ღრის უღდეურობა იგრძნო, ბეჭებში მოიხარა, ცოტათი დაცხ-  
რა. სველი პერანგი ტანზე ეწებებოდა, ზურგს უჭაობებდა,  
მაგრამ საცვლებს მანამდე ვერ გამოიცვლიდა, სანამ გზაზე  
ფუნდუკი ან ქარვასლა არ შეხვდებოდა, კარს, კედელს ან  
ფარდას არ ამოეფარებოდა. სადღაც წაუკითხავს, ბაღდადელი  
ხალიფები დამნაშავეს დასჯის წინ ყველაფერს ახალს აცმევდ-



ნენ, მდიდრულად მოსავდნენ და ბუკის ბლავილითა და მარ-  
რის ცემით ალ-მანსურის მოედნამდე მიჰყავდათ, ხალცი  
მსხვერპლს წითელ, უსახელო ჯუბაში გამოწყობილი, ქანდაკე-  
ბასავით დადუმებული ჯალათი ელოდა. ხალიფებისათვის დამ-  
ნაშავის დასჯა მარტო განაჩენის აღსრულება კი არ იყო, არა-  
მედ დიდი სანახაობაც. მას შემდეგ, რა თქმა უნდა, ბევრი რამ  
შეიცვალა, მბრძანებელთა სისასტიკე გაათქვცდა, მაგრამ კაცის  
საჯაროდ დასჯამ და მოსისხარი მტრების შერიგებამ სანახაო-  
ბითი სახე მაინც არ დაკარგა.

იმ დილით მოსირმული ჩოხა ჩაიცვა, მაღიანად ისაუზმა და  
ციხიდან შეუქუთრველი გავიდა. თავდაცვაზე, უკან დაბრუნე-  
ბაზე ფიქრი ზედმეტი იყო, ამდენი თვალთმაქცობის თავი  
აღარ ჰქონდა. რაკი ბედმა უმტყუნა, სჯობდა ჩაპყოლოდა, თავის  
ფეხით მისულიყო იმათთან, ვისთანაც დატყვევების შემ-  
დეგ ძალით მიათრევდნენ. სიტყვა, სიცილი, აზრის სიცხადე და  
ბუნდოვანება მახვილ კუთხეებს ცოტათი შეარბილებდა, და-  
იწყებოდა ამბების სხვაგვარად დალაგება, ცოდვათა შემსუბუ-  
ქება, ურთიერთგამომრიცხავ მოვლენათა გაზვიადება, ერთი  
სიტყვით თავის მართლება, რის უფლებაც ყველა მოკვდავს  
აქვს, რადგან დამნაშავე არასოდეს არ ყოფილა მარტო ის,  
ვისაც ადანაშაულებენ.

სწორედ ამის იმედი ჰქონდა, როცა კარვისაკენ მიიბიჯებ-  
და. თუმცა უყურადღებოდ არც სხვა მოსაზრებებს ტოვებდა,  
განსაკუთრებით ერთ ნათელ აზრს, რომლის საფუძვლიანობა-  
ში ეჭვი არ ეპარებოდა. თამარი და თეიმურაზი აუცილებლო-  
ბას ემორჩილებოდნენ, თორემ ყიზილბაშები მასზე ნაკლებად  
არ სძულდათ და ამიტომ სპარსელებთან ნაომარ კაცს ასე  
ხელალებით, უღეთოდ არ გასწირავდნენ, მანამდე არ გაიმე-

ტებდნენ სასიკვდილოდ, სანამ ნადირ-შაჰი ან მის დასჯას არ მოითხოვდა, ანდა ისპაჰანში არ დაიბარებდა. როგორც ერთ, ისე მეორე შემთხვევაში დრო ილუმალი მიჯნებისაკენ გადაწოხდებოდა და გონზე მოსვლის, ახალ საფრთხესთან შეჯუჯების შესაძლებლობას მისცემდა. თეიმურაზს მხოლოდ ერთი რამ შეეძლო ესაყვედურებინა, ჩემი გამეფების შემდეგ რატომ არ შესწყვიტეო ბრძოლა, მაგრამ ამ ბრალდების შემსუბუქებას როგორმე მოახერხებდა.

გზა მარჯვნივ უხვევდა, აღმართს მიჰყვებოდა. კლდეებისაკენ მიემართებოდა. შორს, ცის დასალიერთან შიშველი კედელი მძიმე, დანაოჭებულ ფარდასავით ირხეოდა, თანდათან მუქდებოდა და მიღმა მღებარე ქვეყანას — ტყეებს, მდინარეებს, სოფლებს და ქალაქებს ფარავდა, ფარავდა ყველაფერს, რაც დაღლილ, უძინარ თვალს ენატრებოდა, რაც მუდამ ან სათხოვნელი, ან სადავო, ან ძალით დასასაკუთრებელია, მაგრამ ახლა არც დავის უფლება ჰქონდა და არც რაიმეს ძალით დასაკუთრების. ჯერ ის უნდა მოენელებინა, რისთვისაც პასუხს სთხოვდნენ.

კარავში მეფე-დედოფლის გარდა ქართველ და სპარსელ დიდებულებსაც მოეყარათ თავი. ამდენი ხალხის დანახვა არ ესიაშოვნა, არ უნდოდა მოწმეთა თანდასწრებით ეთქვა ის, რაც სათქმელი არ იყო, მაგრამ წარბი არ შეუხრია, ღიმილი არ გამრუდებია. მასზე ძლიერი და ახოვანი ირგვლივ არავინ ჩანდა. შეიძლება ეს იყო იმის მიზეზი, რომ მამაკაცები ფეხზე წამოდგნენ, სახეში შეაჩერდნენ. დიდებულთა ამ საკრებულოში პირველი სიტყვა მას უნდა ეთქვა, პირველი ნაბიჯი მას უნდა გადაედგა, მაგრამ სანამ ადგილიდან დაიძრებოდა, ვილა-

ცისთვის თვალი უნდა გაესწორებინა და მან დედოფალი აირ-  
ჩია. ამის შემდეგ სხვები მხოლოდ მოწმეებად იქცნენ.

თამარი უკვე დიდდა იყო, ორი თუ სამე მღვიღღიანი  
ჰყავდა, მაგრამ მაინც ახალგაზრდა, მიმზიდველი ჩანდა. უს-  
დებოდა ტახტზე ჯდომა, დედოფლობა. ოდნავ მაშაყაყური  
შუბლი, სანდომიანი სახე და ბევრი უბედურების მომსწრე,  
ჰკვიანი თვლები სიავესა და სისასტიკეს გზას უღობავდნენ,  
უგუნურთაგან თმენასა და განსჯას მოითხოვდნენ. ქართლი  
მარტო სამფლობელო კი არ იყო მისი, არამედ დიდი, გაღარი-  
ბებული ოჯახიც, რომლის დასაცავად, გამოსაკვებად და მოსა-  
ლონიერებლად თავს არ ზოგავდა, ქართველებს სახლშიც ესარ-  
ჩლებოდა და სახლს გარეთაც. ამიტომაც უყვარდა დიდსა და  
პატარას, ყველა გაჭირვებული მის კალთას ეფარებოდა. შანშე  
ერისთავი მან გამოსთხოვა ნადირ-შაჰს და არა თეიმურაზმა.

ფეხშებორკილი, მოუქნელი არასოდეს ყოფილა და ამი-  
ტომ თამაშად, უკან მოუხედავად დაიძრა ტახტისაკენ. თამარი  
მარტო დედოფალი კი არ იყო. მისი, არამედ სისხლით ნათესა-  
ვიც და სიყრმის მეგობარიც. რამდენჯერ ურბენიათ, უთამაში-  
ათ ერთად, რამდენჯერ წაჩხუბებულან და ისევ შერიგებულან.  
დღეს კიდევ ერთხელ უნდა შერიგებულიყვნენ და იგი დარწ-  
მუნებული იყო, რომ დედოფალი პირს არ მოარიღებდა, ბე-  
დის ამარა არ მიატოვებდა. სანამ ხმას ამოიღებდა, თამარის  
წინ მუხლი მოიყარა, კალთაზე ემთხვია, შემდეგ მკერდიდან  
პატიოსანი თვლებით შემკული, ცხოველმყოფელი ჯვარი მო-  
იხსნა და დედოფალს აჩუქა. მხოლოდ ამის შემდეგ გაისმა კა-  
რავში მისი ძლიერი, მკვეთრი ხმა. ლაპარაკობდა ქვეყნისა და  
არსებობის შეუსაბამობაზე, თავისუფლებაზე, შესაძლებლო-  
ბათა გადაფასებაზე და შეცდომებზე, ლაპარაკობდა ისე, რომ


არც სხვებს აღნაშაულებდა და არც საკუთარ თავს, არც არავის იწვევდა და არც არავის უპირისპირდებოდა, რადგან ცოდვების მონანიება კარავში თავმოყრილ დიდებულებს, აღნაშაულის აღიარებად კი არ უნდა მიეჩნიათ, არამედ ამისა დაუდგარი ხასიათის კიდევ ერთ უხიაგობად. და ეს ასეც მოხდა. სითამამემ, ცხოვრებასთან პირისპირ შეხვედრის უნარმა და აკინძულ სიტყვათა ძალამ გარემო და დიდებულები მის სასარგებლოდ განაწყო. დედოფალს თვალები გაუბრწყინდა, თეიმურაზმა გვერდზე დაიწყო ყურება, სპარსელი დიდებულები კი საბოლოოდ დარწმუნდნენ, რომ მისი ბედის გადაწყვეტა მათი საქმე არ იყო.

მოწინააღმდეგესთან შეხვედრას რომ დაზავების ხასიათი ჰქონოდა და არა გამარჯვებულის მიერ დამარცხებულის დატყვევებისა, თამარსა და თეიმურაზს მოსთხოვა უვნებლობა აღეთქვათ, ხატზე დაეფიცებინათ, რომ არაფერს დაუშაგებდნენ. თეიმურაზი ცოტათი აიმრიზა, მაგრამ თამარს ყოყმანი არ დაუწყია. ფეხზე წამომდგარმა ხატი მოითხოვა და როცა მოჰგვარეს, პირჯვარი გადაიწერა, ხატის წინ მუხლი მოიყარა და ფიცი სამჯერ გაიმეორა. მარცხით გამოწვეულმა კმუნვამ კვლავ იცვალა ფერი, კიდევ ერთხელ გარდაისახა სიხარულად. ქართველი თავადები ხელს ართმევდნენ, მეფე-დედოფალთან დაზავებას ულოცავდნენ. თამარმა და თეიმურაზმა სუფრის გაშლა ბრძანეს, მისი სახლთუხუცესად დანიშვნა იქვე გადაწყვიტეს და სპარსელ დიდებულებთან შეარიგეს. მინდვრები, ტყით შემოსილი ფერდობები, ყველაფერი, რასაც მინაბული ცა ზემოდან დაჰყურებდა, იმედიანად სუნთქავდა, მარადისობისაკენ ისწრაფოდა და მასაც თან მიაქროლებდა, ავბედითობას და მარცხს ავიწყებდა. მიწა, მთელი ამქვეყნიერი სიბინძურ-

რისა და სიწმინდის, ავისა და კარგის დამტევი მიწა, გულზე კი არ ეყარა, არამედ ფეხქვეშ ეგებოდა და ახალი გზებისა, ნიფათისა, სიხარულისა და მწუხარებისაკენ მიუძღოდა.

საქართველოს  
საგარეო ურთიერთობების  
მინისტროს


თბილისი ზარების რეკვით, მყვირალა ხმებით და ნაადრევი ზაფხულის მომთენთავი სიციხით შეეგება. ქალაქი გამოცოცხლებულიყო, გაზრდილიყო, მალვასა და მარხვას გადასჩვეოდა. ქუჩებში თათრულთან და სომხურთან ერთად ქართულიც ისმოდა. შავი თვალები და მუქი ფერის კანი ველარ ჩრდილავდა თეთრ კანსა და ლურჯ, თაფლისფერ ან კროლა თვალებს. ყველა ეკლესია აღდგენილი და შემკული ჩანდა, ყველა სახლი გადახურული და მდგმურებით სავსე. საამქროებიდან უროს ცემა, ჩარხის კრიალი და ხელოსნების ხმამაღალი ლაპარაკი ისმოდა. ბაზრისაკენ ერთად მიედინებოდნენ აქლემები, ცხენები, სახედრები, ადამიანები, ძაღვები, იმედი, უიმედობა, გამდიდრების სურვილი და ლუკმაპურზე ოცნება. ნათელი დღის ცხოველმყოფელობა ბრბოს ამხნევებდა, აგულუხევებდა, აყაყანებდა. ქალაქი ჩვეულ წეს-ადათებს ემორჩილებოდა, მაგრამ ყოველი სახლის სარკმელიდან აღმოსავლეთი იცქირებოდა, ყოველი თალი ისე იყო მომრგვალებული, როგორც ნახევარმთვარე, საუკეთესო სისხლი საქართველოს აღმოსავლეთმა გამოსწოვა და ახლა თავის გავლენასაც ახვევდა ნაძალადევად თავს. ჩოხის ნაცვლად მოქალაქეებს თალხი ფერის, ფართო ტანსაცმელი ეცვათ, დუქნებში ქართული, ომახიანი სიმღერების ნაცვლად აღმოსავლური სევდით გამსჭვალულ, გამყივან ბაიათებს მღეროდნენ, მოჩხუბარნი სპარსუ-



ლად ან თურქულად უფრო ხშირად აგინებდნენ ერთმანეთს, ეიდრე ქართულად. ქართველებს ჯერ კიდევ უძნელებდებოდათ მიწიდან აყრა, ქალაქში გადასახლება, რადგან მიწის დამამკობელ ქვეყნის დათმობას უდრიდა. აღმოსავლეთის სუნსა და სიბილწეს მხოლოდ ეკლესია გადაურჩა. ისლამმა ჯვარი ვერ შემუსრა, ვერ ამოძირკვა.

ამილახვარს თავის მობრუნება არ დასჭირებია იმისათვის, რომ მიმხვდარიყო, ვინ ვის გვერდით მოდიოდა და ვინ ვის ელაპარაკებოდა. ზოგჯერ მის სმენამდე მთელი წინადადების აზრიც კი აღწევდა. საჭურისი გრძელ ამბავს ჰყვებოდა, იგონებდა ბავშვობას, მისი მომხრეების ტახტისათვის ბრძოლას, დამარცხებას, დასაჭურისებას, განდევნას, სტამბოლში, ბეირუთში, დამასკოში და ქაიროში გატარებულ დღეებს, ხმელთაშუა ზღვაში მეკობრეებთან შეხვედრას, ელჩობას, აღზევებას, უსამართლოდ შერისხვას, მამულის დაკარგვას, უკანვე დაბრუნებას და კვლავ აღზევებას. ყველაზე მეტად ნადირშაჰს ემადლიერებოდა. აქლემების ეყვანთა ქლარუნი და უწყლო ველების უსაზღვრო მდუმარება ისე ეხამებოდა უსიამობგერებს, რომ სინამდვილეს არაამქვეყნიურ სამოსელში ახვევდა, დაღლილებს და დაუძლურებულებს ბნელ თავშესაფარს სთავაზობდა. ამ თავშესაფარში ცხენი და კაცი თვალდახუჭულნი უნდა შესულიყვნენ, მაგრამ სიბნელის ცქერით მას შემდეგაც იჭერებდა გულს, როცა თვალებს დათხრიდნენ.

თბილისმა მისი დაბრუნება არც იუკადრისა და არც იუცხოვა, ისე შეეგება, როგორც ახირებულ, თავზე ხელაღებულ შვილს. მოქალაქენი ხმამაღლა ესალმებოდნენ, თავადები სადილად პატიყებდნენ, წინასწარ გამოსყიდულ სასახლეში ცოლი და ნათესავები ელოდნენ, მთელ იმედს მასზე ამყარებდ-




ნენ. იგი კვლავ საჭირო, ანგარიშგასაწევი კაცი იყო, მღელვარე ზღვამ ვერ შთანთქა, ვერ მოაშთო, მაგრამ გულს ის უკლავდა, რომ ოთხ შვილში ერთი არ შერჩა, უძეოდ ზნდა გადაგებულიყო. მიწა, მიწა და მარტობა იყო მისი წილხვედრი ამქვეყნად, მისი მემკვიდრე და მესაიდუმლე. შეიძლება ნათია ჯერ კიდევ ამშვენებდა შაჰის ჰარემს, შეიძლება მოუნელებელი მოინელა და დაქცობას აყვავება ამჯობინა, მაგრამ ნადირ-შაჰის მეუღლე მისთვის სულიან-ხორციანად დაკარგული იყო. მეორე ქალიშვილი, ირაკლი ბატონიშვილის სატრფო და სასძლო, გათხოვებამდე გარდაიცვალა, ორი უწლოვანი ვაჟი კი აჯანყების შემდეგ დაელუბა. ამიტომაც უჭირდა ცოლთან მარტო დარჩენა, მასთან საუბარი. ერთი შვილი როგორ ვერ იხსნა, ვერ გამოსტაცა სიკვდილს კლანჭებიდან. შეიძლება იმ დღეს, როცა მათ მიწას აბარებდნენ, ან ღვინოს სვამდა, ანდა სისხლს ღვრიდა, შეიძლება სიკვდილმა იმისთვის დაინდო, რომ მის გულში მეტი მწუხარება დაეთესა, დაეძაბუნებინა, ლეშად ექცია. მის მოთოკვას, მოტეხას მტერიც ცდილობდა და მოყვარეც, ცხოვრებაც და სიკვდილიც, მაგრამ სხეული არ დაბუნდებოდა, სული არ იდრიკებოდა. იმ საღამოს ქაიხოსრო ორბელიანს ეწვია, გათენებამდე სვა, ილაპარაკა, იოხუნჯა და დილით ისე გამოცხადდა მეფის კარზე, თითქოს საკუთარ ოჯახში გამოიძინა.

ფერისცვალება სულში გაჩენილ უდაბნოს მოსავდა, ნიღბავდა, მაგრამ სინამდვილესთან შეგუება მაინც ჭირდა. განაჩენი საფრთხისაგან იმით განსხვავდებოდა, რომ გარდუვალობის ბეჭდით იყო დადალული და ბრალდებულს იძულებულს ზდიდა მონაწილეობა მიეღო მთელ იმ საშინელებაში, რაც დასჯას წინ უძღვის. სამოსშემოძარცულს, ჯაჭვით დაბმულს კი არ

უნდა ეყვირა და ეტირა, არამედ უხმოდ, ამაყად აეტანა ტკივი-  
ლი და წამება, ჯალათებისათვის წინააღმდეგობა კი არ უნდა  
გაეწია, არამედ მიხმარებოდა, გაედვილებინა მათთვის საკუ-  
თარი თვალების დათხრა. თავის მოკვეთას თვალების დათხრას-  
თან შედარებით ის უპირატესობა ჰქონდა, რომ ცულის მოქ-  
ნევის შემდეგ დასჯილისათვის ყველაფერი ერთბაშად თავდე-  
ბოდა, თვალდათხრილისათვის კი სწორედ დასჯის შემდეგ იწ-  
ყებოდა აუტანელი ტანჯვა.

ამილახვარმა ხელი ისე მოიქნია, თითქოს აბეზარ მწერებს  
იგერიებსო და ცხენი შუა გზაზე გაიყვანა. ყოფიერების ზღვა-  
რი არც წინ ჩანდა და არც უკან, მაგრამ უკან დარჩენილი  
ცხოვრება ნაკლებად ბუნდოვანი იყო, მსხვერპლს არ თხოუ-  
ლობდა და კარს მხოლოდ ძველ ნაცნობებს უღებდა. სახლთუ-  
ბუტესობა საკმაოდ თავსამტვრევი, პასუხსაგები თანამდებობა  
იყო, მაგრამ სარფიანიც. სახელმწიფოს მთელი შემოსავალი  
და გასავალი მის ხელში იყრიდა თავს, მის დავთრებში ინუს-  
ხებოდა, რისთვისაც გასამრჯელოდ შემოსავლის ერთ მეათედს  
უხდიდნენ. სამაგიეროდ ჯაფაც დიდი ადგა. საჭირო იყო ძვე-  
ლი მოხელეების დათხოვნა, ქურდების ალაგმვა, ხარკთამკრეფ-  
ლების, აღმრიცხველებისა და მოლარეების შერჩევა, სახელმ-  
წიფო წელში იმართებოდა და მხარის აბმა, მხარში ამოდგომა  
სჭირდებოდა. ერთი თვის შემდეგ საქმე ცოტათი გამოსწორ-  
და, უგზო-უკვლოდ არაფერი იკარგებოდა, უანგარიშოდ არა-  
ფერი იფლანგებოდა, მაგრამ სწორედ აქ წააწყდა იმას, რასაც  
შეკრული წრე ჰქვია. ამ წრის გარღვევა, გადალახვა ვერაფ-  
რით ვერ მოახერხა. როგორც კი რომელიმე მოხელე თავს გა-  
მოიჩინდა, მაშინვე აწინაურებდა, ჯამაგირს უორკეცებდა, მაგ-  
რამ დაწინაურებულთა უმრავლესობა თვალსა და ხელს შუა





ობრდებოდნენ, ურცხვად თვალთმაქცობდნენ და არაფრის საქ-  
ნისნი აღარ იყვნენ. ათ კაცში მხოლოდ ორი თუ სამი უკეთებ-  
და საქმეს, დანარჩენები კი ჯამაგირს ტყუილად დებულად  
დნენ და იმ ორ-სამ კაცს მუშაობაში ხელს უშლიდნენ. ეს რომ  
კანონზომიერი მოვლენა იყო, მხოლოდ მაშინ მიხვდა, როცა  
ერთი და იგივე ამბავი რამდენჯერმე განმეორდა. მას შემდეგ  
ხელალებით, დაუფიქრებლად არავინ დაუწინაურებია, უმიზე-  
ზოდ არავინ დაუთხოვია სამსახურიდან. მხოლოდ ქურდობის  
უფლებას არ აძლევდა არავის. იგი რომ დიდი სახელმწიფოს  
სახლთუხუცესი ყოფილიყო, უამრავი ხელქვეითი რომ ჰყო-  
ლოდა, მაშინ გასაკვირი არაფერი იქნებოდა, მაგრამ ეს ხდებო-  
და სახელმწიფოში, რომლის შემოსავალი მეფის კარის შესანა-  
ხად ძლივს კმაროდა.

გაფითრებული მზე ლაქებით იფარებოდა, ცის კიღურს  
ეტმასნებოდა. ბორცვთა ჩრდილები იზრდებოდნენ, სიმკვეთ-  
რეს იძენდნენ, სამოციქულოდ ემზადებოდნენ. დამწუხრებუ-  
ლი, განაცრისფერებული დრო ნაცემ ძალღივით მიძინძულე-  
ბდა შარავნაზე და დასიცხული სიმხურვალეს ანთხევდა, სიბ-  
ნელეს ნირწამხდარი ეგებებოდა. განწყობილების ცვლა-  
თითქოს არაფერს არ ცვლიდა, მაგრამ შეღამებისას უფ-  
რო მგრძნობიარე, უფრო ადვილად დასათრგუნი იყო.  
ყველაფერი, რაც ადრე მეხსიერების სხვადასხვა კუნჭულ-  
ში ფართხალებდა, ამ დროს ერთად იყრიდა თავს და მწა-  
რე ფიქრებს ასაზრდოებდა. რა უნდა ენახა ან ამ, ან სხვა გზის  
ბოლოს ტკივილისა და უაზრობის მეტი, რა სიკეთეს ელოდა  
მომაკვდავი მზის ქვეშ გართხმული ბებერი დედამიწისაგან,  
რომელსაც მალე თვალითაც ვეღარ დაინახავდა.

— რაკი ეს უდაბნო გამოვიარეთ, ღია ცის ქვეშ ლამის გა-

თევა აღარ მოგვიწევს. — უთხრა საკურისმა ახალგაზრდა თა-  
გადს და ალაპი ასსენა.

იმ მხრიდან, სადაც კლდე კედელივით იყო აღმართული,  
გრილმა ნიავმა დაუბერა და თან რაღაც ნესტის სუნის მაგვარი  
მოიტანა. ნახევრად ჩასვენებული მზე ისე თრთოდა, როგორც  
უეცრად გაწყვეტილი აზრი და როცა წამიერად გამჭრალი  
ქვეყანა კვლავ გამოიკვეთა, მესხიერება თბილისის მკრთალ  
კონტურებს ჩაებლაუჭა. ის სასახლე, რომელიც მათ საგვარეუ-  
ლოს ეკუთვნოდა, ორჯერ ჰქონდა გაყიდული და გამოსყიდუ-  
ლი. ყიდდა მამინ, როცა თბილისში არ ედგომებოდა და ყი-  
დულობდა, როცა უკან ბრუნდებოდა. ახალი პატრონის ხელ-  
ში სასახლეს თუ ემატებოდა რაში, თორემ არაფერი აკლდე-  
ბოდა. მეფე-დედოფალმა მამულიც უკლებლივ დაუბრუნეს.  
კახეთში გახიზნული სამი ათასი ყმა ქართლში გადმოიყვანა,  
თავთავიანთ სოფლებში დაასახლა და ორი წლით ხარკისაგან  
გაანთავისუფლა. ყველაფერი ისე ეწყობოდა, როგორც ცხოვ-  
რებაში არ ხდება. იმის მაგივრად, რომ დაესაჯათ, აწინაურებ-  
დნენ, იმის მაგივრად, რომ თვალყური ედევნებინათ, ყველგან  
თავისუფლად უშვებდნენ, მაგრამ მოსვენებას მაინც ვერ პო-  
ულობდა, გული არც სახლში უდგებოდა და ვერც გარეთ  
იქარვებდა მოწყენილობას. ოთხი წლის გამუდმებულმა ბრძო-  
ლებმა, ყოველდღიურმა საფრთხემ, მოუცლევლობამ და მოუს-  
ვენრობამ მშვიდ, აწონილ-დაწონილ ცხოვრებას გადააჩვია,  
ბევრი რამ გააუფასურა ისეთი, რის უგულებელყოფაც ცხოვ-  
რებას ერთფეროვანს ხდის. ვეღარ იტანდა ზერელე, უთავბო-  
ლო საუბარს, საზოგადოებაში ან ჩუმად იჯდა, ან მხოლოდ  
თვითონ ლაპარაკობდა, რაც მასპინძელს და მის სტუმრებს  
ღიზიანებდა. ცოლს ვეღარ ეკარებოდა, ქალიდან მოურავს

ახალგაზრდა, ლამაზი ყმა გოგო ჩამოაყვანილა, ხორცად დაიჭვა, მაგრამ ქალს ისეთი რიდი ჰქონდა მისი, რომ საწოლშიც კი ვერ იღებდა ხმას. ერთ თვეში რაღაც დაირღვა და ის ქვეყანა, რომელიც მისი სამოქმედო ასპარეზი, მისი საარბიელი იყო, ხელიდან ეცლებოდა, საკუთარი თავის ამარა ტოვებდა. მარტობამ გულჩათხრობილი გახადა, წვერში თეთრი გაერია, სახის ფერი შეეცვალა. ამგვარ დაჩიაულებას, ნაადრევად დაბერებას მისი ბუნება ვერ ეგუებოდა და როცა გული ყელში მოებჯინებოდა, სანადიროდ გარბოდა, ჯავრს კურდღლებზე, ტახებზე და შველებზე იყრიდა.

კლდის უკან კიდევ უფრო მაღალი კლდე აღიმართა და სივრცე წახნაგებით დასერა, ბუნდოვანი და ცხადად გამოკვეთილი წახნაგებით, რაც გარემოს სახეს უცვლიდა, ამახვილებდა. მცირე ხნის შემდეგ ეს ხელოვნურად შექმნილი, სივრცეში გამოკიდებული სამყარო ისევ ირღვეოდა და თვალს ხელახლა უხდებოდა მათი ერთმანეთთან დაკავშირება, დალაგება, ქაოსიდან გამოყოფა. ამასვე აკეთებდა თბილისში, როცა აივანზე გამოსული მტკვარს გადაჰყურებდა და უხეიროდ ნაგები ქალაქის ერთ საგნად შეკვრას, ერთ მუქში მოქცევას ცდილობდა. ზოგჯერ ისეთი გრძნობა ეუფლებოდა, თითქოს სადაცაა დაეუფლებოდა დასაუფლებელს, მაგრამ როგორც კი ჩრდილები ადგილს მოინაცვლებდნენ ან თვალი განზე გაექცეოდა, ქალაქი თავის პირვანდელ სახეს იბრუნებდა და სხვაგვარად დალაგებას თხოულობდა.

აივანზე ხშირად იმიტომ გამოდიოდა — განსაკუთრებით ნაშუადამევს, როცა ქალაქს ეძინა და ყოველი ბგერა წინათგრძნობას ან მატებდა რამეს ანდა აკლებდა — რომ ხვალინდელი დღის იმედი არ ჰქონდა. თეიმურაზი და თამარი საბოლო-

ოდ შეურიგდნენ, პატივს სცემდნენ, რჩევას ეკითხებოდნენ, მაგრამ ნადირ-შაჰი, რომელსაც ქვეყნად გამკითხავი არ ეგულებოდა, ამბოხებას, ფიცის გატევას, აბუჩად აგდებას არ აპატიებდა, სპარსელების სისხლის დაღვრისათვის ან თავს მოითხოვდა მისას ან თვალებს. მარიობისთვემდე სპარსეთიდან არაფერი ისმოდა, წარსული ცოტათი დავიწყებასაც კი ეძლეოდა, მაგრამ მარიობისთვის დამდეგს ისპაჰანიდან ეს ორი ხანი ჩამოვიდა და ყველაფერი ისევ აგორდა, აბორგდა.

მზის ჩასვლის შემდეგ დროის ყველა საზომი გაქრა და მთვარის ამოსვლამდე ცა ისევე მიტოვებული იქნებოდა, როგორც ქართლის ნასახლარები. ვალმოხდილი დედამიწა ბუნდოვანებით იმოსებოდა, კლდესა და კლდეს შორის ღამის შავი პირი მოსჩანდა. ღამის შავ პირს დაბადების დღიდანვე იცნობდა, რადგან თუ მთლიანად არა, ნაწილობრივ მაინც მისი ძე, მისი ნათლული იყო. რაც ლაშქრობაში, ღვინის სმაში, სიყვარულში და ხეტიალში ღამე უთევია, რაც ნათელისათვის წაურთმევია და ბნელისთვის მიურთმევია, გასაფლანგავადაც კმაროდა და გადასანახავადაც.

იმ საღამოს ბნელი ისეთივე მწუხარე ჰანგებს ღიღინებდა, როგორი პირიც ჰქონდა. ისპაჰანიდან ჩამოსული ხანები დედოფალს ეწვივნენ, ნადირ-შაჰის რაყიმი მძარტვეს და მზერა ცისკენ ალაპყრეს. დედოფალმა გრავნი გახსნა და გაფითრდა. შაჰი მეფე-დედოფალს სწერდა, გივი ამილახვარს ან მანდ დათხარეთ თვალეები, ანდა აქ, სპარსეთში გამომიგზავნეთო. წაღმა მბრუნავი ჩარხი ერთ წუთში უკუღმა დატრიალდა. თამარს არც დაბრმავება სურდა მისი და არც ისპაჰანში გაგზავნა, მაგრამ სხვა გამოსავალი არ ჩანდა და ამიტომ ერთ-ერთი უნდა

აერჩია. არჩევას დიდი ფიქრი და გამჭრიახობა არ სჭირდებოდა. დედოფალმა იქვე, მათივე ენაზე განუცხადა შაჰის დესპანებს, ამილახვარს მე ვერ დავსჯი, უვნებლობის ფეცი მაქვს დადებული, მიდით მასთან და საქმე თქვენ თვითონ მთავარეთო. ხანებს სხვა არაფერი უნდოდათ, დედოფალს მადლობა გადაუხადეს და დარბაზი დატოვეს.

ნავმა მიმართულება იცვალა, ჩრდილო-დასავლეთიდან დაუბერა და ამილახვარმა გაოფლიანებული ცხოველებისა და სველი ტყავის მძაფრი სუნი იგრძნო. ძილი არ ეკარებოდა, დღისით წოლას და თვლემას ჩვეული არ იყო, მაგრამ წელის ტკივილს და მოხრილი მუხლების ბეუილს კარგა ხანია გრძნობდა. გრილი ნიავე ზურგში სცემდა, პერანგი ტანზე აშრებოდა, მხლებლები უხმოდ მოჰყვებოდნენ გზას. ცხელმა ღღემ გალახა, დაღალა, მაგრამ ვერც დაჯაბნა და ვერც წარსული გამოსტაცა ხელიდან.

ხანები მხოლოდ მეორე დღეს ესტუმრნენ. საქურისს ადრეც იცნობდა, შაჰის კარზე შეხვედრია, ახალგაზრდა თავადს კი პირველად ხედავდა, მისი არც ვინაობა იცოდა და არც სადაურობა. მიუხედავად ამისა, მაინც გულლიად, თავაზიანად მიიღო, ტახტი და ბალიშები შესთავაზა. სტუმრის გულის მოგება, მოთვინიერება არ უჭირდა, სუფრას ხშირად მახედ იყენებდა, მაგრამ ხანებმა საფრთხე იგრძნეს და საქმეს შეუდგნენ. საქურისი მარჯვენა მხრიდან ამოუდგა გვერდით, ახალგაზრდა თავადი მარცხნიდან, მარჯვენა ცერზე ერთმა მოჰკიდა ხელი, მარცხენაზე მეორემ და როცა დარწმუნდნენ, რომ ყველაფერს ჩვეულების მიხედვით აკეთებდნენ, ტირილითა და მოთქმავოდებით შაჰის ნება აუწყეს. საქურისი მართლა ტიროდა, ტიროდა ისე, თითქოს ცრემლის ღვრა სიამოვნებას ანიჭებდა.



ახალგაზრდა თავადს კი თვალთმაქცობა უჭირდა, არაბუნებრივად ზღუქუნებდა. მუსლიმანთა ამ სასაცილო ჩვეულების მნიშვნელობა კარგად იცოდა, მაგრამ რა უნდა ექნა თბილისის ყველა კარი დახშული იყო, ყველა გზა შეკრული. წინააღმდეგობის გაწევას უაზრო სისხლისღვრის მეტი არაფერი მოჰყვებოდა. ამიტომ ორიოდ ნაბიჯით უკან დაიხია, ხელები გულზე დაიკრიფა და მსახიობური დარბაისლობით წარმოთქვა: „დაე აღსრულდეს დიდებული შაჰის ნება მის ფეხთა მტკვრზე, გივი ამილახვარზეო“. ხანებმა შევებით ამოისუნთქეს, ალაჰს მადლობა შესწირეს და დიდ დარბაზში გაჰყვნენ. ნაშუადღევს დატყვევებულს რამდენიმე ქართველი თავადი ეწვია, ქართველებს სპარსელი მხედართმთავრები მოჰყვნენ. სასახლეში ერთბაშად იმდენმა ხალხმა მოიყარა თავი, რომ ეგონა ღნინი გათენებამდე გაგრძელდებოდა, მაგრამ როგორც კი შებინდდა, ხანებმა იარალი მოსთხოვეს, ციხის კარამდე მიაცილეს და საგანგებოდ შერჩეულ მცველებს ჩააბარეს.

დატყვევებული რამდენჯერმე ყოფილა, მაგრამ პატიმრობა იმ საღამოს პირველად გამოსცადა. ვიწრო სარკმელი ძლივს ანათებდა შეუღლესავ, ნესტიან კედლებს, თიხის უსწორმასწორო იატაკი ერთმანეთში გაზავებული შმორის, შარდისა და ფირთხების სუნით იყო გაქლენთილი. რკინით შეჭვდილ კარს უკან შეიარაღებული მცველები იდგნენ. ფანჯრიდან მტკვრის ნაპირი, რიყე, მეტეხი და ისნის ერთი უბანი მოჩანდა. სიციხით შეწუხებულ ქალაქს დაძინება უჭირდა, ქუჩებში ჯერ კიდევ კიაფობდა სინათლე, მაგრამ გარეთ ყურება არ უნდოდა, რადგან ეს ნესტიანი საკანი არც საბოლოო თავშესაფარი იყო მისი და არც ის ადგილი, რომელსაც უნდა შეჩვეოდა. დამწყვდეული მხოლოდ მანამდე ეყოლებოდათ, სანამ ხანები სამზადისს

მოათავებდნენ. მიუხედავად ამისა, ერთ ადგილზე მაინც ვერ ჩერდებოდა, კედლიდან კედლამდე დადიოდა, საკუთარა ნაზრევით იშხამებოდა. რის იმედით მიდიოდა სპარსეთში, რა უნდა ენახა შაჰის კარზე ისეთი, რაც კაცის თვალში შრავალჯერ არ ამოუკითხავს, რატომ უნდა ეღიარებინა ბედისწერად და გარდუვალობად ის, რაც უაზრობად მიაჩნდა. საქართველოში თუ შემკვიდრე არა, მომვლელი და გზის მაჩვენებელი მაინც ეყოლებოდა, სპარსეთში კი თვალეზიანი ერთად თავსაც დაკარგავდა. განრისხებულ შაჰს ერთი სიტყვის შებრუნებისათვის შეეძლო მისი მოკვლა. ღირდა კი ამდენი წვალება იმისათვის, რაც ბოლოსდაბოლოს მაინც უნდა აღსრულებულიყო. განა არ ეუბნებოდა დასჯის წინ მაცხოვარი მოციქულებს, «ვერ ხელეწიფების სოფელსა მოძულებად თქვენდა, ხოლო მე ვძულ, რამეთუ ვწამე მისთვის, ვითარმედ საქმენი მისნი ბოროტ არიან».

ამილახვარმა გვერდზე ისე მიიხედა, თითქოს მძიმე ფრთის შემოკვრა მოესმა, მაგრამ როცა დარწმუნდა, რომ მისკენ დამის მეტი არაფერი მოცოცავდა, კვლავ იბრუნა პირა.

მცველებმა საკანში ანთებული სანთელი, ხის ტახტი და სურსათ-სანოვავით სავსე კალათა შემოიტანეს. სანთლის შუქის ციმციმმა და კუთხეში დადგმული, ხალიჩაგადაფარებული ტახტის სიმყუდროვემ ცხადჰყო, რომ არსებობა ციხეშიც შეიძლებოდა, მაგრამ მომავალზე ფიქრი მაინც უხამავდა, ყველა საფუძვლიან ვარაუდს აცამტვერებდა. შუალამემდე მუხლი არ მოუკეცავს, ყელი არ გაუსველებია, ნაშუალამევს კი რკინით შეჭედნილ კარს მიადგა, ღონივრად დააბრაზუნა და საწერ-კალამი და ქაღალდი მოითხოვა. მცველებს არც ღრენა დაუწყიათ და არც უჩიათობა გამოუჩენიათ. ბატის ფრთა, მელანი

და ქალაღდი მაგიდასთან ერთად მოართვეს. წერილები წერ-  
არ უყვარდა, გაშიშვლებად, დაფარულის გამკლავებად ში-  
ჩნდა, მაგრამ იმ ღამეს ისე ეცოდებოდა თავი, რომ ქალაღში  
მოიმარჯვა და თეთრი ქალაღდი შავი ნიშნებით ააქრელა. წერ-  
და დედოფალს, წერდა ხელმარჯვედ, წაუბორძიკებლად.  
უჩიოდა ქართლის ბედს და საკუთარ ბედს, ქართველი კაცის  
მძიმე ხვედრს და სოფლის უკუღმართობას, წარსულსა და მო-  
მავალს. ყოველი სიტყვა სევდით იყო გამსჭვალული, ყოველი  
წინადადება შეკრული და გამართული. სანამ გზას დაადგე-  
ბოდა, დედოფლისათვის უნდა დაემტკიცებინა, რომ მის  
სპარსეთში გაგზავნას არავითარი აზრი არ ჰქონდა, ზედმეტი  
წვალების მეტს არაფერს მოუტანდა. შეიძლება შაჰს სასიკვ-  
დილოდ არ გაემეტებინა, სიცოცხლე არ მოესწრაფა, მაგრამ  
თავისუფლებას დასჯის შემდეგაც არ მიანიჭებდა, ხეიბარს დი-  
ლეგში ჩააგდებდა და შემდეგ მის გამოხსნას წლები დასჯირ-  
დებოდა. ამიტომაც დაბეჯითებით სთხოვდა თვალეღი მისთვის  
აქ, საქართველოში დაეთხარათ, თვალდავსებული უმცროსი  
ძმისთვის მიეგვარათ და საკუთარ მამულში სიკვდილის უფ-  
ლება მიეცათ.

საკანში სახედრების ყროყინი შემოიჭრა. ფეხზე წამომდ-  
გარმა ქალაღდი დაახვია, მცველებს გადასცა და უკან გაბრუ-  
ნებულმა ისეთი დაღლილობა იგრძნო, რომ პირდაპირ ტახტი-  
საკენ გაემართა. მაღალ, თაღოვან ჰერს სინათლის შუქი ვერ  
სწვდებოდა, მკაცრი მზერა სიბნელის მკაცრ მზერას აწყდებო-  
და. იღუმალება, რომლის არსი უსახურობა და დუმილი იყო, სი-  
ფხიზლეს, საკუთარი თავის გვემას, ტკივილის გაზვიადებას  
თხოულობდა, მაგრამ მან უსახურობასთან პაექრობას თვა-  
ლის დახუჭვა და ძილი არჩია. ძილში ყველა საფრთხობელას  
ძალა მოაკლდებოდა და ციხე ავბედითობას დაკარგავდა.




იმ დილით კიდევ დიდხანს იძინებდა, აფუსფუსებული, აუ-  
ყანებელი ქალაქის ხმაურს რომ არ გამოეღვიძებინა. თბილი-  
სის ხალისიანი სუნთქვა ჰანგებად იღვრებოდა, საკანში შემო-  
ჭრილი დღის სინათლე ცხოველმყოფელი სვეტიცხოვეთით თრთოდა.  
ტანგაუხდელს ფეხზე წამოდგომის მეტი არაფერი დასჭირე-  
ბია იმისათვის, რომ გონს მოსულიყო, ცხოვრებას შეჰგებებო-  
და. ჰმუნვა, შიში, მარტოობის გრძნობა და სადღაც გაქცევის,  
გადაკარგვის სურვილი უკვალოდ გაქრა, ღამის გადამღები  
მწუხარება მჩქეფარე სისხლის მძლავრმა ტალღებმა გადარე-  
ცხა. უხაროდა ფეხზე რომ იდგა, ჰგეყანას რომ საკუთარი  
თვალეზით ხედავდა, სული რომ კვლავ ივსებოდა სიამაყის  
გრძნობით და ბედისა და მტრების გამოწვევის სურვილით.  
რა უნდა ვადაღობებოდა გზაზე ისეთი, რაც სხვას არ ვადა-  
ღობებია, რა უნდა შემთხვეოდა ისეთი, რაც სხვას არ შემ-  
თხვევია. სანამ საქართველო გადამთიელებს ებყრათ, სანამ  
ურჯულოებს ხარკს უხდიდა, არც დამარცხება გაუტეხდა  
გულს და არც ჰმუნვა მიიყვანდა სასოწარკვეთილებამდე. თვა-  
ლების დათხრა არაფერი იყო იმასთან შედარებით, რის გა-  
დასარჩენადაც იბრძოდა.

ქალათში ყველი, კვერცხები, შემწვარი წიწილები, მწვანი-  
ლი, ხილი და თავმოკრული ქილები აღმოჩნდა. პურის მარტო  
ჰამა არ უყვარდა, მაგრამ ციხეში იმიტომ ჩასვეს, რომ ქარ-  
თველებისათვის მოერიდებინათ, გარე სამყაროსაგან მოეწყვი-  
ტათ. მარტო დარჩენილ კაცს სხვა მადა აქვს, სხვაგვარი გან-  
წყობილება ეუფლება, მაგრამ საკუთარ განწყობილებას იგი  
იმდენ ანგარიშს არ უწევდა, რომ ჰამა-სმაზე ხელი აეღო, თა-  
ვი წმინდანად ან წინასწარმეტყველად წარმოედგინა. ტყემალ-  
ში ამოვლებული წიწილის ხორცი უღვინოდაც იჰმებოდა, წი-

წაქისა და მწვანის სურნელება შმორის სუნს ახშობდა. თვა-  
ლების დათხრა რომ სამუდამო პატიმრობით შეეცვალათ, სა-  
წინააღმდეგო, ალბათ, არაფერი ექნებოდა, მაგრამ შაქს ვერც  
იგი მკვდარი ან თვალდათხრილი ენახა, ვიდრე დამწყვედული  
ჰყოლოდა.

მეორე დღეს დედოფლის ხელით დაწერილი ბარათი მი-  
იღო. თამარი ამხნევებდა, აიძულებდა, ურჩევდა ისპაჰანში  
გამგზავრებულყო, პირადად ხლებოდა ნადირ-შაჰს, რადგან  
საქართველოში ვერავინ გამოესარჩლებოდა, ვერავინ დაი-  
ცავდა სასჯელისაგან, სპარსეთში კი იმ კაცთან ექნებოდა საქ-  
მე, ვინც მის ბედს განაგებდა. თვენახევარში ბევრი რამ შეი-  
ძლება შეიცვალოს, განაგრძობდა თამარი, შაჰის რისხვა და-  
ცხრეს, სპარსელებს ომში ნაცადი ვაჟკაცები დასჭირდეს, აბო-  
ბოქრდეს ის, ვისი დაჭერაც არც ვიწრო გზას შეუძლია და  
არც კლდოვანს. უდროოდ აჩქარება სულმოკლე, წინდაუხე-  
დავ ადამიანებს სჩვევიათ, მე კი შენი ჭკუის, გამჭრიახობის  
და ვაჟკაცობის იმედი მაქვსო. მაგრამ ყველაზე მწარე, გადაკ-  
რულ მათრახივით მსუსხავი მაინც ბოლო წინადადება იყო.  
თუ ჩემს გულწრფელობაში, ჩემს ერთგულებაში ეჭვი გეპა-  
რება, შემძლია სპარსეთში გამოგყვე და შენი თავი შაჰს შე-  
ვავედროო.

სირცხვილით ადრეც ბევრჯერ დამწვარა, მაგრამ საკუთა-  
რი თავით ისე უკმაყოფილო, როგორც იმ დღეს იყო, არასო-  
დეს ყოფილა. ქალი სპარსეთში გაყოლას, მფარველობას, შაჰ-  
თან შუამდგომლობას სთავაზობდა, ასეთ რამეს დედოფლი-  
საგანაც კი არ მოელოდა. მცირედმა ეჭვმა დიდი გაუგებრობა  
გამოიწვია. ამ გაუგებრობის გასათანტავად კიდევ ერთი ბარა-  
თის დაწერა იყო საჭირო. ქაღალდი და საწერ-კალამი მაგიდა-



ზე ეწყო, იქვე იდგა წყლით სავსე დოქიცი. წყალი პირდაპირ  
დოქიდან მოსვა, ქალღმერთი წინ დაიდო და ბატის ფრთხილად  
ში ჩააწო. დედოფალი, წერდა მსხვილი, მსუქანი ხარისხით, მტ  
რომ მძიმე დანაშაული, გაუგონარი ბოროტმოქმედება ჩამე-  
დინა, მაშინ, ალბათ, მართლაც დამჭირდებოდა დახმარება და  
• თანაგრძნობა, მაგრამ მე ბრძოლა წავაგე, დამარცხებული მეო-  
მარი ვარ და ამიტომ არც სინანულის გრძნობა მაწუხებს და  
არც სინდისის ქენჯნა მითხრის სამარეს. შაჰი, შაჰი და მოსა-  
მართლე, საზღაურს თხოულობს და ეს საზღაური მე უნდა  
გავიღო, ან სიცოცხლეს უნდა გამოვესალმო ან თვალებს. ჩემ-  
თვის ეს ისევე ცხადია, როგორც ის, რომ თქვენ გულწრფე-  
ლი, სათნო ადამიანი ბრძანდებით. ამიტომაც შემაწუხა ექვმა  
და გაუგებრობამ. თვალების აქ, საქართველოში დათხრას იმი-  
ტომ კი არ გთხოვდით, რომ სასჯელის შემსუბუქების იმედი  
მქონდა, არამედ სამშობლოში დარჩენა ჰკუთხებოდა უფრო ახ-  
ლო მეჩვენებოდა, თუმცა უგუნურებად არც სპარსეთში გამ-  
გზავრება მიმაჩნია. მე ძალის ბედი მაქვს და ისე არ გამწი-  
რავს, რომ დასატირებელი ვაგხდე. თქვენს გვერდით ყოფნა,  
თქვენთან ერთად მგზავრობა ჩემთვის დიდი პატივია, დიდ  
სიამოვნებას მომანიჭებდა, მაგრამ არავითარი სურვილი არა  
მაქვს სპარსეთში გამომყვეთ, შაჰს ჩემი თავი შეავედროთ.  
ჯვარი იმან უნდა ზიდოს, ვინც იტვირთა და თუ ამის ძალა არ  
შესწევს, ვერავითარი ვედრება ვერ უშველის. მშვიდობით  
ბრძანდებოდეთ, დედოფალი, ნუ მოგაკლდებათ ღვთის წყა-  
ლობა ნურც თქვენ და ნურც საქართველოს, მე კი ჩემს გზას  
გავუდგები და ან დავიღუპები, ანდა საწაღელს ვეწევი.

ასე დამთავრდა მათი მიწერ-მოწერა. მეოთხე დღეს ციხის  
კარი გაუღეს, ცხენი მოჰგვარეს და მეფე-დედოფალთან, ქარ-

თველ თავადებთან და ნათესავეებთან გამოთხოვების უფლება  
მისცეს. უმცროსმა ძმამ უამრავი საკმელ-სასმელი ჩამოზიდა  
კალიდან, დიდი და პატარა თბილისში ჩამორეკა, ნათესავეები  
ეხვეოდნენ, ემშვიდობებოდნენ, ისეთი მოთქმა-ტირლით აცი-  
ლებდნენ, თითქოს უკან ვეღარ დაბრუნდებოდა. ამ აზრისა-  
იყო დიმიტრიც. თვალცრემლიანმა განზე გაიხმო და ჩურჩუ-  
ლით უთხრა, ორ-სამ დღეში ხალხს შევაგროვებ, სპარსელებს  
გზაში თავს დავესხმები და ძალით გავანთავისუფლებო, მაგ-  
რამ ძმას მადლობა გადაუხადა, ნათესავეებს ცოტაოდენი ფუ-  
ლი დაურიგა და ფეხი უზანგში გაუყარა. მღვრიე დღე ცრემ-  
ლის ღვრამ და უამრავმა უცხო თვალმა კიდევ უფრო აამღვ-  
რია.

ამილახვარი ისე გასწორდა უნაგირზე, თითქოს გამკვირ-  
ვალე სივრცე ამოწურა, წარსულს ანგარიში გაუსწორა და  
მშობლიურ ქვეყანას საბოლოოდ მოსწყდა. სინათლე სულს  
დაფავდა, კლდეთა სიდიადეს აკნინებდა. სოლომონი ხანებს  
წამოსწეოდა, საკურისსა და ახალგაზრდა თავადს რაღაცას  
უხსნიდა. დაღლილი ცხოველები შებრალებას, ბნელთან შე-  
ნივთებას თხოულობდნენ, მაგრამ გზა ღრმა ხევისაკენ ეშვე-  
ბოდა და კლდეებს შორის უჩინარდებოდა. ჯერჯერობით მის  
ხვედრს ქართველებიც იზიარებდნენ და სპარსელებიც, ჯარის-  
კაცებიც და ჩალვადრებიც, მაგრამ როგორც კი შაჰის კარამ-  
დე მიადწევდნენ, ყველა შემოეცლებოდა, ირგვლივ სიცა-  
რიელე შემოერთყმებოდა და გამაწამებელი ლოდინი ხან  
იმედს ჩაებლაუქებოდა, ხანაც უიმედობის მუქ სუდა-

რაში გაეხვეოდა. შეიძლება შაჰს იმ დღესვე არ დიესა-  
ჯა, ციხეში დაემწყვდია, ისეთივე ბნელ ჯურღმულში ჩავგდო,  
როგორიც კლდოვანი მთის უფსკრულებში ისადგურებდა, მგვ-  
რამ შავი ძაღლის ლეკვი მაინც ყველგან მონახავდა, გვერდით  
მოუწვებოდა, აწკმუტუნებოდა. ძილი ძილს აღარ ემგვანე-  
ბოდა და ღვიძილი ღვიძილს. როგორც კი თვალს მილულავდა,  
წამოიშლებოდნენ მოგონებები, მოჩვენებები, მაჯლაჯუნები და  
ზოგი გულზე დააწვებოდა, ზოგი ტვინს დაუწყებდა ჯიჯნას,  
ზოგი კი დიდი ვაივაგლახით თავმობმულ ვარაუდს გამოუთხ-  
რიდა ძირს და იგი კარგახანს იფართხალებდა ჩამოქცეული  
გუმბათის ნანგრევებს შორის. მაგრამ შეიძლება შაჰს მეტი  
სულგრძელობა გამოეჩინა, დასჯამდე მისთვის რომელიმე ძვე-  
ლი სასახლე მიეჩინა, სტუმრების მიღებისა და საქმელ-სასმე-  
ლის ყიდვის უფლება მიეცა. მაშინ ბნელეთის მოციქულებს  
მათ ნებაზე არ აპარპაშებდა, დროს ლაგამს ამოსდებდა და ხან  
გააქენებდა, ხანაც ადგილზე გააშეშებდა. ფული თუ არ ეყო-  
ფოდა, ივალებდა, ისესხებდა, სასახლეში ძველ და ახალ ნაც-  
ნობებს, გამაჰმადიანებულ ქართველებს, უცხოელ დესპანებს,  
ალაჰის ყმობისაგან განთავისუფლებულ სპარსელებს მოიწვევ-  
და, ლხინს ლხინზე გადააბამდა და იმდენს დალევდა, იმღე-  
რებდა და იოხუნჯებდა, რომ მისი უღარდელობა გამჩენსაც  
კი შეშურდებოდა.

გზა თანდათან ვიწროვდებოდა, კლდეებს შორის მიიკლაკ-  
ნებოდა, უცხო სამეფოში იჭრებოდა. ფათერაკი ცოტათი გა-  
ართობდა, გაამხიარულებდა, მაგრამ წინ არაფერი დახვდე-  
ბოდა ისეთი, რაც გააკვირვებდა, ზღაპრებს ან ძველ თქმულე-  
ბებს მოავგონებდა. ხევს მიღმა მდებარე ქვეყანა მხოლოდ სა-  
ხელით, საზღვრებით, რჯულითა და ენით იყო უცხო, თორემ

იმის ცქერას, რასაც ზეგანიდან დაინახავდა, თვალი დიდი ხანია შეეჩვია. სპარსეთი ჩვეულებრივი სახელმწიფო იყო, შეიძლება სხვა სახელმწიფოებზე ცოტათი უფრო ჩამორჩენილი, გაწამებული, დაღლილი, მაგრამ სპარსეთშიც სახჯელითა და სიკვდილით მთავრდებოდა ყველაფერი, რასაც შეუბღალავი რწმენა, ქეშმარიტი სიყვარული, თავისუფლებისათვის ბრძოლა და დაცანონებული ცხოვრების წინააღმდეგ ამბოხება ჰქვია. ჯალათი და მსხვერპლი სპარსეთშიც ისევე მარტო რჩებოდნენ ერთმანეთის პირისპირ, როგორც ზღვის გაღმა ან ცხრა მთას იქით მდებარე ქვეყნებში.

ღრმა, გადმოწოლილი კლდის ქიმით გადახურული ხევი გვირახს უფრო ჰგავდა, ვიდრე წყლის ამომშრალ კალაპოტს, სადაც ყოველი ბგერა, ყოველი ჩქამი გამოძახილს პოულობდა და ქვის კედლებს ასკდვებოდა. ვინმეს რომ ეს ვიწრო, ბნელი ხვრელი თავსა და ბოლოში ამოეჭოლა, ქვის ტომრად იქცეოდა, ჯოჯოხეთის ერთ-ერთ გარსს დაემსგავსებოდა. ჯოჯოხეთისათვის გამოსადეგი ჯურღმულები ამქვეყნად სხვაგანაც ბევრი უნახავს, ზოგჯერ შესაფერისად მოურთავს და მოუწყვია კიდევ, მაგრამ ახლა არ უნდოდა ცეცხლი გაეჩაღებინა, მდუღარე კუპრის ბუყბუყი მოესმინა, გოგირდის სუნით მოშხამულიყო. ისპაჰანში ნამდვილი ჯურღმული, ნამდვილი ცეცხლი, ნამდვილი წამება ელოდა და წარმოდგენა ხელოვნურად შექმნილ უხამსობას ველარ იტანდა.

მარტო რომ ყოფილიყო, გვირახის ოღროჩოღრო ფსკერზე უჩირადდნოდ სიარული გაუქირდებოდა, მაგრამ ცხენი წაუფორხილებლად მიიკვლევდა გზას და მის მძიმე სხეულს მორჩილად მიათრევდა. იმ საუფლოდან, სადაც სიხარულს სთესენ და მწუხარებას იმკიან, გადმოსაზიდი, სხვა ქვეყანაში გადმო-

სატანი აღარაფერი ჰქონდა. აჩრდილები ჩრდილებად იქცნენ, ბნელს შეერწყნენ და შეესისხლხორცნენ, ხოლო ცხენებისა და აქლემების ფეხის ხმა ისე ისმოდა ღრმა ხევში, როგორც ადესში შერეკილი, ქედმოხრილი კენტავრების ფლტოქცებისა ცემა. უდაბური ველებისა და ამ კლდოვანი ჯურღმულის მიღმა ან სასუფეველი უნდა დახვედროდა, ანდა უძირო ორმო, რომელიც ერთბაშად შთანთქავდა, მტვრად აქცევდა, მაგრამ მიწიერი გზები ასე მარტივად, ასე აზრიანად არსად არ თავდება, არც აღმოსავლეთით და არც დასავლეთით, არც ღვთისკენ მიმართული და არც ეშმაკისაკენ გაკვალული.

ცხენი ისე აიჭრა ზეგანზე, თითქოს მართლაც ჰვესკნელის გზა ამოიარაო და ერთი წუთით რომ არ შეჩერებულყო, გული გაუსკდებოდა. ვარსკვლავებით მოქედილ ცას ერთი ნაოჭი არ აჩნდა, სავსე მთვარის მაცდური სხივები მთებსა და ხეობებს ეფინებოდა. დედამიწას ურცხვად ეარშიყებოდა. დაბლა, ვრცელ და ნაჭირნახულევ ველზე მდინარე მიიკლაკნებოდა, იჭორებოდა, მთვარისა და ვარსკვლავების მაცდუნებელ სხივებს ირეკლავდა. მდინარის პირას სპარსეთის ერთ-ერთი უძველესი ქალაქი იყო გაშენებული. ბრტყელსახურავიანი, რუხი ფერის სახლები ერთმანეთს ეტმასნებოდნენ, შუბბივით აღმართული მინარეთები ცის საუფლოში იჭრებოდნენ. სისხლითა და ოფლით მონაგარი ბალები და ბოსტნები, სოფლები და ქალაქები, ღამის ღუმილი, სიცოცხლის სუნთქვა და უკან ჩამწკრივებულ მეთვალყურეთა ფრთხილი მზერა, ყველაფერი, რაც ცხოვრებას მოსავდა და აშიშვლებდა, იფარავდა და ძარცვავდა, ალამაზებდა და ამახინჯებდა, აღმობიერებდა და ასასტიკებდა, ცოტათი მასაც ეკუთვნოდა, სიკვდილიანად მისი წილხვედრი იყო და თუ გამჩენმა ჭკვის გამძლეობა,

მოკრიალებული ცის უბიწოება და ვარსკვლავთა უკვდავება არ მიანიჭა, ეს სრულიად არ ნიშნავს იმას, რომ მშობლიური მიწის სიყვარულზე და არსებობისათვის ბრძოლაზე ბნელი აელო, ბოლომდე არ მიეტანა ის, რაც წინაპრებმა გადმოიღო-ცეს, უგუნურად გაეფლანგა ისედაც დატაცებული და შებიწ-წული საუნჯე.

სიშორისა და სინატიფისაგან ფერმიხდილი ქვეყანა ჯავრის გულიდან ამორეცხვას, წარსულის დავიწყებას, გაღმობიერებასა და განკაცებას სთხოვდა, ევედრებოდა, ეცნო ღამე და ირგვლივ გაშფეებული იდუმალება, დამცხრალიყო, გაგულგრილებულიყო. შერიგებოდა ბედსა და ღმერთს, უღარდელად მიეტოვებინა სოფლები და ქალაქები, ისევე უხალისოდ ჩაეგლო სასახლეების, ქარვასლების, დუქნებისა და საროსკიბოების გვერდით, როგორც მილიონებს ჩაუვლიათ, ისევე მშვიდად შეჰკებებოდა ტკივილსა და სიკვდილს, როგორც ბევრი ბრძენი კაცი შეჰკებებოდა, მაგრამ ფერმიხდილი ქვეყნის მომადუნებელი ჩურჩული მის გულს არ ეკარებოდა, მის ნებას ვერ არყევდა. დატყვევებულსა და მსჯავრდებულს არავითარი სურვილი არ ჰქონდა მეტი თანაგრძნობა გამოეჩინა ამ ქვეყნის მიმართ, ვიდრე ოდესმე გამჩენს გამოუჩენია. თუ წუთისოფელს ასე სჭირდებოდა კაცთა მოღვმის სიამაყისა და სიჯიუტის დათრგუნვა, მოკვდავთა განკაცება და გაღმობიერება, ჯერ ისინი უნდა გაღმობიერებულყვნენ. ვინც მის ქვეყანას სულს ხდიდა, ვინც მხოლოდ იმიტომ ასამართლებდა და სჯიდა, რომ მასზე ძლიერი იყო.

მთვარით განათებული ველი სულ უფრო ცხადად იკვეთებოდა. ნათლად მოჩანდა ქალაქის მაღალი გალავანი, ბორცვზე წამოყუდებული ციხე, დიდი, ბნელი შენობის წინ გაშლილი



მოედანი. ზოგიერთი სახლის ვიწრო სარკმლიდან სუსტი სუნათლე გამოსჴვიოდა, კედლებს შორის დაბუდებულ ჩრდილებს აკრთობდა და ციური სხივების სიმსუბუქის შეჭუნას ცდილობდა, მაგრამ ზღვარდაუდებელი სივრცის გაფართოებას ვერაფრით ვერ ახერხებდა, ყოველ ნაბიჯზე გადაულახავ დაბრკოლებას აწყდებოდა. მისი ციმციმი მხოლოდ კრაქის ბეუტვა იყო და ქვეყანას ვერაფერს წაგლეჯდა.

ქვეყანა ღამეს, სიზმრებს, უხორცო და ხორცშესხმულ აჩრდილებს ეპყრათ ხელთ, ეპყრათ ისე ხარბად, რომ გათენებამდე ვერავინ ვერაფერს დასტყუებდა, მაგრამ სიზმრებისა და აჩრდილების ამ მდუმარე საუფლოში ამილახვრის მახვილი თვალი ისეთ რამეს ამჩნევდა, რაც თვალით არ ჩანდა, ისეთ რამეს გრძნობდა, რაც სხვა დროს არ უგრძენია. მისი დაღლილი, ჭუჭყიანი სხეული ჯავშნით იმოსებოდა, ჯავშნის ელვარე ზედაპირზე სხვისი თუ საკუთარი ნააზრევით მოწამლული ისრები სხლტებოდა, იღებოდა სიბნელისა და მარტობის შავი კარი, რომლის უკან იმედი და ვაჟაკის გამაფიცებელი სიქველე სუფევდა. საქართველოში ათასობით ობოლი ბავშვი ტიროდა და მათი ცრემლების შესაშრობად თავიც საჭირო იყო და თვალებიც, ათასობით კაცი შიმშილობდა და მათ გამოსაკვებად ჭკუაც საჭირო იყო და მკლავის ძალაც, ათასობით უცხო თესლი, უცხო გავლენა, უზნეობა იკიდებდა ფეხს და მათ ამოსაძირკვავად სულიც საჭირო იყო და გულიც. როგორც არ უნდა წაელეკა ქვეყანა სისხლსა და სიბნელეს, რა სასტიკადაც არ უნდა მოჰქცეოდა ბედი, იმას მაინც ვერ უსაყვედურებდა, რომ არ იცოდა რას სჩადიოდა, ვის ესარჩლებოდა და ვის უპირისპირდებოდა. გრძელი, ყველა გზაზე უფრო მოსაწყენი, დამქანცველი გზა უკვე გამოიარა, უკან



მოიტოვა მზის მცხუნვარება, მოკეთებები, მოვალეები და ახლა მისთვის სულერთი იყო, ვის ჰერს შეაფარებდა თავს, როგორ მიიღებდა სპარსეთის ეს უძველესი ქალაქი. რაკი ბედმა ისე შორს, ასე მტრულად განწყობილ ქვეყანაში გადმოისროლა, ყოველი ნაბიჯი საკუთარი თავის იმედით უნდა გადაედგა.

ამილახვარმა ცხენი ადგილიდან დასძრა და იმის მაგივრად, რომ გარდუვალი ტკივილისათვის მომზადებულიყო, ღამეს დაწინ გადაშლილ ქვეყანას თამამად გაუღიმა, ისე დაეშვა დაღმართში, თითქოს წინასწარ იცოდა, რომ არ წაიქცეოდა.

**ნაწყვეტი „გეორგიანული ისტორიიდან“<sup>1</sup>**

სპარსეთის ერთ ქალაქში გავლის დროს ბიძაჩემმა ფრიად სასიქადულო საქმე ჩაიდინა. მან დაინახა, რომ ქუჩაში ერთ წარჩინებულ კაცს უმოწყალოდ სცემდნენ ფეხის გულეებზე: ამ კაცს გადასახადი არ გადაეხადა, რითაც შაჰი ისე განრისხებულა, რომ მისთვის ნახევარ მილიონად ღირებული ქონება ჩამოურთმევიათ. მაგრამ ხარჯთამკრეფნი მაინც თავის წილს სთხოვდნენ: მათ ათი შაური ერგებოდათ ყოველ ათ მანეთზე, რაღა გადაეხადა, რაც არა დარჩა რა? ბიძაჩემმა თავის უკანასკნელი ფული მიაცემინა და გამოასყიდვინა საბრალო კაცი. ამის გამო თანხლებელმა კახელმა თავადიშვილებმა ბიძაჩემი კიდევ გაჰკიცხეს თურმე: რა გესაქმება ვილაც სპარსელ-

<sup>1</sup> ავტორს საჭიროდ არ მიაჩნია სპარსეთში გაჰყვეს გივი ამილახვარს, მაგრამ რადგან ამბავს დასრულება სჭირდება, მოგვაქვს ნაწყვეტი გივი ამილახვრის ძმისწულის, ალექსანდრე ამილახვრის თხზულებიდან „გეორგიანული ისტორია“. ეს მცირე მოცულობის თხზულება ამ ოცდათორმეტი წლის წინათ გერონტი ქიქოძემ თარგმნა რუსულიდან.

თანო? ფული თვითონ გვჭირია ყოველ გარემოებაში, ისიც კი არ იცი, სიკვდილი მოგელის თუ სიცოცხლეო. ბიძაჩემს უპასუხნია: თუ მომკლეს ფული რად მინდა, ხოლო თუ ცოცხალი დავრჩი, მე უნდა ვფლობდე ფულს და არა ფულმა-მეც. განათავისუფლებული სპარსელი თავის მხსნელს მიუახლოვდა თურმე და მისი სახელი და გვარი ჩაიწერა. ხოლო შემდეგ, როცა თავისი ადრინდელი ღირსება აღიდგინა, მან ბიძაჩემს უხვად მიუზღო სამაგიერო.

ამგვარად მიაღწიეს სპარსეთის სატახტო ქალაქს ისპაჰანს, რაიცა შაჰს აცნობეს. შაჰმა ბრძანება გასცა გივი ამილახვარი ბოქაულს ჩააბარეთ, ხოლო მე არ დამანახოთო: თუ დავინახე ყოველი მისი ბოროტმოქმედება გამახსენდება და შემომაკვდებაო. ამის შემდეგ ბიძაჩემს მცველები მიუყენეს თურმე. მაგრამ მასთან ხშირად სავაზუმოდ დადიოდნენ ეთიმადოვლე და მთავარსარდალი, რომლებიც ჩვენივე ერის შვილები იყვნენ და ღიდად მეგობრობდნენ ბიძაჩემს. ამის გამო ერთხელ მის თანმხლებ აზნაურს ცრემლთაფრქვევით ეთქვა კიდევ, რა გესტუმრება და გემხიარულება, როცა გარს მცველები გვადგიან და ყოველ დღე სიკვდილს უნდა ველოდეთო. რაზედაც ბიძაჩემმა თურმე ღიმილით უპასუხა: თუნდაც მე მომკლან, შენ არავინ ხელს არ გახლებს, ხოლო თუ ჩემი ბედი გადონებს, გეტყვი რომ სწორედ დღეს წერილი მივწერე ეთიმადოვლეს და სესხად ათი ათასი მანეთი ვთხოვე, რაც მან მაშინვე აქლემებზე აკიდებული გამომიგზავნაო. ამით ბიძაჩემმა თავისი ახალგაზრდა აზნაური დაარწმუნა, რომ მის სიცოცხლეს არავითარი საფრთხე არ მოელოდა, ვინაიდან თუ ეს ასე არ ყოფილიყო, მას ფულს არ ასესხებდა აღმზიანი, რომლის ხელში მისი საქმე იყო.



ერთხელ მოხდა, რომ მაჰმანდარებმა (სტუმართა მიმღები მოხელეები) შაჰს, რომელმაც თავისი ამირახორბაში (შტალ-მეისტერი) მოითხოვა, შეცდომით ამილახვარი, ე. ი. ბიძაჩემი მიუყვანეს: ბიძაჩემს ის იყო ევახშმა და სტუმრები გაეცილებია. მას ეშინოდა ასეთი უდროო მოთხოვნისა, მაგრამ მაინც შაჰს ეახლა. მივიდა და მისაღებ დარბაზში დაჯდა, სანამ ეშიკაღასები (ცერემონიეისტერები) მის მოსვლას მოახსენებდნენ. მანამ კი იგი თავიანთ შორის დასვეს და როგორც წარჩინებულ პირთა სტუმართმასპინძლობას შეეფერება, ყალიონი მიაწოდეს.

ამილახვრის გაგონებაზე შაჰმა თურმე თავის ეშიკაღასებს და მაჰმანდარებს დაუყვირა, მე ჩემი ამირახორბაში მოვითხოვე და არა ამილახვარი, ეს თვალით არ დამანახოთ, მაგრამ ამასთანავე თურმე ბრძანა უკეთეს ბინაზე გადაეყვანათ იგი, გაედიდებინათ მისი შესანახი ხარჯები და ათასი მანეთი ეგრეთწოდებული სააბანო ფული მიეცათ, რაიც სპარსელებში უმაღლესი მოწყალების ნიშნად ითვლებოდა.

როცა შაჰმა გაიგო, რომ დედოფალი თამარი გარდაიცვალა, ხოლო თეიმურაზმა ორმოცი დღის შემდეგ მისი გარდაცვალებიდან თავად ციციშვილის ქვრივი შეირთო, დიდად განრისხდა და წამოიძახა: — მე საქართველოს მართველობა თამარს ვუბოძე და არა მის ქმარს, რომელმაც არც კი დაიცადა, გლოვისათვის დაწესებულ ვადას გაეველოო.

მოიმიზეზა რა დაქვრივებული თეიმურაზის სულმოკლეობა, შაჰმა მას არბაში დაადო. სპარსეთის შაჰებს ჩვეულება აქვთ, რომ როცა ვინმეს გაურისხდებიან, ჯერ არბაშს ადებენ, ხოლო შემდეგ სჯიან ფულის გადაუხდელობისათვის. როგორც



კი თეიმურაზმა გაიგო, რომ შაჰმა ორი მილიონის გადახდა და-  
მაკისრაო, მაშინვე მიხვდა, რომ იგი მასზე გამწყვდილი იყო და  
თავისი ოჯახით კავკასიონის მთებში გაიხიზნა, მაშასადამე ცნო-  
ბეს, შაჰმა ამილახვარი გაანთავისუფლა და ჯარით საქართვე-  
ლოში გზავნის შენს შესაპყრობადო. ამ ცნობამ თეიმურაზი  
სასოწარკვეთილებაში ჩაავდო, რადგან მან კარგად იცოდა,  
რომ ბიძაჩემს ვერსად დაემალებოდა და გადასწყვიტა ნება-  
ყოფლობით გამოცხადებოდა შაჰს, ვინაიდან ამ შემთხვევაში  
უფრო უნდა ჰქონოდა შეწყალების იმედი.

ნადირ-შაჰმა მართლაც გაანთავისუფლა ბიძაჩემი. მიიწვია  
იგი და უთხრა: გაპატიებ ყოველივე შეცოდებას, სამაგიეროდ  
შენც უნდა გვემსახურო. გაძლევ ოცდაათოთხმეტი ათას ჯარის-  
კაცს, წადი საქართველოში და სამეფო მართვა-გამგეობა იკის-  
რე, ხოლო თეიმურაზი მისი ვაჟი ირაკლითურთ დაიქირე და  
გამომიგზავნე! — თუმცა ბიძაჩემს სულით და გულით უნდო-  
და უარი ეთქვა, მაგრამ ვერ გაბედა და მზადებას შეუდგა.  
მაგრამ სწორედ მისი წამოსვლის წინა ღამეს ნადირ შაჰს მისი  
ძმისწულის ადილ შაჰის წაქეზებით სასახლის მცველები  
დაესხნენ თავს და მოკლეს<sup>1</sup>.

ამ სახელოვანი ხელმწიფის სიკვდილის შემდეგ დიდი  
არეულობა დაიწყო, ვინაიდან ხანები აღდგნენ და ერთმანეთს  
დაუწყეს ბრძოლა. თითოეული მათგანი ცდილობდა ხელთ და-  
ეჭირა ტახტი. მაგრამ ყველას ადილ შაჰმა აჯობა, რომელიც

<sup>1</sup> დანამდვილებით ძნელია ამის მტკიცება, მაგრამ შეთქმულებაში  
აღბათ ქართველებიც მონაწილეობდნენ, შეიძლება ვივი ამილახვარიც  
რადგან შაჰის კარზე ბევრი წარჩინებული ქართველი მსახურობდა, ხოლო  
სასახლის დაცვა თითქმის მთლიანად ქართველებს ჰქონდათ დავალებული  
(შენიშვნა ავტორისა).

ბოლოს ავიდა სპარსეთის ტახტზე. ამ არევდარევის დროს ბიძაჩემთან თავი მოიყარა ათასზე მეტმა ქართველმა, რომელთაც სპარსეთში სხვადასხვა თანამდებობა ეკირათ. მათთან ერთად ბიძაჩემი წარუდგა შაჰს და თავიანი სცა მას. აღილ შაჰმა იგი დიდი პატივით მიიღო და ყულარაღასობა, ე. ი. მთელი გვარდიის უფროსობა უბოძა. ამის შემდეგ ბიძაჩემს შაჰ-ყული-ხანი ეწოდა. მან მრავალჯერ გაიმარჯვა თავის გვარდით, ხოლო როცა ერთხელ ინდოეთის ერთი გამაგრებული ქალაქის აღების შემდეგ შაჰს წარუდგა დიდი ნაღავლით, ამ უკანასკნელმა მოოჭვილი და თვალმარგალიტებით შემკული ხმალი შეიხსნა და თავისივე ხელით მას დაჰკიდა. სხვა საჩუქრებს რომ თავი დავანებოთ, მარტო ეს ხმალი ოცდაათ ათას მანეთად იქნა შეფასებული.

ბიძაჩემმა სპარსეთში არა თუ შური არ იძია თეიმურაზის წინააღმდეგ, არამედ სიკვდილისგანაც იხსნა იგი. ერთს შეტაკებაში, რომელიც ამ მღელვარე დროს ხშირად ხდებოდა ისპაჰანის ქუჩებში, თეიმურაზი დატყვევებული იქნა სპარსელი ჯარისკაცების მიერ და მას ალბათ მოკლავდნენ, რომ ხმამალა არ დაეძახა, ხელი არ მახლოთ შაჰ-ყული-ხანის ძმა ვარო. ამიტომ იგი უვნებლად მიიყვანეს ბიძაჩემთან, რომელმაც მადლობა უთხრა ჯარისკაცებს და დაასაჩუქრა ისინი: ამის შემდეგ თეიმურაზი საქართველოში დაბრუნებამდე განუყრელად ბიძაჩემთან იმყოფებოდა, მას თავის მხსნელს უწოდებდა და ცდილობდა კავშირი და მეგობრობა მთელს ჩვენს ოჯახზე გაეცრცელებია.


ბიძაჩემი სპარსეთში დარჩა მესამე შაჰამდე, რომელსაც იბრაჰიმი ეწოდებოდა. ამ შაჰმა მას ორი დაბა აჩუქა ნახჭევანის სახანოში, მაგრამ იბრაჰიმს დიდხანს აღარ უყავნია და მას

შემდეგ ჩქარა შესწყდა ნადირ-შაჰის შთამომავლობის ხალი-  
სპარსეთში საშინელი არევ-დარევა დაიწყო.

ბიძაჩემმა, რომელიც განებივრებული იყო შაჰების სამსახურში, არ ისურვა ვაჭილების ყმობა, თავი მოტყუარა სპარსეთში გაბნეულ ქართველ ჯარებს და სპარსელების წინააღმდეგობის მიუხედავად სამშობლოში დაბრუნდა დიდად მორკმული. თეიმურაზ მეფემ იგი დიდი დიდებით მიიღო, ირაკლი მას თავის მამას უწოდებდა.

ამის შემდეგ ბიძაჩემს დიდხანს აღარ უცოცხლია, განაწესა თავის მემკვიდრეობის საქმეები, მრავალი ტაძარი და ციხესიმაგრე ააგო დანგრეულთა ადგილას, არა მარტო საამილახვროში, არამედ მის საზღვრებს გარეშეც, მრავალი ქველმოქმედება ჩაიდინა, თავისი დასაფლავების წესი განაგო და გარდაიცვალა.

ბიძაჩემი პატივით დაასაფლავეს. კუბოს სამი სარწმუნოების სამღვდელოება მიჰყვებოდა: წინ მიუძღოდა მართლმადიდებლობის სამღვდელოება, მარჯვნივ კათოლიკეებისა, ხოლო მარცხნივ სომხებისა. მათ უკან კი მიდიოდნენ მეფე, ჩვენი ოჯახი და წარჩინებული თავადიშვილები. გლოვა მთელ საქართველოში დიდხანს გაგრძელდა.



## დაღამება ამა სოფლისა

ისე გულცივად ჯერ განსჯა არა მჭონია, ასეთი თავისუფალი ფიქრი მაქვს და ასეთი მტკიცე გული, რომ სამოცი წლის მოხუცებულიც ვერ იქნება ჩემისთანა უსასყიდლო მსაჯული.

ნ. ბარათაშვილი

იმ საღამოს ხანგრძლივი ციებ-ცხელებისა და ბოდვის შემდეგ პირველად დაუბრუნდა ცნობიერება. თვალს აღარ უჭიროდა საგანთა გამოცალკევება, ბნელისა და ნათელის გარჩევა. მოირღვა, დაიღწა ოთხივე მხრივ აღმართული კედლები, გა-



ფართოვდა ორმო, რომელშიც ხან აუტანელი სიციხე იდგა. ხანაც გამთოშავი სიცივე. ვიღაცას შუა ოთახში მრგვალი მაგიდა დაედგა, შანდალი მოეტანა, ორი სანთელი აწვთუნებოდა. ვერ მიხვდა, სად იყო, ვისა და რას ებრაძობდა. მანამ როცა იატაკზე გაწოლილ ჩრდილებს დააკვირდა, დარწმუნდა, რომ ადგილსამყოფელი არ გამოუცვლია. ტალახით შელსილი, შეთეთრებული, უსწორმასწორო კედლები აღარ ირყეოდნენ, აღარც ფერს იცვლიდნენ, მაგრამ მთელი ამ ქოხის უხადრუკობას ძველებურად იტევდნენ. ფანჯარა ისე გაეშავებინა გარედან მომდგარ ბნელს, თითქოს ქვეყანა კუბრის ზღვაში იყო ჩაძირული. ახლა მას არც იმაში ეპარებოდა ეჭვი, რომ გარეთ წვიმდა, წვიმდა გადაუღებლად, წვიმდა ისე, როგორც ეს ოქტომბერში იცის. სინესტე ყველა ხერელიდან, ყველა ქუჭრუტანიდან ყონავდა. ირგვლივ ობის, სისველისა და სიღამბლის სუნს აყენებდა. ამ ერთი თვის წინათ იგი მხოლოდ იმაზე ფიქრობდა, როგორ გადახვეწილიყო ცხრა მთას იქით, როგორ მიეტოვებინა ეს გაძარცული, გაპარტახებული ქალაქი, მაგრამ ახლა საამისოდ არ ეცალა. ყველა ჯებირი მოირღვა, ყოველი შემოსული არსება გაშიშვლდა, ყოველი იმედი გაქარწყლდა. მის სულში სიმკაცრემ და სიმშვიდემ დაისადგურა. მაგრამ ეს არ იყო ჩვეულებრივი, გადამახალისებელი, სხვა განწყობის შემქმნელი სიმშვიდე. ეს უფრო ზეციურ სიმშვიდეს ჰგავდა — ყოვლისმომცველს, ყოვლისგადამფასებელს. ტკივილი და სულის ხუთვა სადღაც გაქრა, თვალმა სიმახვილე დაიბრუნა, შეგნებამ ცნობიერება, გონებამ აზროვნების უნარი. აწეწილი, არეულ-დარეული სამყარო ისევ დალაგდა, შეივსო, დროს დაედევნა. სანამ გარეშე ხმაურს გარკვეულ ჟღერადობას შეიძენდა, მან საბნიდან ხელი გამოიღო

და ისე გადაისვა შუბლზე, თითქოს მძიმე ტვირთი მოიწორა თავიდან. მთელი კვირა ებრძოდა ბნელს, მაჯლაჯუნებს, კომპარებს. მთელი კვირა ჭყლეტდნენ, აღრჩობდნენ, მანთავდნენ და მაინც ვერ მოუღეს ბოლო. ახლა ირგვლივ არავინ ჩანდა, მაგრამ სიცარიელის ყრუ გამოძახილი მკვეთრად ისმოდა ყოველ მხრივ დახშულ სივრცეში. მიუხედავად ამისა, შეუბურობელის შებურობა მაინც არ უცდია. ოცდარვა წლის მანძილზე მისთვის არავის არაფერი უბატებია, არაფერი შეუხდვია, არაფერი შეუშუბუტებია. ამის იმედი არც ახლა ჰქონდა. მალე ყველაფერი თავიდან დაიწყებოდა. ჯერ ყინულივით ცივ საბანში გაახვევდნენ, დაჯორგავდნენ, შემდეგ ცეცხლს შეუნთებდნენ ქვემოდან და ისევ დატრიალდებოდა თვალწინ წითელი ბურთულები. მაგრამ ამაღამ იგი მათ ადვილად არ დანებდება, კისერზე მარყუჟს არ ჩამოიკიდებს. მარცხი ჯერ კიდევ არ ნიშნავს დამარცხებას, ლოგინში წოლა — უძლურებას, ღუმილი — მორჩილებას. მას ჯერ კიდევ შესწევს ძალა თვალი გაუსწოროს სიკვდილსაც და ცხოვრებასაც, იბრძოლოს ყოველი წუთის, ყოველი წამისათვის. გარდაიქმნას ისე, რომ შემორჩენილმა აჩრდილებმა ვერ იცნონ, ვერ მიხვდნენ, საიდან დაუბერა ქარმა. მართალია, წინ თითქმის არაფერია, ქვიშა უმოწყალოდ ცვივა ბურთულიდან ბურთულაში, მაგრამ უკან მთელი განვლილი ცხოვრება დევს და მას კიდევ ერთხელ შეუძლია იცხოვროს ამ ცხოვრებით.

წვიმის მძიმე წვეთები სახურავს ეცემოდა, თიხის სქელ ფენას რეცხავდა, წყალი ტალახივით მოედინებოდა. ასეთ ამინდში იგი არაერთხელ შემჯდარა ცხენზე, გრძელი ნაბადი მოუხურავს და ავაზაკივით შეიარაღებული ვიწრო ქუჩას გაჰყვოლია. ყოველი ასეთი გასეირნება უკვალოდ გაქრობა უფრო

იყო, ვიდრე გასეირნება, რადგან შინ არაფერი რჩებოდა. ან-  
და რა უნდა დარჩენოდა. საკუთარი არაფერი გააჩნდა, სხვისი  
კი ზედმეტ ტვირთად მიაჩნდა. სანამ ქალაქს გასცდებოდა, გუ-  
ლი ყოველთვის დამძიმებული ჰქონდა. ირგვლივ ერთი ხეი-  
რიანი სახლი არ ჩანდა, ერთი ხე არ იყო ისეთი, რომ ჩრდილს  
შეჭაარებოდა. ქუჩები ლაფში იღრჩობოდა, ადამიანები კი  
მიწურებში და სიბინძურეში. აქა-იქ მიტოვებული კარ-მიდა-  
მოც ჩანდა. მათი პატრონები ან აბასმირზას გაპყვნენ, ან ლე-  
კებმა მოკლეს, ანდა შიმშილმა იმსხვერპლა. სპარსელები სა-  
მუდამოდ განდევნეს მათ მიერ არაერთხელ გადაბუგული მი-  
წიდან. შიმშილს და ლეკებს ცოტათი უკან დაახევინეს, მაგ-  
რამ ყაჩაღებს ჯერჯერობით ვერაფერი მოუხერხეს. ვისაც გუ-  
ლი ერჩოდა და ძალა შესწევდა, ტყეში გარბოდა. შინ ჯდომას,  
პატიოსნად შრომას და ყოველდღე იმაზე ფიქრს, როდის და-  
გესხმიან თავს, როდის გაგძარცვავენ, მათ ისევ ის ამჯობინეს,  
რომ სხვები ეძარცვათ. მთელ ამ მხარეს დაშოშმინება, მოვლა-  
პატრონობა სჭირდებოდა, მაგრამ ადგილობრივი მოხელეები  
საკუთარ ჯიბეზე უფრო მეტს ფიქრობდნენ, ვიდრე საქმეზე-  
ამის გამო მასაც ეკვის თვალთ, ალმაცერად უყურებდნენ.  
არ სჯეროდათ, რომ ქრთამს არ იღებდა, დაჩაგრულს არ ჩაგ-  
რავდა, ძლიერთა წინაშე ქედს არ იხრიდა. ერთი-ორჯერ პრო-  
ვოკაციაც კი მოუწყვეს, მაგრამ პროვოკაციაზე მეტად მას  
სულ სხვა რამ წამლავდა. მონებსა და ლაქიებს შორის თვი-  
თონაც მონად და ლაქიად გრძნობდა თავს. მარტო დარჩე-  
ნილს გული ეკუმშებოდა, მელანქოლია ეძალებოდა, ხოლო  
ზოგჯერ ისეთი გრძნობა ეუფლებოდა, თითქოს სადაცაა ჰკუი-  
დან გადავიდოდა. ერთხანს კედლიდან კედლამდე დადიოდა,  
ჩრდილებს აფრთხობდა, საკუთარ თავს ელაპარაკებოდა, შემ-

დღე გარეთ გამოვარდებოდა, ცხენს მოახტებოდა და როგორ  
ამინდიც არ უნდა ყოფილიყო, მაინც მთებისაკენ გასწევ-  
და. წვიმა სახეში სცემდა, ნაბდის კალთებს ჩაბლაქტებული  
ქარი უკან ექაჩებოდა, ცხენიდან გადმოგდებას უპირებდა,  
მაგრამ მას სწორედ ამგვარი ქიდილი ანიჭებდა სიამოვნებას,  
გაციებულ სისხლს უთბობდა, თავს ავიწყებდა. ამ დროს იგი  
ცას, ქარს, მინდვრებსა და ტყეებს უფრო ეკუთვნოდა, ვიდრე  
რომელიმე არსებას ან სხვა რომელიმე გარემოს. მაგრამ ასეთ  
გასვირნებას ერთი უსიამოვნებაც თან ახლდა ყოველთვის. ნა-  
ავადყოფარი, მარტოობისაგან გაწამებული ადვილად ცივდე-  
ბოდა და ლოგინად ჩავარდნილს კვლავ ეძალებოდა ნალველი.  
იწვა ჩუმად, დასჯილი ბავშვივით. ძილი არც დღე ეკარებოდა  
და არც ღამე. რამდენიმე დღეში ისე იღლებოდა, რომ თმენის  
ძალა აღარ შესწევდა. ამას წინათ ამბავი მოუტანეს, ყაჩაღებ-  
მა მწყემსები დახოცესო. სიცხიანმა სამი დღე იხეტიალა ტყე-  
ღრეში, მთელი მახრა შემოიარა, მაგრამ ყაჩაღების კვალს  
ვერსად მიაგნო. თავი უხურდა, გული ერეოდა, ბავშვობაში  
მოტეხილი ფეხი ტკიოდა. ყავარივით გამომშრალს ყელში არა-  
ფერი გადასდიოდა, მხოლოდ არაყს წრუტავდა დროდადრო,  
შეუმჩნევლად ეშვადებოდა რაღაც ისეთისათვის, რასაც აღა-  
რაფერი ეშველებოდა. მეოთხე დღეს უკან გამობრუნდა, მაგ-  
რამ განჯამდე ველარ მიადწია და მურუთში ჩამოხტა. დაბუყე-  
ბული ფეხები ძლივს ამოქონდა სქელი ლაფიდან, ბნელ ოთახ-  
ში ხელისფათურით მიიკვლევდა გზას. ბოლოს, როგორც იქ-  
ნა, მიადწია საწოლამდე, იარაღი და ტანსაცმელი იქვე, იატაკ-  
ზე დაყარა და მოცელილივით წაიქცა. მას შემდეგ ფეხზე  
აღარ წამომდგარა, მოწყდა, მოეშვა, საკუთარ თავს გაემიჯნა.  
კარი წყნარად გაიღო. ოთახში შუახნის ქალი შემოვიდა.

იგი პირველად არ ხედავდა ამ ნაყვავილარ, ხელგებდა წითლე-  
ბულ დედაკაცს. თუ ამ ოთახში რაიმე თავის ადგილას იდო,  
მხოლოდ ამ დიდი, ღონიერი ხელების წყალობით მათთვის  
ამქვეყნად მძიმე და ბინძური სამუშაო არ არსებობდა: ყველა-  
ფერს ეხებოდნენ, ყველაფერს ერეოდნენ, დავრომილ ავად-  
მყოფს უვლიდნენ. განჯაში ეს უთვისტომო ქალი პოლიციელს  
თუ ჯარისკაცს ჩამოჰყვა, ქოხი აიშენა, ოჯახის შექმნა მოიწა-  
დინა, მაგრამ პოლიციელი ლეკების ტყვიამ იმსხვერპლა და  
იგი კვლავ მარტო დარჩა. მას შემდეგ ხან მაზრის უფროსს  
ემსახურება, ხან მის მოადგილეს. უფრო ხშირად მოადგილეს,  
რადგან მაზრის უფროსი მეტწილად თბილისშია. თუმცა რა  
უნდა აკეთოს თბილისში გაზრდილმა, ცოლშვილიანმა კაცმა  
ამ გადაბუგულ უდაბნოში, როგორ გაძლოს უდარდელი სი-  
ცილის გარეშე. მიუჩვეველი კაცისათვის მარტოობა ისევე  
ძნელი ასატანია, როგორც ტყვეობა. რამდენიმე თვეში ფი-  
ტავს, აჩლუნგებს, ასნეულებს. ამიტომაც ისწრაფვის დღე-  
ნიადაგ იმათკენ, ვისი ალერსი, ზრუნვა და ყურადღება ჰაერი-  
ვით სჭირდება. ამას წინათ იგი ვერც კი გააცილა. შეციებულს  
ზემოდან ორი ნაბადი ეხურა და მაინც კანკალებდა. მეორე  
დღეს ისევ მოუხდა ცხენზე შეჯდომა. ერთ-ერთი სოფლის  
შახლობლად ყელგამოჭრილი ვაჭრები იპოვეს. წელამდე მი-  
წაში ჩამძვრალი, საკმაოდ მოზრდილი სოფელი ავის მომასწა-  
ვებელი დუმილით შეეგება. ყოველი ვიწრო ფანჯრის უკან  
შეიარაღებული სილუეტები იყვნენ ჩასაფრებულნი. მათი  
მზერა ჯვარედინა ცეცხლივით სერავდა ქუჩას. მიუხედავად  
ამისა, რამდენიმე კაცი მაინც დააპატიმრა, მაგრამ ვერაფერი  
დაადგინა. ხელისუფლებასა და ადგილობრივ მოსახლეობას  
შორის ნდობა არ არსებობდა. არ სწამდათ მექრთამე მოხელე-

ების სამართლიანობის, დაწერილი ქალღმრთის ძალის. არ სჯე-  
როდათ, რომ მათ საკეთილდღეოდ ვინმე ხელს გაანძრევდა  
ძალადობა ისეთივე ჩვეულებრივ ამბად მიაჩნდათ, როგორც  
უამინდობა. პატიმართა უმრავლესობა პირქუში, გაბოროტე-  
ბული, გამამაძაღლებული ავაზაკი იყო, საკუთარი თავის გარ-  
და არავის ენდობოდა და ცდილობდა, რაც შეიძლება ძვირად  
გაეყიდა თავისუფლება. სხვა როგორმე შეძლებდა ალბათ მათ  
გამოტყვევას, მაგრამ მისი სისუსტე ის იყო, რომ კარგად ეს-  
მოდა მათი, რაც თუ მთლიანად არა, ნაწილობრივ მაინც ნიშ-  
ნავს პატიებას. გარდა ამისა, ძალადობა და ადამიანის ფიზი-  
კური წამება ჭირის დღესავით სძულდა ყოველთვის და ამის  
გამო მეტი ჯაფა აღგებოდა. თუმცა ამისათვის არც მაზრის  
უფროსი ვარგოდა. ყაჩაღების დევნას და ექვემიტანილთა და-  
კითხვას მას ისევ თბილისში ეტლით სეირნობა და ქეიფი ერ-  
ჩია. ამიტომაც დააკისრა თანაშემწეს უცხო, გაუგებარი და  
უაზრო ტვირთი. თუ ბედისწერა არა, რამ გადაჰყარა იმ დღეს  
მამუკას, რატომ დათანხმდა, რატომ შეაქცია ზურგი თელავს.  
რომელი ჭკუათმყოფელი გარბის სამშობლოდან, როცა სხვა-  
გან უკეთესი არაფერი ეგულება. თუ აუხსნელი შემთხვევი-  
თობა არა, რისთვის მოაშურა ამ გაპარტახებულ ქალაქს, რა  
უნდა ეპოვა აქ ისეთი, რომ თავის შესაქცევად ან მოსატყუებ-  
ლად გამოსდგომოდა. იქნებ მოეხატრა და უარი ვერ უთხრა,  
ან იქნებ მშობლიურ ქალაქში სული ეხუთებოდა და უნდოდა  
რაც შეიძლება შორს გადახვეწილიყო, გასცლოდა ყველას და  
ყველაფერს, განთავისუფლებულიყო მერყეობისაგან, რასაც  
მთელი სიცოცხლის მანძილზე ვერაფერი მოუხერხა, რის გა-  
მოც საკუთარ მოწოდებას დალატობდა. დალატი რომ ცალ-  
მხრივი არაა, ეს მან აქ ჩამოსვლამდეც იცოდა. ვინც თავს და-

ლატობს — ღალატობს სხვებსაც, მაგრამ ეს არ ეხმოდათ მიწი  
ოჯახის წევრებს, ნათესავებს, ნაცნობ-მეგობრებს. პირიქით,  
მუდამ იმას ჩასჩინებდნენ, რომ ხელი აედო ღვთით მონი-  
ჭებულ მადლზე და უხილავ, გამომფიტავ, გამრყვნელ ძალას  
დამორჩილებოდა, ფეხი შეედგა ისეთ ჯურღმულში, რომელ-  
საც ვედარასოდეს დააღწევდა თავს. აკი ასეც მოხდა. მთელი  
ძალ-ღონე სამსახურს შეაღია, არ დაზოგა არც დრო, არც  
ჯანმრთელობა და მაინც ვერავის ვერ შეუმსუბუქა მძიმე  
ხვედრი, ვერავინ იხსნა ძალადობისა და სიკვდილისაგან.

ღამე ისე პირქუშად იმზირებოდა გარედან, თითქოს აღა-  
რასოდეს დაიხვედა უკან. ამის გამო ყოველი ნივთი, ყოველი  
საგანი, რომელთაც სანთლების გამქვირვალე შუქი დამოუკი-  
დებლობას ანიჭებდა, უფრო მძაფრად იკვეთებოდა, განუმეო-  
რებელ თავისებურებას იძენდა. მას რომ მხარი ექცა, ახლა ეს  
სადავო არ იყო. მაგრამ რაღა მაინცდამაინც მის მხრებს დააწვა  
დროის სიმძიმე, რაღა მის სულში ჩასახლდა უნდობლობა,  
სხვათა ტკივილის სიმძაფრე, დაუცხრომელი პროტესტი. კიბე-  
ზე მანამდეც დაგორებულა სკოლაშიც და სახლშიც, უხეირო-  
დაც დაცემულა, მაგრამ ამჯერად წამოდგომა ვერ შეძლო.  
მთელ ტანზე ცივმა ოფლმა დაასხა, გაფითრდა, გმინვა აღმოხ-  
და. სანამ ტკივილი ღამეებს თეთრად ათევინებდა, სანამ ლო-  
გინში იწვა, ფეხის დარდი არ ჰქონდა, მაგრამ როგორც კი ყა-  
ვარჯნები გადაყარა და სწორად გავლა სცადა, მიხვდა, რომ  
სამუდამოდ დაკოჭლდა. დაირღვა სიმეტრია, სწორხაზოვნება  
და შიგნით რაღაც გაიბზარა. ფეხი დამოკლდა, მაგრამ ამით  
მის ნიქს, მის ენერგიას არაფერი შოკლებია. პირიქით, შემქი-  
დროვდა, დაიმუხტა, გამძაფრდა. დაიწყო რაღაც ისეთის ძიე-  
ბა, რაც ცხრა მთას იქით იდო, რაც დიდ შრომას და თითქმის

მთელ სიცოცხლეს მოითხოვდა. აღზნებას დებრესა ცვლი-  
და, ნაყოფიერებას უნაყოფობა. ამ დროს ყველაფერი აღი-  
ზიანებდა, ყველაფერი აწრთხობდა, იღუმალებით მოცულ  
სამყარო ისე ფერდღებოდა ცალ მხარეს, თითქოს ცალი ფერ-  
მსაც მოკლე ჰქონდა. სადაა აზრის სისწორის, ჰეშმარიტების  
საზომი, სად ემთხვევა ერთმანეთს გარე და შინა სამყარო, სად  
გარბიან თითქმის ჩამოყალიბებული ფიქრები, სად იმაღე-  
ბიან... უეცრად ორი ერთმანეთისაკენ მოძრავ წერტილებს შო-  
რის ნისლი ჩამოდგა და სწორედ იმ ადგილას შესქელდა, სა-  
დაც ცოცხალი აზრი იბადება. უფერული მასა მთელ ქვეყა-  
ნას მოედო, უსუსური შუქი დაისაკუთრა, ჩრდილები დათრ-  
გუნა. დატყვევებული შუქი თრთის, ძალას იკრებს, უფერულ  
მასას ცოტათი აფერადებს. დასუსტებული, ყოველ მხრივ  
დახშული მონდომებით ცდილობს კვლავ მოიპოვოს სათამა-  
შოსავით წართმეული სამყარო, დაძლიოს უფერულობა, თუ  
იმედი არა, ფორმა მაინც დაუბრუნოს ამ ქვეყანას. ნისლი ქა-  
ღალღივით თხელდება, იცრიცება, იფოთლება. პიტალო  
კლდის ფონზე ისე მოჩანან გამოქვაბულები, როგორც დროის  
ჩაშავებული კბილები. ჩაშავებული კბილები შიდა მხრიდან  
ერთმანეთს ებმიან, სიღრმეში იჭრებიან, თავიანთ თავს იმეო-  
რებენ. მიუხედავად კოჭლობისა, მან მაინც ბევრი იარა, ბევ-  
რი იხოხა და მხოლოდ მაშინ მიხვდა, რომ ამ ბნელ ქვაბებს  
ბოლო არა აქვთ და არც შეიძლება ჰქონდეთ, როცა ტანსაც-  
მელი შემოაცვდა, მუხლები გადაეყვლიფა, მყესები დააწყდა.  
მას შემდეგ მარტო წევს და ყოველ უფორმო სხეულს ებრძ-  
ვის. რაც მოხდა მოხდა, უსაშველოს არაფერი ეშველება.  
ამიერიდან ყვირილს არ აპირებს. მისი ძახილი ყოველთვის  
სამყაროდ წოდებულ ყრუ კედელს ასკდებოდა და მტვრად  
იფანტებოდა.



საწოლის წინ აჩრდილი აღიმართა. აჩრდილს არც არავინ ახლდა და არც არაფერი ეჭირა ხელში, მაგრამ მაინც რაღაცას თუ ვიღაცას მოუძლოდა წინ, დაუმაღლავს მალავდა. ამის პრეზენტი სიბრაღული უფრო იყო, ვიდრე ცნობისმოყვარეობა. თვალები ცრემლით ევსებოდა, მუცელზე დაწყობილი ხელები უთრთოდა. უნდოდა რაღაც გაეკეთებინა, უმწეობის, გრძნობა დაეძლია, ლოდინი დაეთრგუნა. საწოლისაკენ დახრილმა ბეჭებზე ხელი მოხვია, ოდნავ წამოსწია და სასთუმალი ისე გაუსწორა, რომ არაფერი უკითხავს. მისი სახე გაცილებით მეტს გამოხატავდა, ვიდრე ეს საჭირო იყო. დაუნახავის დანახვა მან ჯერ კიდევ მაშინ ისწავლა, როცა ყავარჯნებს დაათრევდა, წინაპართა პორტრეტებს და ძველ ნივთებს აკვირდებოდა, როცა ოცნებას ჯერ კიდევ არ ჰქონდა ერთა შეკვეცილი. ფაქტების გადაადგილება ადვილი საქმე იყო. ქვეყანა სწორედ იმ კუთხით ბრუნდებოდა მისკენ, როგორც ამას მისი ფანტაზია მოითხოვდა. დამარცხებას გამარჯვება ცვლიდა, გაპარტახებას — აყვავება, უმეცრებას — საყოველთაო განათლება. რა გზები, რა ნავსადგურები, რა ქალაქები არ მოჩანდა ზღვიდან ზღვამდე, სად ჩამოსხმული ზარები არ რეკავდნენ ეკლესიებში, ვის არ იწვევდნენ ტაძრებისა და სასახლეების ასაგებად, კედლების მოსახატავად, ქანდაკებების გამოსაკვეთად. ნიქს ყველა გზა ხსნილი ჰქონდა, მუხანათობას დახშული და დაბეჭდილი. მაგრამ მაშინ მან ჯერ კიდევ არ იცოდა, რა ძნელია ავისა და კარგის გარჩევა, სხვის სულში ჩახედვა, დაურვებულთა ფეხზე წამოყენება. ვინც ერთ ღროს მალალი გრძნობის მქონე ეგონა, იგი ნახა უგულო, ვისი სული განვითარებული ეგონა, მას სულ არ ჰქონია, ვისიც გონება სწამდა ზეგარდმო ნიქად, მას არც თუ განსჯა ჰქონია, ვისიც

კრემლნი ეგონა კრემლად სიბრაულისა, გამომეტყველად  
შშვენიერის სულისა, თურმე ყოფილან ნიშანნი ცბიერებისა,  
წვეთნი საშინელის საწამლავისა“. ნაცნობი გარემო ყოველ-  
დღიურად იძარცვებოდა, ვერანდებოდა და უეტრად იგი სი-  
კრუესა და სიკვდილს შორის აღმოჩნდა. მათ გარდა აღარა-  
ფერი დარჩა ასარჩევი ამ ქვეყნად. არ იცოდა, რისთვის დგე-  
ბოდა დილით, რისთვის იპარსავდა წვერს, რისთვის მიდიოდა  
სამსახურში, სადაც ყველაფერი ისევე გამომშრალი იყო, რო-  
გორც ღერბიანი ქალაქები და მათი შესანახი კარადები. მის-  
ტიფიკაცია ყველაფერს თხელ გარსში ახვევდა, აღამიანებს  
სალტესავით ერტყმოდა. ქალაქის სამეფო უზარმაზარი, თა-  
ვისებური და ყოველსმომცველია. ქალაქს უნდა ემსახურო,  
ყოველ ასოს, ყოველ ნიშანს მეტი ანგარიში უნდა გაუწიო,  
ვიდრე აზრსა და გრძნობას, რადგან აღამიანების ბედს ქალა-  
ქი წყვეტს და არა საღი აზრი. მოხელის დაწინაურებაც ქა-  
ლაქდზეა დამოკიდებული. მთავარია, როგორ ექცევი მას,  
უფლი, თვალისჩინივით უფრთხილდები თუ ჯღაბნი. რამდენა-  
მე კაცმა ნაწილობრივ მაინც აუარა გვერდი ამ უზარმაზარ  
ქსელს — შემდეგ მათ სულ სხვაგვარად ეჭირათ თავი, მაგრამ  
მისთვის ბედმა არც ეპოლეტები გაიმეტა და არც ჩინ-მედლე-  
ბი. ამისთვის თავის დროზე, რამდენიმე წლის წინათ იზრუნა,  
კიბეებიდან თავდაყირა დაავორა. შეიძლება მისი საქმე არც  
ხმლის ქნევა იყო, მაგრამ სერთუკი და საწერი მაგიდა აბუ-  
ჩად აგდებას, დაცინვას უფრო ჰგავდა, ვიდრე რაიმეს ვამე-  
ტებას. ბევრს არც ის სჯეროდა, რომ იგი ამ უბრალო, უნაყო-  
ფო სამუშაოს თავს გაართმევდა, დიდხანს გაუძლებდა ქალა-  
ქების ქექვას, უფროსების წინაშე მორჩილად დგომას. განჩი-  
ნების პალატაში სამსახურის დაწყება გამოცდა უფრო იყო,

ვიდრე ცხოვრების სარბიელზე გასვლა. ფარდის უკან ყოველთვის უამრავი თვალი, უამრავი ყური, უამრავი დამხმული სახეა. მათ წინასწარ იციან, რა მოხდება, ვის რა მოუვა, მით უმეტეს, ისეთ კაცს, ვისაც დაუდევარი ხასიათი და მწარე ენა აქვს, ვინც ძნელად ეგუება ადამიანებს. ამიტომაც არ ეპარებოდათ ეჭვი, რომ მისი კარიერა კრახით დამთავრდებოდა. შეიძლება სწორედ ეს იყო ერთადერთი მიზეზი იმისა, რომ ორიოდ თვის შემდეგ მან არა თუ დიდებულად გაართვა თავი დაკისრებულ მოვალეობას, არამედ საუკეთესო მოხელედაც კი ითვლებოდა. ილინსკი ყოველთვის მას ავალებდა მთავარმართებლის კანცელარიაში ან უფრო მაღალ ინსტანციებში გასაგზავნი ქალაქის შედგენას. ერთხელ ისიც კი უთხრა, ჩემი ადგილი შენ დაგრჩებაო. ილინსკი კანცელარიაში დაბერებული კაცი იყო და ამიტომ არ ესმოდა, რომ მის ხელქვეითს რომელიმე რეგენთან უაზრო დავას, თავმოყვარეობის დათმობას, ზედმეტი შრომა ერჩია. საკმარისი იყო ერთი ხმამაღალი შელაპარაკება, ერთი უკადრისი სიტყვა და ყველაფერი თავისთავად დამთავრდებოდა. ჯერ გულწასულ ილინსკის გაიტანდნენ ოთახიდან, შემდეგ კი მას დაითხოვდნენ სამსახურიდან. ამის შემდეგ საღლაც უნდა გადახვეწილიყო, რადგან მამის საყვედურებს და ღრიალს ისედაც ვეღარ იტანდა.

უეცრად ჩრდილი შეტრიალდა, ბეჭებში მოიხარა და კარისაკენ წავიდა. ნაცნობი ხმით წარმოთქმულმა ბგერებმა გამოკვეთა ორი სიტყვა, რომელთა ქლერადობა ცოტათი განსხვავდებოდა ერთმანეთისაგან. მარტო დარჩენილმა ბევრი იშტვრია თავი, მაგრამ მაინც ვერ მიხვდა, რომელი იყო ამ ორს შორის სწორი: „Какой молодой“ თუ „Какой ми-

ЛЫЙ“. მცირე ხნის შემდეგ მისი ყურადღება სანთლების ციმ-  
ციმმა მიიპყრო. მყრალ სოროში ჯერ კიდევ ტოკავდა ორი  
ცოცხალი სვეტი, რომელთა არსებობას ზღვარი დაუდევს და  
რალაც ისეთთან დააკავშირეს, რასაც დიდი დღე არ ჰქონდა.  
იქნებ ეს მცირე დრო იმისათვის უწყალობეს, რომ საკუთარი  
თავი ჰგმოს, საკუთარ სულს გაემიჯნოს, უსიტყვოდ დაემორ-  
ჩილოს ბედს. იქნებ იმისათვის მოიყვანეს გონს, რომ თვალ-  
ნათლივ დაინახოს, რას ნიშნავს ყოფილი ხანების აგარაკზე  
უპატრონოდ წოლა. რამდენი უდანაშაულო ადამიანისათვის  
დაუთხრიათ აქ თვალეები, მოუქრიათ ენა, გაუუპატიურებიათ,  
გაუთელიათ. რამდენი ვერაგობის და მუხანათობის მოწმეა ეს  
დატყეპნილი თიხა. ამ ძველისძველ სახანოში საუკუნეების  
მანძილზე ბატონობდნენ ტირანები, სატრაპები, უზურპატო-  
რები, თავს მუჰამედის შთამომავლებად აცხადებდნენ და ჰა-  
რამხანების მორთვა-მოკაზმვის, მამაკაცების დასაჭურისების  
და მტაცებელი მხეცების მოშინაურების მეტს არაფერს აკე-  
თებდნენ. მათი უზნეობის, უმეცრებისა და სიმხეცის კვალი  
ახლაც აჩნდა მათ ყოფილ ქვეშევრდომებს. რამდენჯერ გამო-  
ლაპარაკებია ბაზარში ცხვირმოჭრილ, ენამოჭრილ, დასაჭუ-  
რისებულ ბერიკაცებს, რომელთაც ამქვეყნად საშინელების  
მეტი არაფერი ენახათ. ერთ-ერთ მათგანს მთელი ინდოეთი  
და წინა აზია ჰქონდა შემოვლილი, დერვიშობდა, სიბრძნეს  
მწაფებოდა, მაგრამ რად უნდა სიბრძნე იმას, ვისაც ღღენია-  
დაგ ლუკმაპური და თბილი კუთხე ენატრება. წუხელ სახიჩ-  
რები დაუპატიჟებლად ესტუმრენ, შუა ოთახში დასხდნენ და  
ამათლის თამაში დაიწყეს. ყოველი გაგორების შემდეგ ვი-  
ლაც თავველით წრიპინებდა. წაგებულს შუა ცეცხლიდან გა-  
მოღებულ ი რკინის ჯოხით შანთავდნენ. ჰაერი დამძიმდა,

ოთახში ოფლისა და დამწვარი ხორცის სუნი დადგა. რა ჰქნას, როგორ გაყაროს გარეთ ეს მაჯლაქუნები, ვის დაუძახოს, ვის თხოვოს შველა. ცეცხლის პირას მოჭრილი ყურები და ცხვირები ყრია. რკინის ნაჭერს სიმხურვალისაგან თავი გასქელებია. კამათლები უზარმაზარი ლოდებივით გორავენ და ერთმანეთის მახლობლად სხდებიან. მის სმენამდე ისევ აღწევს თავის საცოდავი წრიბინი. უნდა წამოდგეს, ბნელი კუთხე მონახოს, ისე დაიძალოს, რომ ვერავინ მიაგნოს, მაგრამ ადგილიდან ვერ დაძრულა, მუხლები ვერ მოუხრია. უეცრად შუბლზე გახურებული რკინის ნაცვლად ცივი ლოდი დაადგეს და თვალისჩინი წაართვეს. მას შემდეგ ისე ეშინია ძილის, როგორც სასჯელის. სასიამოვნო და სასიხარულო დიდი ხანია არაფერი მოლანდებია.

ნივთთა სამყარო დუმდა, ადგილიდან არ იძროდა, მაგრამ ჩრდილებმა კარგა ხანია მოინაცვლეს ადგილი. მოგრძო ოთახი იწელებოდა, სინათლეს გაუბოდა, დერეფანს ემსგავსებოდა. მსხვილი ფიცრებისგან შეკრული კარი ისეთ შთაბეჭდილებას ტოვებდა, თითქოს დაჭედილი იყო. რამდენჯერ უვლია ამ კარსა და ყრუ კედელს შორის, რამდენჯერ ჩამომჯდარა მაგიდასთან, ხელში კალამი აუღია და ისევ გადაუგდია. სიტყვასთან, აზრთან, საკუთარ თავთან ამოიჭიდილი აღრეც ბევრჯერ განუცდია, მაგრამ ასე დიდხანს არასოდეს გაგრძელებულა. ამ ბოლო დროს ერთი სიტყვა ვერ დაწერა, წერილი რა არის, მისი დაჯღაბნაც კი ვერ მოახერხა. დაიხშო ის წყარო, რომელიც სიცოცხლით ავსებდა, ამოებზე ამარჯვებინებდა, შეიძლება, ამიტომაც დაჩაგრა ავადმყოფობამ. ბოლო დღეს სხეული დაუმძიმდა. იმ ადგილას, სადაც გრძობა იღებდა სათავეს, უზარმაზარი სიცარიელე წარმოიშვა.

ამგვარი რამ პირველად არ ემართებოდა. ორიოდ წლის წინათ ზუსტად ასევე დაჩლუნგდა, დასევდიანდა, ავადაც კი გახდა, მაგრამ გამოჯანსაღების შემდეგ ულვერ-ბენედიკტის მოზღვავება იგრძნო და შთაბეჭდილებებს გზა გაუხსნა, არარსებულს არსებობა მიანიჭა. რამდენიმე კვირის შემდეგ ცეცხლი ცოტათი შენელდა, მაგრამ ყველაზე მეტად სწორედ მაშინ დასწყდა გული, რომ დღის სინათლეზე მის ქმნილებებს არავინ გამოიტანდა. ერთი სტრიქონი რომ მაინც ენახა დაბეჭდილი, შეიძლება ამ უცხო მხარეში არ გადმოხვეწილიყო. კოლოებისათვის თავი არ გაემეტებინა. მუდამ მოუცლელმა ბევრი ედავა საკუთარ თავსაც და სხვებსაც, ბევრი დრო დახარჯა იმისათვის, რომ შინაგანი თავისუფლება მოეპოვებინა, საკუთარი ჭკუით შეეფასებინა ყველაფერი, მაგრამ მოწოდებისა და მოვალეობის შეთავსებამ დალაღა და ბოლოს სულ მარტო დარჩა. დაბალი ჭერი თავზე აწვება, კედლის მონაკვეთი იბრიცება, შორს დარჩენილი, მოვერცხლილი გუმბათი ჩამავალ მზესავით იღვეა და მთელი მისი ძალღონე ირგვლივ შემომდგარ სამყაროს მიაქვს.

თვალის დახუჭვისა და გახელას ერთ წამზე მეტი არ დასჭირებია, მაგრამ ამ ხნის განმავლობაში სინათლემ იკლო, კედლები განაცრისფერდა, რალაცამ საზრისი დაკარგა. ამალამ მან თვითონ უნდა უთიოს ღამე საკუთარ თავს და ამიტომ თვალის მოხუჭვის, მოდუნების უფლება არა აქვს. აღმა სვლა დამთავრდა, ზღვარი სულიერსა და უსულო საგნებს შორის გაბუნდოვანდა, ნალველი შემსუბუქდა, გაქარწყლდა. შიში და იმედი ერთმანეთის გარეშე არასოდეს არსებულა ამქვეყნად და როცა ქრება ერთი — ქრება მეორეც. მაგრამ ერთი სურვილი ჭერ კიდევ ბოგინობს მის სულში. უნდა დაირღვეს, ნაწილაკე-

ბად დაიშალოს, მთლიანად გაითქვიფოს ქართული საგუროთ  
ნაგები შენობების, რიყის ქვით მოკირწყლული ქუჩების, ია-  
ვარქმნილი ციხეებისა და სასახლეების მოხაზულობაში. შეერ-  
წყას, შეეზარდოს სიონისა და ანჩისხატის ზარების რეკვას,  
ისე გაეხვიოს კოჯრის გრილ ნიაგში, როგორც გამჟვირვალე  
სუდარაში. სამწუხაროდ, სიკვდილს მხოლოდ ერთი სახე აქვს  
და ადამიანი მოკლებულია არჩევანს. სანამ თბილისში იყო,  
სანამ მის ცას შეჰყურებდა, სხვაგან ყოფნა ეწადა, განმარ-  
ტობას ეძებდა, ხან სასაფლაოს აფარებდა თავს, ხან მთაწმინ-  
დას. ბოლოს ესეც არ იკმარა, მობეზრებულ საყვარელივით  
შიატოვა, გაეცალა და ახლა ცხადად გრძნობს, რომ ყველაფ-  
რის თან წაღება არ ხერხდება, ცხოვრების ანარეკლი — ცხოვ-  
რება არაა. კალოუბანი აქედან ისე შორსაა, როგორც დღის  
სინათლე. ერთხელ აჩრდილი ეწვია, წარსული მოაგონა, რა-  
ღაც დაათმობინა, მაგრამ სამაგიერო არაფერი დაუტოვა. ერ-  
თხელ კი ბუნდოვანი კონტურები გამოიკვეთა და პეიზაჟმა  
ხორცი შეისხა. ქუჩაში გადმოკიდებული აივნები მოჩუქურთ-  
მდა, ნათელი ფერებით შეივსო, გამომზეურდა. ზურგშეჭ-  
ცეული სამყარო კიდევ ერთხელ შემობრუნდა მისკენ, სმენა-  
მაამებელი ჩურჩულის აღსაქმელად მოემზადა, თვალი მოლი-  
მარი სახის ელვარებას წაებოტინა. მაგრამ მცირე ხნის შემ-  
დეგ იგი უკვე საბოლოოდ დარწმუნდა, რომ სახლები, ქუჩე-  
ბი, ეკლესიები, აივნები და მახლობელთა სახეები ისე მიე-  
დინებიან და ქრებიან, როგორც წლები. მოგონებათა მთლი-  
ანობა ყოველწლიურად ირღვეოდა, ზოგი რამ ცხადად ვლინ-  
დებოდა, ზოგი კი უამრავ შთაბეჭდილებათა მორეცში  
იძირებოდა, მნიშვნელობას კარგავდა. ხან თვითონ იყო  
სხვისი შემფასებელი და მსაჯული, ხანაც მას აფასებ-




დნენ და ასამართლებდნენ, ხან თვითონ გაურბოდა ყვე-  
 ლას, ხანაც მას გაურბოდნენ, ხან თვითონ აწვალებდა სხვებს,  
 ხანაც მას აწვალებდნენ. იყო ისეთი შემთხვევებიც, როცა  
 თანხმობას ხელს თითქოს არაფერი უშლიდა, მაგრამ შემდეგ  
 იმდენი უთანხმოება, იმდენი უსიამო წვრილმანი წამოყოფდა  
 თავს, რომ არათუ სხვა, საკუთარი თავიც უცხო ეჩვენებოდა.  
 ერთხელ სასტუმრო ოთახში დაიმარტოხელა ის, ვინც ხორც-  
 შესხმულ ანგელოსად მიაჩნდა, ვისი მკერდის რხევა და ყელის  
 მოღერება გონებას აკარგვინებდა, ვინც ყველაზე ნატიფი და  
 ფაქიზი არსება ეგონა. მისი თეთრი, ლამაზი, მოვლილი ხელე-  
 ბი მოთვინიერებულ ფრინველივით ეწყო მაუდგადაკრულ მა-  
 გიდაზე, ცისფერი აბრეშუმის კაბა მოლივით შრიალებდა.  
 საუბარი ყოველგვარი უხერხულობის გარეშე დაიწყო და  
 ძალდაუტანებლად მიმდინარეობდა. შეიძლება ამის მიზეზი  
 ისიც იყო, რომ თავადის ასული ბევრ მამაკაცს ჯობდა ჭკუით  
 და გონებამახვილობით, მაგრამ მასთან საუბარში ამ უპირა-  
 ტესობას კარგავდა და სიამოვნებით ეწაფებოდა წმინდა წყა-  
 როს, იძენდა რაღაც ისეთს, რასაც ვერავისაგან შეიძენდა. სამ-  
 წუხაროდ, იგი მხოლოდ გარეგნულ მოკაზმულობას ხედავდა  
 იმისას, რასაც ღრმა, მტკივნეული, განშტოებული ძირი ჰქონ-  
 და და მუდამ რაღაც ისეთისაკენ ისწრაფოდა, რასაც გარეგ-  
 ნულ მოკაზმულობასთან საერთო არაფერი ჰქონდა. მაგრამ  
 მაშინ ამდენს თვითონაც ვერ ამჩნევდა. ჯერ კიდევ იმედოვნ-  
 ებდა, რომ დაფარულსა და ღრმად დამარხულს ფარდას ახ-  
 დიდა, ამ ამაყ ქალს სულიერი ცხოვრების ტანჯვასა და ნეტა-  
 რებას გააცნობდა, ყოველდღიურ უხამსობას და უაზრობას ჩა-  
 მოაშორებდა. იმ დღეს იმდენ თანაგრძნობას ხედავდა სევდით  
 დაბინდული თვალების ციაგში, ისე ახლო იყო მიზანთან, რომ



ვერც კი შეამჩნია, როგორ შემოვიდა ოთახში მოახლე. „ქალ-  
ბატონო, მკერავი გელოდებათ“. თავადის ასული სწრაფად წა-  
მოდგა, ბოდიში მოიხადა და ისე გავიდა ოთახიდან. მისი  
განხორციელებული ოცნება მოართვეს. შუაზე გაწყვეტილი  
ფრაზა ერთხანს ქვეწარმავალივით იკლავებოდა, შემდეგ  
გაუფრულდა და რომელიღაც ნაოქს ამოეფარა.

ერთი სანთელი რატომღაც უფრო ჩქარა იწოდა, ვიდრე  
შეორე. ჩამონადენი ცვილი გაყინულ წყაროებს ჰგავდა. მის  
შეგნებაში კვლავ იჭრებოდა რაღაც ისეთი, რასაც სინამდვი-  
ლეში ან სხვაგვარი სახე ჰქონდა, ანდა სულ არ არსებობდა.  
სისხლძარღვები იბერებოდა; შხამი ივსებოდა. რომელიღაც  
კუთხეში გაწამებული სიჩუმე კვნესოდა. ზურგზე წოლით  
დაღლილმა გამხდარი, ფრჩხილებწამოზრდილი ხელი სახეზე  
ჩამოისვა. რამდენი ხანია წვერი არ გაუპარსავს, საკუთარი  
სახე არ უძებნია. ერთადერთი, რაც მას ახლა ალბათ ნიღაბი-  
საგან ანსხვავებს — ტანჯვის კვალია. თუმცა რა მნიშვნელობა  
აქვს როგორ გამოიყურება ის, ვინც ზღვარს გადასცდა, ვისაც  
თვალთმაქცობა და სიმართლის დამალვა აღარ სჭირდება.  
ჭეშმარიტ თავისუფლებას ადამიანი მხოლოდ მაშინ იხვევს,  
როცა სიკვდილის პირისპირ დგას, როცა უკან დასახევი გზა  
აღარ აქვს. მანამდე კი ვინ არ გელობება წინ, ვინ არ მოით-  
ხოვს ანგარიშის გაწევას, ვინ არ გახსენებს ყოველ წამს, რომ  
მოვალე ხარ დაიცვა საკუთარი ოჯახის, საკუთარი გვარის  
ღირსება, არ ჩამორჩე სხვებს ფასეულობათა დატაცებაში,  
შეიზღუდო იმისათვის, რომ სხვის მიერ წამხდარი საქმე გა-  
მოასწორო. ერთხანს მედგრად ეწინააღმდეგებოდა გარეგან  
დაწოლას, ცდილობდა ერთსახოვანი დარჩენილიყო, მაგრამ  
როცა სილატაკემ მტკიცედ მოიკიდა ფეხი, როცა ცხოვრე-



ბაზე გული აუცრუვდა, გაორდა, ცასა და მიწას შორის გა-  
მოეკიდა. ღარიბი ოჯახი რომ ათასგვარი უთანხმოებებზე და-  
უკმაყოფილების წყაროა, ეს მან აღრეც იცოდა. მამამ, მარ-  
ეგონა, თუ გაღარიბებული თავადის ოჯახი ჯოჯოხეთისაგან  
არაფრით განსხვავდებოდა. მამის ყვირილი მთელ უბანს ეს-  
მოდა, დედა და დები ტიროდნენ, მოახლეები კარს უკან იმა-  
ლებოდნენ, გაგულისებულმა მამამ არავის დანდობა, არავის  
შეწყალება არ იცოდა, განუხჯელი, თავაშვებული იყო. წარბი  
არ შეუხრია, როცა მის არასრულწლოვან ვაჟს თავზე ეკბეკუ-  
ტორი დაადგა და როზგები აწივლდა. საჭაროდ დასჯამ მის  
სულში აღმოუფხვრელი კვალი დასტოვა. უფრო დიდი დამ-  
ცირება მის შემდეგ აღარ უგრძენია. ბოლო დროს სახლში  
მისვლა ისე ეზარებოდა, როგორც მოხსენებითი ბარათის შედ-  
გენა. შინაურებს კიდევ უფრო ნაკლებად ესმოდათ მისი, ვიდ-  
რე გარეშე აღამიანებს. ცხოვრება მათთვის მხოლოდ ის იყო,  
რასაც ირგვლივ ხედავდნენ, რასაც ისმენდნენ, რასაც ფასს  
ადებდნენ. ხოლო ის, რაც ამ ფარგლებს სცდებოდა, რაც მათ  
არ გაეგებოდათ, უგუნურობად და მანკიერებად მიაჩნდათ.  
მისდამი დამოკიდებულებაში ბევრი რამ ისე იცვლიდა სახეს,  
რომ თავი და ბოლო არ უჩანდა. დანაშაული ლექსის წერა თ  
არ იყო — ლექსს ბევრი მათი ნათესავი და ახლობელი წერ-  
და, — არამედ ის, რომ მისთვის უფრო ღირსეული და სერიო-  
ზული საქმე არ არსებობდა, სხვა ყველაფერი მეორეხარისხო-  
ვანი და უმნიშვნელო ეჩვენებოდა. დროთა განმავლობაში  
უფსკრული კიდევ უფრო გაღრმავდა და იგი იძულებული შეი-  
ქნა მიეტოვებინა დამბლადაცემული მამა, გარეთუბანი, მთა-  
წმინდა და ამ ციებიან მხარეში გადმოხვეწილიყო. ერთხანს  
თავს იტყუებდა, ეგონა, თვითონაც მოისვენებდა და ოჯახსაც

მოასვენებდა, მაგრამ რა აზრი აქვს გაქცევას, როცა შენი თავი ყველგან თან გახლავს.

ნაცნობ სიბრტყეთა ზედაპირზე აღარ სჩანდა ის ორნამენტები, რომელთა მოხაზულობას თვალი შეაჩვია. მათი ადგილი იღუმალმა, მისდამი მტრულად განწყობილმა ნიშნებმა დაიკავა. სიცარიელე უამრავ ნაფლეთს, ნაგლეჯს, ნამეხარს ირეკლავდა, უხეიროდ აკოწიწებდა, გამოცდილებით შეძენილსა და ნაოცნებარს ერთმანეთში ურევდა. ღამე იმუქრებოდა, ისე მწყრალად იმზირებოდა ვიწრო ნაპრალიდან, თითქოს ქვეყნის დასაქცევად იყო მოვლინებული. სუნთქვა ჭირდა, ფილტვები ველარ იტევდნენ დაგროვილ შხამს. სიკვდილის მოახლოება მან ბევრად უფრო ადრე იგრძნო, ვიდრე აღსასრულის დადგომა. იგრძნო, ჯერ კიდევ მაშინ, როცა ფეხზე დადიოდა. ამ რამდენიმე კვირის წინათ მის სხეულში უცხო, უხილავი, შემუხსვრელი ძალა ჩასახლდა და თავის საზარელ საქმეს შეუდგა. ტკივილი ადგილს ინაცვლებდა, ფერდიდან თავში აბობლდებოდა, დაბლაგვდებოდა, საფეთქლების გამომტვრევას ცდილობდა, შემდეგ ღვიძლს მონახავდა და მთელი ღამე ალესილი დანასავით ტრიალებდა. ეჭიმების მას არც მანამდე სწამდა, მაგრამ როცა ახლოს გაიციწო ის, ვინც ამ ქვეყნად არავის ებუება, როცა საკუთარი არსებობის ხარჯზე შეისწავლა მისი მზაკვრული ხასიათი, მიხვდა, რომ უკან ვეღარ დაახევინებდა. ამიტომაც არ დაუწყია ეჭიმებთან სარბილი, არ გაქცეულა თბილისში, არავისთვის უთხოვია შველა და შემწყობა. იმ დღიდან არა მარტო საკუთარი თვალებით უყურებდა სამყაროს, არამედ მის თვალებითაც. შეიძლება ეს ხანგრძლივი ლოდინი მოქმედებდა მის განწყობილებაზე უარყოფითად, შეიძლება ქვეშეცნეული წინათგრძნობა იყო იმის მიზე-



ზი, რომ თავისი დროის ტკივილი იტვირთა. ახლა, როცა ყვე-  
ლაფერი დასასრულს უახლოვდება, იგი სულ უფრო მეტ  
ტად რწმუნდება, რომ სხვაგვარად ცხოვრება ატეხილულია, რა  
მდგომარეობისათვისაც არ უნდა მიეღწია, სიმწვიდესა და კმა-  
ყოფილებას მაინც ვერ ჰპოვებდა, საკუთარ თავს თვითონვე  
გატანჯავდა. მისი დანიშნულება ბოძება იყო და არა ხვეჭა.  
ყველაფერი უნდა დაერიგებინა, მიეცა იმ ცხოვრებისათვის,  
რომელშიც წილი არ ედო. მისი სული პირად მარცხს, სილა-  
რიბეს და სიყვარულში ხელის მოცარვას არ დაუმიძიებია,  
მჭიმე ტვირთად მთელი ერის, მთელი კაცობრიობის ცხოვრე-  
ბა დააწვა.

მერყევი შუქი სიჩუმესა და სიცარიელეს ალაქიანებდა,  
კუთხეში მდგარ სკივრს გაქვავებულ ცხოველს ამსგავსებდა.  
უეცრად საიდანღაც სქელი ნისლი დაიძრა, მთელ ოთახს მოე-  
დო და ყველაფერი შთანთქა. იგი არ დაბრმავებულა, მაგრამ  
ველარაფერს ხედავდა. სიცივე ფეხის ტერფებიდან თანდათან  
მალა იწვედა, კრისტალდებოდა, მუხლებს სალტესავით  
ერთყმოდა. მწუხარება იცრიცებოდა, ნისლში იძირებოდა.  
ახლა უკვე აღარც იმის შეგრძნება აწუხებდა, რომ დაუბანე-  
ლი იყო. თბილისის აბანოებს მხოლოდ მაშინ აფასებდა, როცა  
სხვაგან იყო გადახვეწილი. რამდენჯერ უჭეიფია ზეწარმოხუ-  
რულს ამხანაგებთან ერთად. თაღს ქვეშ, რამდენჯერ წარმოუ-  
თქვამს სადღევრძელოები. მექისეს ჩაციებული ღვინო, ახალ-  
დაკრეფილი მწვანელი და შიშხინა მწვადები მოჰქონდა. მე-  
დუდუკეები გუმანით გრძნობდნენ, სად იყო მათი ადგილი. სა-  
ხელდახელოდ გაშლილ სუფრას შნო და ლაზათი ემატებოდა.  
იწყებოდა ჯიბრი, მამაპაპური ქეიფი. თასები ხელიდან ხელში  
გადადიოდა, აგუგუნებული სიმღერა თაღს აწვებოდა, ამქვე-

ყნიური ჭირ-ვარამი აღარავის ახსოვდა. იქმნებოდა სხვაგვარე  
 გარემო, სხვაგვარი განწყობილება, შიგნით რაღაც ლღვებოდა  
 და იგი თავდაუზოგავად ეტანებოდა ცხოვრებას, ედგინებოდა  
 სვამდა. მაგრამ მეორე დღეს ისეთი გრძნობა ჰქონდა, თითქმის  
 დანაშაული ჩაიდინა, ყრუ კედელს შუბლით შეასკდა და არა  
 იმიტომ, რომ მხიარულობა და გართობა სძულდა, არამედ  
 იმის გამო, რომ არ უყვარდა რაღაც ისეთის ძიება, რაც სინამ-  
 დვილეს აბუნდოვანებს, ადამიანს მორჩილსა და მამებელს  
 ხდის. სიბრძნისა და სიბრყვის საზომი გამარჯვება და დამარ-  
 ცხება კი არაა, არამედ ის, თუ რას ირჩევს ადამიანი, რას ემა-  
 ლება და რას ეძალება. სანამ გულის რევას ებრძოდა, სანამ  
 საკუთარ თავს არარაობად თვლიდა, უსახლკარო გადამთი-  
 ელივით დახეტილობდა ვიწრო ქუჩებში და ყურადღება გა-  
 რეშე საგნებზე გადაჰქონდა. ქალაქი ყოველთვის იზრდე-  
 ბოდა, რაღაც ახალს იძენდა, მაგრამ მაინც ჭრელი და არასი-  
 მეტრიული ჩანდა, რაც განუმეორებელ თავისებურებას ანი-  
 ქებდა. ერთმანეთზე შეკოწიწებულ, ბანიან სახლებს რომელი-  
 მე სომეხი ან აღმოსავლელი ვაჭრის კარ-მიდამო ცვლიდა,  
 აღმოსავლურ კარ-მიდამოს ქართული აივნისანი სახლები, აივ-  
 ნიან სახლებს ევროპული ნაგებობები. მოქალაქეებიც ასევე  
 ჭრელად იყვნენ მორთულნი. ერთმანეთში ირეოდა ჩოხა,  
 სერთუკი, მუნღირი, ანაფორა, ხალათი, ქართული კაბა, „ხა-  
 ბარდა“, ნაირფეროვანი აღმოსავლური მორთულობა, ევრო-  
 პული ქუდები, ჩიხტიკოპები და ჩაღრები. მიდიოდა რაღაც  
 ძველი და მოდიოდა ახალი. ირღვეოდა დრომოკმული ტრადი-  
 ციები, ზნე-ჩვეულებანი, აზიას ევროპა ცვლიდა და ყოველი  
 ნათელი შტრიხი მის მიერ განჭვრეტილ მომავალს ამართლებ-  
 და. მიუხედავად ამისა, თვალი მაინც შორს იმზირებოდა, ცის

კიდურს ეტანებოდა, სივიწროვესა და აღრეულობას გაურბო-  
და. ღია ფანჯრების მიწებზე ჩამავალი შვის სხივები თამაშობ-  
დნენ, მაგრამ იგი სიხარულის საქებნელად არ გამოფულა ქუჩ-  
ჩაში. წუხელი საკუთარი თავი დაკარგა და მანამდე ვერ მოთქ-  
სვენებდა, ვერ გაექცეოდა მარტოობას, სანამ ხელახლა არ  
იპოვიდა, საზოგადოებაში ყოველთვის იმდენი სახე ჰქონდა,  
რამდენიც სურდა, მაგრამ საკუთარ თავთან თამაში არ უყვარ-  
და, სიცრუით ტვირთის შემსუბუქება უნაყოფო შრომად  
მიაჩნდა. გამკვირვებელ სევდას სიცილი და არმიყობა ვერ  
არბილებდა, მოქნილი სხეული და ბრჭყვიალა ნივთები ამქვე-  
ყნიურ სიამოვნებათა მონად ვერ ხდიდა. რამდენჯერ წაჩხუბე-  
ბია ამის გამო ის, ვინც თითქმის ყოველ საღამოს ელოდებო-  
და, ვისთვისაც წარმავალობა და უშიშვზოდ მოწყენა არ არსე-  
ბობდა. მისი ახალგაზრდა, ოდნავ არასიმეტრიული, ცხოვრე-  
ბის ავ-კარგიანობაში ცოტათი გამოცდილი სახე მხოლოდ მა-  
შინ იღრუბლებოდა, როცა იგი რამდენიმე დღე არ გამოჩნდე-  
ბოდა. ერთხანს ბავშვივით იბუტებოდა, თავი ისე ეჭირა, თით-  
ქოს დაივიწყა, გადაიყვარა, მაგრამ საკმარისი იყო ხელი მოე-  
ხვია, მოფერებოდა, თვალი გაესწორებინა და ყველაფერი თა-  
ვიდან იწყებოდა. მყუდრო, სუფთა, მარტოხელა ქალის სურ-  
ნელებით გაელენთილი ოთახი ისე აღელვებდა, რომ სხვაგან  
წასვლა, სხვა რამეზე ფიქრი არ უნდოდა. აქ მას არც საკუთარ-  
ი თავის დათმობას თხოვდნენ, არც მომავლის იმედით ვა-  
ლის აღებას და არც გრძნობათა დაოკებას. ტრადიციული პი-  
რობითობის საპყრობილედან გამოქცეული დილაამდე უსხლ-  
ტებოდა ხელიდან საკუთარ თავს, უკიდურესად იძაბებოდა,  
ცარიელდებოდა და ისევ იძაბებოდა. მაგრამ დილით ისე გა-  
მოდიოდა ქუჩაში, თითქოს ვიღაცას თუ რაღაცას უღალატა,

ამოდ დაიქანცა, საკუთარ ანკეს წამოეგო. შინ დაბრუნებულ-  
ლი მამის ბუზლუნს ყურადღებას არ აქცევდა, წვერს უხალი-  
სოდ იბარსავდა და სამსახურში მიდიოდა. ქალაქის ქუჩაში  
შრიალი ისე მოქმედებდა მასზე, როგორც ცივი წყალი მთვარე  
რეულზე.

საფეთქლის მახლობლად რომელიღაც ძარღვი გაწყდა,  
დაიკლაკნა და სანამ დამშვიდდებოდა, ჩაქუჩივით ცემდა.  
კენესა ყრუ გამოძახილს უფრო ჰგავდა, ვიდრე მისივე ყელი-  
დან ამოსულ ბგერათა შედედებულ კოშტს. საბედნიეროდ,  
ტკივილმა ჯერჯერობით ტვინის მხოლოდ მცირე ნაწილი დაი-  
საკუთრა. უღალატეს კუნთებმა, სახსრებმა, ნაკვთებმა და არა  
გონებამ. ფეხები მოსწყდა, ხელები დაუმძიმდა, ენა აღარ  
ემორჩილება. ახლა რომ ესტუმროს კიდევ ვინმე, უეცრად  
რომ დაადგეს თავზე, მაინც ვერაფერს ეტყვის. თუმცა რა უნ-  
და უთხრას გარედან მოსულს იმან, ვინც მოშხამული და სა-  
სიკვდილოდ გადადებულა. ერთადერთი, რის თავიც ჯერ  
კიდევ აქვს, საკუთარი ტკივილისათვის ყურის გდებაა. ჯერ  
არც-ერთი ცვლილება, არც-ერთი კუნთის მოღუწება არ გამოჩ-  
ენია მხედველობიდან. დაღლილი, დაფლეთილი ნებისყოფა  
უზარმაზარ ძალას ეღობება წინ და ყოველი კვანძის, ყოველი  
უჯრედისათვის იბრძვის. სწრაფად აკოწიწებს მორღვეულ  
ტიხრებს, ელასტიურობას უბრუნებს გახევებულ სისხლძარ-  
ღებს. მაგრამ ყველგან მაინც ვერ ასწრებს. ერთხანს არაფე-  
რი ესმოდა, ყურები ამოეგლისა, მაგრამ მცირე ხნის შემდეგ  
ისე გაუმახვილდა სმენა, რომ თვალით უხილავი მწერის ზუ-  
ზუნიც კი გაიგონა. მოდის გუნდებად დაწყობილი, რუხი და  
მოლისფერი ლაშქარი. მათი რიცხვი მილიარდია, მაღა დაუ-  
ცხრომელი, სისასტიკე განუზომელი. ცა იღრუბლება. მზის



სხივები ვერ ატანს სქელ მასაში. ყოველი მხრიდან ისმის გაბმული ზუზუნი, ერთი გრძელი, ამაზრზენი ბგერა, რომელსაც ვერაფერი ახშობს. ჯერ ერთი გუნდი ეშვება დაბლა, ერთხანს საწოლის ირგვლივ ტრიალებს და შემდეგ გამეტეებით ესმის თავს. სიკვდილმისჯილივით გაფითრებული ცხადად გრძობს, როგორ იჭრება მის სხეულში ათასობით ნესტარი, როგორ თხელდება სისხლი, როგორ ივსება სხეული შხამით. გუნდს გუნდი მოსდევს, მშიერი გამძლარს დევნის, ასხდებიან ქუთუთოებზე, ტუჩებზე, ნესტოებზე, სვრიან, ბილწავენ, ალაქიანებენ, ხშირ წვერში გზას იკვლევენ და ხორცამდე ატანენ. გაბმული ზუზუნი აყრუებს, სხეული იზრდება, იბერება, დაგროვილი შხამი ისე აწვება შიგნიდან თვალებს, თითქოს სადაცაა უბეებიდან გადმოყრის, აჩრდილებს ფეხით გაათელინებს. იქნებ გადმოყარა კიდევ. რამდენიმე წამია ველარაფერს ხედავს, დაბრმავდა, ქვეყანას რუხი ფერის სუღარა გადაეფარა.

მძიმე კარის კრიალი ისე მოესმა, თითქოს მახლობლად რალაც გატყდა. გონს მოსულმა ჰაერი ხარბად შეისუნთქა და თვალები გაახილა. სანთლები განახევრებულიყო, ჩამონადენი ცვილის ლოლუები გასქელებულიყო, კართან ატუზული სილუეტი მყარ საგნებს შეზრდოდა. ახალგახელილ თვალებს უჭირდათ აცახცახებულ ზოლების დალაგება, აჩრდილის ვინაობის დადგენა. მხოლოდ მოგვიანებით მიხვდა იგი, რომ კართან ატუზული სილუეტი ცოცხალი არსებია, ერთადერთი ცოცხალი არსება, რომელმაც იცის, რომ მისი მაღალკეთილშობილება დილამდე ვერ მიატანს. მაგრამ იქნებ ამჯერადაც ცდებია, იქნებ სწორედ ის ესტუმრა, ვინც სხვას გაჰყვა, ვინც დედოფლობის ღირსი იყო და გადედოფლდა კიდევ. ასეთი თეორი, ბაფთიანი კაბა მხოლოდ ერთ საღამოს ეცვა, სწორედ იმ

სალამოს, როცა მისი დანიშვნა გამოაცხადეს. სავსე ლოყები  
ოდნავ შეუფაკლდა, თვალეზე ჩრდილმა გადაურბინა, ბრი-  
ლიანტის საყურემ ქალების შუქი აირეკლა. სხეებესაფვის იგი  
ახალგაზრდა, ლამაზი, მდიდარი ქალი იყო, მისთვის კი სიყვა-  
რულ-ისათვის გაჩენილი არსება. მიუხედავად ამისა, სიყვა-  
რულზე და მომავალზე მათ შორის ერთი სიტყვაც არ თქმუ-  
ლა. თავადის ასულს სასახლეები, დიდება და ძალაუფლება  
იტაცებდა, მის სულში კი პროტესტი, განუკურნებელი ტკიფ-  
ლი და ამქვეყნიური სიამოვნებისადმი უნდობლობა სუფევდა.  
გუმანით გრძნობდა, რომ შეუძლებელია იმის დასაკუთრება,  
რაც ყოფას ეკუთვნის, რაც შენგან ყოველთვის დაშორებუ-  
ლია. თუმცა იყო ისეთი შემთხვევებიც, როცა ქალი მის  
გვერდით უკეთ გრძნობდა თავს, ვიდრე წარჩინებულ, ფიზი-  
კურად შემკულ, ბრწყინვალე კავალრებს შორის. მაგრამ ეს  
არაფერს არ ნიშნავდა, არაფერს არ ცვლიდა. საკუთარი თავის  
გარდა მას არაფერი გააჩნდა ისეთი, რომ თავადის ასუ-  
ლის ყურადღება მიექცია, მისი პატივმოყვარეობა დაეკმაყო-  
ფილებინა. რა უნდა მიეცა კოჭლ, გაღარიბებულ, მოხელედ  
გამწესებულ პოეტს იმისათვის, ვისაც საქართველო ეპატარა-  
ვებოდა, ვისაც ქართველ ქალებს შორის ტოლი არ ეგულებო-  
და. სად წაეყვანა, სად მიეჩინა ბინა? მამისეულ სახლში, ნახ-  
პევანში, განჯაში? რა ტკბილად დაეძინებოდა კოლოების ზუ-  
ზუნში და თავგების წრიბინში. ბოდვა, ბოდვა და ზმანება იყო  
ყველაფერი, რასაც ეჭიდებოდა, რასაც მალულად ელოლია-  
ვებოდა. როგორც არ უნდა გამოედო თავი, რა იმედებითაც  
არ უნდა აღვსილიყო, ყველაფერი მაინც ისე დამთავრდა, რო-  
გორც თავდება.

თუ გზაში არ იყო, ამ დროს ყოველთვის ლოგინში იწვა,

გვერდს იცვლიდა და ძილი ღვთის წყალობად მიიჩნდა. მაგრამ ახლა ძილი არ არსებობდა, არაფერი აღარ არსებობდა, ვარდა ბურუსით მოცული სამყაროსი, რომელიც თანდათან ილუოდა, ზელიდან უსხლტებოდა, დამნაშავესავით მიიზარებოდა: ურთ ღროს მასაც აწუხებდა ამგვარი გრძნობა. საკუთარი თავისად-მი უკმაყოფილება აღიზიანებდა, ისე აფორიაქებდა, რომ ვერც სახლში პოულობდა ადგილს და ვერც გარეთ. მერყეობა აღუწებდა, ერთი უკიდურესობიდან მეორისაკენ ღვენიდა, მაგრამ დადებითი პასუხი ყოველთვის იმდენივე იყო, რამდენიც უარყოფითი და ამის გამო დიდი ვაივაგლახით შეკოწიწებული ხუხულა ინგრეოდა, ღორღად ზვავდებოდა. მისთვის აუცილებელი შეიქნა ნილაბის აფარება, სახიობობა, რადგან ცხოვრება ყოველწლიურად არწმუნებდა, რომ სხვაგვარად არსებობა შეუძლებელია, მახლობლებისა და საზოგადოების შეურაცხყოფელია. თუმცა სხვებს ეს ხელს არ უშლიდა ეცხოვრათ და ეხარათ ოცნების ხარჯზე. ღია ფანჯრები საბურველივით იწოდნენ ჰაერში გაფანტულ ოცნებებს და ამ ღროს მას უადრესად დიდი სურვილი ჰქონდა სხვის სულში გადასახლებულიყო, სხვისი თვალებით ეცქირა ქვეყნისათვის. შეიძლება მაშინ მასაც მოეკიდა ფეხი მიწაზე. დაემშვიდებია სინდისი შემთხვევიდან შემთხვევამდე. ასეთ წუთებში ნათელი შუქი მკაცრ ხაზებს არბილებდა, სევდა იფანტებოდა, პორიზონტი ფართოვდებოდა, სადღაც რაღაც მკვრივდებოდა, მაგრამ რასაც კი მოეჭიდებოდა, ყველაფერი ისე აღნებოდა ხელში, როგორც ამაღამდელი ღამე. უძრავი, მძიმე, მხუთავი ღამე, რომელსაც ვერაფერს წაართმევ. ყოველი ჩრდილი მისი განუყრელი ნაწილია, ყოველი აჩრდილი მისი მოციქული.

სინათლე მძაფრად შექანდა. კუთხიდან ისე წამოიწია სიბ-

ნელემ, როგორც ბანალგაბურძენილმა ძაღლმა. ჰერა შეტორ-  
ტმანდა, საწოლისაკენ დაქანდა. ახლა მას არაფრის შეჩერება,  
არაფრის გასწორება აღარ შეეძლო. ძალა მხოლოდ იმისთვის  
ჭირდებოდა, რომ თავი გვერდზე არ გადავარდნობდა. ყველა  
არსება გაქრა, ლანდად იქცა, მხოლოდ ერთადერთმა ქალმა,  
მისმა მოსამსახურემ შეინარჩუნა ხორცი და თავის ნებაზე მო-  
ძრაობის უნარი. ერთხანს მაგიდასთან ფუსფუსებდა, სანთ-  
ლებს ასწორებდა, შემდეგ ჭიქაში რაღაც დაასხა და მისკენ  
წამოვიდა. უნდოდა კიდევ ერთხელ დაეხედა მომაკვდავისა-  
თვის, რითიმე მაინც შეემსუბუქებინა მისი ტანჯვა. უეცრად  
გულზე რაღაც დააწვა, სუნთქვა შეუქრა, ცეცხლივით მოედო.  
აუტანელი სიმხურვალე ტვინისაკენ მიიწეკდა და გზადაგზა  
ყველაფერს ანგრევდა. გამწარებული ორივე ხელით სიცარიე-  
ლეს ჩაეჭიდა, საწოლიდან წამოიწია და ყველაფერი, რაც ზედ  
ეხურა, ძირს გადმოყარა. აღარ უნდოდა ლოგინში წოლა, გაუ-  
თავებელი ლოდინი, სასტიკი, უაზრო თამაში იმასთან, ვინც  
მის სხეულს არღვევდა. ერთხელ გაბრძოლება ჯერ კიდევ  
შეუძლია, შეუძლია ფეხზე წამოდგეს და ისე შეეგებოს სისხ-  
ლისმსმელ მტარვალს, რომელსაც იმის თავიც კი არა აქვს,  
რომ გაუჭიანურებლად მოუღოს ბოლო. ცალი ფეხი უკვე ჩა-  
მოშვებული ჰქონდა, საწოლიდან, როცა წინ უზარმაზარი  
აჩრდილი აეფარა და ღონიერი ხელები მხრებზე მოხვია. მათი  
ბრძოლა სასტიკი და ხანმოკლე აღმოჩნდა. ერთხელ თითქოს  
სძლია კიდევ, მოიშორა თავიდან, მაგრამ ამ ერთ წამს იმდენ-  
ი ძალღონე შეაღია, რომ ხელები მოსწყდა, ხერხემალე გაუ-  
მრუდდა. სუნთქვაშეკრულმა თავი უკან გადააგდო, ბალიშზე  
დაეცა და სხვის ნებას მიენდო. ამ დროს დამსკდარ, გამშრალ  
ტუჩებს რაღაც ცივი შეეხო. ღიად დარჩენილი პირი კიდევ

უფრო ფართოდ გააღო და გრილი ჭურჭლიდან მცირეოდენი სითხე მოწრუბა. ღვინის გემო ესიამოვნა, ისეთი გოძნობა ჰქონდა, თითქოს უკანასკნელი სურვილი შეუსრულეს. «Батюшку, Батюшку надо позвать», მოესმა ამ დროს ნაცნობი ხმით წარმოთქმული სიტყვები და ბუნდოვნად დაინახა კარისაკენ მიმავალი სილუეტი. დიდხანს, დიდხანს აცილებდა კარისაკენ მიმავალ ბნელს და როცა მრუმე მასა მთლიანად გაიცრია, მან კვლავ დაისაკუთრა ორი ნათელი სვეტი და მრგვალი მაგიდის კიდე.

შორიდან ძაღლების ყეფა მოისმა. ყეფდნენ ბანჯგელიანი, ყურებდაჭრილი ძაღლები, რომელთაც სიბნელე და უამინდობა ისევე აღიზიანებდათ, როგორც სოფელში უცხო კაცის გამოჩენა. ღამე იწელებოდა, სიჩუმე ყოველ ჩქამს, ყოველ ბგერას ეხმაურებოდა. აზრი ხან მთლიანად იპყრობდა გონებას, ხანაც შრეებს ქვეშ იმალებოდა. უკან მოხედვამ, რაღაც ისეთის ძიებამ, რაც ადრე მხედველობიდან გამოჩნა — საშინლად დაღალა. მეხსიერებაში დაუზიანებელი აღარაფერი დარჩა. ყველაფერი, რაც ადრე სამყაროს დასტყუა, რაც პირად საკუთრებად მიაჩნდა, ახლა უმოწყალოდ ეცლგბოდა ხელიდან და კვლავ მშრალზე რჩებოდა, თეთრი ლაქების მეტს ვერაფერს ხედავდა. ყელიდან მღვრიე ბგერები ამოსდიოდა, გახშირებული სუნთქვა ცხადყოფდა, რომ დადგა ძრწოლისა და ვაივაგლახის ქამი. ირგვლივ რომ ღამე არ ყოფილიყო, თავი ალბათ გვერდზე ექნებოდა გადაგდებული, მაგრამ არ უნდოდა ისე წასულიყო ამ ქვეყნიდან, რომ დღის სინათლე არ ეხილა, თვალი არ გაესწორებია იმისათვის, ვისიც არაფერი ემართა, ვინც არ აცალა ქალღმერთზე გადმოედვარა დაოკებული რისხვას და ვნებათღელვა. უწინ აჩრდილივით ყველგან თან

სდევდა, ლხინშიც და ჭირშიც მის ზურგს უკან იდგა, ახლი კი  
დრო უშოვა და ისე დაიშორებოდა, როგორც ეს ნაცადმა  
მკვლელმა იცის. განთიადზე რაც უნდა ის უქნას, მაგრამ სხვა  
ნამ ბნელი საბურველს არ მოიშორებს, სანამ ცოტათი არ შე-  
ფერადდება — სიცოცხლეს არ დათმობს, ყურს არ მოაჭრე-  
ვინებს.

თვალეებს სიმრუდე დაეტყო, უჩვეულოდ გაფართოებულ-  
ნი მძიმედ მოძრაობდნენ დაწითლებულ ქუთუთოებს შორის.  
ლოგინი გამაგრდა, გახეშეშდა, კენჭებითა და ეკლებით აივსო.  
საბანი ისე დამძიმდა, თითქოს შიგ მატყლის მაგივრად რიყის  
ქვები ეყარა. სიცარიელე მას თითქმის ყველგან თან დაჰქონ-  
და, მაგრამ არასოდეს უცდია შეევესო იგი მისტიციზმით,  
სხვისთვის გადაელოცა ტვირთი. ამის სურვილი არც ახლა  
ჰქონდა და თუ სცოდავდა, სცოდავდა შეგნებულად. არსე-  
ბობს, არსებობს — ეს საკითხი არც ისე უმნიშვნელო იყო,  
რომ ბრმად ეწამა. შეცდომა მთლიანად ცვლიდა ყოფიერების  
არსს. ამიტომ ამჯობინა ბრმა რწმენას ურწმუნობა. იცავდა  
არა იმას, რასაც ვარაუდი ებღაუჭებოდა, არამედ იმას, რაც  
გულს ხვდებოდა, რაც მის ხალხს სისხლის ფასად დაუჯდა.  
განზე გადგომა სიკვდილს უდრიდა, ხსნა მხოლოდ უვალ გზა-  
ზე ფეხის შედგმას შეეძლო. საჭირო იყო მხოლოდ აქეთ, ამ  
მიმართულებით სიარული... წვერი ადრეც მოუშვა, ერთ  
დროს ატარებდა კიდევ, მაგრამ ასე არასოდეს შეწუხებულა.  
ვინ უშვებს ამდენ ნისლს ოთახში, ვინ აკავებს ჰაერს, ვინ  
უჭერს ყელში ხელს? რაღაც უნდა გაუჩინარდეს, ამოიშა-  
ლოს, ამოირეცხოს შეგნებიდან, თორემ ყოველი კედელი, ყო-  
ველი სიბრტყე, ყოველი უაზრობა აღსდგება, წამოიქცევა და  
არა მარტო აჩრდილებს მოიტანიებს ქვეშ, არამედ მის უხეშ  
საწოლსაც.

მან ვერც კი შეამჩნია, როგორ შემოვიდა ოთახში მღვდელი მოსამსახურე ქალის თანხლებით. ცნობიერება ახლა ისე ხშირად ეთიშებოდა, რომ გონს მოსვლა ნაპერწკლის უსუსურ ბეჭუტვას ჰგავდა. ბურუსიდან ჯერ თხელი, მოწითალო წვერი გამოცოცდა, შემდეგ კი გამზდარი, უფერული სახის ნაკეთები. ეკლესიის ეს ნამარხულევი, მორჩილი მსახური ისევე მოძულეებული იყო, როგორც მისი მრევლი. სხვებისაგან მხოლოდ გახუნებული ანაფორით და ჩამჭრალი, ღრმადჩამჯდარი თვალებით გამოირჩეოდა. დადიოდა მოკლე, შებორკილი ნაბიჯებით. თუკი ვინმეს ამქვეყნად ღმერთი სჭირდებოდა, უბირველეს ყოვლისა — თვით მოძღვარს. იგი მხოლოდ ერთხელ დაესწრო წირვას სახელდახელოდ ამენებულ, ბნელ ეკლესიაში, რომელიც ადგილობრივ გარნიზონს ემსახურებოდა და მაშინვე მიხვდა, რომ ამ ჩია ღვთის მსახურს აქედან აღარსად გადაიყვანდნენ, მისი საფლავი მისივე ეკლესიის ეზოში გაითხრებოდა. იმ საღამოს მხოლოდ ერთი რამ ვერ გაითვალისწინა. არ ეგონა მისი საზიარებელი თუ გახდებოდა... თუმცა რისთვის ირჯებოდა ამ თავსხმაში. მას უზიარებლადაც შეეძლო მიეტოვებინა ეს ქვეყანა. ახლა არავის გამოსარჩლება, არავის შემწეობა არ სჭირდებოდა. სიხარული, მწუხარება, იმედი და უიმედობა სადღაც უკან დარჩა, წინ კი მხოლოდ უკუნია, კედლებს შორის გამოკეტილ სიცარიელეში გამეფებული უკუნი, რომლის გაფანტვა აღარავის შეუძლია. ამ ცოტა ხნის წინათ სქელი ფარდის ცალ კუთხეში თვალმა ჰუჭურუტანა იპოვა და მიღმა დარჩენილ ცხოვრებას გახედა. ეგონა ქალაქის ვიწრო ქუჩებს, აყვავებულ ბაღებს და მტკვრის ხეობას დაინახავდა, მაგრამ ფასადმორღვეული სახლისა და კავკასიის უმაღლესი სასამართლოს კანცელარიის მეტი ვერაფე-

რი აღმოაჩინა. წვერმოშვებული, სერთუკებში გამოწყობილი მოხელეები მტვრიან ჰაერს ისუნთქავენ, კალმებს აწრიბინებენ და მას ისე უყურებენ, როგორც ბოროტმოქმედს. ერთხანს ვერ მიხვდა, რას ერჩოდნენ, რას აბრალებდნენ, დაგვიანება არც ისეთი დიდი დანაშაული იყო, რომ ამის გამო მთელი პალატა განსდგომოდა. დაღლილი, გაფითრებული მაგიდებს შორის დახეტილობდა, აზრის მოკრებას ცდილობდა და უეცრად მოაგონდა, რომ რალაცის გაკეთება დაავიწყდა, დაავიწყდა უაღრესად მნიშვნელოვანი ქალაქის შედგენა, რომელზედაც რამდენიმე უდანაშაულო ადამიანის სიცოცხლეა დამოკიდებული. მისი დაუდევრობა მხოლოდ მაშინ გამომქლავნდა, როცა განაჩენის სისრულეში მოყვანამდე მხოლოდ რამდენიმე წუთიღა დარჩა. ქალაქი უნდა დაიწეროს სწრაფად, ერთი ამოსუნთქვით და ამავე დროს ისე, რომ წყალი არ გაუვიდეს, ვერსად ვერ დააკავონ. კურიერი მოსაცდელში ზის და იცდის. ქალაქი ხელიდან ხელში გადავა, ცოტათი დაისვრება, დაიკუმუჭნება და ბოლოს მიაღწევს იმ ინსტანციამდე, სადაც ადამიანის ყოფნა-არყოფნის საკითხს წყვეტენ. ახლა ყველაფერი მის უნარზე, მის გამჭრიახობაზეა დამოკიდებული. შეიძლება ჯალათი უკვე ემზადება, ხელთათმანებსა და წითელ ბალახონს იცვამს. სხვა დროს ამგვარი დაუდევრობისათვის სამსახურიდან დაითხოვდნენ, ახლა კი მოთმინებით ელოდებიან, როდის შეუდგება წერას, როდის დაიდებს ქალაქს წინ. დაუდევრობა სხვებსაც გამოუჩენიათ, მაგრამ ამის გამო ისინი არავის დაუყენებია საკუთარ სინდისსა და სახრჩობელას შორის. ქალაქი თეთრი, ზომიერ დაჭრილი და გატყეცილია, კალამი — სავანგებოდ შერჩეული, მსუბუქი, მახვილი, მელანი — შავი, მკვეთრი, გაუზავებელი. წინადადება



წინადადებას ერწყმის, ყოველი ფაქტი, ყოველი არგუმენტი თანმიმდევრულად ლაგდება, დამაჯერებლობას იძენს, ერთმანეთს ავსებს. უზომო გარჯისა და დაძაბულობისაგან ურვი ოფლი ასხამს, სუნთქვა ეკვრის, ფეხები უშეშდება. კიდევ ოამდენიმე წინადადება და ქალაქი კანონად იქცევა, ჯალათის ხელს შეაჩერებს. დარჩა მხოლოდ ორიოდ ფრაზა, ერთი უკვე ჩამოყალიბდა, გამოიყვეთა, დასრულდა, ახლა მეორე, და მოიცოლებს თავიდან მძიმე პასუხისმგებლობას, აღარავის დააჩავგრინებს თავს. მხოლოდ ერთი სიტყვაა შესაცვლელი, სხვებთან შედარებით როგორღაც წინაა გამოჩრილი. და სანამ იგი შესაფერის სიტყვას ეძებდა, ქალაქს ზემოდან უხილავმა ტალღამ გადაუარა და ყველაფერი წაშალა, გადარეცხა. თანამშრომლებმა ერთმანეთს რაღაც ანიშნეს, მხრები ჯინჯილებიანი ეპოლეტებით დაიმშვენეს, დამცინავად აქირქილდნენ. ფანჯარას ბნელი მოაღგა, სადღაც მწუხრის ზარებმა დარეკეს, ილინსკიმ ოთახში სანთლები შემოიტანა. ახლა მას არაფრის გამორკვევის, არავისთან ანგარიშის გასწორების თავი არ აქვს. რაღაც არ უნდა დაუჯდეს, უნდა იხსნას განწირულნი, რადგან ამგვარი ბრალდებისაგან არავინაა დაზღვეული. კიდევ ნახევარი გვერდი, ერთი მესამედი, უკანასკნელი ფრაზა და შეუძლიათ იხმონ კურიერი, ჩააბარონ ხელმოწერილი ქალაქი. ღონემიხდილმა კალამი გვერდზე გადასდო, წელში გასწორდა, ქალაქს სილა მოაყარა, მაგრამ სილამ ისე შეიწოვა მელანი, რომ ქალაქზე ერთი ასოც არ დარჩა. ქვეყანა გაფითრდა, გამხმარ ხესავით გაშიშვლდა და მან ნათელმხილველივით ამოიკითხა თანამშრომელთა მზერაში, რომ ერთ-ერთი იმათგანი, ვისაც სასჯელი ელის, თვითონაა.

ყნოსვა თითქოს დახშული ჰქონდა, მაგრამ როცა მღვდ-

ლი საწოლს მიუახლოვდა, მან ცხადად იგრძნო სუელი ტან-  
საცმლის სუნი. მალე მისი ბუტბუტიც გაიგონა. ბრტყელი სახე  
ისე ირყეოდა ბნელში, როგორც დიდი, მღვრიე ლაქა. პირვე-  
ლი ორი ბგერა გარკვევით ისმოდა, შემდეგ სიტყვები სულ  
უფრო მეტად კარგავდნენ დამახასიათებელ ქლერადობას და  
სხვადასხვა ტონალობის ნაწილაკებად იშლებოდნენ. უეც-  
რად თვალწინ ბრწყინვალე სავანმა იელვა. ვერცხლის  
მოზრდილი ჯვარი ერთხანს ცხადად მოჩანდა, შემ-  
დეგ გვერდები შემოაცვდა, უხილავი სიმხურვალის რკალში  
მოექცა, დნობა დაიწყო და აბოლდა. შავმა კვამლმა მთელი  
სამყარო შთანთქა, მძიმე მასის წონა შეიძინა. მისი სხეული  
ცივდებოდა, ისე შეშლებოდა, რომ აღარაფერს გრძნობდა,  
თითქმის აღარც კი არსებობდა. მაგრამ ამას სხვა კი არ  
ამჩნევდა, არამედ მისივე ბურუსით მოცული გონება. მღვდე-  
ლი არსად წასულა, იგი უბრალოდ გაქრა. მისი ადგილი დაი-  
ჭირა სიცარიელემ, უკიდევანო ბნელმა კედელმა, რომელსაც  
აქა-იქ ვიწრო კარი აქვს შებმული. კედლის გასწვრივ ფერმ-  
კრთალი აჩრდილები დაბორილებენ, ერთმანეთს რაღაცას  
ანიშნებენ, მაგრამ ვერცერთი მათგანი ვერ ბედავს შეაღოს  
კარი, შეიხედოს სიცარიელეში, თუ ვერ დაინახავს. მიხვდეს  
მაინც, რას ჰქვია მარადისობა, რა კავშირი აქვს ადამიანთან,  
რატომაა ერთი გულგრილი, ხოლო მეორე მუდამ მგრძნობიარე,  
დაძაბული, უკმაყოფილო. უეცრად ცარიელ დიობში სი-  
ნათლის მკრთალმა შუქმა იელვა და ერთი წამით სამყაროს  
გაქვავებული ნაგლეჯი დასტყუა. ბექობი, სახელდახელოდ  
აგებული ეკლესია, გალავანი, სამრეკლო, საფლავები, უწყლო  
ველები, მტკვრის ხეობა, მაღალი, ტყით დაფარული, ლურჯად  
მოელვარე მთები, რომელთაც მარადისობა ტანზე შემოუხვე-

ვით, შეუსისხლხორცებიან. რამდენჯერ დადევნებია ამ მთებს, რამდენჯერ დაუმარტოხელებია ტყის იღუმალი ჩურჩული, რამდენჯერ გაუჩინარებულა რძისფერ წისლში. მესსიერებამ ბევრი რამ გადაურჩინა ისეთი, რასაც სხვაგვარი ფერი და ფორმა არასოდეს ექნება, მაგრამ იგი ვერც ამ მყარ, გაქვავებულ ნაგლეჯს წაიღებს თან და ვერც გამოუთქმელ აზრებს. მზე მისთვის აღარ ამოვა, აღარასოდეს იარსებებს სიცხადე.

მღვდელი დაზეპირებულ სიტყვებს იმეორებდა. მოსამსახურე ქალი კაბის კალთით იწმენდდა ცრემლებს, რომელიღაც კუთხეში თავები წრიპინებდნენ. მისი გამუქებული თვალები ღრმად იძირებოდნენ ჩრდილით პირშეკრულ ორმოებში და გვერდზე იხრებოდნენ. ხშირი წვერის ფონზე მძაფრად იკვეთებოდნენ სახის მსხვილი ნაკვთები. მზერაგაციებულს ტუჩების შეუმჩნეველ მოძრაობაზე ეტყობოდა, რომ მისი გონება ჯერ კიდევ ფეთქავდა, ჯერ კიდევ ცდილობდა გაემთლიანებია დაქუცმაცებული სამყარო, ერთმანეთთან დაეკავშირებია აზრთა ნაწყვეტები. მაგრამ როცა დაზიანებული რელიეფი მთლიანად გაქრა, როცა სიბნელემ ყველა ნაპრალი ამოავსო, მისმა ტვინმაც დაიწყო რღვევა. დამბალ ბელტს ჯერ ერთი ნაწილი მოსცილდა, დაიშალა, გაქარწყლდა, შემდეგ მეორე გაითქვიფა მღვრიე მასაში, ბოლოს დარეკა ყურებში და სანამ თვალების დახუქვას მოასწრებდა, თავი გვერდზე გადაუვარდა.

ქარი მძიმედ აწვებოდა კარს, ცდილობდა ველებიდან წაოღებულ სუსხი და უამინდობა ოთახში შემოეტანა. დაქმუნული სივრცე შეციებულევით იშმუშნებოდა, ბანჯგვლიანი ძაღლები ჩახლეჩილი ხმით ყეფდნენ. სანთლები ჯერ კიდევ

ზრხოლავდნენ, მაგრამ მათი შუქი აღარავის ჳირღებოდა.  
ოთახში პირქუშმა დილამ შემოიხედა, იატაკზე ნაცრისფერი  
ზოლი გაწვა. საწოლთან გაჩერებული, ბეჭებში მოხრილი  
მღვდელი ჩუმად იდგა და უკნიდან საკუთარ აჩრდილზე უფ-  
რო შავი ჩანდა. ამ ოთახში ყველაფერი დაღლილი იყო — სი-  
ჩუმეც, ჩრდილებიც და განაცრისფერებული სივრცეც, მხო-  
ლოდ მიცვალებულს არ ემჩნეოდა დაღლა. იგი ისე მშვიდად  
იწვა ხის მძიმე ტახტზე, თითქოს არც წუხანდელი ღამე არსე-  
ზობდა, არც ტკივილი და არც სიკვდილი.



## და ბანიყვეს საოოსალი მისი

წელზედ ახადეს საფლავსა, იგ ნინოს დახადარია,  
სული აღმოხდა სურნელი, აღარსად იყო მკვდარია,  
თქვეს ფრანგი შოიბარავდეს, თუ სად დაეცათ ღარია,  
მე ვიტყვი ზეცას წასულსა, სმელეთზე არსად არია.

თ ე ი მ უ რ ა ზ I

ახალგამოცვლილმა სანთლებმა ბნელს უკან დაახვეინა, სქელმა კედლებმა სითბო შეიწოვა, საკანში აგრილდა. შირაზული ხალიჩის ხალისიანი, აბიბინებული ორნამენტები ნათელ ფერებად იღვრებოდა, ქვეშ ეფინებოდა. ხალიჩაზე დაჩოქილ მუხლებზე მეტად ხელები სტკიოდა. წიგნი ტყვიასავით დამძიმდა. ერთმანეთზე მიჯრილი ასოები მწერებრივით ზუზუნებდნენ, დაღლილ თვალებს კორტნიდნენ. ოთხთავი ყველგან თან დაჰქონდა, ზეპირად იცოდა, მაგრამ ღმერთთან

მაშინ უფრო ახლო იყო, როცა წინ გაწვდილ ხელებში წიგნი ეჭირა. „რამეთუ იყენენ დღენი იგი ჭირისანი, რომელი არსად იქმნა ესევეითარი დასაბამითგან, რომელ დაჰბადა დემერთმან ვიდრე აქამომდე და აღარცა იყოს“.

საკანში დარხეულ ბგერებს ძალა და სიმკვეთრე აკლდა. დედოფალმა მზერა აღმართა და მოოქრულ ხატს მიაჩერდა. ჭვარზე გაკრულ მაცხოვარს ისეთივე გაწამებული სახე ჰქონდა, როგორც მის წინ დანოქილ ქალს. შეიძლება ამ ქალზე უკეთ არავინ იცოდა ახლა, რას განიცდიდა ნაზარეველი გეთსამანიის ბაღში, რამხელა სიცარიელე ერტყა ირგვლივ. „და არა თუმცა დემერთმან შეამოკლნა დღენი იგი, არამცა ცხონდა ყოველი ხორციელი, არამედ რჩეულთა მათთვის, რომელნი გამოირჩინა, შეამოკლა დღენი იგი“.

წიგნი შეტოვდა, გვერდზე გადაქანდა, მაგრამ სანამ იატაკზე დაეცემოდა, გამხდარმა, აკანკალებულმა ხელებმა შეძლეს მისი გასწორება. შუალამის შემდეგ ყოველი ბგერა მუქარად იქცა, გათენებას მთელი სამყარო უფროთხოდა. ხანდახან მერყევ, ხარჩობად დაყოფილ სივრცეში ბავშვის გაღიმებული სახე გამოჩნდებოდა, გაცისკროვნდებოდა სწორედ მაშინ, როცა დამძიმებული გული აფორიაქდებოდა, მოწყვეტილი ვარსკვლავივით ჩაქრებოდა. სად წაასხეს მისი გვრიტები, სად აწამეს ცეცხლითა და მახვილით? „მწუხარ არს სული ჩემი, ვიდრე სიკვდილამდე“.

ირგვლივ შემორტყმული კედლები იმდენად სქელი და მრუბე იყო, რომ ყოველგვარ იმედს აქარწყლებდა. სპარსეთში გადმოსახლების შემდეგ შირაზის სუფთა ჰაერმაც კი კედლების სიმტკიცე შეიძინა. საითაც არ უნდა გაქცეულიყო, მაინც ლოდსა და დუღაბს შეასკდებოდა. ამ კედლებს შორის

შვიდი წელი დაპყო, მაგრამ გუშინს აქეთ ბევრი რამ შეიცვალა. დრო დაიღვარა, გამაწამებელ ლოდინად იქცა. „მოაწია დასასრული, და მოვიდა ჟამი. აჰა ესერა მიეცემის ძეკაცისაი ხელთა ცოდვილთასა“.

დღღოფალი წიგნთან ერთად დაემხო იატაკზე და სანამ გახევებული კუნთები ოდნავ დაუბრუნდებოდა, გაუნძრევლად იწვა. დარაჯების გარდა ამ ძველ ციხე-დარბაზში ყველას ეძინა — მოახლეებსაც, გიორგი მღვდელსაც და წვერშელებილ მელიქსაც. ძილი მხოლოდ მას, უძინარსა და გაწამებულს არ ეკარებოდა. გუშინს აქეთ მთელი წარსული გადაქექა, შეუთავსებელი შეათავსა, მაგრამ ხელჩასაჭიდი მაინც ვერაფერი იპოვა. აუტანელის ატანა ბედმა მას არგუნა და რადგან მის ბედს ვერავინ გაიზიარებდა, საკუთარი სულისათვის თვითონ უნდა მოეელო, მოეელო ისე, რომ სახვეწარი არავისთან არაფერი ჰქონოდა. სიმტკიცე აღრეც ბევრჯერ დასჭირებია, რამდენჯერ გაუსწორა თვალი სიკვდილს, მაგრამ ხვალ მისი ყოფნა-არყოფნის საკითხი კი არ სწყუდებოდა, არამედ ორი ქვეყანა უპირისპირდებოდა ერთმანეთს — დამპყრობელი და დაპყრობილი. ამიტომაც არ ჰქონდა მოდუნების, საკუთარი თავის შებრალების უფლება. ასეთ ბრძოლაში დამარცხება წარწყმედას, უმძიმესი მსხვერპლის შებღალვას ნიშნავდა.

ხვალინდელ დღეზე ფიქრი ისე არ აწვალებდა, როგორც ჩამოყალიბებული აზრის სიშიშველე. გული ხან მძაფრად უცემდა, ხანაც სიცარიელეში იძირებოდა. საკმარისი იყო უკან მოხედვა, წარსულს წაპოტინებოდა და მაშინვე წაბილწულ სუდარაში ეხვეოდა. რამდენი სიბრიყვის, სიძულვილის, სისხლისა და სიკვდილის კვალი აჩნდა ადამიანის გაჩენის დღიდან გაურეცხავ ზეწარს, რამდენი მოჭრილი თავი და და-

თხრილი თვალები იმზირებოდა გაცრეცილი ფარდის ქუქრუ-  
ტანებიდან. ძუძუების საშინელი ტკივილი პირველად სწორედ  
მაშინ იგრძნო, როცა ალექსანდრე და ლევანი, მკერდიდან  
მოგლიჯეს. ჯალათებს მალალი ლაწვები, ღონიერი მკლავები და  
ველური გამოხედვა ჰქონდათ. ერთ-ერთი მათგანი იმდენად  
საზარელი იყო, რომ თავისიანებსაც კი აფრთხოებდა. სპარ-  
სეთს ჯალათის ხელი და შიში მართავდა, ვინც მოძალადეს არ  
ემორჩილებოდა — იღუპებოდა. გუშინდლამდე მახლობლების  
წამებით უკლავდნენ გულს, გუშინ კი სიკვდილსა და რჯუ-  
ლის გმობას შორის დააყენეს.

დედოფალი ისე ნელა გაიმართა წელში, თითქოს ღრმა  
ორმოდან ამოცოცდა. თაღს საბურველში გახვეულმა დაკე-  
ცილი წიგნი თაროზე დადო და ვიწრო სარკმლისაკენ წალას-  
ლასდა. მას შემდეგ რაც შვილიშვილები მოსტაცეს, თვალ-  
ზე ცრემლი არ შეშრობია, მარხვა არ მიუტოვებია. უქმელო-  
ბისაგან კბილები დასცვივდა, ყბები ჩაუცვივდა, კანი გაუ-  
ყვითლდა. ყველაფერი, რაც საქართველოდან წამოიღო, უცხო  
ცის ქვეშ უმოწყალოდ დაჰქანა, მხოლოდ სული შერჩა უტეხი  
და უბერებელი. ამიტომაც არ ერიდებოდნენ, არ ტოვებდნენ  
უყურადღებოდ. შაჰმა ოტომანთა იმპერია შეარყია, ძლიერი  
მტრები დააჩოქა, მაგრამ მისი არსებობა მაინც ვერ დაივიწყა.  
უნდომ და ეჭვიანმა სახელმწიფო მსტოვრებით აავსო. ლო-  
ცვაზე მეტად ჯაშუშების დაკითხვა უყვარდა. ქვეყნად არავის  
არ უნდა ეცხოვრა ისეთს, ვისაც მისი შიში არ ექნებოდა. ამი-  
ტომაც მოიშორა თავიდან შვილები, სეფე-მირზა ვერაგულად  
მოაკვლევინა.

დედოფალმა ვენეციური შუშის ანარეკლს თვალი მოარი-  
და. ბოლო ღროს სპარსეთში ბევრი ვენეციური შუშა შემოკ-



ქონდათ და ეს ვიწრო სარკმელი მისი თანდასწრებით შემო-  
ნეს. მანამდე კი ქარი ისევე თავისუფლად იჭრებოდა საცანში,  
როგორც მწუხარება მის სულში. ზოგჯერ სადღაც შორს დარ-  
ხეული ბგერა ან უჩვეულო ფერის ნახსლექტი უზნიშვნელო  
წვრილმანებს მოეჭიდებოდა და კავკასიონის მთებს ანდა გრე-  
მის შემოგარენს დაითრევდა. ლურჯი და მწვანე ფერი საქარ-  
თველოს სხვა ქვეყნებისაგან ანსხვავებდა, დასაბამიდან მოპო-  
ებულ დამოუკიდებლობას ანიჭებდა. სხივთა უსაზღვრო ციაც-  
ში არაფერი არ აგონდებოდა ისე ნათლად, როგორც რქაწი-  
თელის მტევნები და თუთის აქოჩრილი ბალები. მათი დანახვა  
ახარებდა, მცირე ხნით მწუხარებასაც კი ავიწყებდა, მაგრამ  
აწვალებდა კიდევ. მოულოდნელად შემაშფოთებელი გრძნო-  
ბა ეუფლებოდა, ეშინოდა, რომ წაართმევდნენ, წაბილწავ-  
დნენ ამ ნაფერებ მიწას, ბალ-ვენახებში გადამთიელებს ჩამოა-  
სახლებდნენ.

მარცხენა ხელით სარკმელი გამოაღო და ცას ახედა. ასეთი  
მძიმე ღამე და მბჭუტავი ვარსკვლავები არასოდეს უნახავს.  
შირაზს ეძინა. შორიდან რუქნაბადის ხმაური ისმოდა. შვიდი  
წლის მანძილზე რამდენჯერმე მოუხბდა ქალაქში გასვლა და მის  
დაულაგებელ კონტურებს გვარიანად იცნობდა. დღისით ამ  
სარკმელიდან საფარდინის მომინანქრებული მეჩეთი და აზუდ-  
ად-დოულეს ზღაპრული სასახლის ნანგრევები მოჩანდა. შაპ-  
აბასი საოცრად ჰგავდა თავის შორეულ წინაპარს. მასავით  
ქკვიანი, შეუპოვარი დიდების, ფულისა და ფუფუნების მო-  
ყვარული იყო, მასავით ეკვიანი, ვერაგი და უგუნურობამდე  
სასტიკი. ერთმა საყვარელი ქალი მოიშორა თავიდან, მეორემ  
შვილები, ერთმა ვირთხები მიუსია ხელფეხშეკრულ ტყვეებს,  
მეორემ დამშეული ავაზები, ერთმა შირაზში ააგო დიდებუ-

ლი სასახლე, მეორემ ისპაჰანში. აზუდ-ად-დოულემ დაშლილ-  
დარბეული ხალიფატის შეკოწიწება ითავა, შაჰ-აბასმა თურ-  
ქებისა და მონღოლებისაგან გათელილი სპარსეთის აღდგენა,  
ქვეყნის გასაძლიერებლად ორივე თავდაუზოგავად ~~აღიჭრდა~~  
მაგრამ საკუთარი ხალხისათვის ორივე უცხო იყო. სპარსეთს  
ერთი კაცის დაძაბული ნებისყოფა მართავდა და როცა ეს კა-  
ცი მოკვდებოდა, სპარსეთი ისევე დაქანდებოდა უკან, რო-  
გორც მთიდან დაგორებული ურემი.

საკანში ვარდების გამაბრუებელი სურნელება შემოიჭრა.  
„შენს დიდებულ ბაღში ვარდები ისე დგანან ანემონების  
ირგვლივ, როგორც აგუგუნებულ ხანძარს მიჩერებული ალა-  
შინათა სახეები“. ეს სიტყვები რამდენიმე წლის წინათ ამოი-  
კითხა სპარსულად თარგმნილი არაბი პოეტის კრებულში და  
რატომღაც ახლა, ამ უმძიმეს წუთებში მოაგონდა. არსად არ  
უნახავს იმდენი და იმხელა ვარდები, რამდენიც ამ კედელ-  
მორღვეულ ქალაქში ნახა. ყოველი ეზო, ყოველი ბაღი ვარ-  
დებით იყო გადაწითლებული. ვარდის სუნს ქარიც კი ვერ  
ფანტავდა. პირველად სიამოვნებას ჰგვრიდა, როცა ბავშვებს  
დააძინებდა, გარეთ გამოვიდოდა და ვარდის სურნელებით  
ტკბებოდა, მაგრამ ათასმა უბედურებამ ვარდს სუნი შეუცვა-  
ლა, წამებასა და სიკვდილს დაუკავშირა. მას შემდეგ ფანჯრის  
გამოღება ეზარებოდა, ვარდის სუნს სიკვდილის სუნიც ახლდა  
თან.

მოკრიალებულ ცაზე შავი, წაგრძელებული ღრუბელი გა-  
მოჩნდა და რამდენიმე ვარსკვლავი შთანთქა. დედოფალმა  
თვალეები დახუჭა. მის გულს დიდი ხანია ღრღნიდა დანაშაუ-  
ლის გრძნობა. რატომ ჩაუგდო სისხლიან მტარვალს უცოდვე-  
ლი ბავშვები ხელში, რატომ არ გადაიმალა, არ გახიზნა მთებ-

ში, გულუბრყვილობა სწორედ მაშინ გამოიჩინა, როცა ვერ მიხვდა ვისთან ჰქონდა საქმე. ეგონა ალექსანდრეს და ლევანს სპარსეთში გაგზავნიდნენ და ისევე აღზრდიდნენ. შაჰის კარზე, როგორც ერთ დროს მისი შვილი აღზარდეს, მაგრამ შაჰმა მძევლებიც მიითვალა და კახეთიც ააოხრა. რამდენ უბედურებას ასცდებოდა საქართველო, სპარსეთის ტახტზე რომ ასეთი ძლიერი, უნარიანი მბრძანებელი არ ასულიყო. მეზობლების დასარბევად იგი დროშასავით აფრიალებდა ყურანის მერვე სურას.

დედოფალმა სარკმელი მიხურა, მაგრამ ადგილიდან არ დაძრულა. კედელს მიყრდნობილი აჩრდილს უფრო ჰგავდა, ვიდრე ცოცხალ არსებას. ხატზე არეკლილი სხივები ერთმანეთს კვეთდნენ და ჭერში ფანჯრის გაქრას ცდილობდნენ. საკუთარ თავზე ფიქრი არ უნდოდა, არ სიამოვნებდა. მან უკვე მტკიცედ გადაწყვიტა ქრისტიანად მომკვდარიყო და ამ გადაწყვეტილებას ვერაფრითარი ძალა ვერ შეაცვლევინებდა. მერყეობას არ შეუწუხებია, არ გაურვიცია, მაგრამ სული მხოლოდ მას შემდეგ მოითქვა თავისუფლად, როცა მტარვალის ნებას წინ აღუდგა. ახლა არც შაჰ-აბასის ეშინოდა და არც მისი დამქაშების. მხოლოდ ერთი რამ ზარავდა. იცოდა, რომ მკლავმაგარი მამაკაცები გააშიშვლებდნენ, ხელ-ფეხს შეუკრავდნენ და სანამ ძუძუებს გაზით დააგლეჯდნენ, კიდევ ერთხელ მოსთხოვდნენ მუქარით: „დაჰმე ქრისტე და იწამე ალაჰი“. რა უნდა ეთქვა, რა პასუხი გაეცა მოძალადეებისათვის. ჯალათებს კი არა, მღვდლებსაც არ სჯეროდათ, რომ დასათმობი მას უკვე აღარაფერი ჰქონდა.

როგორც კი ქალაქში ხმა გავრცელდა, ქრისტიანმა დედოფალმა რჯულის დათმობას წამებით სიკვდილი არჩიაო, კათო-

ლიკები შეუფოთდნენ, აფუსფუსდნენ. რამდენიმე მათგანმა იმის უფლებაც კი ითხოვა, რომ წამებას დასწრებოდა, მაგრამ ბოლო დროს მასთან არც ქრისტიანებს უშვებდნენ და არც გამაჰმადიანებულ უცხოელებს. ყველა კართან დარაჯი იდგა. ძველ ციხე-დარბაზს ყიზილბაშთა მთელი რაზმი იცავდა. შირაზში თითქმის იმდენივე უცხოელი ცხოვრობდა, რამდენიც ადგილობრივი მკვიდრი. ავგუსტიანელ ბერებს გარეუბანში თავიანთი ეკლესია, ბაღი და საცხოვრებელი ჰქონდათ. ესპანეთის, ინგლისის, საფრანგეთის ელჩები შირაზში თვეობით ცხოვრობდნენ, მეჯლისებს მართავდნენ, ერთმანეთს ექიშებოდნენ. ამ რამდენიმე წლის წინათ სცადა კავშირი დაემყარებინა ესპანეთის ელჩთან, ბასილიანელი ბერი გაუგზავნა, წიგნი მისწერა, ეგონა საქრისტიანოს უძლიერესი სახელმწიფო ერთმორწმუნე ქართველებს გამოეჭომაგებოდა, მაგრამ გარსია დე ფიგერუამ თავაზიანად მოიკითხა და მიმოწერას თავი აარიდა. ესპანელებს სპარსელებთან კავშირი უფრო აინტერესებდათ, ვიდრე საქართველოს ბედ-იღბალი. მის ირგვლივ ყველაფერი ისე იყო შეკრული და შებოქილი, თითქოს საშინელი სენის გავრცელება შეეძლო. თუმცა ამას წინათ ავგუსტიანელმა ბერებმა დიდი გამბედაობა გამოიჩინეს, გამამხნევებელი ბარათი და ღვთისმშობლის პატარა ხატი გამოუგზავნეს, მაგრამ ხატები თავისივე ბევრი ჰქონდა. კათოლიკებს შორის იყო რამდენიმე ღირსეული, მისი უკუღმართი ბედით შეწუხებული ღვთისმსახური, მაგრამ იყვნენ ისეთებიც, რომელთაც მისი წამებით სიკვდილი უფრო დიდ საქმედ მიაჩნდათ, ვიდრე გადარჩენა. როგორც კი შაჰის ნება აღსრულდებოდა, პანაშვიდს გადაუხდიდნენ და მთელ მსოფლიოს მოსდებდნენ, ჩვენს დროში ქრისტიანმა ქალმა რჯულის დათმო-

ბას მოწამეობრივი სიკვდილი არჩიაო. იგი არც იმაში იყო დარწმუნებული, რომ მის ნეშტს არ მოიპარავდნენ, წმინდანად არ შერაცხდნენ. სიკვდილის შემდეგ იგი უკვე სხვების საკუთრება იქნებოდა და ბევრ რამეს მიაწერდნენ ისეთს, რაც გულში არ გაუვლია.

უეცრად მოეშვა, მთლიანად კედელს მიენდო. გაწყვეტილი აზრი ფართხალებდა, უადგილო ადგილას ინასკვებოდა. საკანო მოჩვენებებით და მწუხარებით აივსო. კვნესოდა გული, სახლი, მთელი ქალაქი, კვნესოდა ისე, როგორც ხაფანგში გაბმული ცხოველი, რომელსაც თავის დახსნის იმედი აღარა აქვს. ლანდები უაზროდ დაბორიანდნენ, მოგონებები გუნდ-გუნდად იშლებოდა. ორლობეში ფეხშიშველი, სახლიდან პერანგის ამარა გამოვარდნილი ბიჭუნა გარბის, გაურბის სიკვდილს, ცხენზე ამხედრებულ, წითელჩაბალახიან სიკვდილს, რომელსაც ხმალი შეუმართავს, ველურად ყივის და მოთმინებით ელის იმ წამს, როცა ბიჭუნას მოჭრილი თავი მიწაზე გაგორდება. შორიდან სახედაკაწრული, სამოსშემოხეული დედაკაცის კივილი ისმის, ტვირთი იზრდება, ისეთი ძალით აწვება მხრებს, რომ სადაცაა გასრესს, მაგრამ ამ დროს გაწყვეტილი აზრი მაცხოვრის მოოქრულ ხატს ებლაუჭება და იგიც ამოკყავს საშინელებით დაბნელებულ უფსკრულიდან.

რა ჰქონდა სამღურავი უცხოელებთან, როცა მის წამებას ზოგიერთი ქართველიც კი მოითხოვდა. ამას წინათ ერთი მათგანი შაჰს უმტკიცებდა, ქართველების მორჯულებას ქეთევან დედოფლის სიმტკიცე უშლისო ხელს. ასეთები საქართველოშიც ეგულებოდა. გამაჰმადიანებულ ქართველებს ეთაკილებოდათ, ძალდაუტანებლად რომ დაგმეს რჯული და ცდილობდნენ მათი რიცხვი გაზრდილიყო, დაქუცმაცებული ტვირთი

არც ისე შიშვე საზიდავია, მაგრამ იყვნენ ისეთებიც, რომელ-  
თაც სწამდათ, ერის გადარჩენის ერთადერთი გზა გამაჰმადიან-  
ებააო. მათ არ ესმოდათ, ქრისტიანობის დათმობა მარტო  
რჯულის კი არა, ენისა და წარსულის დათმობაც იქნებოდა.  
დაინგრეოდა ეკლესიები და მონასტრები, მოისპობოდა ქარ-  
თული წიგნი, ქართული ხატი, ქართული სული. ორიოდვე საუ-  
კუნის შემდეგ აღარავის ემახსოვრებოდა, რომ ქვეყნად სა-  
ქართველო იყო და ქართველები ცხოვრობდნენ.

იმამ-ყული-ხანი უცხოელ ელჩებს ისე ღებულობდა, რო-  
გორც დამოუკიდებელი სახელმწიფოს მეფე, ადვილად თავს  
არც ყიზილბაშ ემირებს უტოლებდა, მაგრამ ამ სამიოდვე თვის  
წინათ მას მაინც ესტუმრა. ეზო შეიარაღებული მხლებლებით  
და შავკანიანი მონებით აივსო. საკანში ოფლისა და მტვრის  
სუნი შემოიქრა. ფარსის მმართველი გალიმებული სახით მოა-  
დგა კარს, მაგრამ თავაზიანი ღიმილის უკან სიკვდილის აჩრ-  
დილი მოჩანდა. ეს გამაჰმადიანებული ქართველი, მდიდარი,  
ზრდილი, განათლებული სატრაპი იყო. შაჰის კარზე აღზრ-  
დილს თავი სპარსელად მოჰქონდა და სპარსელივით სძულდა  
ყველა გადამთიელი დამპყრობლები — თურქები, მონღოლები  
და ყიზილბაშები. შეიძლება მარტო დარჩენილს სხვა ზრახვე-  
ბიც ედო გულში, მაგრამ გულის ნადებს არავის უზიარებდა.  
მისი აღზევება განსაკუთრებით მას შემდეგ დაიწყო, როცა  
ინგლისელების დახმარებით პორტუგალიელებს კუნძული ორ-  
მუზი წაართვა და სპარსეთს სავაჭრო გზა გაუხსნა. მის უამრავ  
სახელს კიდევ ერთი საპატიო სახელი შეემატა. ადრე ამ ძველ  
ციხე-დარბაზში იგი უფრო ხშირად დადიოდა, ზოგჯერ გამაჰ-  
მადიანებული ქართველებიც მოჰყავდათ თან, მაგრამ ბოლო  
დროს ფეხი ამოიკვეთა. თუმცა მისი ნებართვით ერთხელ აქ  
ასპაზელმა ქრისტიანებმაც შემოაღწიეს.

ხალარხანს ტახტზე ჩამოჯდომა შესთავაზა, მაგრამ მან სავარძელი არჩია. შავი, ოქროს ძაფით ნაქარგი კაბა აახალგაზრდავებდა, გაქათქათებულ ჩალმაზე დაბნეული ბრილიანტეცივად ბრწყინავდა. მის მზერაში გამოცდილებით დაღლილი კაცის შქმუნვარება იგრძნობოდა. ამ ცოდვილ სასახლეში ჯერ ხელისუფლების არც ერთ წარმომადგენელს არ შემოუდგამს ფეხი ისე, რომ უბედურება არ მოეტანა თან. ამიტომაც ჩამოწვა მათ შორის ბედისწერასავით მძიმე, დამთრგუნველი დუმილი.

მოახლემ ხილთან და ქართულ ღვინოსთან ერთად შარბათიც შემოიტანა. დაბალი მაგიდის ზედაპირი გახალისდა. ცოცხალი ფერებით აივსო. იმამ-ყული-ხანმა ღვინო დაისხა, რამდენჯერმე სიამოვნებით მოწრუბა და შემდეგ ბოლომდე დასცალა. სანამ თიხის ჯამს მაგიდაზე დადგამდა, მის მუქ თვალებში ნაპერწკალმა იელვა. ახლა აღარ გაუჭირდებოდა იმის თქმა, რაც ტვირთივით შემოიტანა საკანში.

— დედოფალო, — დაიწყო მან ისე, თითქოს სიტყვათა სირბილე სათქმელის სისასტიკესაც შეარბილებდა, — თქვენი ბედი რომ ჩემს ხელთ იყოს, დღესვე დაგაბრუნებდით საქართველოში, მაგრამ ჩვენს შორის შაჰი დგას, რომლის რისხვას ვერც ერთი ჩვენგანი ვერ გაექცევა. დღეს სპარსეთში სიმართლეს მხოლოდ ისინი ეძებენ, ვისთვისაც სამართლის კარი დახშულია. სისხლისღვრამ შაჰი გააბოროტა. ის დღე დღედ არ მიაჩნია, როცა ვინმეს ან ჩუმად არ მოაკვლევინებს ანდა სასიკვდილო ვანაჩენს არ გამოუტანს. ამიტომაც არ შეისმინა ჩემი სიტყვები. ნაადრევად გამეფებულმა კარგად იცის, რომ მეამბოხე სულის მოსასპობად სხეულის მოსპობაა საჭირო და ასეც იქცევა. უმეტესობას ვერაგულად კლავს, ცოდვების მო-

ნანიების საშუალებას არ აძლევს, თქვენ კი უკან დასახვევ  
გზას, არჩევის უფლებას გიტოვებთ.

ჯერ დასცხა, სახე აელეწა, შემდეგ კი გარდუვალობის  
სუსხი და ბეჭების ტკივილი იგრძნო. იმამ-ყული-ხანმა გრძე-  
ლი, მოქნილი თითებით მტევანს ერთი მარცვალი მოსწყვიტა,  
მცირე ხანს ატრიალა და შემდეგ ისევ ლანგარზე დასდო. მისი  
დაძაბული მზერა მდუმარებას ეფარებოდა, რაღაცას ელოდა.  
შეიძლება სასოწარკვეთილი ქალის კივილს; მუდარას, მის ფე-  
ხებთან დამხობას. სასახლეში აღზრდილს ლოდინზე ეტყობო-  
და, რომ ადამიანის გათახსირების მოწმე ხშირად ყოფილა.

ღუმელი გამოუთქმელ აზრთა სიცხადეში ეხვეოდა,  
მკვრივდებოდა. უეცრად ნაკვთთა სიმსუბუქე და გამამხნევე-  
ბელი სითბო იგრძნო. თბილი ტალღები ზურგიდან, იმ ადგი-  
ლიდან მოედინებოდა, სადაც მაცხოვრის ხატი ეკიდა. ქრის-  
ტიანობა ბავშვობიდანვე შეითვისა, შეისისხლხორცა და მისი  
ღათობა ვერაფრით ვერ წარმოედგინა. სწორედ რწმენა აღ-  
მოჩნდა ის ერთადერთი საუნჯე, რაც ვერ წაართვეს, ვერ ამო-  
გლიჯეს სულიდან, ახლა მან კარგად იცოდა, რა დაეპირისპი-  
რებია მოძალადისათვის, რით დაეცვა საკუთარი ღირსება.  
გრემის ეკლესიის ზარების რეკვა ყოველ დღე ესმოდა, ზოგ-  
ჯერ განმეორებითაც კი, მაგრამ ამას წინათ ისე ცხადად გაი-  
გონა ძილში, რომ საწოლიდან წამოვარდა და პირჯვარი გა-  
დაიწერა. იმ დამეს თვალი არ მოუხუჭავს. ხატის წინ დაჩოქი-  
ლი გულმხურვალედ ლოცულობდა. ბოლო დროს ლოცვამ  
სხვა ხასიათი მიიღო, სხვა აზრი შეიძინა, ისეთივე მკაცრი და  
მწუხარე გახდა, როგორც მისი პირისახე.


იმამ-ყული-ხანმა ისევ დაისხა ღვინო, მაგრამ დაღვევის  
შერცხვა და სავსე ფიალა გვერდზე გადადგა. შეიძლება იგი



უკვე ნანობდა, რომ ამ მგლოვიარე საკანში შემოდგა ფეხი, განწირული ადამიანის პირისპირ აღმოჩნდა. რა უნდა ეთქვა ისეთი, რომ წამებით სიკვდილის ტოლფასოვანი ყოფილიყო, აზრის მცირე ნასახი შეენარჩუნებინა. მისთვის ისევ ის სჯობდა, რომ შაჰის ნება ეუწყებია და უკან გაბრუნებულიყო, მაგრამ არ უნდოდა მხოლოდ ხელისუფლების წარმომადგენელი, სხვისი ნების აღმსრულებელი ყოფილიყო.

— მე კიდევ ერთხელ შევეცდები აგარიდოთ შაჰის რისხვა, მაგრამ არაფრის იმედი არა მაქვს, — დაიწყო მან ლმობიერად და ხმის შესაფერისი გამომეტყველება მიიღო. — ბოლოს და ბოლოს, როცა სხვა გამოსავალი არაა, რჯულის გამოცვლა არც ისე დიდი უბედურებაა, როგორც ბევრსა ჰგონია. ძველი არაბები რჯულს იმდენჯერ იცვლიდნენ, რამდენჯერაც სურდათ. დამიჯერეთ, რომ რწმენასა და ცხოვრებას ერთმანეთთან საერთო არაფერი აქვთ. ღმერთი ბევრს სწამს, მაგრამ წმინდანი ამქვეყნად ისევე ცოტაა, როგორც წყალი უღაბნოში. მგონი აქ, შირაზში ცხოვრობდა ერთი სუფისტი შეიხი, რომელიც ამბობდა, ცა რომ სპილენძად იქცეს, დედამიწა კი ტყვიად და მე ჩემი თავის გამოსაკვებად ხელი გავანძრიო, მაშინ წარმართი ვიქნებოდი და არა მუსლიმანიო. ასეთი კაცისათვის ღმერთის გარდა არაფერი არსებობს ამქვეყნად, მაგრამ თქვენ ხომ რწმენა გონიერებაზე მალლა არ დაგიყენებიათ, არ გაქცევებართ ცხოვრებას, არ ვაგულგრილებულხართ მახლობელთა მიმართ. ამიტომაც ვერ ამიხსნია თქვენი სიჯიუტე.

მას მართლაც არ შეეძლო ამის ახსნა, რადგან რჯულიც გამოცვლილი ჰქონდა და სამშობლოც. ცხოვრება მისთვის სათარეშო ასპარეზი იყო, სადაც დროს რაღაც უნდა დასტყუო,



თორემ ხელცარიელი დარჩები. ხელცარიელად დარჩენას კი მან შაჰის ნდობის დამსახურება და თავადობა ეკრძივო-თვით შაჰ-აბასს არც ღმერთი სწამდა და არც ეშაჰი. იმ დროს ერთ-ცა კათოლიკებს და სომეხ ეპისკოპოსებს მფარველობას უწევდა, სუნიტობის მიმდევარი მაჰმადიანებს სასტიკად დევნიდა, პირში ცხელ ტყვიას ასხამდა. მისი სალოცავი ხატი სპარსეთი იყო. ამ მრწამსს მტკიცედ იცავდა და ურჯულოდ თვლიდა ყველას, ვინც მის კერპს არ ეთაყვანებოდა. ამიტომაც ჯიჯგნიდა საქართველოს. იმამ-ყული-ხანს ბევრი რამ შეეძლო გაემართლებია, შავი თეთრად შეეღება, მაგრამ მან დანამდვილებით იცოდა, რომ შაჰი მას ქართველობისათვის სჯიდა და არა ქრისტიანობისათვის.

— რწმენა ზღუდავს, აჩლუნგებს ადამიანს, ქართველებმა კი სწორედ ახლა უნდა გამოიჩინონ გამჭრიახობა, გაუძლონ ჟამთა სიავეს, — განაგრძობდა იმამ-ყული-ხანი, — იქ, სადაც თავის მხრებზე შენარჩუნება ჭირს, მოთმინება და ლოდინია საჭირო. დროთა განმავლობაში ყველა მეფე ემხობა, ყველა სახელმწიფო ნადგურდება. რომის იმპერატორი კლავდიუსი იგონებს, სანამ კალიგულა ცოცხალი იყო, თავს ვისუღლებდი, ისე ვიქცეოდი, თითქოს ამქვეყნის არაფერი გამეგება, რადგან სხვაგვარად თავს მხრებზე ვერ შევინარჩუნებდიო. და ამას ამბობს კაცი, რომელიც კალიგულას სიკვდილის შემდეგ იმპერატორი გახდა. მთავარია, სიცოცხლის შენარჩუნება, გამოსავლის პოვნა და არა თავგანწირვა. რას მოიგებდა საქართველო, შამაჩემს რომ ქრისტიანობისათვის თავი გაეწირა?

ფანჯრიდან შემოჭრილი, იატაკზე გაწოლილი სინათლის ზოლი თანდათან ვიწროვდებოდა, ალესილი დანის სიმახვილეს იძენდა. ეზოდან ცხენების ფრუტუნნი, იარაღის ეღარუნნი

და ჯარისკაცების ხმამაღალი ლაპარაკი ისმოდა. საკანში იჭრებოდა ხორცშესხმული ბგერები, რომლებიც ერთმანეთს ებმოდნენ, მჭიდროვდებოდნენ და იღუმალეზას ემიჯნებოდნენ. მათი სიგრძე, რხევა და დაძაბულობა იმდენად ნაცნობი იყო, რომ ცალკე გამოყოფას არ თხოულობდა. მაგრამ როცა ბინდი შესქელდებოდა და უფორმო სხეულს ზანტად შემოათრევდა საკანში, არარაიდან სივრცის გამაუქმებელი, სიცხადეს მოკლებული ბგერები იშობოდა, რომელთა შრიალს და ფაჩუნს ვერც ყური უგულვებელყოფდა და ვერც დაღლილი გონება ახშობდა.

იმამ-ყული-ხანის ჭკვიანი სახე უფერულდებოდა, ცალკეულ ნაკვთებად იშლებოდა. რაც არ უნდა მოხდენილი და კეთილშობილი ყოფილიყო მამაკაცი, ამ მგლოვიარე საკანში მაინც მზდალი და სულმოკლე ჩანდა, რა გულახდილობაც არ უნდა გამოეჩინა, მაინც ეჭვებს იწვევდა. დღეს იგი მთელი ფარსის მმართველი იყო, შეეძლო ამბოხებული ყიზილბაშების ან ტყვე თურქების მოჭრილი თავებისაგან კოშკები აეგო, მაგრამ კისრის ძარღვის ფეთქვაზე ეტყობოდა, რომ როგორც კი შაჰ-აბასის მზე ჩაესვენებოდა, მისი ამაყად შემართული თავიც დაგორდებოდა.

იმამ-ყული-ხანმა სახიდან ლმობიერი ღიმილი მოიშორა და სიტყვებს სიმსუბუქე მოაკლო.

— თქვენ ან არ იცით რა გელით, ანდა იმის იმედი გაქვთ, რომ ქალი ხართ და შაჰი დაგინდობთ. ამქვეყნად ჯერ არავინ შობილა ისეთი, ვისი გაწირვაც შაჰს არ შეეძლოს, რაც შეეხება სპარსელ ჯალათებს, მათ გულცივობაზე ლეგენდები დადის. შეიძლება თქვენ ღვთის ყოვლისშემძლეობის, სასწაულების გჯერაო, მაგრამ იქ, სადაც ძალა ბატონობს, ღმერთი ვერა-



ფერს გიშველით. სპარსეთში ცაც კი შიშითაა ფერდაკარგუ-  
ლი. მე არ მესმის რატომ უნდა შეეწიროს ადამიანი მარცხს,  
როცა შეუძლია მარცხი გამოცდილებად აქციოს და თავისთვის  
გამოიყენოს. გამაჰმადიანებულ ქართველებს სპარსეთში ყვე-  
ლა გზა ხსნილი აქვთ. ბატონობა და მონობა აქაც არსებობს,  
მზე აქაც ისევე ამოდის და ჩადის, როგორც საქართველოში.  
თქვენ რომ პირველი ქართველი იყოთ, ვისაც რჯულის შეცვ-  
ლას აძლებდნენ, მაშინ სათქმელი არაფერი გექნებოდათ, მაგ-  
რამ რჯულშეცვლილი ქართველები შაჰის კარზე იმდენია,  
რომ მათ დაუკითხავად არც ერთი დიდმნიშვნელოვანი სახელ-  
მწიფო საქმე არ წყდება. დაფიქრდით, წამებით სიკვდილსა  
და სიკვდილამდე უზრუნველყოფილ ცხოვრებას შორის დიდი  
სხვაობაა.

როცა გარემო მეტისმეტად იძარცვებოდა, ნივთთა ანარეკ-  
ლი მკვრივდებოდა და სინამდვილეს აშიშვლებდა, სიამე ისე  
მოუკონავდა ცხოვრების ყოველი ნასვრეტებიდან, როგორც ნეს-  
ტი სქელი კედლებიდან. საკმარისი იყო წარსულის მძიმე  
ფარდა ონდავ გადაიწია და სიტყვები მაშინვე კარგავდნენ  
აზრს. როგორ უნდა დაეთმო, როგორ ეპატიებია შაჰისათვის  
კახეთის აოხრება, ათასობით ოჯახის აყრა, შვილიშვილების  
წამება. რა უნდა მიელო იმის სანაცვლოდ, რაც წაგლიჯეს,  
სისხლიანი ფეხებით გათელეს. მის სულში დაგროვილ ნა-  
ღველს ველარაფერი ამოაშრობდა, ვერაფერი ჩაუნერგავდა  
ჯალათისადმი რიღსა და პატივისცემას. სხვისი სისხლით ხე-  
ლები არასოდეს შეუღებია, მაგრამ შესაძლებლობა რომ ჰქო-  
ნოდა, შაჰს სიამოვნებით დაკლავდა, მის სისხლს ძაღლებს  
დაალევიანებდა. თუ ღმერთი ამას ცოდვად ჩაუთვლიდა, ტანჯ-  
ვით გამოისყიდდა.

იმამ-ყული-ხანი ცდილობდა შიშოც შთაენერგა მისთვის და იმედიც, მაგრამ ძნელი წარმოსადგენი არ იყო ის, რაც შაჰ რაჯულის შეცვლის შემდეგ ელოდა. შაჰი ან ამავე ციხე-დარბაზში დატოვებდა, ანდა რომელიმე სხვა სასახლეს გამოუყვებინდა და განმარტოებით ცხოვრების უფლებას მისცემდა. შეიძლება ჯამაგირიც დაენიშნა, მაშულებიც ებოძებია, მაგრამ არც უმეთვალყურეოდ დასტოვებდა და არც ქართველებს გააკარებდა. რამდენიმე წლის შემდეგ მისი სხეული უდაბნოში გადარგულ ხესავით გახმებოდა. ჯერ ფოთლები დაუჭკნებოდა, შემდეგ ტოტები დასცვივდებოდა და ბოლოს ისე წაიქცეოდა, როგორც ძირმოშალი კედარი. უპატრონო მკვდარს მასავით სახელგამოცვლილი, გამაჰმადიანებული მოახლეები სუდარაში გაახვევდნენ, სხვის კუბოში ჩაასვენებდნენ, სხვის მიწაში ჩაფლავდნენ და მორიდებული პირით გაეცლებოდნენ. არა, იგი იმისთვის არ შობილა ამქვეყნად, რომ სახეც დაკარგოს და სახელიც, ღმერთსაც უღალატოს და კაცსაც. ჯალათები იმდენს ვერაფერს დააკლებდნენ, როგორც რაჯულის შეცვლა გააწამებდა. თავის დახსნა ქრისტესაც შეეძლო, მაგრამ ჯვარზე იმიტომ ავიდა, რომ არ უნდოდა ფარისევლებს ქვეშ გაგებოდა, რწმენა მოესპო იმათთვის, ვისი ცოდვებიც იტვირთა.

— როდის უნდა აღსრულდეს შაჰის ნება? — იკითხა დედოფალმა ისე მშვიდად, თითქოს მისი ხორცი არ იგლიჯებოდა, არ იწვებოდა.

— შაჰს ჯერ არაფერი შემოუთვლია. მაგრამ ვიცი, რომ გაცოფებულია. — იმამ-ყული-ხანი ტყუოდა, უსირცხვილოდ ტყუოდა, მაგრამ ეს მას ხელს არ უშლიდა ლაპარაკი განეგრძო, — მე აქ თქვენს გასაფრთხილებლად მოვედი, მოვედი კი-

დევ ერთხელ, რადგან მთელმა ცოდვამ ჩემს კისერზე უნდა გადაიაროს. ქრისტიანები მაჰმადიანებზე ნაკლები ბრალმდებლები არ არიან. ვიცი რა ხმებსაც გაავრცელებენ დასავლეთში. სპარსელები ქრისტიანებს აწამებენ, ცეცხლზე სწვავენო, განაცხადებენ ისე უტიფრად, თითქოს მათ ქალაქში ყოველ დღე არ გიზგიზებდეს კოცონები. გამავებინეთ მაინც ან თქვენ რატომ იღუპავთ თავს ან ჩვენ რატომ გვაყენებთ უხერხულ მდგომარეობაში. თქვენს გამო სპარსეთში გადმოხვეწილმა ქართველებმა არ იციან რა გზას დაადგნენ. შაჰს კი ისინი სჭირდება, ღმერთზე უფრო სჭირდება, რადგან ჯერ კიდევ ბევრი ომი აქვს გადასახდელი და ბევრი ციხე ასაღები.

— თქვენ როგორ ფიქრობთ, რა სჯობია, ქართველებმა სხვისი ციხეების აღებას შეაკლან თავი თუ თავიანთი გაანთავისუფლონ ყიზილბაშებისაგან?

— ქართველებს ჯერ ამის შესაძლებლობა არა აქვთ. როცა დატყვევებული მხეცი მძვინვარებს, მხოლოდ საკუთარ თავს ვნებს. მე რომ თქვენი და თქვენი შვილის პატივისცემა არ მქონდეს, აქ არ მოვიდოდი. მინდა გიხსნათ წამებისაგან, აგარიდოთ შაჰის რისხვას, მაგრამ ცოტათი თქვენც უნდა შემიწყოთ ხელი.

იმამ-ყული-ხანის შეგონებები აღიზიანებდა, გულს ურევდა. მისთვის ახლა გასაგები იყო, რისთვის ესტუმრა ეს ბრწყინვალე თავადი, რა უფრო აწუხებდა, მისი ბედი თუ საკუთარი სინდისის ჯერ კიდევ შეუნიღბავი ნაკაწრი.

— ის, რასაც თქვენ ცოტას ეძახით, ჩემთვის სიცოცხლეზე უფრო ძვირფასია.

— სიკვდილსა და სიკვდილს შორის დიდი სხვაობაა, დედოფალო.

— სიკვდილზე უარესი ბევრი რამ არის ამქვეყნად.

— რჯულის დათმობა?

— არა, ქართველობის დათმობა. ეს ქვეყანა ჩემთვის მხოლოდ მანამდე არსებობს, სანამ მის ერთ პატარა კუთხეს საქართველო ჰქვია.

იმამ-ყული-ხანი ფეხზე წამოდგა. სპარსეთში გაზრდილს კვანძის გამოხსნას მისი ხმლით გაჩეხვა ერჩია, მაგრამ ამით იგი საკუთარ თავსაც მიაყენებდა ზიანს. წარბშეკრული ერთხანს საკუთარ სულში იქექებოდა, რაღაცას ეძებდა, შემდეგ სახეზე თავაზიანი ღიმილი აიფარა და დამშვიდდა. მისმა საღმა გონებამ საჭირო აზრი თვალის დახამხამებაში გამოქექა. ვალი მან პირნათლად მოიხადა, რის გაკეთებაც შეეძლო გააკეთა და ახლა უფლება ჰქონდა უმტკივნეულოდ მიეხურა სინდისის ოდნავ ღრიჭოდ დატოვებული კარი.

— უზრუნველ ცხოვრებას მოწამებრივი სიკვდილი გირჩევნიათ?

— სხვა გზა არ დამიტოვებს.

— შაჰი არ ჩქარობს, დარწმუნებულია, რომ ამ ცოტა ხანში აზრს შეიცვლით.

— მის ადგილას მე ამის იმედი არ მექნებოდა.

— მშვიდობით ბრძანდებოდეთ, დედოფალო. მე ჩემი ვალი მოვიხადე. იმას, ვინც სიკვდილისაკენ ისწრაფვის, ვერაფერს შეაჩერებს. ცოდვა, ცხოვნება, უკვდავება ჩვენ, ადამიანებმა მოვიგონეთ, ამ სოფლისათვის კი ყველა მკვდარი დასამარხავია და ყველა დამარხული დასაფიცებელი. დაიფიცებენ არა მარტო შაჰებსა და დედოფლებს, არამედ ქრისტესაც და ალაჰსაც. თქვენს გადასარჩენად ბევრი რამე ვიღონე, მაგრამ დღევანდელმა დღემ საბოლოოდ დამარწმუნა, რომ თქვენი და შაჰის მორიგება ჩემს ძალ-ღონეს აღემატება.



იმამ-ყული-ხანი ისე გავიდა საქანიდან, როგორც შეგონებით დამშვრალი შეიხი. ოთახში დარჩა გარედან შემოჭრილი ბგერების გამოძახილი და მღვრიე ცხოვრების სუნი. მთავრებმა მაგიდა აალაგა, ყველაფერი, რაც თვალს ეხამუშვებოდა, გარეთ გაიტანა. მღუმარებით გარემოცულს ისეთი გრძობა ჰქონდა, თითქოს ამ ცოტა ხნის წინათ პონტოელ პილატეს ესაუბრებოდა. იმამ-ყული-ხანიც ისევე იყო განებივრებული ხელისუფლებით, როგორც იუდეის მმართველი, არც მას გააჩნდა რწმენა, საშობლო, რაიმეს აღიარების ან საბოლოოდ უარყოფის უნარი. როგორც ყველა თმაშევრცხლილი ვეზირი, იგიც დარბაისლურად იმეორებდა, ცხოვრებაში არაფერი არაა ისეთი, რისთვისაც თავის გაწირვა ღირდეს. ადამიანები უმადურნი და უსახურნი არიან, სამეფოები და იმპერიები იმხოა, კაცმა რაც არ უნდა აკეთოს ქვეყანაზე, ბოლოს მაინც უწმინდური აღმოჩნდება. ამიტომაც არ ღირს ხმამაღლა ყვირილი, აურზაურის ატეხვა, სულ ერთია, შენს ხმას მაინც ვერაფერს გაიგონებს. მათი არა მარტო აზრები ემთხვეოდა ერთმანეთს, არამედ მოვლენათა გარე სახის დანახვის უნარიც. როგორც კი მოვლენას გარსი შემოეცლებოდა და წონასწორობის დაკარგვის საშიშროება იქმნებოდა, მაშინვე ხელებს იბანდნენ და განზე დგებოდნენ.

საკანში ბევრი ზედმეტი, უსარგებლო ნივთი იყო, მაგრამ მათი გადაყრა ან გაჩუქება იგივე იქნებოდა, რაც ძველი დროიდან შემორჩენილი, თითქმის ისტორიულ ძეგლად ქცეული საკურთხევლის დანგრევა. ამიტომაც არ უხლია ხელი არაფრისათვის. მძარცველები ხვალამდე თავს შეიკავებდნენ, ბნელ ზრახვებს ამოეთარებოდნენ, ხვალ კი საკურთხეველს დაანგრევდნენ, ყველაფერს დაიტაცებდნენ და თითო-თითოდ გაპ-

ყიდნენ. მის ნივთებს სხვა ფასი დაედებოდა, მისი ჩვრები სხვა საზომით გაიზომებოდა. შაპი გაგულუხვდებოდა, ყველფერს სხვებს გადუყრიდა, მხოლოდ მის ცხედარს არ დაანებებდა არავის.

სამი თვე გავიდა მას შემდეგ, რაც ხალარხანმა ხელი დაიბანა და ძველ ციხე-დარბაზს გაეცალა. ამ ხნის მანძილზე საკანში არავინ შემოსულა ისეთი, ვის მზერაშიც მისი გარე სახე აირეკლებოდა. ნივთთა სამყარო დროს მხარს უბამდა, ირგვლივ ერთყმოდა, განძრევის საშუალებას არ აძლევდა. სამი თვე ელოდა წამებას, სიკვდილს და ბოლოს მის წინაშე აღმოჩნდა. იმამ-ყული-ხანმა მობრძანება არ იკადრა, მელიქი გამოგზავნა, მას დაავალა განაჩენის სისრულეში მოყვანა. ქარი სარკმელს აწვალებდა, ჰაერი ღრუბლის სისქეს იძენდა, დაბლა ეშვებოდა. სიტყვები გახურებულ ლურსმნებივით იფანტებოდა საკანში. ერთხანს ვერაფერს ხედავდა, სივრცე შემოდგომის ნისლივით მღვრიე იყო, მაგრამ შემდეგ უკან დაიხია, ხელის ფათურით ხატი მონახა და საკუთარი თავი კვლავ მოიპოვა. გონმოსულს ხმის ამოღებაც შეეძლო და კითხვებზე პასუხის გაცემაც, მაგრამ მას უკვე აღარავინ არაფერს ეკითხებოდა, მისი ბედი გადაწყვეტილი იყო.

დედოფალი სარკმელს მოსცილდა. სულისხუთვა მხოლოდ მას შემდეგ დაეწყო, რაც სუფთა ჰაერზე გასვლა აუკრძალეს, სანთლის სუნი დამყაყდა, ისეთი სიმძაფრე შეიძინა, თითქოს იხრწნებოდა. ბოლო დროს მუხლებმაც უღალატეს, საკანში სიარული უჭირდა. მოპირდაპირე კედელზე სპარსეთში გადმოხვეწილი ქართველი მხატვრის მიერ ნაჩუქარი სურათი ეკიდა. ხის შეფოთილი ტოტი, ყელმოდერებული ბუღბუღი და ცისფერი ფონი ზუსტად ისეთი იყო, როგორიც თვალს ახსოვ-

და, მაგრამ სიხალისე და მომხიბვლელობა დაეკარგა. ხალხი ის, რასაც ახლა გამოხატავდა, გარემოსთან შეგუებული სიგნის თვისება უფრო იყო, ვიდრე თანდაყოლილი სიცოცხლისუნარიანობა.

დედოფალი ფარდაგადაფარებულ ტახტზე წამოწვა და მზერა ჰერს მიაპყრო. არ ეგონა ლოდინი თუ ასე გააწვალებდა, წარმოდგენით გამოწვეული ტკივილი თუ ყველა სხვა ტკივილს დაავიწყებდა. კახეთიდან წამოყვანილი მოძღვარის, პნთიმოზ ბერის წამებას იძულებით დაასწრეს. ჯალათებმა ჯუბები გაიხადეს, ცეცხლი დაანთეს, ჩანთებიდან გაზები, ბარები, შამფურები და საჭები ამოალაგეს, გულმოდგინედ გადაარჩიეს, ცეცხლში ჩაყარეს და სანამ რკინა გახურდებოდა, ანთიმოზ ბერს ხელ-ფეხი გაუკავეს. უფრო საშინელი არასოდეს არაფერი უნახავს. აწამებდნენ უდანაშაულო ადამიანს, კაცს, რომელსაც სიკეთის მეტი არაფერი დაუთესავს ამქვეყანაზე, აწამებდნენ ისე უღვთოდ, რომ ეგონა ცა ჩამოიქცეოდა, დედამიწა გადაბრუნდებოდა. მაგრამ არც ცა ჩამოიქცა და არც დედამიწა გადაბრუნდა. მხოლოდ სახლი გაიკლინთა დამწვარი ხორცის სუნით და შემზარავი გოდებით. ნაძალადევი სიკვდილი ამ არაერთხელ გადაბუგულ ქვეყანაში ისეთივე ჩვეულებრივი მოვლენა იყო, როგორც ძლიერის მიერ სუსტის დაჩაგვრა. ვაოფლიანებულმა ჯალათებმა იარაღი გაწმინდეს და ჩანთაში ჩაალაგეს. იმ დღეს ძლივს ამოიარა კიბე, ყოველ წამს ჩერდებოდა, სულის მოსათქმელად კედელს ეყრდნობოდა. ბოლოს, როგორც იქნა, მიაღწია ხატამდე, მაგრამ ლოცვა აღარ შეეძლო, დაღამებამდე მკვდარივით ეგდო იატაკზე.

ტახტზე წამოწოლილი აჩრდილი შეტოკდა. ტყვეობამ, ოთხ კედელს შორის გამოკეტვამ სიცოცხლის მძლავრი დინე-


ბა შეასუსტა, მოადუნა. სისხლძარღვებში შხამი და ნალექი დაგროვდა. რამდენი ხანია, რაც ცვარით ფეხი არ დაუსველებია, მთებისთვის თვალი არ შეუვლია. მისი კანი ისე გათხელდა, რომ ძვლებზე გადაკრულ სიფრიფანა ქალაღს ჰგავდა; რომლის დაფხრეწა ჯალათებს არ გაუჭირდებოდათ. ლოცვით დალილს ზოგჯერ ისეთი გრძნობა ჰქონდა, თითქოს ცხოვრებიდან თავისთავად ამოიშლებოდა, ამოირეცხებოდა. აღარ დასჭირდებოდა უაზრო კითხვებზე პასუხის გაცემა, ნებისყოფის დაძაბვა, ყვირილი, ბედის გმობა. დროსა და სივრცეს შეუმჩნევლად დაუძვრებოდა ხელიდან, ბნელში გაუჩინარდებოდა, უზომო მწუხარებას ბალახსა და ხის ფოთლებს შეატოვებდა.

დედოფალმა რამდენიმე სიტყვა ჩურჩულით წარმოთქვა, შემდეგ კიდევ ერთხელ გაიმეორა, მაგრამ საჭირო აზრის გამოხატვა მაინც ვერ შეძლო. დაგორებული ღამის ჩუმი ნაბიჯები აბრუებდა, განზე გამდგარი სამყარო არაფრის დასაკუთრების უფლებას არ აძლევდა. მას კი უდიდესი სურვილი ჰქონდა შვილიშვილებისათვის თავზე ხელი გადაესვა, ერთხელ კიდევ გაეგონა მათი წკრიალა ხმა, დაეკოცნა პატარა ლევანი, ისე ჩაეკრა გულში, რომ ველარავის მოგლიჯა მკერდიდან. მათი პერანგები, ჩოხები და ახალუნები ახლაც სკივრში ჰქონდა ჩაკეტილი. როცა სევდა ყოველმხრივ შემოაწვებოდა, სკივრიდან ტანსაცმელს ამოალაგებდა, წინ დაიწყობდა და ისე დაჰყურებდა, თითქოს შვილიშვილებმა მთელი ამქვეყნიური სიტბო და სინათლე თან წაიღეს, დედამიწა ბნელში დატოვეს.

გვერდით რომ მოძღვარი, ერთი ჩია ბერი ან მღვდელი ჰყოლოდა, ლოდინი ასე არ გაუჭირდებოდა, მაგრამ სასულიერო პირს მასთან შესვლის უფლება არ ჰქონდა. თვით მღვდლე-

ბიცი დაშინებულნი იყვნენ. ვერც ერთი მისი მოძღვარი ვერ გადაურჩა წამებას. სპარსელები მის სიმტკიცეს მათ ზეგავლენას აწერდნენ. ანთიმოზის შემდეგ ბასილიანელი ბერი აწამეს, ბასილიანელი ბერის შემდეგ იყალთოელი დიმიტრი. ახლა ამ ძველ ციხე-დარბაზში გიორგის, იმერელ მღვდელს ეძინა, მაგრამ სპარსელებს იგი მოწმედ უფრო სჭირდებოდათ, ვიდრე მის სულიერ მამად. თუმცა ხვალ გიორგი მღვდელიც და მოხლეებიც მას უნდა გაემხნევებინა, რადგან ასეთი განსაცდელისათვის ისინი მზად არ იყვნენ.

დედოფალმა თავქვეშ ხელი ამოიღო. საკმარისი იყო გვერდზე გადაბრუნებულიყო ან პირქვე დამხობილიყო და სივრცე გამხმარ ხურმასავით დაპატარავდებოდა, უძირო ორმოდ იქცეოდა, ჭაზე უფრო ვიწრო ორმოდ, სადაც არც ტიხრები იქნებოდა, არც გზის მაჩვენებელი ნიშნები და არც დღე და ღამე. მიუხედავად ამისა, ეს ვიწრო ორმო წარსულსაც დაიტევდა, ხვალინდელ დღეზე ფიქრსაც და მთელ საქართველოსაც. ყველაფერი, რაც აუტანელის ატანას უადვილებდა, იმ ქვეყანასთან იყო დაკავშირებული, სადაც ფეხი აიდგა, გათხოვდა, დაქვრივდა. თუმცა ახალგაზრდობა იქაც გამწარებული ჰქონდა. ქმარი პირველად იმ დღეს ნახა, როცა ჯვარი დასწერეს. დავითი ამაყი, წინდაუხედავი, სულწასული კაცი იყო. ლოდინს, განსჯას, საქმის გონივრულად მოგვარებას ცხენზე ამხედრება და იმის ძალით დასაკუთრება ერჩია, რასაც ნებით არ აძლევდნენ. განრისხებულს არც თავი ახსოვდა და არც მახლობლები. რჩევა, კეთილი სიტყვა აღიზიანებდა, აჯიუტებდა. ერთხელ ისე გაცოფდა, რომ მათრახიც კი მოუქნია. არაბული ანდაზა ამბობს, მეფეთა შორის ნათესაობა არ არსებობსო, მაგრამ მამის ტახტიდან ჩამოგდება და ძმის დილეგში



ჩასმა არა მარტო დანაშაული იყო, არამედ საკუთარი თავისა და ღვთის გმობაც. აქი დასაჯა კიდეც ღმერთმა. ტახტზე ასვლის შემდეგ რალაც უცნაურად შენა შეეყარა და ექვეს თვეში გაათავა. მისი მრისხანე სახის ნაკვთები პირველად მხოლოდ მას შემდეგ დარბილდა, როცა მიხვდა, რომ საამქვეყნო არ იყო. მამამ მომაკვდავი შვილის ნახვა არ ისურვა. მეფე ისე დაასაფლავეს, როგორც კაცის მკვლეელი. მას რომ მაშინ ტახტიდან მამა არ ჩამოეგდო და ძმა ციხეში არ ჩაესვა, თეიმურაზს შაჰის კარზე გახიზვნა არ დასჭირდებოდა. ობლად დარჩენილს სხვაგვარად აღზრდიდა, უცხო გავლენას აარიდებდა.

თავქვეშ ამოდებული ხელი გაითელა, დაუბუჟდა. ადგილიდან დაძრული ჩრდილი გვერდზე გადაქანდა. ერთხანს აზრი თავისივე ანარეკლს ეფარებოდა, შემდეგ კი ჩამოყალიბდა, გამოიკვეთა. შაჰ-აბასი მხოლოდ მაშინ ანთხევდა პირიდან შხამს, როცა მის სათაყვანებელ კერპს საფრთხე ემუქრებოდა. ეტყობა, ქართველები გამოფხიზლდნენ, დაინახეს, რომ ყველა გზა მოჭრილი აქვთ. გამძვინვარებულ ლომთან შებმა კი მხოლოდ გზამოჭრილს შეუძლია. ამიტომაც აჩქარდა მტარვალი. ჯერ ლუარსაბი მოახრჩო აქვე, ამ ქალაქში, ახლა კი მას უშზადებდა გახურებული რკინის სარეცელს. ასე პირდაპირ, ასე ჭიჭურად ისინი არასოდეს შეხვედრიან ერთმანეთს. ახლა არც უკან დახევა შეიძლებოდა და არც განაჩენის გადავადება. მათი დავა სიკვდილს უნდა გადაეწყვიტა. მართალია, მას თითქმის არაფერი გააჩნდა, შაჰს კი ჯალათების მთელი ზროვა ჰყავდა, მაგრამ ასეთ ბრძოლაში წინასწარ არავინ იცის, ვინ გაიმარჯვებს — ის, ვინც ჯვარი იტვირთა, თუ ის, ვინც ჯვარცმა მოიგონა. შეიძლება იგი ქვეშეცნეულად ისწრაფოდა კიდეც

სიკვდილისაკენ, ცოცხალი ვერავის ველარაფერს არგებდა, მკვდარს კი შეეძლო მცირედი სამსახური კიდევ გაეწია საქართველოსათვის.

სიცივე ჯერ წელში იგრძნო, შემდეგ კი მთელ სხეულს მოედო. დედოფალი აკანკალდა. სხეულში დაგუბებული მწუხარება თრთოდა, თვალის გუგებს აწვებოდა, ცრემლს თხოულობდა, მაგრამ მისი სხეული იძენად გამომშრალი იყო, რომ დათხრილი თვალებიდანაც კი არაფერი გადმოდინებოდა. მწარე სითხე გულს ძმარავდა, ყელში აწვებოდა. ქვეყანასთან მას უკვე აღარაფერი აკავშირებდა, ლოდინი ფოთოლივით ჭკნებოდა, მაგრამ თვალს არც შუქი აკლდებოდა და არც უმიზნო ხეტიალს იშლიდა. ედებოდა ყველაფერს, რასაც კი წვდებოდა, დრო რითიმე უნდა ამოევისო, ამოევისო სწრაფად, სულმოუთქმელად, თორემ სხვა უარესი ამოავსებდა.

ტახტზე ჩამომჯდარმა სული ცოტათი მოითქვა, მაგრამ როცა ფეხზე წამოდგომა სცადა, ტკივილმა იმატა. ტკიოდა წელი, გვერდები, ბეჭები ტკიოდა ისე, თითქოს გახურებულ ლურსმნებზე იწვა. გათოშილი სამყარო ამოძრავდა, წისქვილის ბორბალივით დატრიალდა. აენტო კოცონი, ალაპლაპდა გაოფლიანებული კანი, გაქვეადნენ გაფითრებული სახეები. მის შიგნით ვიღაც თავგამოდებით იძახდა არა, არა, არაო და ეს ძახილი ისე იძირებოდა სიცარიელეში, როგორც ჭაში ჩავარდნილი ქვა. სხეულზე ჯერ არც ნაჭრილობევი აჩნდა და არც სიღამწერის ნიშნები, მაგრამ მან უკვე იცოდა, რომ ამგვარ ტკივილს დიდ ხანს ვერ გატძლებდა, ჯალათებს ხელში შემოაკვდებოდა.

აჩრდილი გმინავდა, დაბუყებულ ხელებს ისრესდა, წამოდგომა ისე უნდოდა, როგორც დროის შეჩერება, დღეთა

აღრევა. ცრემლი რომ ჰქონოდა, გულს მაინც მოიძებდა, ვა-  
დახრუკულ მინდვრებს დააღობდა, მაგრამ იგი უკვე იმ სამ-  
ყაროს ეკუთვნოდა, სადაც ადამიანის სისუსტეს არავითარ ან-  
გარიშს არ უწევენ. ღამე, გამუქებული ჩრდილები და საკანში  
ვამეფებული მღუმარება ერთმანეთს ერწყმოდა. თავის მოკვ-  
ლას როგორმე მოახერხებდა, დანასაც იშოვიდა და შხამსაც,  
მაგრამ თვითმკვლელობაზე ფიქრს იმ დღიდანვე მოეშვა, რო-  
ცა მიხვდა, რომ წამებას გაუძლებდა, ფეხქვეშ არავის გაეგე-  
ბოდა.

ღედოფალმა თავს ძალა დაატანა და ფეხზე წამოდგა. სა-  
კანში ჯარისკაცის ხმამაღალი შეძახილი შემოიჭრა. ბედი დიდ-  
ხანს უმზადებდა განსაცდელს, მაგრამ გუშინდლამდე ეს მხო-  
ლოდ ვარაუდი იყო, გუშინს აქეთ კი სინამდვილედ იქცა. რა  
ჩჩებოდა ჯანგატეხილს ამქვეყნად — ერთადერთი შვილი და  
კეთილი სახელი. შვილი შორს იყო, ვერც იხსნიდა, ვერც  
ლაიტირებდა, კეთილი სახელი კი უმძიმეს მსხვერპლს, სიცო-  
ცხლის დათმობას მოითხოვდა. სიცოცხლის დათმობაზე ფიქრს  
დიდი ხანია შეეჩვია, მაგრამ შვილის დარდი საფლავში მიყვე-  
ბოდა. არ ჰქონდა იმის იმედი, რომ თეიმურაზი ცხოვრებას  
და განადგურებული სამეფოს აბურდულ-დაბურდულ საქმე-  
ებს თავს გაართმევდა, ქვეყანას მოალონიერებდა. ნიჭი, ვაჟკა-  
ცობა და თვალტანადრბა არ აკლდა, მაგრამ საქმის ბოლომდე  
მიყვანის მოსალოდნელი შედეგების გათვალისწინების უნარი  
არ ჰქონდა. მის არსებაში რამდენიმე პიროვნება ცხოვრობ-  
და — მეფე, პოეტი და რაინდი. ერთის მხრივ სახელმწიფოს  
ბედის მკვდელი, მეორეს მხრივ კი უღარდელი მოქეიფე, ხელ-  
მარჯვე მონადირე და თავდაჯერებული მოშაირე. სწორედ ეს  
გაორება იყო მისი და მისი ქვეყნის უბედურების მიზეზი.



თეიმურაზს არ ესმოდა, რომ რაინდობის დრო წავიდა, ხალხები სამკვდრო-სასიცოცხლოდ დაუპირისპირდნენ ერთმანეთს. ასეთ ბრძოლაში კი ყურადღების მცირედი მოდუნება, გრძობებს აყოლა, მიუტევებელ დანაშაულს ნიშნავს. შამყანას სწორედ იმიტომ განდიდდა და გაძლიერდა, რომ ძველ ადათ-წესებს ზურგი შეაქცია, ყველაფერი სახელმწიფოს ინტერესებს დაუმორჩილა. ქართველების ხელით მან დაუმარცხებელი მტრები დაამარცხა, ქართველებმა კი მისგან თავის დაცვა ვერ მოახერხეს. თეიმურაზის გარდაქმნის, დადინჯების იმედი არ ჰქონდა, მაგრამ ერთი რამ მტკიცედ სწამდა. მისი შვილი თავის ხალხსა და ღმერთს არ უღალატებდა, შაჰის ყურმოჭრილი მონა არ გახდებოდა.

დედოფალმა საკანს თვალი მოავლო. ყოველი ნივთი თავის ადგილას იდგა, მაგრამ ქვეყანა მაინც დაფერდებული ეჩვენებოდა. დრო წინ მიიწევდა, სანთლებს ალღობდა, საკანში არა-ამქვეყნიურ სუნს ავრცელებდა. წვალებით მოპოვებული თავისუფლება მხარში ედგა, მაგრამ სიცარიელეს მაინც ვერ ავსებდა. თუმცა ახლა მისთვის სულ ერთი იყო, როგორი დილა გათენდებოდა, რას ამოავსებდა და რას არა. ცეცხლი დასწვავდა ტკივილს, კრუნჩხვებს, ღამეულ მოჩვენებებს და არა იმას, რისთვისაც ამქვეყნად ცხოვრობდა, სულს იმწარებდა. გადაწყვეტილების მიღება ადვილი არ იყო, შიში გულ-ღვიძლს უღრღნიდა, მაგრამ რაც უფრო უძლურდებოდა სხეული, მით უფრო ემატებოდა ძალა, ბოლო დროს კი მთელი მისი არსება ისე ამბობდა, რომ დასათრგუნავად ჯალათებს უხმეს. ახლა მას მხოლოდ საკუთარი სიკვდილი უნდა განეცადა, განეცადა წინასწარ, მანამდე, სანამ სული ამოხდებოდა, შეგდეგ კი აღარაფერი ეკითხებოდა.

დედოფალმა სარკმელი გამოადო. ცა მოწმენდილიყო, გა-  
ნაცრისფერებულებიყო. ვარდის სუნს სიმძაფრე დაეკარგა. სა-  
კანი თანდათან ვიწროვდებოდა, სქელი კედლები გასრფნით  
ემუქრებოდა. არაფრით არ ეგონა ამდენის ატანას თუ შეძ-  
ლებდა, მაგრამ როცა მთელი ამქვეყნიური სისასტიკე დაუპი-  
რისპირეს, მიხვდა, რომ მეტსაც აიტანდა, ცხოვრების ჩრდილ-  
ში გახვეულ ნათელს გასათელავად არავის დაანებებდა.

საფარდინის მეჩეთის ცადაწვდილი მინარეთიდან მუეძი-  
ნის გამყივანი ხმა მოისმა. ეს ხმა წლების მანძილზე ესმოდა,  
მაგრამ ვერაფრით ვერ შეეჩვია, განთიადს ვერ დაუკავშირა.  
ქვეყანა მძიმედ, ნამთვრალევივით იღვიძებდა, ნამუსრევით წა-  
ბილწულ კალთას მოათრევდა. ტკიოდა მარცხენა ხელი, მთე-  
ლი მარცხენა მხარე. „ლა ილაპ ილა ლაპ, ლა ილაპ ილაპ, ლა  
ილაპ ილა ლაპ“, ესმოდა ზევიდან და ეს უცხო სიტყვები ისე  
სცემდა თავ-პირში, როგორც ციდან მოწყვეტილი ქვები. სმე-  
ნის დაძაბვა, გამახვილება მხოლოდ მას შემდეგ შეამჩნია, რო-  
ცა ჩრდილები გაფერმკრთალდა. დღისით ფეხის ხმა დაწმუ-  
ლი, ბლაგვი და ცხოვრებისეულია, განთიადისას კი ცივი,  
მკვეთრი და მუქარით სავსე, სწორედ ისეთი, როგორიც დაყ-  
რუებულ დერეფანს შეეფერება.

გარიყრაყს სუნთქვაშეკრული ქვეყნისათვის ნათელი მოპ-  
ქონდა, მისთვის კი წამება და სიკვდილი. გონებას უჭირდა  
დაუჯერებელის დაჯერება, მწუხარებისა და სიბნელის ცეცხ-  
ლითა და ოფლის სუნით შეცვლა. მღუმარება ყელში ხელს  
უჭერდა, დახრჩობას უპირებდა. ლოდინით წელში გატეხილმა  
ხატთან მისვლა კი შეძლო, მაგრამ ველარ დაიჩოქა, ბაგე ვერ  
გახსნა. მისთვის უკვე ყოფა, სიტყვა, გამოკვეთილი ხატოვა-  
ნება და ბუნდოვანი ნიშნები გადაარეცხილი იყო, ამოიწურა.

ჩივილი, იმედი, ლოცვა, დარჩა მხოლოდ გაქვავებული მღუ-  
მარება და სხეულიდან ამოწვდილი, მრწამსს ჩაბღაუბებული  
სული.

უეცრად მღუმარება მეხნაკრავ ხესავით გაიბო, აფეთქდა.  
დაყრუებულ დერეფანში ფეხის ხმა გაისმა. მოაბიჯებდა ძა-  
ლადობა, სულის ამომხდელი ტკივილი, მოაბიჯებდა ისე უკმე-  
ხად, რომ განთიადი უკან იხევდა, ფითრდებოდა. მკვეთრი,  
შემზარავი ბგერები ჯერ ტვინს დაეპატრონა, უმოწყალოდ  
კორტინდა, შემდეგ კი მთელი ძალით დააწვა მხრებზე და წა-  
აქცია. გათელილი, ნაგვემი სხეული მჩვარივით ეგდო კუთხე-  
ში. ჭერი და კედლები ირყეოდა, ღია სარკმლიდან დღის სი-  
ნათლემ იღვრებოდა. მოკუნტულ, ერთ მუჭად შეკრულ სხე-  
ულს არაფრის გაგონება, არავის დანახვა არ უნდოდა — ეში-  
ნოდა ცეცხლის, რკინის, სიკვდილის, მაგრამ სული არ ცხრე-  
ბოდა, არ დრკებოდა და უეცრად შადრევანივით ამოიფრქვა,  
შედედებული სივრცე გააბო, სვეტად აღიმართა. მის აღმა  
სვლას ვერც მძიმე ნაბიჯების ხმა აბრკოლებდა და ვერც ჭე-  
რი აკვებდა. ეტანებოდა სამყაროს უსასრულო დერეფნებს,  
ცას და სინათლეს, რწმენასა და სიცხადეს, ნაგვემ სხეულს  
ისეთი ძალით ეწეოდა მალა, რომ თვალის დახამხამებაში  
ფეხზე წამოაყენა. გამაწამებელი ღამის ნარჩენები დღის სი-  
ნათლემ გაფანტა, დაფერდებული ქვეყანა გასწორდა, ხოლო  
როცა ჯალათებმა კარი შემოიღეს, სულის მეტი მას უკვე აღა-  
რაფერი გააჩნდა.

## ს ა რ ა ქ ი

შეამბოვნენი	_____	5
დაღამება ამა სოფლისა	_____	151
და განიხილეს სამოხელი მისი	_____	188

36

0289/  
1331



Магулариа Гиви Ноевич

**Повстанцы**

(На грузинском языке)

Детюниздат Грузинской ССР

«Накадули», Тбилиси, 1973

რედაქტორი ნ. ჩირაძე, მხატვარი გ. ქლიბაძე, მხატვრული რედაქტორი შ. დოლიძე, ტექნიკური რედაქტორი ლ. ქვარცხავა, კონტროლიორ-კორექტორი ლ. სულთანიშვილი, კორექტორი ბ. შალვაშვილი, გამომშვები ი. ხაჩიძე.

გადაეცა ასაწყობად 26/111-73 წ., ხელმოწერილია დასაბეჭდად 1/VIII-73 წ.; ანაწყობის ზომა 5,5x7; ქაღალდის ზომა 70x108<sup>1</sup>/<sub>32</sub>; ნაბეჭდი თაბახი 9,62; სააღრიცხვო-საგამომცემლო თაბახი 8,36; ტირაჟი 20 000; უე. 01111; შეკვ № 1294.  
ფასი 25 კობ.

გამომცემლობა „ნაკადული“, მარჯანიშვილის ქ. № 5  
Издательство «Накадули», ул. Марджанишвили, 5  
საქართველოს სსრ მინისტრთა საბჭოს გამომცემლობათა, პოლიგრაფიისა და წიგნის ვაჭრობის საქმეთა სახელმწიფო კომიტეტის სტამბა № 2, „ნაკადული“, ფურცელაძის ქ. № 5

Типография № 2, «Накадули», Государственного Комитета Совета Министров Грузинской ССР по делам издательства, полиграфии и книжной торговли, Тбилиси, ул. Пурцеладзе № 5

